


Ovras da  
**Pader Baseli  
Berther**

**1858 – 1931**

**Tom I  
Tujetsch**

Ediziun 2007  
Forum cultural Tujetsch



**Ovras da**  
**Pader Baseli Berther**  
**1858–1931**

**Tom I**  
**Tujetsch**

## **Engraziamenti**

Nus engraziein en emprema lingia alla vischnaunca da Tujetsch per lur grondius sustegn finanzial. Plinavon engraziein nus a pliras instituziuns per lur contribuziuns. Numerusas vischinas e vischins da nossa val, sco era biars d'ordvart han susteniu finanzialmein l'ediziun. Ad els tuts ensemen grond engraziament pil sustegn e renconuschientscha da nossa lavur.

Scolast secundar Leci Jacomet (1927–2007), Sedrun, ha repasau l'entira ovra da pader Baseli Berther, fatg las correcturas, dau buns cussegls e motivau nus alla edizion dallas lavurs da pader Baseli. Ad el seigi engraziau. Plinavon ha scolast Vinzens Pally, Rueras, fatg il lectorat e curregiu. Bien engraziamenti persuenter.

Bruno Berther, Rueras, ei segidaus cun las fotografias. Ultra da tuttas fotografias ellas ediziuns originalas da pader Baseli, havein nus completau cun ulteriuras fotos da nossa val.

## **Remarca redacziunala**

Il lungatg da pader Baseli fuva quel dall'entschatta dil 20 avel tschentaner. Nus vein adattau sias lavurs alla ortografia actuala. Sapientivamein havein nus pil pli schau bia da sias expressiuns tipicas da gliez temps, per part era expressiuns tuatschinas, per buca sfalsificar sia viarva. Era il patua da Tujetsch havein laschau leu, nua ch'el ha duvrau quel en sias ovras.

## Cuntegn

|   |      |     |
|---|------|-----|
| Al lectur/ra .....                                    | pag. | 5   |
| In plaid sin via .....                                | pag. | 6   |
| Il pader, cronist e historiograf .....                | pag. | 9   |
|   |      |     |
| Sas era nua Giuv ei? .....                            | pag. | 11  |
| (cumpariu 1896 en Crestomazia tom I)                  |      |     |
| Sin Cadruvi (cumpariu 1904) .....                     | pag. | 22  |
| Selva avon 100 onns (cumpariu 1909) .....             | pag. | 39  |
| A Camischolas (cumpariu 1917) .....                   | pag. | 71  |
|   |      |     |
| Baselgias, capluttas e spiritualessen en Tujetsch ... | pag. | 91  |
| (cumpariu 1924)                                       |      |     |
| Baselgia da Sedrun .....                              | pag. | 92  |
| Baselgia da Rueras .....                              | pag. | 98  |
| Baselgia da Selva .....                               | pag. | 102 |
| Capluttas .....                                       | pag. | 103 |
| Sontgets .....  | pag. | 109 |
| Spirituals nativs da Tujetsch .....                   | pag. | 111 |
|   |      |     |
| La sera da pustretsch .....                           | pag. | 132 |
| (cumpariu el Glogn annada 9, 1935)                    |      |     |
| Suenter viaspas .....                                 | pag. | 141 |
| (cumpariu el Glogn annada 11, 1937)                   |      |     |
| A S. Giachen (cumpariu en Tschespet 23/1943) ...      | pag. | 156 |
|   |      |     |
| Disgrazias – Rueras – La Val Tujetsch .....           | pag. | 160 |
| (treis manuscrets buca terminai e cumpari)            |      |     |
| Disgrazias .....                                      | pag. | 160 |
| Rueras .....  | pag. | 162 |
| La Val Tujetsch .....                                 | pag. | 163 |
|   |      |     |
| Notizias da Tujetsch (Rimnada da notizias) .....      | pag. | 166 |
| Notizias generalas .....                              | pag. | 166 |
| Notizias historicas .....                             | pag. | 175 |
| Emigraziun .....                                      | pag. | 179 |
| La pleiv da Tujetsch .....                            | pag. | 181 |
| La Via Alpsu .....                                    | pag. | 184 |
| Disgrazias .....                                      | pag. | 187 |
| Alps da Tujetsch .....                                | pag. | 189 |

|                           |          |
|---------------------------|----------|
| Auras e malauras .....    | pag. 190 |
| Barschaments .....        | pag. 192 |
| Lavinas .....             | pag. 199 |
| L'ustonza da Rueras ..... | pag. 211 |
| Bibliografia .....        | pag. 218 |

## Al lectur e lectura

Ils 16 da matg 2007 ha il Forum cultural Tujetsch astgau festivar il pign giubileum da 10 onns existenza. Duront quei cuort temps havein nus astgau realisar numeros projects ed en special svegliar igl interess e sensibilisar la populazion per ils fatgs culturals. Cun caschun da nies giubileum edin nus igl emprem tom dallas ovras da pader Baseli Berther – numnadamein davart la historia dalla Val Tujetsch.

Nossa val e tgina dil Rein sa rasar ora ina reha historia, la quala pader Baseli Berther ha rimnau e documentau minuziusamein. La vischnaunca astga esser loscha d'ina grondiusa ovra che vegn presentada da niev. Grazia allas grondas enconuschienschas e nunstunclenteivla laver da nies archivar communal e scolast Tarcisi Hendry eis ei insumma stau pusseivel d'edir las ovras da pader Baseli Berther.

Cun las ovras da pader Baseli Berther lein nus svegliar vinavon igl interess per nossa historia locala. Sias lavurs all'entschatta dil 20avel tschentaner laian mo supponer con ascha che la veta da mintgadi era. Lavur, quitau ed oraziun accumpagnavan las grondas famiglias atras las stagiuns.

Il Forum cultural Tujetsch gauda onn per onn in grond sustegn. Cun las ovras da pader Baseli Berther lein nus renconuscher Vies sustegn. Gudi in per uras interessanta lectura e refrestgentai las enconuschienschas historicas da nossa val. Cun plascher ed engaschi lein nus cunituar cun nossas stentas. In grond Dieus paghi a tutz ch'ein segidai e segidan vinavon cun il Forum cultural Tujetsch.

Sedrun, il november 2007

Forum cultural Tujetsch

La suprastonza

## In plaid sin via

Sco negin auter cronist e historiograf ei pader Baseli Berther enconuschents alla populaziun tuatschina. Cun sias lavurs all'entschatta dil 20avel tschentaner ha el derasau simpatia ella val. El ei vegnius legius, respectaus e sustenius dalla populaziun. El ha fatg enconuschent l'interessanta historia, ha fascinau il pievel e mussau las rihiezias historicas e culturalas dalla val. Il pievel ha legiu e dau vinavon – raquintau cun deletg la historia e las historias da pader Baseli.

Las varga curonta publicaziuns da pader Baseli ein pil pli lavurs religiusas. Las autres ein per propi lavurs davart la historia dalla Val Tujetsch e Cadi. Ton ch'ins sa parter siu entir relasch litterar en treis parts: Quella sur da sia patria Tujetsch; lu ina part davart la Cadi, oravontut publicaziuns sur dalla vischnaunca da Mustér e lu la part religiosa. Il present cudisch porta la schelta dallas lavurs sur da Tujetsch.

## Sas era nua Giuv ei?

Quei ei l'emprema lavur cultur-historica, che pader Baseli ha publicau, cumparida l'emprema ga 1896 ella Crestomazia Retoromontscha, tom I, e lu el Tschespet 23/1943. Igl ei in maletg cultur-historic digl anteriu ruelaun Giuv sur Rueras al pei dil Péz Culmatsch.

## Sin Cadruvi

Reminiscenzas ord la Val Tujetsch, cun illustraziuns da Gion Disch, ei ina lavur cumparida 1904. Quella lavur cuntegn maletgs culturals cun dessegn. Aschia: Tgei che vegn paterlau sin Cadruvi la dumengia suenter messa; tgei ch'il cumpar manegia dallas fieras; dil starler grond dil Tgom; dil Gambun cun sias caultschas cuortas e cassacca blaua e da sia honorifica missiun sco pot dil sontg'iel ielas l'entira Surselva e dallas stialas da latg. «Sin Cadruvi» ei in maletg dalla fatscha da dumengias e luverdis da temps vargai.

## Selva avon 100 onns

1909. Notizias cultur-historicas ord la Val Tujetsch. In studi screts cun fin sentiment e capientscha per las cruschs e miserias d'in pievel muntagnard. Igl autur tradescha il bien cor ed il sentir cun il pievel. Igl ei ina descripziun dalla cuntrada, dalla glieud da Selva e Tschamut, da lur lavurs ed isonzas, da lur temas ed anguoschas e da prighels e sgarschurs! El caracterisescha ils differents caplons e scolasts, ils purs e lur dunnas cun lur far e demanar en casa ed en baselgia, sil funs ed en nuegl e descriva la sgarschei-vla lavina da Selva dils 12/13 da december 1808, che ha en in amen priu la veta a 25 persunas!

## A Camischolas

Anno 1917 cumpara il studi: «A Camischolas», notizias historicas ord la Val Tujetsch. Quel raquenta dalla scola da tschels onns, d'avat Gallus de Florin, dils da Zarcuns. Era ils marcadonts da stiarls ein buc emblidai ed aunc meins mistral e misterlessas.

Attenziun speciala schenghegia el denton alla caplutta da Camischolas, dedicada a s. Onna, sco era al barschament da Camischolas per la fiasta da s. Placi 1822.

## **Baselgias, capluttas e spiritualessor da Tujetsch**

La pli vasta lavour cultur-historica ha el dedicau allas «Baselgias, capluttas e spiritualessor da Tujetsch». Quella broschura ei cumparida 1924. En quella spaziosa lavour presenta pader Basel la historia dalla pleiv cun sias endisch baselgias e capluttas, ils tschun sontgets, sco era siu spiritualessor, ils spirituels indigens ed jasters, che han operau ella val sco plevons, caplons e primissaris dil 15 / 16 avel tschentaner entochen 1924.

## **A Sogn Giachen**

In tur atras il vitg da Rueras, succedius la dumengia, ils dus da settember ensemes cul guardiafiug, descrivend casas e cussadents. Quella lavour ei cumparida el Tschespet 23 / 1943.

## **Suenter visapras**

Quella lavour ei avon maun sco fragment per ina extensiua lavour davart il tschentor si chischner. Guglielm Gadola ha publicau quella lavour el Glogn cun amplificar la lavour da pader Basel ed adattau la cuntuaziun a siu lungatg.

## **La sera da pustretsch**

La lavour descriva il tagliar pustretsch ed ei in maletg dalla veta purila. Quei studi cultural en fuorma da skizza, ha Guglielm Gadola scrit sin fundament d'in fragment da pader Basel Berther sco era sin fundament dad outras notizias cultur-historicas ord la Val Tujetsch.

## **Treis manuscrets**

Senza fallir san ins titular els treis cun: Cruschs e disgrazias, Rueras e La Val Tujetsch. Treis cuortas lavurs buca terminadas ch'ein avon maun mo sco manuscrets per ina pli gronda lavour.

## **Notizias sur da Tujetsch**

Per cumpigliar sia lavurs historicas ha pader Basel rimnau en gasettas archivs e tier privats ina massada d'informaziuns sur dalla Val Tujetsch.

«La gloria dils affons ein lur perdavons!» Quei ei il motto che pader Basel ha mess all'entschatta d'ina da sias lavurs ed en quels plaids schai la finamira ch'el ha vuliu contonscher cun sias lavurs cultur-historicas. Pader Basel ha perscrutau e conservau. Sias lavurs ein da miniziosa preparaziun. Da quei plaidan tut sias notizias ch'el ha fatg e rimnau en nossa val tier la populaziun ed en archivs. Cun sias lavurs sur da Tujetsch ha el

conservau in temps ch'ei oz als pli biars nunenconuschents. Siu lungatg ei populars e capeivels ed aschia ha el contonschiu in e scadin – ton ch'el ha pia adempliu sia finamira: sensibilisar la populaziun tuatschina pil vargau e far attents sin la preziosa historia, las atgnadads dalla vallada ed ils beins culturals dalla val. El ha aviert ils egls e svegliau il sentiment pil vargau.

Possi quei patratg canticuar e prosperar vinavon en nossa val!

# Pader Baselí Berther (1858–1931)

## Il pader, scolast, scribent, cronist, historiograf e conservader

Il Dieni da pader Baselí: in uclaun cun ton sco in per casas ed entgins clavaus. Leu manischava Duri Battesta Berther (1816–1882) in pign menaschi agricol, ensemes cun sia dunna Maria Ursula naschida Schmid (1821–1898). Ella vischinanza las restonzas historicas dil Casti da Putnengia, che regordan agl avat Pieder de Putnengia e fa endamen igl origin dalla Ligia Grischa. La casa paterna schai agl ur dil stradun sul Cuolm d'Ursera. Casti, stradun, casas e clavaus – oz il Dieni tursitic – ein ligiom dil vegl e dil niev. Aschia era pader Baselí, il perscrutader dil vargau e dalla historia dalla val e lu il pader e scolast ella claustra da Mustér.


En quei idilic e muntagnard uclaun ei pader Baselí naschius ils 10 da november 1858. Da batten, ils 11 da november, pil di da sogn Martin, ha el retschiert il num Giachen Martin. El ha passentau ses giuvens onns ensemes cun ses quater fargliuns, cul frar Tumaisch (1853–1931), igl enconuschen plevon da pli tard a Surrein ed a Medel. Els onns d'affonza ha il pign Giachen Martin viu a baghegiond il stradun dall'Alpsu atras la Val Tujetsch (1860–1864). Il bab Duri Battesta e siu frar Giachen Martin s'occupavan era sco surprendiders da construcziun da vias. Els han obtenui dil Grischun e digl Uri mingtin ina sort da baghegiar, ina naven da Mustér tochen S. Brida e l'auter naven dil pass tochen al secund caraun sul vitg d'Ursera.

Suenter haver absolviu las classas primaras ha el fatg in cuors preparatoric a Mustér en claustra ed ei lu 1873 serendius a Sviz ella emprema latina sco student extern. Siu frar, Tumaisch Giusep, era da quei temps el medem collegi ella 6avla classa. Suenter la 5avla classa ei Giachen Martin serendius per in onn a Friburg, probabel per seperfecziunar el lungatg franzos. Il cuors filosofic ha el absolviu 1879/80 silla universitat dad Eichstätt, che vegneva da quei temps frequentada cun preferenza da students svizzers. 1881/82 ei il Tuatschin commember dil comité central dalla Uniun svizra da students. Denton fa el era carriera militara. Cun 23 onns eis el gia premlitinent dil battagliun 90. Igl atun 1882 ha sia brigada fatg manevers en Tujetsch.

Suenter il cuors da filosofia e la via militara haveva il student Giachen Martin da rispunder sin la impuronta damonda: Tgei clamada eleger? La risposta ha el dau cun s'annunziar el seminari da s. Leci a Cuera. Suenter dus onns da teologia ed in tierz ad Eichstätt splunta Giachen Martin vid la porta claustral a Mustér e damonda dad esser admess sco noviz e vegn retschards dalla pintga famiglia benedictina. Ils 16 da december 1884 fa frà Baselí profess ed il matg suandont vegn el ordinans sacerdot.



Il premlitinent Giachen Martin Berther



Il pader Baselí Berther

Gia sco noviz veva pader Baseli dau scola ed ussa ha ei num per da retschiert. Aunc il davos onn, 1930/31, veva el dau las uras da latin d'ina classa. 1888 pren el enta maun la prefactura.

Duront 18 onns, tochen 1906, eis el prefect dalla scola claustral! Pader Baseli era per propi conventional e benedictin. Siu confessiunal era adina bein frequentaus ed ins vesevi el bugen sin scantschala.

Da lezzas uras ha la claustra da Mustér giu ina partida distingui paders. Pader Baseli mava per vitgs ed uclauns a rimnond tut ils cudischs romontschs e funda la renconuschida Biblioteca romontscha claustral. Pader Baseli rimnava scartiras e manuscrets tut insurin. El ei staus onns e decennis l'olma dalla Biblioteca romontscha che conserva ils gronds scazis da nossa litteratura e cultura.

Sper l'immensa lavour e scola, el chor ed en biblioteca ha pader Baseli anflau uras libras per scriver tractats historiccs-culturals.

Pader Baseli ei suenter liunga malsogna morts la vigelgia da Nadal 1931. La sepultura ha giu liug ils 28 da december, nua che varga 60 persunas da Tujetsch e da quei da 30 spirituals ein stai presents. Bein in mussament da respect e renconuschienschta per la lavour da pader Baseli Berther en favur dil pievel dalla Cadi e la Romontschia.



Dieni, casa paterna

## Sas era nua Giuv ei?

Ei era in di da settember, che nus sesanflavan ella Val Tujetsch ed havein leu aunc tard encunter sera fatg ina pintga excursiun sin Giuv. Biars onns eran spirai, dapi che nus havevan visitau la davosa gada quei liug isolau. Nossa uratta, Maria Catrina Venzin, era da Giuv, e perquei havein nus aunc adina empau simpatia per quei tec tratsch leusi sin quei crest. Nus eran serendi da Rueras a Dieni, da leu a Muschnatscha e da Crusch da Giuv si. Oragiu sut la caplutta sper ils faners havein nus fatg ina pausa e mirau empau entuorn. Ins ha da cheu anora ina stupenta survesta sur l'entira Val Tujetsch, priu ora dadens gl'uaul, Selva e Tschamut. Gl'entir di ora have'vei pluui e draccau, ch'ins ha stuiu star en stiva, e beinenqual cumar haveva giu mess fiug en pegna; e buca per nuot, pertgei si dad ault er'ei bess la neiv. Denton ussa vi encunter sera er'ei puspei setratg si ed ei pareva da far bial'aura danovamein. Il sulegl mava da rendiu, l'umbriva era gleiti damaneivel dalla riva dil Tgom; ils cuolms entuorn nus purschevan in magnific aspect.

Leu ora giudem vesein nus il Muraun cun ina capetsch'alva, che para da tener guardia sur il far e demanar dils da Tujetsch. Nua che nus stein, tratgan ins, mirond encunter Mustér, ch'ins serabetschi buca pli lunsch che Garmischeras, ni sil pli entochen la Val Franzosa, essend ch'ils uauls Cavorgia e dil Bostg seuneschan leu, sco sch'els lessen serrar giu tut transit; en certa graus fuss ei enqual ga fetg surviu! – Mirein nus da maun seniester, sche crodan il Cuolm da Vi e Caschlè en egl. Ina curiosa cumparsa fa quei Cuolm da Vi cun sias spundas, pilver sco in pèr caultschas, ch'ein cuntorschadas sil pli



La Rufna cun Giuv

ault grad. Silla Pala gronda ina tarmenta scrotta, sisum Cungieri in'autra e lu sin Vons tut gagl. Tgei ei quei? Schegie ch'ils Tuatschins han giu uonn ina buna raccolta da fein, sche han els tonaton buca piars temps e puspei rimnau da tuttas varts ina massa fein a pastg; ina excellenta perdetga da lur activitat e da lur spargnar. Il fein vegn scarts uonn e lu, avon che scugliar naven ils tiers per nuot ni per pauc, lein nus segidar sco nus savein. Quei ei lur calculaziun. Jeu creiel strusch, ch'il Fistatg da Vons seigi vegnius isaus ora enzacu schi fetg sco uonn. Tscheu e leu havevan ins era serrau la faultsch pulit, ins veseva quei lunsch naven.

Il medem aspect porsch'era il Caschlè cun siu barlot da veglia memoria. Las palas da Londadusa, ch'ins veseva mo la part sisum, ils Trutgs aults, la Foppa verda, dapertut era ei vegniu raccoltau. – Grad sut la Foppa verda giu schai il mises Mila, il qual, mirond cheu encunter, leventa si beinenqual legreivla reminiscenza ord nos giuvens onns. Siu schinumnau Crap gries dess ora beinenqual buccada da metter el caffè, sch'el fuss – da zucher. En quei liug havein nus era fatg nos emprems studis el lungatg tudestg. Nus buobs havevan mintgamai in agen tschaffen, cura che in ni l'auter tudestg vegneva sul Rizli dalla Val Mila oragiu, cun sias caultschas stgir-verdas, cun in tschiep aschi cuort sco il libroc e la liunga capetscha da seida cun in hazer tingalin. Cheu devan nus bein adatg, cura che quels tschintschavan culs umens dil mises e bein gleiti savevan nus era dir: «Wo gehtnt ihr hi? Uf sant Jakob aba, süli go reicha!»

Grad sur nus si, sisum la spuretga Pulanera sesaulza ina tarmenta meidia, sco sch'ella less pertgirar en quei dartguir il spért da lavina, che ha gia fatg beinenqual ga sterment als habitonts da Rueras. – Sevulvein nus sin maun dretg, sche croda gl'emprem igl uaul Tschuppina si. La campagna, che nus havein giu fatg anno 1882 culla brigada XV da Cuera entochen Hospital ei tier nus e tier tuts da Tujetsch aunc en buna regurdient-scha. Nus seregurdein aunc bein, co nossa partida era postada en quei uaul quasi in entir di ora, spetgond sin in vehement cumbat, ferton che las mattauns da Rueras pur-tavan da beiber a nus. Ils menaders da l'autra partida han cun quella caschun giu mussau pauca enconuschiantscha dil terren dalla Val Tujetsch, e cun quei havein nus giu biala veta e spargnau la puorla. Dil rest haveva nossa battaria da muntogna, che era postada si Planatsch fatg ina bravura cun arver il fiug sigl inimitg, che bandunava tut en colonnas serradas il vitg da Sedrun. En cass dad uiara havess in tal s'avanzar digl ini-mitg giu ina tresta consequenza per el sez. Per l'emprema ga havein nus era saviu valetar la muntada dall'artigliaria da muntogna cun ses mélis, che mavan dil Calcogn enagiu schi segirs sco las cauras. Segiramein fagess la Svizra meglier, sch'ei sto inagada ton-aton esser – da tener in tec pli bia sin l'artigliaria da muntogna che sin quella da cam-pagna, che semova schi vess ella planira, nundir sin nos cuolms. Denton fuss il survetsch tier l'artigliaria da muntogna in tec pli fadigius, e lu – cun mélis ei buca tut che vul sedar giu. Basta, ussa havein e survegnin nus nossas fortezias e cheu duvrein nus ni mélis ni cavals – denton daners, stagn biars per nossa paupra Svizra.

Per Tujetsch san las fortezias dil Gottard esser d'avantatg, silmeins en certa graus. Per gl'emprem han els obtenui cun quella caschun in flot stradun naven dils cunfins ento-

chen sper las tegias dall’alp Tiarms, aschia che mintga pur sa ussa ir e vegnir cun siu carret rauba sco da durmir cun aunc haver la buna caschun da prender in refrestg: «Zur Rheinquelle». Per l’altra san ils Tuatschins haver buna speronza, che la Confederaziun metti ussa inaga neu sin siu agen quen in telegraf sur l’Alpsu, e forsa che quei pass vegn cul temps era tenius aviarts duront gl’unviern, che dess lu bia fadigias. Digl avantatg, che quellas fortezias han purtau e portien per hotels ed ustrias en nossa vallada, stu-ein nus schar tschintschar auters.

Sur igl uaul Tschuppina vi sesaulza la liunga tenda dil Tgom e Nual; giu da funs pastira da casa, per miez ora bostga e caglias, sisum treis alps: Tgom, Nual e Mut. Tenor nies manegiar fuss quella costa per miez ora in excellent terren per plantar en niev uaul. Da maun sut creschan ils pegns pli dabot ed ei dat pli biala lenna. Semenein nus cun nies egl pli alla dretga, sche pudein nus aunc grad ver sur Planatsch e Milez vi il Pez Cavradi ed il Badus, che tarlischan ella splendur dil sulegl cun lur nova neiv, sco sch’els fussen dad aur. Sil Cuolm Val havevan ei gia catschau a stavel ed ei ha num ir per nus, sche nus lein aunc mirar giu Giuv.

Strusch che nus havein fatg enzacons pass anavon, salidan nus dus robusts umens. Ei eran vid il segar risdiv, ch’era plitost cuorts, mo da ton megliera fixiun. Schegie ch’ei haveva giu pluui quasi gl’entir di ora, quels dus umens havevan tonaton luvrau tudi. Malgrad lur vestgadira bletscha eran els aunc da bien humor. E sco els havevan aunc biars luvrau leuoragiу pils plauns entuorn, bein seregrundond dils plaids ch’ins auda en Tujetsch: Gl’atun san ins buca durmir giu; da s. Mattiu, pur, pren quei ch’ei tiu, e per esser pli segirs stauscha quei ch’ei odem gl’iral entochen entadem! S. Mattiu er’ei gia l’auter di, e da quei tschupi alv pils aults entuorn sehanavan ins aunc pauc; denton ei era in’enzenna, in’admoniziun, ch’in auter signur vegni gleiti sur il Rizli.

Nies pign discuors, che nus havein menau cun quels dus umens, era sur il pagament dils tiers. Quei ei adina la questiun gronda en Tujetsch. Quei che nus havein dils tiers – auter havein nus nuot. «Uonn paia ei pauc, aber nus spetgein tochen nos Baiers vegnan; sch’enzatgi paia enzatgei, sche paian quels; dil rest vein nus da biè fain; de quora giu on ei biè mender». –

Raschun havevan ei e lur calculaziun era buca mal. Ferton che nus scrivin questas lingias ein ils prezis tonaton pli aults e cul temps vegn ei, speronza, aunc meglier, mo pazienza! «Dius pertgiri!» era lur cordial salid, ferton che nus eran gia daditg endisai mo cun bien di e buna sera.

Avon nos egls stat ussa Giuv cun sia caplutta dedicada a s. Bistgaun. Giuv dumbra ussa circa diesch baghetgs pigns ni gronds e duei esser stau tenor veglia tradiziun in dils emprems uclauns en Tujetsch, sche buca gl’emprem. Dapresent sesanfla leu negina casa pli, mo ch’ei existevi leu pli daditg in vischinadi, havein nus plirs arguments. Il num Giuv deriva dil plaid latin «jugum», che vul dir ton sco giuv, crest. En veglias scartiras anflein nus perquei aunc savens scret Juf enstagl Giuv. Era la posiziun dil liug muossa, che quei num hagi sia gesta significaziun. Sco ei vegn raquintau, era la sola dalla Val Tujetsch dad in temps in spess uaul. Pliras casas dil vitg da Rueras, sco per exempl



128 Sedrun: Motlu bei Giuv

Giuv

quellas nua che Duri Riedi, Martin Peder e Giachen Antoni Venzin stattan ussa, dueien esser baghegiadas cun lenna dils Plauns Flurin. Igl ei fetg natural, ch'ils emprems habitants hagien fatg si lur habitaziuns sin crests suleglivs, ordvart dils spess uauls, nua che da tuttas sorts animals selvadis avdavan. Tals loghens eran segiramein Giuv e Caspausa, che vegnan teni per ils emprems logs habitai en Tujetsch.

Danunder ils emprems habitants da Tujetsch ein vegni, savein nus buca dir, denton fetg probablamein sutsi e buca sur il Cuolm d'Ursera. Schebein s. Sigisbert seigi vegnius surennue ed aschia tras la Val Tujetsch ni buc, lein nus buca decider. Ei exista arisguard la vegnida da s. Sigisbert a Mustér treis ideas. Ina part pretendan, ch'el seigi vegnius sur il Cuolm d'Ursera (Crispalt), auters dian, ch'el seigi vegnius sur il Lucmagn, e puspei auters manegian, ch'el seigi vegnius sutsi, la quala pretensiun savess forsa esser la pli probabla. Cun raschuns e motivslein nus buca seschar en per oz, forsa in'autra gada.

Historicamein anflein nus igl onn 1251 notizias sur il casti da Putnengia, ord il qual la renomada schlattina Pontaningen deriva, che ha dau alla venerabla claustra a Mustér in famus avat cul num Piered ed alla Surselva il fundatur dalla Ligia Grischa. Dil num Tujetsch (Tivez) vegn ei fatg menziun pér igl onn 1300 e quei en ina scartira digl avat Nicolaus I da Mustér, nua ch'el surlai en moda da regal alla claustra da Wettingen, Cantun Aargau, ils dretgs sur ina certa brava dunna – honestam mulierem Berchtam – sco era sur ses affons. La schlattina Berther (Berchter) existeva cumpatg gia da gliez temps en la Val Tujetsch.

Sur Giuv sez havein nus, malgrad tutta breigia, anflau mo paucas notizias positivamein historicas. La davosa casa, ch'eri leu, sesanflavi en quei fieg dadens il baghetg da frars Hetz. In'autra stevi entadem, nua ch'ins va enagiu tiel flum. In ton dils mirs stattan aunc uss, sche nus sbagliein buc. Ord quella casa vegn ina certa Liberata Schmed, che steva pli tard a Rueras. Da quella femna vegn ei raquintau, ch'ins havevi mess inagada ella da pign affon avon casa en in carret d'affons, e che quei carret seigi ius cun ella dalla plauanca giu tochen giu ell'aua senza far enzatgei. Pilver, quei affon sto haver giu in bien aungel pertgirader!

Gl'onn 1805, aschia raquenta pader Placi a Spescha, stevien aunc duas casas a Giuv. Dil rest anflein nus aunc oz leu puozs, chischners e clavaus vegls cun irals, in'enzenna ch'il graun ed il glin vegnevi cultivaus e rugalaus leu. Ils trutgs, che meinan dadens Giuv videoagiu ella Rufna e da leu anenasi encounter Mulinatsch, survevan senza dubi per las cauras ed auters tiers da casa dil vischinadi. A Mulinatsch mava la pastira da casa per Giuv entochen en sco Plibiala dat neu. Fetg probabel gudeva Giuv era Liets sco pastira da casa ni sco mises, sco quei ch'ils differents trutgs, che meinan dil crest dalla Vallabuscha si, laian sminar.

Duas persunas da Giuv havein nus aunc enconuschiu, numnadamein Tschamun Decurtins e Giachen Francestg Berther, che stevan omisdus silsuenter a Rueras. Il davos era staus cavrer a Giuv e sedeva giu pli tard cul mistregn da calger. Nus savein aunc sereguardar bein da quei brav um cun siu tschiep mantschester, co el vegneva a cuser tier uns, co el metteva si siu spieghel grond la sera da cazzola. Temps d'unviern vegneva ei numnadamein aunc adina luvrau in pèr uras suenter tscheina. Quei bien vegl calger era nies vischin, e ton sco nus sereguardin haveva nossa mumma bugen quei um. Nus savein buca tralaschar da raquintar cheu in per anectadas da quei remarcabel calger. In da nos frars, che haveva in tec argien viv da pli che ordinaris buobs, era inagada cun in auter leger cumpogn si en ina pala dils praus Mila e mava da quellas palas giu, buca en costas, mobein pli en plat. Tut da rabia vegn nies bien calger tier la mumma e di: «Uardei co se quels dus, quai è dus vairs lumps! Sè quai fatg cun resti!» Tgei aura igl ei stau quella sera a casa sai jeu nuota pli. Vegneva el a cuser tier uns, sche schabegiav'ei bein enqualga, ch'el prendeva nos calzers, ch'eran matei tarschinai malamein, en ses mauns, fageva vegnir nus avon el e deva ina seriusa admoniziun: «Sè quei co puspe manau cazès! Ju sa bétga tgé gianter vus fagiais!» Il meglier fagevan ins da quescher murtgiu e lu fageva el puspei in brav pèr calzers «sullabransulla» e catschava aunc si in hazer piogn persuenter. Quei bien um e davos calger da Giuv, el rauassi en pasch!

En ina scartira digl ordinariat da Cuera digl onn 1765 vegn ei lubiu als vischins da Rueras e Giuv da metter neu ina scola per instruir la giuentetgna en leger e scriver. Il beneficiat u caplon da Rueras, che haveva da tener quella scola, retargeva sco pagaglia da min-tga fiug, hagien els affons ni buc, u ina vaulta lenna ni 20 rizzers, pressapauc 56 raps. Avon temps havein nus era giu la caschun da mirar atras in tec igl archiv dalla pleiv a Sedrun. Per tala favur havein nus, d'engraziar al present sur plevon da leu. En quellas interessantas veglias scartiras havein nus denter auter era anflau ina gliesta dad ina certa confraternitad da s. Giachen (Frates sancti Jacobi), che datescha digl onn 1616. Senza dubi ei quella confraternitad, dalla quala ins seregora dapresent pauc pli en Tujetsch, stada eregida ella baselgia da s. Giachen a Rueras, il qual liug vegneva dad in temps era numnaus semplamein a S. Giachen. Entras entginas notizias e cumbinaziuns essan nus cun quella caschun era vegni sil patratg, che Rueras pudessi haver giu gl'em-prem en Tujetsch in spiritual e che quei vegl foliant egl archiv a Sedrun, che cuntegn quei register savessi forsa esser staus cumponius e salvaus si all'entschatta a Rueras. Denton per nus ei ad interim mo quella gliesta dils confrars d'impurtonza. La confrater-

nitad sco tala era seformada gia gl'onn 1609, denton s'organisada ni privilegiada pér 1616. Denter ils commembers da gliez onn, che pudevan esser en tut circa 40, sesanflava era in schit diember ord il vischinadi da Giuv. Ils numbs ein: Gilli Jon, Genet Gilli, Jon, Jacob, Christ del Gilli, Griatta Genet, Onna Cians, Jon Reget, tuts da Giuv. Quei ei in mussament, ch'ei eri da gliez temps pliras casas a Giuv.

Cul vischinadi da Giuv sa forsa era l'alp Val Giuv esser stada all'entschatta en connexiun, silmeins sesanfla quella damaneivel e confinescha culla pastira da casa da Giuv, numnadamein Mulinatsch, Craps e Liets e porta ultra da quei era il medem num. Las alps Val Giuv e Val Val udevan, aunc en quei tschentaner, alla claustra da Mustér, e quei entochen gl'onn 1861, nua che la vischnaunca da Tujetsch ha cumprau giu ni pagau ora il tscheins fier per quellas alps per adina cun il capital da 7650.- frs. Tenor nies saver existan en fatgs da quellas duas alps aunc quater documents egl archiv da Tujetsch, ils quals nus havein entras buontad da signur president Soliva saviu mirar atras.

Gl'emprem datescha da 1597 e dilucidescha ina dispeta sur ils tscheins che la vischnaunca, respectiv ils pursanavels da quellas alps, stuevan pagar mintg'onn alla claustra. Ils pursanavels han giu declarau, ch'els sappien buca dar ton, numnadamein 5 centners caschiel grass (guot feist gesalzen Khess), ei seigi nunpusseivel. La fatschenta ei vegnida rugalada giu dil mistral regent da gliez temps Menicus Buldet. Da vart dalla claustra era cumpariu Christian Castelberg, avat, cun in advocat «L'urau von Gieriet, Seckelmeister zu Medels». En num dalla vischnaunca da Tujetsch «die ehrsamen und wisen Stadhalter Deg Durschey und Jacob Berchter alter Seckelmeister in namen deren Nachburen mit Fürsprecher Stadhalter Merens von Brigels.»

Igl ei vegniu stabiliu, ch'ils da Tujetsch hagien da pagar il tscheins cun 5 centners caschiel grass sco avon; ch'els stoppien mintgamai schar saver la claustra in di avon che la rauba vegni partida, sinaquei che la claustra sappi tarmetter in fumegl cun ina gesta stadera (mit einer grossen gerecht und gewerig Wag, die da gerecht syge). Duess ei dar difficultads, sche sappi il fumegl dalla claustra recuorer tier il salter dalla vischnaunca da Tujetsch. Il caschiel sappi la claustra encuir ora sin las crunas en tschaler da mintga tegia, stoppi denton lu ir vinavon sin quella cruna, entochen ch'ella hagi il quantum fixau.

Ord quellas notizias stuein uns concluder, ch'ei vegnevi dad in temps caschau grass en quellas duas alps; denton sco nus havein enderschiu, mo in cert temps, per aschia saver cuntentar la claustra, gl'auter temps vegnev'ei caschau magher. Dapresent vegn ei caschau magher en tuttas alps da Tujetsch. Dil pieun da «fessli» savevan ins aunc avon paucs onns nuot en Tujetsch. Tgei havessen nos vegls detg sur da quei fabricat, els che caschavan aunc grass ed havevan aschia aunc pli pauc pieun? Els tenevan pli bia sin in bien caschiel, che era grass ni che haveva aunc en enquala flur e spargnavan tons cuschinems dad ozildi. Dad in pur sin Giuv vegn ei raquintau, ch'el havevi aschi bia caschiel caura en tschaler, ch'in miradur havessi saviu far in entir di mir cun tal magnuc! Plinavon savein nus concluder, ch'il caschiel vegnevi da gliez temps salvaus si en tschalers entochen descargar dad alp. Ton sco nus savein, vegneva il caschiel da quellas duas

alps salvaus si a Rueras en quellas truaschs sper la casa da Giachen Antoni Venzin, en quella da frars Cavegn e lu en il grond tschaler dalla casa nua che Duri Riedi stat, che ha aunc ussa ina porta dubla. La rauba vegneva pertada sin bast ord las duas alps, e zuar Val Giuv vegneva dil maun da Giuv, Val da Sudada giu. Ils cavals, ch'ins duvrava leutier, stuevan haver si in bucseigl, ina specia da buccari. – Dapresent va ussa mintga pur sez ell'alp a caschar e meina ni porta lu sia rauba immediat a casa e rugalescha en siu tschaler. Signuns han ins negins pli. Biars vegnan a sesmarveglier sur tal cundrez, mo nus savein dir, che mintga caussa ha duas varts e ch'ins hagi pli daditg era giu signuns en Tujetsch. Tgei che seigi meglierlein nus schar dad in maun e mo far la damonda: Savess Tujetsch buca haver pli gronda rendita ord il latg da tontas vaccas e cauras in entir onn ora? Quasi tut pieun e caschiel vegn consumaus ella val sezza. Cun star ensemens, sil-meins ina alp cun cauras e vaccas, caschar grass e rugalar endretg, dess quel in famus product, ch'era gronds signurs schassen plascher; il transport fuss aunc buca schi lunsch entochen Caschinutta. Per tal intent savess ins schar liber in'alp, e mintga pur pudess metter en quella ina ni duas vaccas e far aschia in'emprova. Denter biaras ideas ei quei era ina, e nuslein tuttavia buca haver detg, che quei seigi la megliera.

Il secund document en caussas da quellas duas alps ei da 1804. En quel vegn ei determinau, ch'ils pursanavels hagien da dar mintg'onn sco tscheins, avon che parter la rauba, 600 crenas caschiel grass (wärschaften fetten Käs). Arisguard il pesar ora valan las medemas reglas sco sura. Cheu encounter s'oblighescha la claustra da surschar las alps vinavon, ed en cass da midadas hagien ils da Tujetsch adual adina gl'emprem dretg. Suttascrets ein en quella scartira, ch'ei puspei concepida en lungatg tudestg, da vart la claustra: Anselmus, avat, pader Basilius Veith, decan. Da vart dalla vischnaunca ils geraus: Christian Joseph Venzin, Thomas Josephus Beer ed Ulrich Venzin.

Da quei temps datescha probablamein era igl usit dalla claustra da retrer enstagl il caschiel en natura il daner persuenter e zuar 18 rizzers la crena. Ei steva denton liber alla claustra. Ils davos onns vegneva ei adina pagau ora en daner e quei il di da s. Martin dil statalter dalla vischnaunca.

Gl'onn 1861 ei vegniu fatg la convenziun, nua che Tujetsch s'oblighescha da pagar giu il tscheins fier dallas alps Val Val e Val Giuv, consistent en 600 crenas u 850 funs caschiel grass, annuala grevezia alla claustra da Mustér, cun il capital da 7650.–frs. en diversas ratas, suenter la quala liquidaziun Tujetsch seigi lu sligiaus per adina da tuttas grevezias visavi la claustra. Suttascret han: P. Martin Andreoli, administratur claustral, e da vart dalla vischnaunca ils geraus: Hans Giachen Beer, J. A. Berther e Duri Venzin.

En ina nova e davosa scartira sur quels fatgs da 1866 vegn ei stabiliu, che la vischnaunca da Tujetsch cedi da sia pretensiun sin il gentar da s. Martin. Persuenter lai la claustra anavos 2000.–frs. dil capital, sco era il restont tscheins da 100.–frs., ed aschia calan tuts dretgs e grevezias da mintga vart si. Quei gentar da s. Martin per il plevon, ils geraus e calusters, che la vischnaunca pretendeva sco per in dretg, ferton ch'ei era mo ina isonza ni abus, era vegnius si cheutras che la claustra ha giu entschiet a dar ord atgna voluntad e per creanza enzatgei gentar als cautegias da quellas duas alps; silsu-

enter ei la respectiva suprastonza vegnida vitier e pli tard tut quels ch'eran enzacu stai en uffeci da vischnaunca, aschia che la tablada dumbrava entochen 26 persunas.

Suenter haver fatg quella pintga excursiun sur las bialas alps Val Val e Val Giuv lein nus puspei turnar anavos a Giuv ed avon che prender cumiau aunc visitar sia baselgia.

Dador la baselgia stat sper il mir si ina sempla crusch da lenn, che porta il num da Jesus ed igl onn 1836. Nies cor vegn penetraus da dolur, essend che quella enzenna dil salit regorda nus vid la disgrazia, ch'ei succedida cheu la sera dalla fiasta da Nadal entras ina lavina. Quater giuvens perveseders ein vegni suten; dus da quels han aunc pudiu vegnir spindrai, mo ad in han ins stuuiu prender giu ina comba, ferton ch'ils dus auters ein daventai l'unfrenda dalla mort; denter quels sesanflava in bien aug, che steva en ses 28 onns. Tgei dolorusa nova ei quei mintgamai per geniturs e fargliuns!

Suenter haver recitau in De profundis per il ruaus da quellas olmas e rugau Niessegner, ch'el pertgiri la Val Tujetsch da talas disgrazias, essan nus serendi en baselgia.

La presenta baselgia da Giuv ei dedicada a s. Bistgaun e sa esser vegnida baghegiada aschia entuorn 1650. Fetg probabel existeva leu avon in'autra caplutta, e sin quei patratg ha il datum dil zenn menau. El pign clutger sesanfla mo in zenn. Vul ins vegnir tier quel, sche ston ins seruschnar dil tettg enasi. Quei survetsch ha in bien amitg fatg, ughegiond sias caultschas cun la resca d'aunc far in per sgreffels. Il resultat ha denton cumentau la breigia ed era la marveglia. Il zenn cun sias numerusas furclettes egl ur para gia dalunsch d'haver fatg atras dabia. Sper l'inscripziun: Sancta Maria, ora pro nobis, porta el las figuras dil crucifix, da Nossadunna e, sche nus sbagliein buc, era da s. Onna. Plinavon anflein nus il vegl datum da 1780 e sutvi la remarcabla suttascripziun dil mei-ster: «Joseph Bonifaz von Walpen von Rekigken fon Wallis.» Senza dubi ei quei zenn in dils pli vegls en Tujetsch e lu la interessanta nova ch'el vegni ord il Valleis! Quei sto esser stau in fadigius transport dil Valleis si, sur la Furca, tras la val e sur il Cuolm d'Ursera, d'in temps ch'ins saveva aunc nuot da vias. Gl'onn vargau havein nus legiu ella Gasetta Romontscha, che l'ura dalla baselgia da Rueras, che funcziunescha aunc ussa stu-pent, vegni ord il Valleis. Era il zenn grond da leu cul datum 1490 vegn probablamein dil medem liug e forsa era il zenn grond da Tschamut, che ha gronda semegliadetgna cun quel da Rueras. Il zenn grond da Selva da 1788 cun sia ruosna ed il pign da 18(2)2 portan medemamein il num dalla firma da Walpen da Reckingen ord il Valleis sura. Ei sto esser, che Tujetsch haveva dad in temps empau communicaziun cun ils Vallesans ni Vallesanas, buca mo cun schar cular zenns e bransinas, forsa era en auters fatgs.

Igl altar dalla baselgia da Giuv ha in pulit maletg, che representa enamiez Niessegner vid la crusch; da maun dretg grad sper la crusch Nossadunna e s. Bistgaun; da vart seniastra s. Roc e s. Carli Borromeus. Davon il maletg sesaulza ina bufatga scaffa da glas cun ina nova, biala statua da s. Bistgaun; pli daditg sesanflava en quella scaffa Nossadunna dallas dolurs, che vegneva venerada leu en particulara moda, sco la tabla votiva pendida si sper gl'altar muossa. Ella porta il datum 1774 e representa, co Nossadunna dallas dolurs ed ils auters sontgissims patrunz da Giuv han giu conservau in um, ch'ei ruclaus enasi Val Mala da far nitschuns, sco ei vegn raquintau.



Caplutta da s. Bistgaun a Giuv

Sin igl altar sesanflan pintgas reliquias da s. Maurus, s. Bistgaun e s. Pieder da Alcantara. La baselgia ed en particular igl altar ein fittai si pulit ed han, cun caschun che las baselgias oragiu ella vallada ein vegnidas restauradas, artau beinenqual caussa.

Ils vischins da Giuv eran il pli damaneivel dils habitants da Nurschai, che schai circa diesch minutus pli anora sillia medema spunda sulegliva. Nus havein mo la tradiziun che di, ch'ei eri dad in temps leu ina ni duas casas. Ils vegls ed isai trutgs, che meinan dil Crest Nurschai si e semeinan dil Rieven ault orasi tochen gl'Uaul Liets, laian sminar, che quels survevien per la biestga dils habitants da leu. Cura ch'igl ei sesbuau giu leu e sefermau il Rieven ault e las Budas, savein nus buca dir, scadin cass fetg baul.

La pietad ed igl engraziament stimuleschan nus dad aunc raquintar per conclusiun enzatgei ord las ruinas da Giuv. Ti eis forsa gia ius atras Tujetsch ina sonda, temps da stad ed has forsa viu in di dalla pli gronda bialaura, co ils habitants vegnan malgrad fuola da fenar en duas liungas processiuns, cantond e recitond il s. rusari, encunter la biala caplutta da Zarcuns. Quei ei ina veglia isonza, che generaziuns e generaziuns han observau e la quala ha purtau gronda benedicziun ella vallada. Ella deriva da Giuv e la tradiziun raquenta sco suonda.

A Giuv viveva dad in temps in pietus e sogn um cul num Gionet (Janet). Schegie buca versaus en sciencias mundanas era el ton meglier enconuschents cun la veta dils sogns ed exercitava en particulara moda la pietusadad. Sia speciala oraziun era il paternies. El meditava il cuntegn da quel cul spért ed entrava aschia ellas grondas verdads dall'oraziun, ch'il Segner ha sez mussau. El haveva da dir in paternies naven da Giuv entochen Zarcuns, ina mesa ura lunsch. Probablamein mava el dalla senda, che meina aunc ussa

tras Budas, Cascharolas, Flurin e Zarcuns. Quei era la via da bara dils da Giuv e forsa l'emprema via tras la vallada. Ferton che Gonet mava inagada aschia meditond e recitond il paternies, ei Nossadunna cumparida ad el en quei liug, nua che la baselgia da Zarcuns stat dapresent ed ha fatg da saver ad el, che sch'ils habitonts da Tujetsch veglien prender si da sanctificar la sonda cun far ina processiun en quei liug, sche vegni ella far madirar il graun. La caplutta da Zarcuns seigi sin quei vegnida baghegiada da Gonet da Giuv.

Vas ti inagada tras la biala vallada e sper il vitg da Zarcuns ora, pren la breigia e viseita quella tgeua caplutta; salida Nossadunna cun in pietus ave; mira lu si encunter igl arviul e ti vesas leu il maletg da quei eveniment, co Nossadunna ei cumparida a Gonet che stat leu enschanuglias. Vid il mir sas ti leger ina inscripziun latina cul suandonc cuntregn romontsch:

«Miraculus ei il Segner en ses sogns (Psalm 67, 36). Mo aunc bia pli miraculus eis el enten la beatissima purschala Maria, regina da tutz ils sogns e mumma da siu s. Fegl, la quala el ha dau a nus Tuatschins en particulara moda per mussadura e protectura, sco ella sezza ha mussau cun cumparer miraculusamein cheu en quest liug ad in cert Gonet da Giuv gl'onn 1622 ils 8 da schaner. Quei vegn mussau si entras scartiras, entras la tradiziun ed il present maletg e vegn era cartiu sontgamein.»

D.O.M.

En in cantun dil maletg stattan ils plaids: «Bartolome, Broder de Castelberg ha fatg questa pittura 1763.»

Sco igl ei vegniu detg a nus, sche duevien respectivas scartiras sur da quei sogn um sesanflar pli daditg egl archiv dalla vischernaunca ed el seigi satraus el santeri a Sedrun sut la porta pintga. A Selva, nua ch'ins fageva, avon che la baselgia a Sutcrestas vegni baghegiada, la processiun dalla sonda mintga ga a Tschamut, vegneva ei fatg mintga ga ina oraziun en memoria da Gonet da Giuv.

Ei fa in'atgna impressiun, cura ch'ins vesa quasi l'entira vischernaunca rimnada mintga sonda naven da dumengia dil scapulier entochen dumengia dil rusari cheu avon il vut da Nossadunna, udend sias oraziuns, ses suspirs e ses giavischs cun il sacrifici dil sacerdot. L'impressiun segondescha, cura ch'ins auda il bi cant popular, las sonoras vuschs accum-pagnadas cun ils migeivels suns d'in'orgletta. Cheu san ins aunc tedlar las bialas canzuns romontschas religiusas, en particular quellas ch'il meriteivel pader Beat Ludescher ha giu cumponiu per nies pievel romontsch, quei um che ha operau aschi bia ga cun ses divers cudsichs da scola, sia ductrina ed en particular entras siu cudsich da devoziuns. Ed alla fin dil survetsch divin, cheu resuna aunc sco davos salid digl entir pievel il «Salve Regina». Pign e grond, giuven e vegl mira aunc ina ga si tier Nossadunna, salida ella e serecamonda puspei en ses sogns mauns per l'entira jamna. E puspei audan ins ils suspirs ord la litania da Nossadunna, las ramurontas vuschs, che reciteschan il s. rusari, e mintga processiun seretila puspei encunter Sedrun e Rueras.

La devoziun dallas sondas ei per ils da Tujetsch buca ina pintga unfrenda. Grad duront in temps dalla pli gronda fuola e nua che mo ina suletta ura sa esser savens da schi

grond avantatg. Nuotatonmeins tegn scadina famiglia bia sin quella e frequenta ella stediamein.

Nus essan alla fin cun nossa laver. Mond atras la Val Tujetsch e vesend leu ina nunspe-tgada, biala e reha raccolta da graun uonn, ei la legenda da Giuv vegnida endamen a nus. All'entschatta havevan nus igl intent da raquintar quella semplamein sco per engraziament per tala benedicziun. Mo encurend material essan nus vegni sil patratg da metter inaga ensemes ina pintga cronica sur Giuv. Quella laver ei el medem temps ina pintga enzenna da nossa fideivla carezia per la biala Val Tujetsch e ses cars habitants.



Il Cadruvi

## Sin Cadruvi

Reminiscenzas ord la Val Tujetsch cun illustraziuns.

Ferton che Johann Disch da Mustér ha dessignau las quater figuras, han ils dus convischins Vigeli Peder da Selva e student Sep Antoni Deragisch da Bugnei procuraui las differentas stialas da latg per la tabella e M. Maggi da Glion la fotografia da Sedrun cul Cadruvi. Admettel cheutras a quels signurs miu cordial engraziament per lur curteseivla buontad.

Mustér, ils 14 da zercladur 1904

Ei era la tiarza dumengia d'uost, in di da stupenta bialaura. A Sedrun tuccav'ei da fatg e già entschav'ev'in u l'autra femna a vegnir da

Cadruvi si. Pigns affons tut persuls a casa e lu pinar gentar, schavan buca far la procesiun, schi bugen ch'ellas havessen retschiert la benedicziun cul Sontgissim.

Ussa resunan tuts zenns giud l'imposanta tuor. Lur solemna harmonia rebatta dalla vallada viaden. In caluster vegn cun crafanun ord porta baselgia. Pintgas buobas, vestgidas plitost en gagl, culla corda paternos enta maun, suondan el. Lu vegnan las mattatschas, duas e duas e las mattauns cun schlappa si e fazale suroragiun entschavend il sogn rusari. Suenter quellas vegnan las cantaduras, vestgidas empau pli da fin, a cantond cun lur claras vuschs mintgamai in cuors dil «Pangue lingua», ch'igl emprem cantadur haveva intonau, entschavend la processiun. Sin las cantaduras suonda ina roscha buobs tut in denter l'auter cun la capiala ni capetscha sin maun, ni era cun nuot. Gia pareva il caluster cul crafanun da tschei maun giudem il santeri, ch'igl emprem cantadur entscheiva, vegnend da port'ora in auter cuors: «Verbum caro, panem verum», ferton ch'ils cantadurs, giuvens e vegls, sustegnan el, tgi cun vusch sonora, tgi empau pli da bass. Ussa cumparan dus pigns crafanuns cotschens cun crusch alva e duas latiarinas sin asta, che quater buobs portan. Els eran stai vegni destinai per tal honorific uffeci dil reverendissim caplon immediat suenter messa. Sut il baldachin, che quater signurs geraus portan, passa cun reverenza il celebrant en ornat tenend entamaun la monstranza. Dus caplons cumpognan quel urond il sogn rusari. Suenter il baldachin vegn en emprema lingia in u l'auter dalla suprastonza ni ch'ei staus enzacu en quella. Silsuenter ils umens sco ei frunta, giuvens e vegls, dus e dus, medemamein a reciton il sogn rusari. Las dunnauns, ordavon la dunna digl emprem gerau, suondan ussa; enzacontas orda-

von empau pli finas, ferton che las otras ein vestgidas quasi tuttas tuttina, schuba car-pun nera, giocli cun fazalet rasau empau suroragiu e cun schlappa si.

Tut che va en profunda devoziun entuorn baselgia. Perfin ils buobs miran beinduras davongiu e sesprovan da dir enzacons paternos silmeins da bass, haveva gie la mumma detg al Tin avon che schar ir a messa: «Sta lu ari ain baselgia e di paternos tocc'i fo messa e cu i dat la benedicziun, sche fo la sontga crusch.»

Arrivaus cul Sontgissim sisum il santeri sper la geina queschan ils zenns. Il celebrant sevolva engiu encunter il pievel, il qual tschincla en uss gl'entir santeri. In dils caplons conta cun aulta vusch l'entschatta digl evangeli da s. Gion. Finius quel, intonesch'il celebrant ils versichels cun l'oraziun e dat alla fin la benedicziun cul Sontgissim, rugond il Segner, ch'el vegli benedir e restar cun siu pievel. Tut ch'era daferton semess enschanuglias, fagend la sontga crusch e pitgond sil pèz. Pilver, in solemn, muentond maletg – gl'entir pievel cheu enschanuglias avon il Segner, s'enriclond e rugond el per grazia e misericordia!

Ils zenns resunan danovamein giud la tuor. Las pintgas e las giuvnas semeinan da porta baselgia viaden, ferton ch'il vegli emprem cantadur, sepigliond vid il curschin dalla petga, leva si ed entscheiva la secunda part dil Te Deum: «Te ergo quaesumus...» Tut che stat sin peis e cumpogna Niessegner en baselgia, finend cun siu camerat il sogn rusari. Avon igl altar vegn ei intschenius e lu reponiu.

Sin la laupia vegn ei entschiet «Igl aunghel dil Segner», che umens e femnas dian aunc, mettend vitier ils tschun pugns, sco igl ei usitau duront il temps, ch'ils tiers sesanflan ell'alp. Stau recitau il De profundis cun igl Oremus digl emprem cantadur, era il survetsch divin d'avonmiezdi finius. Ina pintga pausa ed il reverendissim caplon splunta sill'a trucca. Cheustattan ils buobs sin peis, fan dus a dus igl enclin e bandunan en tempo moderau la baselgia. Aschia era suenter las buobas. Glieud carschida, priu ora las femnas, che han da pinar gentar, stattan aunc in mument. Ussa entscheiva quel e tschel a star sin peis, fa in act da ricla, petga treis ga sil pèz e salidond siu vischin cun: «Ludaus sei Jesus Cristus» banduna el il sanctuari. Aschia plaun a plaun igl entir pievel.

En seriusa tgeuadad serenda in e scadin sin il santeri, che sesanfla gest sut baselgia. Ins enquera si cheu ils logs dalla famiglia, semetta enschanuglias e roga ina liunga uriala per ils cars defuncts, che rauassan cheu ell'umbriva dalla sontga crusch. Igl ei quei in commuentont, serius mument, che ligia schi stretgamein in pievel cun las olmas dils per davons; che regorda puspei ils affons vid ils nundumbreivels benefecis, vid la carezia d'in bab e d'ina mumma; che fa endamen puspei per ina jamna la vanidad dil mund, nossa davosa sort e nossa sontga obligaziun da rugar per las paupras olmas. En verdad, in bi e consoleivel patratg aschia in santeri suenter il survetsch divin; tut auter ch'in santeri, ch'il spért modern ha enviau naven dalla baselgia, lunsch viadora en in curtin per spir quitau pella sanadad. Cunquei ch'ins sa buca bandischar la mort, enquerau ins da bandischar silmeins il patratg vid quella!

Bandunond quei sogn liug, quasi tut che seferma aunc in pign mument enasisum il santeri. Per tgi vegn ei rugau cheu, tgi rauassa cheu? Cheu rauassan en in agen quadrat ils

pli gronds benefacturs dalla vallada, ils spirituals. Il pievel ei engrazieivels, el renconuscha las nundumbreivlas grazias retschertas ord lur mauns. Quels umens han luvrau cun stenta e breigia per il salit dallas olmas, per il beinstar dalla vischnaunca; els han luvrau ed endirau fideivlamein sco buns pasturs per lur nuorsas onns ora, biars la gronda part da lur veta. Il pievel ei engrazieivels, el roga per ses pasturs, che rauassan cheu en sontga pasch e che spetgan cheu cun lur muntanera sin il di dalla gronda rimmada, sil di dalla levada. Ei sto far in'atgna, consoleivla impressiun ad in spiritual da saver ruassar ina gada enamiez ses parochians, era sch'ei fuss lunsch naven da sia cara patria.

Avon ils anno tschunconta dil tschentaner vargau vegnevan ils spirituals dalla vischnaunca per ordinari satrai en baselgia parochiala avon ils pass, sper ils altars da s. Brida e s. Bistgaun. Il davos, ch'ei vegnius satraus en baselgia ei stau igl erudit e meriteivel sur decan Giusep Hetz da Tschamut, 36 onns plevon a Sedrun, morts per Gliendisdis Tschuncheismas 1846. Suenter ch'il cantun ha giu scumandau 1851 da satrar en baselgia cun in castitg da 68.-frs. (tiella revidida lescha da 1876 cun il castitg da 100.-frs.), ha la vischnaunca giu fixau in plaz sco fossa per ils spirituals grad avon porta baselgia da maun dretg, cura ch'ins va engiu encunter il cantun dil perti baselgia. Ei era in quadrat per circa treis fossas, ch'era circumdaus cun in garter da fier. En quei liug ein vegni satrai:

sur Vigeli Venzin (vegl) da Sedrun/Gonda, † 1854 ils 15 d'avrel e

sur Gion Giusep Deplaz da Selva, † 1859 ils 25 d'october.

En quels onns ha il Drun giu caschunau gronds donns ed era giu magliau naven in ton dil vegl santeri. Ins ha stuiu far niev uorden cul santeri cun translocar quel per duas retschas fossas pli anora e cun far si niev mir entuorn. Cun quella caschun han ins era resalvau quei quadrat enasisum il santeri per ils spirituals e giu transportau l'ossa dils dus sura spirituals giu en quei liug e schau ir en las fossas dils spirituals avon porta. Quei ei daventau, sche nus sbagliein buc igl onn 1862. Silsuenter ein vegni satrai en quei liug suandonts spirituals:

sur Giusep Anton Durgiai da Mustér, † 1863 ils 30 da fenadur;

sur Vigeli Venzin, (giuven) da Rueras, † 1880 igl 1. da fevrer;

sur Maurus Desax d'Acletta/Mustér, † 1881 ils 20 da mars;

sur Giachen Lurenz Riedi da Rueras, † 1884 ils 22 d'avrel;

sur dr. Giachen Andriu Macolin da Rueras, † 1888 ils 30 da november.

Ei fuss enzatgei bi e contribuess segiramein buca pauc per mantener en frestga memoria quels gronds benefacturs dalla vallada, sch'in bufatg monument communabel cun lur numbs embeless quei quadrat, ni sch'ina sempla platta cun lur numbs sesanflass leu speiras si pil mir dil perti baselgia.

• • • •

En santeri vegn ei ussa trasora pli e pli lartg. Umens e femnas bandunan quel e van dalla via si. Ins auda uss a tschintschond. Las fatschas ein tut cumentas, ha gie mintgin sanc-

tificau il di dil Segner schi bein sco el ha saviu entochen dacheu. Pertgei buc esser cun-tents e da buna veglia?

Ferton che las femnas van en tropz e tropz a sediscurrente encounter casa lur, seferman ils umens sin Cadruvi. Oz ei buca vischnaunca, mo tonaton discuoran ins bugen suenter ina jamna, nua ch'ins haveva fenau sil pli ault grad. Il famus bien fein, ch'ins haveva fatg en ils davos dis, contribueva buca pauc tier la excellenta cumentantscha, che regeva sin las fatschas brinas. Dasperas haveva quel ni tschel da far giu ina pintga fatschenta cun in u l'auter da ses convischins.

Beinenqualin haveva priu neunavon sia pipa cun spiel da caglia morta ed emplenava quella ord la scufla da pial giat. Auters pitgavan fiug e smanavan cun bien inschign il schu-aun, ferton ch'auters havevan a mogna ina presa «miez hollender» cun prender era sez alla finala ina pulita. Il Toni, ch'era staus uonn a recrut, envida si sia mesa cigarra, ch'era aunc vanzada dalla dumengia vargada. E leu davos encureva il «Kendli» el sac dil libroc in stumbel «portorrico» per era far semegliar empau pli cuort.

Tuttenina – tut che quescha. La capiala giud tgau, la pipa ord bucca, tgi va sin in maun, tgi sin l'auter. Il segnerfarrer cun ils caplons vegnan si da baselgia e serendan a casa. In cuort bien plaid, baul da maun dretg, baul da maun seniester da part dils reverends e las cumentas fatschas dils umens laian percorscher sufficientamein, tgei stema e confidanza ils augsegners dalla vallada gaudan. – In tec pli envi selubeschta in um da tschinttschar in per plaids cul segnerfarrer. El ha cumissiun da far far enzatgei dil bien per in'alp.

Aunc pli envi stat ina mattatscha ord in uclaun, vid la quala ins veseva dalunsch, che dolur schischeva en siu cor. «Segnerfarrer, sch'Els lubeschan, nus havein la mumma, ch'ei schon daditg buca bein. Sche nus astgassen supplicar Els, da visitar ella in da quels dis.» Suenter haver dumandau ora pli clar sur il sesanflar dalla mumma, declara il segnerfarrer: «Nus lein far aschia, jeu vegnel schia e schia damaun cun la messa a... e lu vi jeu visitar ella. Denton salidei la mumma e mei el num da Diu.» –

Da baselgia si vegn uss era il caluster, adina curteseivels e da bien humor. El til'ora sia ura, che va tenor siu pretendier – adina il pli exact – mira anavos sill'ura dil clutger e vesend, ch'ei ruchiava encounter mesa las dudisch, di el si per enzacontas giuvnas, che mavan ual avon el: «I è ju bienaditg. Oz veis aber udiu, vus femnas!» – Il segnerfarrer haveva perdegau dalla mortificaziun dils senns, en particular dalla lieunga. Il bien caluster leva aunc regurdar ina gada las giuvnas vid il bien propiest, ch'ellas havevan giu fatg, mo ha survegniu persuenter ina pulita strihada ord miez dallas frestgas giuvnas. «Vus gidi taunataun nuet plé, schegliuc savessas Vus schon è duvra.» – Ina risada! – Giavischond bien appetit dil gentar allas mattauns, svanesch'el era denter ils umens sin Cadruvi.

Cheu regeva ussa bia veta. Gruppas e gruppas da treis tochen tschun umens stevan ense-men e discurrevan, tgi da quei e tgi da tschei. Ferton ch'ils umens passai vi raschunavan en profunda ruasseivladad, regev'ei denter ils giuvens, ch'eran plitost sin in maun, beinduras gronda hilaritad. Discurriu vegnev'ei il bia sur ils schabetgs dalla jamna vargada.



Il cumpar

Enten Strem er'ei ruclau ina stiarla, la megliera dils Rests, era selischnada d'ina platta giu, fatg in per tgaubrochels e rut il fil dalla veta. Ina paupra famiglia era stad'en e fatg giu ella. Tut che steva mal. – Gl'emprem gerau haveva survegniu da Cuera ina reclamaziun en fatgs dil stradun e raquintava quei ad enzacons dils caus dalla vischnaunca. – Il Vigeli haveva sfraccau il palzuir cun serrar giu in carr fein ed il bov era sespuentaus. – Sillas plauncas Flurin haveva ina giuvna schau ruclar in blah fein. Quei raquintava in legher cumpogn als mats, che pudevan rir. – In vegl pessimist pretendeva, ch'ils praus da Salins-sura hagien buca giu en uonn aschi daried fein, sco igl onn vargau, ferton che siu vischin remarca cuortamein:

«Cumpar, nu vais è'l tgau? Mirai sen vies ladretschi!»

Leu ualts amiez Cadruvi havevan plirs endamen da vaccas e – gedius. Silmeins udevan ins il Placi cun sia buna vusch a schend: «Tia grischa è bétga pels Tudestgs, cun lezza vo'l gediu, lavai sch'ju legna bétg!» Maniau fuv'eit in marcadont ord il cantun Aargau, che vegneva mintg'onn en Tujetsch per in quantum vaccas, onz dallas mendas e pagava aunc andants prezis.

Ina partida giuvens haveva endamen da pastiras e fein a pastg; vegnevan gie las sorts vendidas l'autra dumengia. Beinenqualin era staus in per dis avon tut discusamein e mirau giu enqual sort ed encureva ussa in soci per magliar la pulenta ensemes en las «Fantanatschas», si «Caschlè», sil «Pegn dil Tgapi» ni schiglioc enzanua auter.

Videm spegl iert dils Monns seraschunavan enzacons vischins da Sedrun. Els havevan endamen dil cavrer, cun il qual els eran nuota dil pli cunts uonn. El schava maner ora bugen e gia in per gadas havev'el schau vegnir giu las cauras els praus Strem. Tscheidi havess ei muncau pauc, ch'ellas fussen perfin vegnidas oragiù els èrs. In vegliet cun cavels tschuors era ualts scaldaus ella caussa. «Quai è bétga maniera, schè vegni giu las tgauras els praus da miasa stad. Tgi so, pertgei ins dat da quellas piaglias? Ju sa bétga tgei gianter quels buezs fon cossè tudè. Vut el bétg, né o el nuet streh da fa tgavrè? Da miu tiams vess ins fatg quertas, ins vess schau ir a tgèsa da quella gliut. Ju sun in um vegl, aber sch'ju vess in tec meglieras tgombas, scha tumess ju aunc ussa bétga da fa tgavrè. Hm! pertgira enzacuntas tgauras sin da quella pastira – uonn tgo lu aun fatg da quell'aura! Quai è bétg'urden! Dafartaun, pervia da mè fagei tge che vus lais!» –

Il bien vegliet haveva tutta raschun ed era aunc ualts moderaus. Sch'ins havess udiu las femnas da quellas varts! Pauper cavrer lu! Basta, il cauvitg, che fuva era leu presents,

patertgava suenter, co far capeivel quella caussa al cavrer aunc quella sera.

Plitost sin in maun marcadava in bab da far vegnir il calger a cuser, silmeins in di, fer-ton che in auter dumandava la Marionna, sch'ella savessi vegnir a gidar, cura ch'ei vegn da mèder. – Vi sper la palera encunter il Drun steva il talper e rugalava sia pipa ed in tec pli engiu il pigrer da Nalps, che raschunava miez talian e miez romontsch cun il cauvitg da S. Antoni.

Era il starler grond dil Tgom fuva staus giu oz a messa. El turnass ussa bugen puspei ella bassa cun sias genetschas, pertgei leusi entscheiv'ei a semegliar empau da liung. Perquei havev'el era detg leusi al starler pign: «Ju stu i giu in'ièda a da ina tulanada.» El tschintschava ussa sin

Cadruvi cul cautegia. Plirs purs havevan cattau adagur el ed eran vegni neutier per dum-andar tgei lur genetschas fetschien. «Tge fo la mia? Tge fon las mias?» Il starler ludava. «Ils tiersstattan bégn, on fatg ina stroda pruva, i en plein tgarn. La tia è ina dallas meglieras. Tia blaua è serefatga, té gnanc enconuschesse plé ella. Dentaun, i è nueta taun dareit maglia, las munglassen bétga pegera, ju stess mal. I fuss bien, sch'ins savess gleiti tur-nar anno cun ellas.» – Quei era sia parola, schegie ch'ei era aunc maglia pli che avunda. Denton ils purs enconuschevan beinavunda lur vegl starler e schavan tulanar el vinavon. Il starler haveva era saviu purtar la nova, ch'ei seigi stau si avon paucs dis tut discu-samein marcadonts, che hagien mirau las genetschas. Quei era emperneivla aura pils purs e beinenqualin studiava gia suenter, cons marenghins la sia pudessi valer. «On i era mirau la mia?» damonda quel e tschel il starler. «Ge, ge, ju a è stiu mussar ella; i on è nudau se la tia!» Aschia consolav'el ils purs, il bien starler, ch'era pigl auter in um versau en fatgs dad alp.

• • • •

Entuorn entuorn fimavan ils tgamins. Las vanauns buglievan ed ils truffels ni ils bizochels vegnevan barsai per dar tier la carn. Tscheu e leu vesevan ins las patrunas da casa, che mavan senza giocli, tgi per in viadi aua, tgi per dus lenns. Autras schavan ora las gaglinas per in mument. Avon casa sin plattas stevan mattatschas e fagevan termagls culs pigns.

Ils buobs, che han mai ruaus, fuvan era sin Cadruvi. Els siglievan per ils barricars e mirs entuorn e fagevan da sepigliar. Ina crotscha cun dus cavals vegn dalla punt neu e sefer-



Il starler grond

ma avon ils «Lucas». Cuninaga circumdeschan enzacons buobs la crotscha e pondere-schan exactamein ils cavals. Il Sep dil fravi manegia, che quel da maun dretg semegli grad il «Fuchs» dils Gionandrius, ferton ch'il Casper dils Tonis pretenda: «Quel co o plé finas tgombas ed è plé saraus.»

Tuttenina semida la posizion dils buobs. Da vitg en vegn in um vegl cun ina trucca si dies ed in canaster en bratsch. Plein legria cloman ils buobs: «El Gambun, el Gambun! el o da vender tschareischas!» – Tgi seregorda buca cun legerment ed engraziament da quei brav um vegl, che ha fatg tons plaschers als affons da nossa vischnaunca? Pign

mument e quasi tuts ils buobs, sco era beinenqual femna e surtut igl aug «Luis», in um vegl, che magliava bugen tschereschas, circumdeschan il bien Gambun. El haveva priu plaz osum il baun sur casa da scola. La trucca cotschna en fuorma da turnister, tschent'el ad interim sut il baun en.

El arva si il canaster. Bialas tschereschas cotschnas tarlischan ord quel. Beinduras tunschev'el vi ina ni l'autra als buobs per schar schigiar e far la queida aunc pli gronda. Ils buobs eran denton ils plirs svani denter ils umens per encurir si il bab. Beinsavend tgei quei s'approximar schi beinschit hagi da dir, haveva il bab, ni era il bien padrin – aunc oz engraziel jeu persuenter! – priu ora la buorsa e dau enzacons raps per schar cumprar tschereschas.

Tgei tschaffen! Per tschun raps in pugn plein, per diesch raps dus pugns ed aunc in pèr suren. Aschia eran quasi tuts ils buobs vegni tier tschereschas, ch'els havevan schau metter en lur capetscha ni capiala. Els stevan ussa leu entuorn cun in ni l'auter da lur fargliuns e magliavan quei custeivel fretg en cumpleina cunteintscha.

Gambun haveva bien cor e saveva con bugen ils buobs havevan tschereschas. El deva buna mesira ed ils buobs fuvan era adina cuntents cun quei ch'el deva. Enqual femna e magari era aunc igl aug Luis, che astgavan spender in tec dapli, havessen marcadau bugen da far dar enzacontas dapli. Mo Gambun scheva cuortamein: «Ju sa bétga da per nuét; ju stu i gliunsch per ellas.» Nua? – a Perdomet! – Nus buobs tertgavan, Perdomet seigi aschia in liug, sco la tiara dall'empermischun, danunder che quels dus buns umens han purtau quella gronda trocla sin in pal.

Gambun fuss atgnamein staus dalla Val Calanca, ha giu fatg la ventira cun maridar ina da Tujetsch, ina Nell, il bab dalla quala, in fravi, fuss vegnend enneu da S. Pieder el



Il Gambun

Vorarlberg. Siu fegl ha giu maridau ina da Perdomet e quella haveva sper auter survegnui per dota enzacons tscherschers ed a quella buna dunna havessen nus atgnamein d'engraziar per quei prezius fretg.

Gambun era in um vegl cun caultschas cuortas, cassacca blaua e pertava per ordinari ina capiala bergamasca cun flisella cotschna entuorn. El tschintschava plaum, empau tral nas, mo haveva in oreifer bien humor. Gl'unviern mava el per las casas, fageva e pinava canastras schi ditg sco enzatgi leva. Denteren raquintava el da tuttas sorts legras historias, aschia ch'el era adina beinvegnius, cunzun als affons. Havessen sias historias buca finiu quasi adina culs medems plaids: «Ed a mi han ei dau ina cul caz giu pil dies... ni a mi han ei dau in pei... e catschau en tiel D. B.e fatg pinar si sias canastras nauschas,» sche havessen ins bunamein pudiu crer, che tut seigi sontga verdad. Er'ei empau da quiet en stiva e tschintschavan la glieud pauc, sche deva el tutte-nina ina ferma sturnidada, che tut siglieva agradsi. Quei deva nova veta!

La jamna sontga mav'el adina a Cuera per il s. ieli e pertava quel per l'entira Surselva si, ils emprems onns entochen vi d'Ursera – ina honur e favur, ch'era siu fegl ha gudiu e la quala siu beadi gauda ussa. Pilver, ina honoreivla caussa per quella brava famiglia. El rruaussi en pasch, il bien Gambun!

• • • •

Sin Cadruvi er'ei denton vegniu pli e pli vit. Beinenqualin era serendius a casa. Denton mirond pli exact, eran ils umens aunc adina ils biars leu, plitost sin in maun, ell'umbriva en differentas gruppas. Quasi tuttas caschadas havevan oz da trer ensemen il latg ed ils pursanavels da mintga alp stevan ussa ensemen e rugalavan giu quella fatschenta. Ils «Signurs», ils «Magnancs» ed ils «Purs» – aschia semumnan ils pursanavels dal-las treis caschadas dalla val – quels stevan per part leu sin Cadruvi e per part giu davos casa da scola, nua ch'ils «Tschemuters» fuvan era damaneivel. Ils da Culmatsch – gia da natira empau egl ault – eran si sper la casa dil Vigeli da Cadruvi, ferton ch'ils da Cuolm Cavorgia stevan humiliteivlamein leu sut sper ina pluna quaders vi encunter il Drun.

Da tschentaners enneu ha la vischnaunca da Tujetsch giu in agen cundrez cun sias bialas alps, cunzun cun il quen per la gudida. Cheu vegn ei menau in exact quen senza pupi ni tabla, senza tenta ni rispli, senza num e senza cefras. Curios, mo tonaton gest aschia. Ins vegli perdunar a nus, sche nus selubin da descriver il cundrez dallas alps en Tujetsch empau pli detagliau per saver far lu ton pli capeivel il trer ensemen il latg, cun il qual las differentas gruppas dils pursanavels s'occupavan ual sin Cadruvi.

• • • •

Tujetsch ha tut mo alps cuminas e dumbra pressapauc 400 vaccas. Quellas vegnan car-gadas duront temps da stad – per ordinari naven da s. Placi entochen biabein l'entschat-

ta d'october – en treis alps: Val Val, Val Giuv e Cuolm Cavorgia cun lur differentas midadas. Tier las vaccas audan mintgamai era las genetschas, en tut circa 200 tgaus, che vegnan denton adina separadas dallas vaccas e cargadas en atgnas alps entochen vi encunter miez settember. Culs 26 da settember (pli baul ils 20) stat ei liber dad ira puspei cun ses armauls, nua ch'ins vul. Enzacontas vaccas e genetschas vegnan tenidas en mintga vischinadi a casa, seigi per il latg, ni per duvrar per bov, ni era per schar haver ellas pli bien. Pli che dus tiers gronds astg'ins, tenor uorden da vischnaunca, buca tener a casa temps da stad. Ferton che Val Val e Val Giuv han mintgina treis caschadas cun circa 60 vaccas per caschada, ha Cuolm Cavorgia mo ina caschada cun circa 35 vaccas.

Mintga diesch onns vegn ei fatg ni renovau igl uorden dallas alps. Cheu sa mintgin prender alp nua ch'el vul. Per ordinari s'annunzian ins per quell'alp, nua ch'ins ha il mises damaneivel. Cheu ein ils tiers endisai e sch'ei crod'en malaura odem la stad, sche han ins nuegl ed in pugn fein siu, senza ir a runond. Tujetsch ha numnadamein ils mises sin pastira, ch'ei en bia loghens el medem temps pastira d'alp. Ual dasperas sesanflan ils praus pils mises, sin ils quals ei vegn denton mai pasculau temps da primavera.

Cun prender alp schabegia ei naturalmein savens, ch'ei vegn memia bia tiers en ina ni autra alp. Cheu ston ins ughegiar la sort, cura ch'ei vegn ulivau las alps, che daventa mintg'onn sil di da s. Gion suentermiezdì a Sedrun. Tgi che la sort tucca, sto ceder ed ir en in'autra alp per in onn. L'auter onn sa el puspei turnar anavos ell'alp, ch'el haveva priu primarmein, sch'ei plai ed en cass, ch'ei fuss puspei memia bia vaccas en quell'alp, sche sto el buca ughiar pli la sort, entochen che buca tuts pursanavels han fatg il tur ed ughiau la sort. Sa in pur brattar alp cun in auter da pressapauc medema quantitat armauls, sche stat quei liber. Ed aschia davent'ei, che beinenqual pur ei onns ora ella medema alp.

Per ordinari audan 14–16 purs tier ina caschada, che ha siu agen tenercasa. Cheutier auda en emprema lingia il cautegia. Quel vegn dessignaus dils pursanavels el pustretsch alla fin digl onn. Il bia va quei uffeci en roda. Il cautegia ha da reger e dad haver qui-tau per ils fatgs dalla caschada. El ha da pladir la fumeglia – paster grond, paster pign e purtger – ha da procurar per il sal, da mirar che las midadas vegnan fatgas e da tener quen quellas. Dat ei en ina gronda malaura ni neivs, sche havess el da serender igl emprem ell'alp ni da tarmetter in representant. Croda ei en enzatgei extraordniari ell'alp ni maunca ei enzatgei, sche ha la fumeglia da sevolver ni da schar saver il cautegia.

Il resti ni uorden, che sedrova per la tegia dattan ils pursanavels denter els, empau per in. Quei, sco era las midadas, che mintgin ha da far per la stad ora, vegn fixau era il di da s. Gion. Per mintga vacca, buna ni schliata, vegn ei dau in curtè dad alp. Allura, tgi dat ina sadiala, l'auter ina binera; in la cazzetta, l'auter ina cozza; in la sigir, l'auter dus plumatschs; in il burtget da groma e quel da latg, ferton che l'auter furnescha la brocca, ed il caz furau; in il turschet, dartguir e burs da sal, l'auter il mistrer (mistral) cun in madrat eav. Quel che habitescha onz damaneivel d'in uaul furnescha las furschettas. Sulettamein per il priel e la panaglia, che in ni l'auter pur posseda, vegn ei pagau enza-

tgei tscheins, per il priel circa 10.–frs., per la panaglia 1–2.–frs. La suppia da mulscher ha mintga paster da purtar sez; per il «pur» ha quel, che ha da caschar igl empren da procurar.

Concernent las midadas, sur las qualas ei vegn tratg la sort e nua ch'ei croda sin treis vaccas ina midada, ni 1.–fr. per tgi che sto ni sa buca far, davent'ei, ch'ins sto far il sternem da letg, l'auter ir cul priel; in purtar in buordi curtès, l'auter la panaglia, in ir beinschit cul «mistral» (mistrer) en in'autra midada, ferton che dus auters han forsa in di la honur d'enferrar ils pors.

Il di dalla cargada, che vegn fixaus sin vischnaunca, vegn mintga pur cun sias vaccas e cun igl uorden, ch'el ha da dar – tut bein nudau culla noda casa – ell'alp sez. El surdat e recamonda ses armauls e siu fatg al paster grond, il qual surpren ussa il quita per tegia e caschada. Il cautegia sco era il pur, che ha dad ir igl emprem vid il latg, ein era cheu e gidan tenor meglier saver e puder. Ei vegn fatg uorden en tegia, scuau ed ulivau il tschaler, sbuglientau e tschentau ils curtès. Ils pasters caveglian vi lur fagots, empren-dan d'enconuscher las vaccas, principalmein quellas, che mintgin ha da mulscher, 25 il paster grond, 16 il paster pign, 18 il pur. Il purtger sto gidar il pur ni il paster grond, sch'el ei capavels da mulscher, ni sto silmeins metter giu latg tier aunc ademplir siu uffeci da tener en stavel.

Beinenqual pur ha aunc da far attents ils pasters sin quei ni tschei, ch'appartegn sias vaccas. «Mia naira è empau da dira, tilli magari enqual'ièda. – Quella co dat da tiams en tiams in tec tschuf dad in tet; mungia giu bégn ella. – Té stus vai in tec gl'egl sen mia blaua, la vo ugen dapersai e quai aun la notg. – Mia melna tscho o unflau in tec ina tgomba davus, – sa bétga cu l'o fatg, ungi'ain in tec in per tschaveras cun quell'aua tscho; a schi vess da vegnir mender, sche la savai mè. – Te Gion Antoni, sche té as in tec peida, scha rabetscha empau lenna sen quei de, tg'ju a de caschè; ju sun in pau-per!» Aschia ein ils quitaus quei di. Surdau e recumandau lur tiers, lur fatg principal, als pasters ed era al Segner, tuornan ils purs sediscurrent sur quei e tschei a casa. Vegli il Segner pertgirar l'alp da disgrazias, schar star saun e far prova las vaccas!

• • • •

En Tujetsch han ins il bia negins signuns ed era buca tschalers ellas alps per salvar si il purment. Cheu va mintga pur sez ad alp e rugalescha il latg quei di ni quels dis, che la roda ha tuccau el. Quella roda u gliesta vegn fatga per l'emprema gada da mintga caschada il di da s. Gion, ni la dumengia sissu e quei tenor la sort. Sin 20 crenas (25 funs) latg in di, sin 40 crenas dus dis ed a. v. tenor la quantitat latg, che las vaccas d'in pur dat-tan. Cheu sa lura mintgin trafficar ell'alp cun il latg da quei di sco el vul – «tenai ple-tost sel piun ne sel magnuc, schè envarna fetg ne mu pauc, fa in gron ne in pign geri», – grad sco el vul, igl ei siu. El sto mo dar adatg, ch'el schubregi bein la vischala da latg, cunzun ils curtès, sinaquei che siu successur vegni buca en conflict cun il «cucu». Quei fuss schiglioc ina snueivla zanur per el.

Cun il caschar entscheivan ins il tierz di suenter la cargada. Quei di vegnan era ils pors catschai ell'alp, sin duas vaccas in. Ins surdat e recamonda quels al purtger. Avon che turnar a casa sa mintgin beiber latg ni penn per stizzentar la seit, ch'ei ha fatg da vegnir siadora cun quella tuntignusa, stinada cumpignia. Ussa tucc'ei al purtger dad haver in bien egl e da far in tec beinschit, entochen che quella famiglia ei sendisada e vegn bein perina dador tegia.

Il pur, ch'entscheiva cul caschar, ha era da dar ils dus emprems dis la spisa alla fumeglia. Persuenter retila el dalla caschada 12.-frs., cura ch'ei vegn tagliau pustretsch. Aschiglioc vegn mintga pur quei di, ch'el ha il latg beinmarvegl naven da casa cun tua-glias, blahas, sac da tschagrun, cuagl, empau ris ni pulenta en in sitget ni forsa era enzatgei cuschinau per dar solver, sco era cun buna maglia per ils pasturs. El cascha lu, l'emprema stad il bia duas ga per di, tila panaglia e rugalescha la tegia. Sera e damaun mulscha el las vaccas, ch'il pur ha da mulscher, fa solver l'autra damaun e dat marendia per quei di en sac als pasturs, paun e caschiel, savens era ina buna buccada carn criua vitier. El pren lu siu fatg, magnuccas, pischada e tschagrun sco era la maglia, ch'ei van-zada e fa cun quei tut cul blah da cantuns sin moda pratica il buordi ni la carga per serender a casa. Ei il buordi buca memia grevs, sche vegn el purtaus si dies, schiglioc meinan ins quel cun bov ni sin in carret a maun en ina canastru cun empau strom suten a casa sia. Daferton vegn in auter pur cun siu fagot dad esch tegia en e fa il medem. Il quen dil latg, che vegn menaus en tegia tschavera per tschavera, daventa sin suan-donta moda. Avon ch'entscheiver a mulscher vegn la stadera da crenas fermada si a mesa tegia vid las lattas da curtès. Cun quella vegn il latg dallas vaccas da mintga pur pesaus. Leu speras, el mir ni sin ina cruna, sesanfla la stiala da latg ed il cungi dil paster grond, cun il qual ei vegn nudau ni tagliau en mintgamai la peisa dil latg suenter haver tratg giu la sadiala.

La stiala da latg consista ord ina buccada lenn, il bia draus ni culeischen da circa 15 cm lunghezia e 3 cm el diameter. Secund il diember dils pursanavels dalla caschada vegn quella buccada lenn dulada ora en 5, 7 ni 8 cantunadas. Silsuenter vegn quel daus colur, per ordinari cun rida cotschna ni enqualga era cun flurs melnas ni blauas. Il moni dil cungi fa lu neidi las fatschadas tut ch'ei tarlischa. Allura vegn ei tagliau en ina profun-da cava amiez il lenn entuorn entuorn. Da mintga maun da quella cava vegn ei fatg si cun in cungi da bien péz sin mintga plat la noda casa d'in pursanavel. Quella survegn aunc sco ornament sura e sut ina leva, fina cava, che vegn denton fatga avon che tagliar ora la noda sezza. Aschia formeschan las nodas ina sper l'autra mintgina in bi quadrat. Sut la noda vegn lu tagliau en sil liung per miez il plat giu ina leva cava, che tonscha bunamein tochen giudem.

Ussa, in tagl tagliaus en e tagliaus ora sut la noda traviers la cava liunga, ha la valeta da diesch crenas, che vegn denton era numnaus «ina crusch». In tagl mo tagliaus en e buca tagliaus ora munta tschun crenas ni «mesa crusch». Autras singulas crenas e mesas crenas vegnan nudadas si giu bass el cantun da maun dretg, la crena cun tagliar en e tagliar ora, la mesa crena mo cun tagliar en senza tagliar ora. Aschia havein nus per

exempel sillla stiala cun crusch, tier la noda A.  $72 \frac{1}{2}$  crenas latg = 7 cruschs +  $2 \frac{1}{2}$  crenas; noda P. 46 crenas =  $4 \frac{1}{2}$  crusch + 1 crena. Ils quarts vegnan buca quintai.



Stialas da latg

Survegn la stiala denton in ornament, sco per exemplu in tgau, in clutger, ina crusch etc., sche vegnan las nodas partidas en per ordinari in tec autruisa, denton buc adina. La mesadad dallas nodas vegnan tagliadas en immediat sut igl ornament, l'autra mesadad amiez il lenn, aschia che la figura, igl ornament, resta adina sisum.

Per nudar si il latg las tschaveras en tegia han ins stialas plitost grossas, meins bialas e buca dadas colur. Ei il latg, ch'in pur gauda in di ni dus ni treis dis ensemes sin quella stiala, sche zuglia il paster grond quella bein bufatg en in fazalet ni en sia capetscha da tingalin e pren en sac cun el, cura ch'el va la damaun cun las vaccas ord stavel. Duront il di, in'uriala da buna peda, ferton che las vaccas schaian ni cauman, porta el vi quei quen sin in'autra bein rugalada stiala, che vegn surdada al pur, che va l'auter di a casa cun siu gudiment. Quella stiala cuntegn il quen dil latg, ch'el ha gudiu da ses conpursanavels e porta perquei era suten sia atgna noda. Quella lavur, ch'il paster grond ha cun quellas duas stialas numn'ins «prender giu latg», ina lavur, che sto vegnir fatga cun gronda exactedad. Perquei dictescha per ordinari in auter cumpogn mintgamai la summa da mintga pur al paster grond ed alla fin vegn ei confruntau il quen dalla stiala nova cun il quen dalla stiala vedra, schebein tut seigi gest. Laschond las nodas vegn ussa il quen dalla stiala vedra dulaus naven e quella fa aunc per in per dis il medem survetsch en tegia.

Denter ils pasturs dat ei beinenqualin, che ha in oreifer inschign, in agen talent, da tagliar ora ni far stialas da latg. Buca cun pauca satisfacziun e legherment surdattan els famusas, plascheivlas stialas als purs, che tegnan quei per ina speciala honur. Sper las semplas, ordinarias stialas vegnan autres turnicladadas ed ornadas e muossan sin excellenta moda il gust e senn estetic da beinenqual giuven cumpogn. E quei ton pli, che quellas lavurs vegnan tuttas fatgas mo cun in sempel cungi e senza negin model. Aschia vegn ei fatg stialas cun tuor, cun clutger ed ina rucla lien, stialas cun crusch e stialas cun differents tgaus ed auters ornamenti. Natural dattan talas stialas empau lavur dapli e vegnan fatgas mo da temps en temps, per far in legherment ad in pur, per esser engrava-

zieivels ni era per tentar in «Magnanc» ni forsa perfin per tarmetter in salid allas feglias dil pur giu casa, che han giu tarmess si in aschi bien solver ed ina aschi stupenta marendia. Sil mund dat ei dapertut siu pertgei e perquei, – era sisum las alps.

• • • •

Ussa, cun ina ni duas da quellas stialas en in maun ed en l'auter maun in bien cundi e beinenqualin aunc cun ina buccada rispli en bucca, stevan oz ils purs sin Cadruvi en las differentas gruppas e tergevan ensemen il latg. Aschia numn'ins il quen, che vegn rugalaus denter ils purs d'ina caschada las dumengias sin Cadruvi. Avon ch'ina roda dil latg ei mintga ga finida, vegn ei mirau con latg mintga pur ha gudiu ni caschau da l'auter, ei vegn scuntrau e tschentau si ina nova roda, nua che quel ha dad ir igl emprem a caschar, il qual ha dad haver il pli bia latg dils auters.

Il quen cun quellas stialas ei sempels, fetg sempels. Per exemplu: Ils Giachens han gudiu quei di ni quels dis, che els han caschau 56 crenas latg dils Heleners, ferton che ils Heleners han survegniu  $63\frac{1}{2}$  crenas dallas vaccas dils Giachens quei di ni quels dis, ch'els han giu il latg. Ils Giachens taglian pia naven sut la noda dils Heleners quellas 56 crenas cul cundi e nodan si, sch'ei plai, leu  $7\frac{1}{2}$  cun rispli, ch'els han aunc da haver dils Heleners. Ils Heleners encuntercomi taglian naven sut la noda dils Giachens mo 56 crenas;  $7\frac{1}{2}$  restan per enzenna, ch'els debiteschien aunc ton als Giachens, il qual deivet vegn lu pagaus ni scuntraus tier la proxima roda. Il nudar si il dabien cun rispli stat liber ed ei mo ina moda nova, dalla quala ins saveva nuot pli daditg. – Ei ina stiala vita, quei vul dir, ha ella si neginas crenas pli, sche ha ella era negina valeta pli. Ins fiera naven ella ni surlai als affons per schar far termagls.

Suenter che tutz pursanavels han rugalau lur quen in cun l'auter, vegn ei tschentau si ina nova roda, nua ch'il cautegia ha da scriver si ils nums, co ils purs han dad ir sil-suenter vid il latg. Quella gliesta vegn tarmessa cun l'emprema caschun ell'alp per schar surdar al paster grond. Da tschentar si quella roda dat ei beinenqual difficultad, pertgei igl ei grev da saver far endretg a tutz tgaus. Ferton che scadin pren beinbugen il latg l'emprema stad, sehonan ils biars pauc da prender quel, cura ch'ei va encunter igl atun, nua ch'igl ei mo ina pipa latg e tonaton las medemas spesas e ceremonias. Era enqueran ils biars da buca restar debiturs alla fin, nua ch'ei sto vegnir pagau anavos tiel pustretsch per ordinari tschun raps per crena. Quei vegn mintgamai fixau gia all'entschatta tier l'ulivada. Sch'ils biars van plitost nuidis firaus e dumengias vid il latg, sche dat ei tonaton enqual filosof, che preferescha grad il firau ni la dumengia, nua ch'el metta via, tenor siu quen, il pli pauc.

Havend rugalau la stiala e tschentau si la nova roda, ina liunga ni ina cuorta, sco ei fa basegns, vegn ei aunc tedlau sin remarcas ni reclamaziuns, ch'ein vegnidias ord l'alp, ni ch'il cautegia anfla per bien da far. Baul ei quei ni tschei en schliet uorden, baul mauncia ina caussa, baul l'autra. Quella ga han quels e quels da far midada, l'autra gada auters ed aschia vinavon.

Sil di dad oz, la tiarza dumengia, haveva negina caschada enzatgei apparti. Ils da Val Giuv havevan giu endamen da vegnir gleiti ensemes, quei vul dir neu da Tschamut e giu da Culmatsch. Il cautegia da Cuolm Cavorgia haveva fatg attents, ch'ei stoppi aunc vegnir cumprau in sac sal per la caschada. Era cul tschentiar si la nova roda er'ei iu daper-tut pulit. Sulettamein quels da Cuolm Cavorgia havessen ins detg, ch'els hagien giu ina gada enzatgei pli dad ault. Denton er'ei stau mo quet dad in da Culmatsch, che mirava beinduras giu sin la pluna quaders.

Las treis caschadas da Val Val havevan concludiu oz il davos da far enferrar ils pors ton pli gleiti e giu supplicau ils pursanavels, che hagien da far quella midada, dad ir enasi en cuort, essend vegniu detg, ch'ei seigi gia stau pors, tochen ora giu Putnengia vid truffels. Las femnas da Rueras fetschien sfracs!

E pilver, ina sonda sissu mavan tschun umens vestgi en tschiep stuppa, cun beras ed in bien ton fildirom schau giu ed in per bunas zaungas, fagend ils usitai carauns da Clavadi si. Ils da Rueras fagevan grad la solita processiun a Nossadunna. Casualmein ha il Restantoni, ch'era fruntaus quei di cul Stoffel, il tierz gerau, giu il disclelg, ora si Surgiassa, da mirar in tec anavos e da dir si per siu cumpogn: «I von quaina se!» Sco il tenti fuss staus! Biars han sin quei sco mirau in tec anavos e surmenau auters, che vegnevan suenter da mirar encunter Clavadi. Denton a quels davontier ha quei nuota pudiu far; igl augsegner ed il Hasper cantavan vinavon la litania da tut ils sogns.

Las femnas da Dadens gl'uaul raquintavan pli tard, ch'ins hagi udui buca ton daditg in di, ei eri grad per ina sonda, stermensusas vuschs, sco ei vegness giu da Rusas ni ora giu da Foppettas. Sgarscheivel er'ei! «Sche quai o mu bétga da munta enzatgei». Fa bien! Ei mava encunter l'ina. Ils umens havevan rugalau lur fatgs dad alp. Salidond in l'auter cun «Dius pertgiri! – Mai al num da Diu!» serendan els a casa per prender aunc spert enzatgei gentar avon ch'ei tuchi da viaspas. Beinenqualin, ch'ei leu damaneivel da casa pren siu convischin e parta generusamein siu gentar cun el, sinaquei ch'el stoppi buca ir schi lunsch e sappi era aunc ir a viaspas.

Ed en verdad, ei era ner temps. Gia vegneva il caluster a fimond sia pipa da Gonda giu per retscheiver ordras dil segnerfarrer cura tuccar da viaspas. Denton il segnerfarrer ha risguard. El sa, ch'ils umens han giu da trer ensemes il latg, ch'els han finiu buca ton daditg e ch'els stoppien era haver enzatgei dadens giu, sch'els veglien gidar a cantar viaspas. El spetga aunc in mument.

Plirs buobs stevan entuorn il caluster sin Cadruvi e dumandavan da schar gidar a tuccar da viaspas, ina damonda, che vegneva mai tschuncada giu dil bien caluster.

• • • •

Ei era Silvester 1902. In vegl bien amitg vegn dad esch en per salidar ed agurar in legreivel niev onn. Nus havein tschintschau da quei e da tschei, denter auter era dallas bialas alps da nossa vischnaunca. Plidond dalla rendita da quellas, remarca igl amitg casualmein: «La stiala da latg han ei dismess ussa, il quen vegn menaus sin pupi.» –

Entschiet cun quei ha Duri Riedi da Rueras 1901, ch'era quella stad paster grond sill'alp da Tschamut. Ils pursanavels da Cuolm Caviggia han entschiet cul pupi per la stad 1902, pia mantenui in onn pli ditg la venerabla stiala. Ussa vegnan las crenas ni funs latg, – pertgei la veglia stadera da crenas vegn era a stuer ceder cul temps, screts si en in carnet, nua ch'il num e schlatteina dil pur stat. Quei carnet resta adina en tegia. Per il pur, che vegn a caschar vegn ei mintga ga tratg ora il quen sin ina buccada pupi, nua che las nodas figureschan aunc ad interim enstagl il num. Las dumengias da stad vesan ins ussa ils purs sin Cadruvi cun in toc pupi rubigliau a fagend quen. Tgi tegn quel encounter in mir, l'auter encounter in esch; tgi sin sia schanuglia, tgi sto metter siu cudisch d'oraziuns suten per saver vegnir a riva cun sia bilanza. Alla finala fa quella zensla pupi si ina tuttavia miserabla tschera.

Nus savein strusch dir con malemporneivel quella nova midada ha supriu nus, con mal quei ha fatg a nus. In usit aschi vegls, aschi sancziunaus da nos perdavons, aschi pratics e gests, aschi interessants e ton sco nus savein d'anflar negliu sil mund, auter ch'en Tujetsch – dismetter quei tut en ina, senza hau ni miau – quei havein nus buca saviu capir, e capin aunc oz buca.

Pertgei ha la stiala stiui ceder al pupi? Nus havein anflau neginas otras raschuns, che la cumadeivladad dils pasturs per buca duvrar in auter plaid. Pertgei draussa, in cunti ed ina buccada rida cotschna dat ei bein aunc en nossa vallada? La lavur per la fumeglia d'alp ei era buca vegnida pli gronda, ch'ins havess buca temps da far denter en ina stiala, ferton che la pagaglia ei carschida per in bien ton naven da dus, treis decennis. Dasperas purschess la lavur cun la stiala ina biala ed instructiva occupaziun per in giuven pastur, la veta dil qual ei beinduras, malgrad tutta poesia, aunc monotona avunda leusi sils cuolms.

Nus havein giu caschun da tschintschar cun plirs purs arisguard il dismetter la stiala e tuts han exprimiur lur malcontentientscha cun il niev cundrez da pupi. «Quai è nuét, ina butgèda pupi, tg'in so bétga nua metter.» «In o nuét ainta maun e qu ins o da tra anzia-men, sch'on ins nuét susteign!» «Ina butgèda usche on ins gleiti piars.» «Nus turnain a manar ain la stiala.» «Quai devan ei mai schè i sut.» – Aschia tschintschavan ils purs. Schebein els han la curasca da turnar a menar en la stiala en lur alps, vi jeu buca dir. San ins haver speronza? Sch'ils purs vulan, pertgei buc? Ei mass fetg lev e nuslein viver da quella speronza!

Nus lessen buca dir e nus havessen saviu capir ed emblidar, sche quella midada fuss daventada tier ina u l'autra viulta d'impurtonza cul quen pil purment da nossas alps, sco per exempl sch'ei fass vegniu ina gada da quella, da baghiar tschalers ellas alps e da metter si versai signuns, che capessen e tractassen il reh e fin purment in tec pli raziunal. Nus fussen era ferm perschuadi, che la rendita, schibein en quantitatad sco principalmein en qualitat, purtass tgunsch ora ils cuosts, ch'ins havess forsa cheutras dapli. Tujetsch cun sias biaras e bialas alps, cun tontas vaccas e massa cauras, duess buca stuer cumprar «piun e magnuc», anzi saver exportar. Ed il fin, excellent product da nossas alps, tractaus in tec pli alla moderna, savess levmein far concurrenza a sca-

din product dad outras cuntradas ed acquistar in renomé grad sco il mèl ed ils buns «magnucs tgaura».

E tgi sa, fuss ei buc era pli raziunal e pli avantagius da renschar en cascharias cun agens tschalers e signuns per il temps da primavera en gronds mises, sco per exempl a Scharinas, Milez, Mulinatsch etc.? Conta lavur e ceremonias, che mintgin ha cun siu fatg, vegness ei spargnau e lu, – neve Onna Catrina, tgei figura fagess aschia ina magnucca, gronda sco la roda dil fallun da Rueras, visavi ad ina partida dils usitai hulers, tamplers dalla primavera cun bia crusta e pauc maguol ed aunc da differenta buontad! – Denton, quei ein mo patratgs, patratgs sur ils quals mintgin sa far cun temps e pedas atgnas reflexiuns e calculaziuns.

Il niev vegn, il vegl sto ceder. Aunc enzacons onns forsa ed ins sa en Tujetsch strusch tgei ina stiala da latg vegli dir. E cun la stiala svaneschan era plaun e plaun las interessantas nodas casa. Suenter ina generaziun vegn la stiala ad esser ina raritad strusch da far capir. Gia ussa van jasters per la vischnaunca entuorn e cumpran, sch'els survegnan, stialas vedras per in bi daner. Nossas stialas ein per jasters fetg interessantas e quasi nuncapeivlas.

Ferton che nus scrivevan questas lingias havevan nus entginas stialas da latg sin nossa meisa. Tut che ha admirau quella curiosa buccada lenn. Pli ch'in e pli che dus amitgs studiai havein nus schau lignar, tgei quei pudessi esser e la risposta fuva: «Franc idols», quei vul dir pigns fauls dieus, ch'ins venerescha en tiaras selvadias!

En tschien onns san ins era en Tujetsch nuot pli dad ina stiala da latg ed ins tschon-tscha lu leu forsa da quella, sco nus tschintschein oz il di dil barlot si Caschlè ni dil Mattias tudestg, che mava dil Rottenberg en a cavagl sin in buc alv... Il niev vegn, il vegl sto ceder, denton sche mo il spért da nos buns vegls resta!

• • • •



Il Marti

Ei era puspei in di da stupenta bialaura. Odem igl uost er'ei. Nus sesanflavan a Sedrun sin Cadruvi. Buc in'olma era perpeis, dano enzacons pigns affons, che fagevan termagls cun crappa e ruoga leu en in encarden. Tut era vid la lavur. Ditg essan nus stai cheu, havein mirau e turnau a mirar; havein schau passar e repassar tras nies spért da tuttas sorts maletgs da nossa cara val-lada. Il davos ha ei pariu, sco nus vesessen aunc leu el sulegl

ual sut sia casa il vegl «Marti». Sia comba lenn – ina memoria dalla lavina da Giuv 1836 – haveva'el fitgau encounter in crap. El pinava hontas – hontas da caffè. Denter en semiav'el dils onns, nua ch'el mava aunc frestgamein cun sia comba lenn a cavagl silla fiera da Ligiaun e vendeva sia marcanzia stiarls. Inaga ha el sco scurlau il tgau e detg tier sesez: «Era tier nus sei semidau dabiè!»

Il caluster – ei er'in niev, mava a tuccar da miezdi. Ina carina buobetta, la pintga Mariuschla, vegn da leugiu, pren nus pil maun e di: «La mumma o detg, tge Vus deies vegnir a gentar.» – Bien, sche mein nus pia. Denton in cordial salid e Dieus pertgiri vus umens sin Cadruvi!



Il plaz Cadruvi

# Selva avon 100 onns

Notizias culturhistoricas ord la Val Tujetsch

*Rimnei las restonzas, sinaquei  
ch'ellas mondien buc a piarder.*

Gion 6,12.

Cun ils 13 da december, il di da s.Lucia, 1908 ha Tujetsch celebrau in centenari da tresta memoria. Tschien onns eis ei stau, ch'ina stermentusa lavina ha rasau ora tema e sgarschur, profunda dolur e tristezia sur il pign vitg da Selva. Nus mein viadenasi ella tgeua vallada e schein puspei raquintar ina gada vegls vischins la tresta sort da lur cars per davons. Igl ei unviern, nus havein peda.

Il vitg da Selva, situaus en in parlet da praus e serraus en da duas varts da teissas, aultas spundas, ei staus exponius da vegl enneu a differents prighels. Selva ha el decours dil temps stuiu far atras grondas disgrazias. Perquei di era il poet da Selva, Giusep Steiner (†1904), stend a S. Brida ed alzond ses egls encunter Selva, cun buna raschun:

*Cheu ves'ins lu in'autra val,  
Mo quell'ves'ora bia pli mal.  
Gl'ei Selva, liug zun blasfemau,  
Ch'ha glieud e tiers pli ga satrau;  
Gie, cheu ei stau zun bia sgarschur,  
Ch'ha fatg anguoschas e snavur;  
Cheu san ins numnar la val da larmas,  
Cheu gida nuot, neginas armas!*

Selva vul dir uaul, e buca per nuot. Avon tschentaners, sco ins anfla aunc en veglias scartiras, vegneva Selva numnaus semplamein «im Holz». Pli daditg era la spunda dentier Carmihut e las Petgas surratga cun uaul. La gronda casa dubla, che la claustra da Mustér possedeva ina gada a Tschamut, era baghegiada (era ils plantschius!) cun quaders, ch'ins haveva pinau sillla spunda sur Tschamut encunter Scharinas. Pli tard formava quei uaul ina schetga e negin astgava pinar cheu lenna, ni sin il siu, ni sin quei dalla vischnaanca. «Mintga streh tgèsa in taler strof.»

Priu ora in pign circuit, igl Uaul da Rusas ual sur Selva, ei quella tenda uaul svanida ussa totalmein. Schebein quei ei daventau tras barschament, ni sch'igl uaul ei morts giu plaun e plaun, savein nus buca dir. Tgunsch sa il davos esser stau il cass. Nus fagein gie onn per onn l'observaziun, ch'ils uauls da maun sura, sco per exempl Liets, Uaul Flurin e Camischolas, van cun ried anavos. Els cloman tier als habitonts da Tujetsch da plantar en niev uaul ellas largias, sch'ins vul buca riscar il medem prighel da lavinas sco a Selva. Quei savess tgunsch daventar cul temps per il vitg da Rueras. Sche la lavina meina in di ils baghetgs dil mises da Mila giu ella Rufna, sche stein nus mal, denton sesmarvigliar savein nus buc. Plantei en uaul!

Denton buca mo las spundas, era la val sezza da Selva era ina gada cuvretga cun uaul. Dadens il vitg enagiu sextenda dapresent in grond toc terren humid, numnaus Las Palius. Onns da bialas stads portan quellas fein e risdiv en abundonza, mo arar san ins mai ellas. In pur ha avon onns empruau d'arar si in toc ed il pli grond avantatg ch'el ha giu da sia stentusa lavur ei stau, ina gronda pluna cuscha e lenna. Selva haveva pia dad in temps uaul en abundonza; ussa eis ei scart da lenna e quei ton pli, ch'era igl uaul da tschei maun dil Rein setila pli e pli encunter l'aua Nual, ferton ch'ils pegns da Plaun Viradas vegnan era pli rars. Avon temps ei cheu bein enqual pegg vegnius daus fiug per spuentar igl uors.

Il vitg da Selva ha dapresent 72 habitants cun 12 ½ fiugs e 13 casas. Igl onn 1853 dumbrava Selva 76 olmas e 17 casadas. Tenor ina exacta statistica, fatga da sur decan Giachen Antoni Degonda 1768, haveva da gliez temps Selva 96 habitants cun 19 fiugs. Da quels eran 5 umens e 2 femnas absents. Sche ins pareglia las famiglias da lezzas uras cun quellas dad ussa, sche dat ei la suandonta survesta:

| <b>1768</b>        | persunas  | <b>1909</b>                 | persunas  |
|--------------------|-----------|-----------------------------|-----------|
| Riedi              | 20        | Venzin                      | 37        |
| Werth (Würth)      | 19        | Peder                       | 18        |
| de Curtins         | 12        | Loretz                      | 9         |
| Hetz (Hütz)        | 12        | Giger                       | 5         |
| Peder              | 8         | Berther                     | 1         |
| Berchter           | 6         | caplon Elvedi cun fumitgasa | 2         |
| Curschellas        | 6         |                             |           |
| de Gonda           | 5         |                             |           |
| Cundrau            | 3         |                             |           |
| de Flurin          | 2         |                             |           |
| caplon Laimpach    |           |                             |           |
| cun mumma e niazza | 3         |                             |           |
| <b>Total</b>       | <b>96</b> | <b>Total</b>                | <b>72</b> |

Avon tschentaners sesanflava il vitg pli anora. Perdetga da quei ei il num «Tschevitg» = tschei vitg, ch'ils praus dador Selva portan aunc ussa e nua ch'ins encorscha aunc plirs suloms. Probabel ha ina bova giud la Val da Clavausura ruinau il vitg vegl ni schiglioc sfurzau ils habitants da seretrer pli anen. Ch'igl ei rut ora cheu ina gada ina gronda bova, muossan claramein las numerosas muschnas, che surtraian per grondissim donn ina extendida squadra dil meglier terren.

Era il fiug ha visitau Selva cun sgarschur e devastaziun. 1785, ils 15 d'october ei igl entir vitg barschaus giu. Sulettamein la petga dil begl seigi restada intacta. Il fiug seigi ruts ora ella casa dallas «Mihellas», ual sut la baselgia, ferton ch'ina femna seigi ida sur combras en cun cazzola per stuppa. La paupra glieud eri dalla tema ed anguoscha

tut confusa, aschia ch'ei savevien dustar ni fiug ni auter. Ina dunna seigi ida en nuegl ed hagi priu ora las cadeinas senza catschar ora ils tiers. Da cheu deriva probablamein l'ordinaziun dil vischinadi, che negin astgi luvrar cun glin (spatlar, tscherschar...) da cazzola.

En quella disgrazia ei era la baselgia, consecrada da uestg Josef Mohr ils 13 da zercladur 1630 en honour da s. Gion evangelist, s. Paul e s. Valentin, barschada giu. Tier la reconstrucziun dalla nova baselgia seigi in cert mistral Mirer da Sursaissa e Fidel Condrau da Rueras stai gronds benefacturs. En quei barschament ei era igl urbari vegl daventaus ina unfrenda dallas flommas. Il present urbari ei vegnius tschentaus si per cumissiun dalla Curia 1791, ils 13 d'avrel dil plevon da Sedrun, sur Vigeli Venzin cun ils ugaus dalla caplania Remigius Cursellas e Leci Sievi e gerau statalter Gion Hasper Riedi.

Schebein ei existevi gia avon 1630 ina baselgia a Selva, lein nus buca dir. Nus savein strusch crer.

Pervia dalla fundaziun d'ina caplania a Selva han ils vischins da Selva e Tschamut giu endamen cun uestg Gion VI Flugi d'Aspermont 1658, essend el vegnius quei onn a Tujetsch per cresmar e far visitaziun. Definitivamein ei il benefeci dalla caplania vegnius fundaus pér 1665 ed approbaus dalla Curia episcopala ils 13 da mars 1666. Deputai da Selva e Tschamut ein stai serendi tier igl uestg cun ina brev da landrehter Conradin de Medell (†1. zercladur 1691) il qual ha giu recumandau cauldamein la caussa da ses cumpatriots. La brev da landrehter Conradin sesanfla egl archiv episcopal a Cuera e porta sia arma cun il datum: «Davetsch den 10. Merzen 1666.»



La baselgia da Selva

La pervenda pertava all'entschatta 160 renschs (circa 272.-frs.). Sco emprem caplon da Selva anflein nus Pieder Callenberger, ch'ei staus leu entochen 1681.

• • • •

Il pli grond inimitg da Selva ei denton adina la lavina stada e quei da duas varts. Va il viandont temps da stad dil stradun viadenasi encounter Tschamut e mir'el giu encounter il vitg da Selva, sche observa el, che tutt baghetgs, pustai sisum il vitg, han ina ferma ustonza en fuorma da cugn e dian ad el: Igl inimitg smanatscha cheu da surengiu! Quels mirs grisch-ners, surcarschi cun pastg, dattan al vitg in serius aspect, e sez la baselgia fa cheu negina excepziun.

Seferma il viandont empau e mira el gradagradvi, da tschei maun dil Rein, sche vesa el in'aulta, lada, teissa spunda, surcarschida cun pastg, bostga e draussa. Enamiez quella, gest en fatscha al vitg, mira neuvigiu cun seriusa tschera ina aulta val en fuorma da dartguir, la Val Ruinatsch, nua ch'il nauschaspért da lavina avdescha. Il vitg schai bein circa 500 m naven dil Rein e circa 100 m pli ault, ch'il vau dall'aua, nuotatonmeins tonscha, sch'ei sto esser, schebein il buf, sco era la lavina sezza cun lur devastonta forza il vitg beinmaneivel. Aschi stermentusa ei la furia dad ina lavina en nossas muntognas! Il prighel ei ussa buca pli schi gronds sco avon onns, denton el ei aunc adina cheu. La Val Ruinatsch han ins gia da decennis enneu entschiet a segar ora e pinar ora la draussa ed effectuau cheutras, che la neiv vegn giu quasi dafertontier senza far donn, ferton che la neiv sefermava pli daditg vid il liung e spess pastg, vid bostga e cagliom e rumpeva per ordinari giudora en furiosa, cumpleina massa pér encounter la primavera, cura ch'ei curdav'en la marschauna.

Era da maun sura ei il prighel svanius per part. La vischnaunca ha avon onns cun susteniment dil cantun e dalla confederaziun plantau en cun gronds cuosts uaul sur Selva si e menau si tscheu e leu rempars e foss per retener neiv e bova. La giuvna plontaziun prosperescha e porscha, Dieus seigi ludaus!, onn per onn pli consoleivla segirezia e meglier schurmetg.

Quei che augmentava aunc il sterment digl unviern als habitants da Selva, era da lezzas uras la munconza d'ina buna e segira via encounter Rueras. La spunda denter Selva e Carmihut ei aulta e fetg teissa e perquei prigulosa da lavinas. Beinduras vegnevan ei perquei serrai giu da tutta communicaziun cun l'ulteriura vallada, ed igl ei schabegiau, ch'ins ha stuiu refierer sepulturas per plirs dis ed ira la finala aunc da tschei maun ora cun quellas.

Il stradun dad ussa, baghiaus leu atras 1863 ha levgiau la communicaziun entras ina megliera via, mo la calamitad pervia dalla lavina ei aunc adina la medema. Nus havein mai saviu capir, co ins ha astgau dar quella direcziun al stradun denter S. Brida e Tschamut. Quei ei, sil plipauc detg, imperdunabel! Il toc via naven digl Uaul da s. Brida entochen Tschamut ei buca mo fetg prigulus temps d'unviern pervia da lavinas, cunzun ellas Vals; temps da primavera, nua che il terren sesgreglia, e temps d'atun, nua che cauras e nuorsas pasculeschan leu, ei quei toc via tscheu e leu era prigulus pervia dalla



Selva

crappa. La suletta correcta e segira direcziun pil stradun fuss stada tras Carmihut, lu ina punt vi sin tschei maun da sum en trals mises semanond sulla punt vedra neu si tral vitg Selva, leu grad en e cun in per carauns da Crestas si a Tschamut. Ei fuss buca stau la pli cuorta lingia, denton senza dubi la pli segira e la pli comunizeivla per ils Dadens gl'uaul e che havess ultra da quei era purschiu in'emperneivla variaziun pigl egl, ferton che la presenta, grada via ei da snueivel gronda monotonia. Igl ei vegniu falliu cheu da differentas varts. Era certins filosofs da Selva han da sias uras buca muncau da clamar: «La via stu ira sé della pastira ain!»

E lu per cass ch'il stradun dall'Alpsu vegness tenius aviarts temps d'unviern, sco ins sa forsa aunc haver speranza ina gada cura che la viafier ei tochen Mustér, – quei toc via fuss staus segirs, sche buca grad dil tuttafatg, tonaton per la gronda part.

• • • •

Suenter quei ch'ils da Selva han giu lur baselgia e lur agen caplon, han els giu in bien ton meglier e stuevan buc ira ton «on Tujetsch», sco els havevan per moda da dir, cura ch'els vargavan ora igl Uaul Tschuppina. Biars onns, aunc ditg suenter che Rueras e Selva havevan lur agens spirituals, stueva tut ir, firaus e dumengias, ella farria a Sedrun a messa e quei sur tut onn ora. Ei ha dau bia da far, bia scrivems e deputaziuns tiella Curia, entochen ch'ils da Selva e Tschamut han saviu frequentar leuen il survetsch divin, priu ora las fiastas grondas, ed entochen ch'ils vischins da Rueras han saviu star grad eri, priu ora las dumengias denter s. Placi e la dumengia dil rusari, nua ch'els ston aunc adina serender ella farria. Era tier funcziuns da bara e tier uffecis generals stuevan ils caplons ir firaus e dumengias cun la messa ella baselgia parochiala, sch'ei vegneva garegiau, e lu era tuts venderdis Cureisma.

Cura che quellas obligaziuns ein vegnidas sluccadas, ei vegniu mantenu denton il dretg, ch'il plevon dalla vallada hagi da proverder ils malsauns dall'entira vischnaunca e ch'il Sontgissim astgi vegnir salvaus si mo ella baselgia parochiala.

Ils vischins da Selva han stuiu haver ditg pazienzia en quei punct. Pér ils 11 d'october 1842 han els finalmein survegniu la lubientscha da Ruma da salvar si per adina il Sontgissim en lur baselgia e persuenter havessen els giu da pagar 80 talers, ch'ein denton sin supplicar dil pauper vischinadi, vegni reduci sin  $19 \frac{3}{4}$  talers ni 65 flurins 50 rizzers en valeta da Cuera = circa 111.– frs.

Cura ch'il caplon da Selva ha survegniu il dretg e l'obligaziun da proverder ils malsauns, savein nus buca dir; scadin cass gia baul. Aschia capin nus ils plaids digl urbari, che dian: «Il beneficiat sto ver la cura d'olmas, va tier malsauns da Carmihut, Caspausa, Selva e Tschamut.»

• • • •

Aunc all'entschatta dil tschentaner vargau existevan entginas casas a Carmihut. Ussa seregorda negin pli da talas. In cert Nicolaus Biarth da Carmihut ha fatg si 1676 duas messas perpetnas, ina a Selva e l'autra a Tschamut, che vegnan aunc ussa legidas. – En ina casa a Carmihut vegnevei fatg ustria ed ils da Caspausa vegnevien giu bugen cheu e sedivertevien en quella casa; aschia raquenta ina veglia tradiziun. Quei ei forsa la raschun, pertgei ils perveseders da Caspausa ein aunc adina schi da buna veglia e tegnan lur solita perdananza!

Sur Carmihut orasi egl uaul era il corps dils catschadurs postaus, cura ch'ils Franzos, l'armada da Loison, ei ida cheu atras ils 6 da mars 1799. In punct strategic numero in! Cheu ha la resistenza da vart dalla Surselva encounter ils Franzos entschiet e cheu ein era las empremas unfrendas dils Franzos curdadas, ferton che l'emprema unfrenda ord la retscha dils Grischuns ei stada il ferm giuven Giachen Martin Berther da Camischolas, blessaus a Putnengia entras ina balla, e suenter mazzaus barbaricamein dils Franzos. Dis ed onns steva sut ils baghetgs da Putnengia sper ina muschna ina sempla crusch en memoria da sia curdada.

Era igl ugau pervenda da Selva, Rumias Curschellas, sesanflava denter la cumpignia da Tujetsch leuenasi egl uaul sur Carmihut. Vesend el a vegnend leugiu sutora in officier sin in cavagl alv, hagi el detg a ses camerats: «Ju vi tuttina mira, sch'iu gartegia bétga quel!» hagi tschentau sia buis sin in cusch, laghiau e sittau giu el.

Ils Franzos, che seigien curdai en quell'emprema attacca, seigien satrai ella Foppa Tschuppina ella paliu. In auter, ch'era curdaus pli anen, han ei runau giu els Ruvens da Funs, dadens Carmihut enagiu. Udend a raquintond quei ina ga pli tard in gagliard buob da Selva, Paul Giusep Venzin, seigi el ius giu en quels ruvens ed hagi anflau l'ossa e spert cattau adagur in grond e bi nuv mellen. La schuldada franzosa purtava mintgin ina terschola dil dies giu e giusum quella in nuv mellen.

Vesend ils da Selva a veginnd ils Franzos dador Tschamut, hagien ins tuccau da stuornas e tut tgi ch'era aunc leu, seigi fugius a Rueras, glieud veglia vi Surrein els baghetgs. La davosa persuna, che seigi ida ord il vitg, seigi stada Onna Catrina Riedi, maridada Deplaz-Venzin, mumma da sur Deplaz. Quella haveva il plan da veginir a Rueras e da leu fugir cun sia quinada si el mises Mila. Mo ella ei stada memia tard. A Selva seigien ils Franzos seteni si nuot, sulet ina ruosna hagien ei sittau el zenn grond.<sup>1</sup>

Onna Catrina ei arrivada tochen oragiu Funs, enagiu sut Carmihut, giu tiell'aua. Cheu eis ella fugida en in clavau e sezuppada ella stubla. Denton ha ella aunc giu la gagliardia e curascha da mirar tras las remas e da dumbrar l'armada, passond gest sura tras las Vals. Ella ha dumbrau biabein 1000 umens.<sup>2</sup> Ses treis buobs, da siat, tschun e quater onns haveva ella fatg fugir a Rueras tier la quinada Barla Turtè Condrau. Da leu naven ein quels treis vegni tarmess giu Surrein (S. Antoni) tier aug Carli, per far fugir a Nacla. Arrivond ils treis buobs a Sedrun, seigien els i dil Drun giu. Strusch fuvien els giu tiel-la punt, che las ballas dils Franzos schulavien sper els giu, scavond si neiv e tratsch. Gl'emprem, nunsavend tgei quei less dir, essend ch'els fuvien vid la marendo dall'onda Turtè, seigien els tuttina i suenter empau pli dabot. Arrivond ventireivlamein a S.Antoni, han lur parents tarmess els cun autra glieud enta Nacla en ina casa. Cheu fuvi serabitschau ensemes bia glieud. La sera hagien ei magliau ina suppa tuts ensemes; ils treis cumpogns seigien mani sut letg en. Il vegl da quels treis buobs ei stau sur Gion Giusep Deplaz ed ils dus auters ses dus frars d'ina vart: Flurin e Paul Giusep Venzin.

Gion Fidel Venzin da Selva, padraster da sur Deplaz, haveva giu ligiau tut sia carn secca en in blah e zappau quel a Carmihut, giun Funs davos ina pluna lenna enagiu. Persequitond ils Austriacs ils Franzos dalla Val Tujetsch viaden, eran ils Austriacs stai sefermai enzatgei a Selva. Denter auter han els era giu anflau il blah carn e naturalmein i cun tut. Quei ha giu fatg mal al pign buob Deplaz. Pertgirond el in di ils tiers ora sil pastg, ha el entschiet a ruclar giu crappa sin ils Austriacs, che eran secampai dador Selva. El leva cheutras prender vendetga per la carn criua engulada. La crappa hagi giu disturbau la schuldada e fatg donn vid dus cavals. Mirond danunder la crappa vegni, han els cattau adagur il buob e tarmess in per schuldaus e schau pigliar el. Quels han menau il buob enagiu Selva ed il bab hagi stuiu dar cun ina torta bravamein avon lur agens eglis, entochen ch'els seigien stai cunteints.

Sur Deplaz ha studiau pli tard plirs onns a Salzburg. Sesanflond el ina sera ell'ustria, raquintavan sin in'autra meisa plirs officiers sur l'uiara encunter ils Franzos el Grischun e denter auter era il schabetg cun il curaschus buob da Selva. Student Deplaz seigi s'ap-

---

<sup>1</sup> Il zenn, che purtava quella noda, ei sefendius igl atun vargau (1908) e vegn uss culaus danovamein ad Aarau.

<sup>2</sup> Tenor ina nova scartira «Le massacre de Dissentis» par R. Graffin. Paris 1908 dumbrava l'armada da Loison sul Cuolm d'Ursera 1200 umens.

proximaus alla meisa dils signurs ed hagi cun lubientscha ofniau, che quei buob da Selva seigi el staus. Cun gronda curtesia hagien ils signurs officiers priu il student en lur miez e tractau el sco lur meglier amitg.

Tier la davosa retirada dils Franzos tras la Cadi sur il Cuolm d'Ursera sut general Suchet han biars umens dalla Cadi stuiu purtar suenter bagascha e proviant entochen vi d'Ursera. Umens da Mustér e Tujetsch hagien stuiu furnir il paun da Tujetsch ad Ursera. Ina partida umens seigi vegnida cun paun entochen Selva e bess quel en in ladretsch e quei paun seigi restaus leu. Quei seigi stau in grond avantatg per ils habitonts da Selva. Ei havessi giu dau fomaz, sch'els havessien buca giu da ruir empau da quei paun. In cert Andriu Schnoz da Sumvitg seigi en consequenza da quels strapazs sur il cuolm vegnius malsauns e morts a Selva ils 18 da fenadur 1799.

Era femnas da Tschamut e Selva han stuiu purtar bagascha dils Franzos. Denter quellas sesanflavan treis da Tschamut: Turtè Schmed, Culastia Riedi<sup>3</sup> ed Onna Maria Riedi. Sil cuolm ei in cavagl daus el lag e sefermaus denter crappa, aschia ch'ils Franzos han buca rabbitschau ora e stuiu schar anavos el. Returnond las femnas d'Ursera han elllas emprau vid il cavagl e finalmein rabbitschau orasi el. Tut ledas d'haver in cavagl, han elllas menau quel a Tschamut e schau pascular el leu. Marods denton, ch'ein passai leu atras entgins dis suenter, han enconuschiu il cavagl e priu el cun els.

Dad in temps fuvil paun snueivel scarts dadens gl'aul, a Selva e Tschamut. Per l'ina havevan els pauc e schliet terren per metter ora graun e per l'autra stuevan els vegnir a Rueras per schar moler e far paun, sco ei schabegia aunc el temps present. Jamnas e meins ora havevan ei beinduras negin paun. Cumprar, sco uss, savev'ins aunc buca da lezzas uras.

Ei vegn raquintau, che duas femnas vegnevien temps d'unviern mintga sera ensem a filar. Ellas han teniu cussegli da far ina sera in bien puschechn. Suenter ditg secusse-gliar, tgei ch'ellas duessien far, han elllas concludiu d'ir la suandonta dumengia a Sedrun a messa e lu comprar leu in paun (sentelli paun segal!) e lu magliar ina sera paun detgavunda. Quei seigi stau il puschechn da tscheiver da quellas duas filieras!

• • • •

Denton, nus lein schar ruassar il paun da Selva e l'invasiun franzosa da 1799. Per Selva e Tschamut ei quella aunc buca stada schi nauscha; tut pli stermentusa per l'ulteriura Val Tujetsch e la Cadi, cunzun per Mustér. Per la Cadi ei l'uiara encunter ils Franzos stada dall'entschatta entochen la fin il pli trest eveniment da sia historia, buca perquei ch'ils Franzos ein vegni, anzi perquei ch'il brav e bien pievel ei vegnius surduvraus e menaus trestamein pil nas entuorn dils signurs, che stevan sut la pantofla da certas pussonzas

---

<sup>3</sup> Probabel la curaschusa giuvna, che ha battiu encunter ils Franzos en vestgadira d'umens.

e che vegnevan pagai persuenter. Il pievel senteva claramein en sesez, tgei ch'ei fass il meglier da far: Star «naturals»!

Nuot caracterisescha meglier quell'uiara en nossa tiara, ch'ils plaids, ch'ils purs schevan silsuenter en Surselva:

*La teila ei urdida el Tirol dils gronds signurs,  
Tessid'en Rezia e tratg'en culs cavels dils paupers purs!*

Tenor nossa perschuaision ein quels eveniments aunc ditg buca sclari si sufficientamein. In student grischun savess sefar cheu meriteivels cun rimnar il material cumpleinamein e publicar ina historia critica sur l'uiara dalla Surselva encunter ils Franzos.

• • • •

Co stev'ei culla scola a Selva? Sco en biars auters loghens, aschia ei era a Selva il caplon staus igl emprem scolast e la casa pervenda l'emprema casa da scola. E quei ei stau il cass ditg avon che la vischnaunca sco tala, ni il stadi hagi marveglia ni fetschi enzatgei da quellas varts. Ils differents vischinadis cun il spiritual alla testa han giu il qui-tau per la scola. Il spiritual fuva per ordinari pagaus nuot per dar scola, ni quasi nuot. In interessant document da quellas varts cul datum 1677, ils 15 d'uost «Pacten und Conditionen wie man einen Caplon aufnimmt zu St. Jacob» di denter auter arisguard las obligaziuns d'in caplon a Rueras il suandon:

... «Zum Triten allen Werktagen ohne kein Beschwendnuss oder Lohn 2 Malen zum Tag Schuol halten.»

Tenor in auter document da 1765 retergeva il caplon da Rueras per far scola als affons da Rueras e Giuv<sup>4</sup> sco pagaglia da mintga fiug, hagien els affons ni buc, u ina vaulta lenna ni 20 rizzers, pressapauc 57 raps.

Era a Selva prescriveva ina obligaziun dil beneficiat, la quala datescha senza dubi aunc digl urbari vegl, sco suonda:

... «Sechtens. Soll Er ohne weiteres Interes Schull halten, und die Kindern unterrichten.»

E tgei stentusa lavur fuva quei da gliez temps far scola senza negins adattai cudaschs e cundrezs!

Da sur Deplaz, staus caplon a Selva da 1818–1859, savein nus, ch'el deva scola en sia casa il temps dils dis cuorts, il bia da s. Catrina (25 da november) entochen dumengia da palmas. El entschaveva mintgamai ualtri marvegl e fageva scola tochen mesa las endisch e pér lu celebrav'el la s. messa. El mussava da leger, scriver e far quen. Ei era in um pign, curte-

---

<sup>4</sup> In uclaun, dil qual ei exista mo la baselgia pli, s. Bistgaun.

seivel, temprau e tuttavia versaus ellas scienzas. El haveva giu fatg ses studis, schibein dil gimnasi, sco era dalla teologia a Salzburg ed era cunzun bein da casa ella historia. Nunhavend all'entschatta in cudisch d'ABC, vegnevan ils affons cun ina slonda en fuorma da palutta en scola, sin la quala ils bustabs eran tagliai ora cun in conti. Il bien caplon mussava e schava dir si ils bustabs. Suenter haver fatg in temps quei exercezi, prendev'ins in cudisch da mussaments (ductrina) ni d'oraziuns ed entschaveva a bustabiar ed arrivar aschia tier il leger. Gion Gaudios Riedi da Tschamut, bab da sur Gion Evangelist, capeva bein da tagliar ora quels bustabs ed era aschia per bein enqual affon il furnitur digl ABC da lenn.

Denton er'ei cumpariu gia 1805 a Bregenz in ABC en lungatg sursilvan, mo tier nus ha per igl ABC da pader Beat Ludescher<sup>5</sup> giu in desiderau esit. Era la bibla da pader Sigisbert Frisch (1823) ei stada da grond nez per la scola egl emprender da leger.

Mender mav'ei cul scriver. Sur Deplaz encureva ensemplattas, tablas da scriver per ses scolars e cun gronda breigia tagliav'el ora greffels ord toccanaglia da plattas, ch'el partev'ora a sia scola.

Arisguard il quen existev'ei gia dus cudischs, in da Steinhauser (1808) e l'auter da pader Beat (1809), mo sco ei vul parer a nus, sche fuvan quels cudischs darar els mauns dils scolars, essend che nus havein strusch anflau quei cudisch en casas veglias. Pli da vegl vegnev'il quen fatgs a tgau e nudaus si, sch'ei fageva da basegns, cun in conti sin buccadas lenn alla moda dallas stialas da latg. Aschia havein nus aunc enconuschiu in vischin da Cavorgia, Leci Balzart, che ha purtau ina gada ad in vischin la mesira d'in toc fein en bratscha e quartas, tagliaus ora sin ina stiala lenn.

Entuorn igl onn 1850 ein ins setratgs culla scola da Selva a Sutcrestas. Igl ei vegniu fatg scola leu en casa pervenda, nua ch'ei era gia tier il baghegiar previu in local da scola. Plirs onns han ins dau scola en ina casa privata da Flurin Venzin gest sper la caplutta, nua ch'il scolast haveva era siu tenercasa e combra da maner. Che la famiglia Venzin hagi retratg enzacu, enzatgei tscheins persuenter, savein nus strusch crer. 1863 han ils vischins da Selva e Tschamut baghegiau ina atgna casa da scola a Sutcrestas. Veggend denton il diember dils scolars pli gronds e semussond la casa da scola stagn pintga, han ins puspei dau scola en casa dalla caplania, sco igl ei aunc ussa il cass e quei ton pli, ch'il caplon e habitants restan ussa temps d'unviern a Selva. Nuotatonmeins semuossa quei local ussa era memia pigns e meins qualificaus, aschia che la vischnaunca vegn cul temps a stuer far quens da baghegiar ina nova casa da scola per Dadens igl uaul.

Suenter sur Deplaz han seculars surpriu la scola; plirs, sco en biars auters loghens, senza negina preparazion ni ulteriurs studis, auter che la scola da vischnaunca. Els havevan pintgas pagas, denton era pintgas expensas, essend ch'ils vischins gidavan ora generu-

---

<sup>5</sup> A.B.C. u Regla de leger da pader Beat Ludescher. Quinta e pli gronda ediziun 1839, Cuera; 48 pag.

samein ils «schuelmeisters» en lur tenercasa, ch'els fagevan per ordinari sez. Aschilunsch sco nus havein saviu intervegnir, han suandonts scolasts ni scolasts dau scola a Sutcrestas:

Gion Paul Riedi da Tschamut, circa dus unviarns.

Balzer Antoni Curschellas da Surrein-Tujetsch, circa dus unviarns.

Gion Battesta Mathiuet da Cumpadials, in unviern (22jamnas), paga 120.– frs.

Gion Giusep Monn da Cumpadials, in unviern.

Rudolf Cavelti da Sagogn, dus unviarns, 1861/62 e 1862/63; paga 150.– frs. – Haveva era da scaldar la pegna dalla scola, nua ch'ei vegneva duvrau bostga (striaunas). Cavelti, in giuven da 16 onns, ha giu scret inagada a casa sur da quei, per dar ina idea dall'altezia, enten la quala el sesanfli!

Gregori Capeder da Curaglia, dus unviarns, 1863/64 e 1864/65.

Ei staus igl emprem, che ha dau scola ella casa nova.

Stiafen Albin da Mumpé-Medel, dus unviarns, 1865/66 e 1866/67.

Josef Steiner da Cumpadials, treis unviarns, 1867/68 – 1869/70.

Rosa Berther da Selva, dus unviarns, 1870/71 e 1871/72.

Duri Riedi da Rueras, 36 unviarns, 1872/73 – 1907/08.

Onna Maria Caplazi da Surrein-Sumvitg, 1908/09.

• • • •

Ussa lein nus raquintar enzatgei sur la posta da Selva. Sche nus sbagliein buc, sche sei pér denter 1850 e 1860 vegniu fatg enzatgei uorden da quellas varts. All'entschatta mava in pot naven da Rueras, duas ga per jamna – dumengia e mesjamna –, da tgei uras ch'el leva e quei mo tochen Selva. El haveva negina mondura.

In respectiv regulativ da 1858 ordinava, ch'il pot da Tujetsch stoppi ir treis gadas per jamna – dumengia, mesjamna e venderdis – naven da Mustér allas tschun dalla damaun ed esser a Selva in quart avon las nov. Gl'unviern allas siat naven da Mustér.

In regulativ postal da 1859 haveva quitau pils Dadens igl uaul sin suandonta moda:

|                  |                         |                                     |
|------------------|-------------------------|-------------------------------------|
| Abgang in Rueras | 8 Uhr morgens im Winter | Sonntag,<br>Mittwoch<br>und Freitag |
|                  | 7 Uhr abends im Sommer  |                                     |
| Ankunft in Selva | 9 Uhr morgens im Winter |                                     |
|                  | 8 Uhr abends im Sommer  |                                     |

Stau fatg la via nova sul Cuolm d'Ursera, cursava la posta temps da stad, per l'emprema ga calonda fenadur 1865. L'auter temps mava il pot naven da Rueras treis dis per jamna – mardis, gievgia e sonda – e quei tochen Tschamut. Las siat dalla damaun naven

da Rueras, las otg a Selva e mesa las nov a Tschamut. – Dapresent sto il pot ir mintgadi a Selva e Tschamut, priu ora las dumengias e curdond en grondas nevadas. Ed ussa, tgi ei stau igl emprem pot da Selva? Martin Felici Schmed da Rueras, quei brav e sempel um, dil qual nus seregurdein aunc aschi bein, sco ei fuss oz. Ei era in pauper schani, denton in um dad aur, cuntents e pazients sco Job. El haveva il bia duas vaccas ed ina stiarla, enzacons tiers manedels, ch'el perveseva aunc tier far pot tut unviern ora en sia solitaria acla «Val» sper Dieni. El fuva nies meglier vischin, fageva reguladamein pliras ga per di sia staziun tier nus, laschond anavos siu uorden da posta e sia mondu-ra, ferton ch'el serendeva en sia acla. Sia feglia Filomena pertava temps d'unviern, quels dis ch'el mava a Selva, il solver tochen Dieni, dis ruhs era il gentar. Duront sia tschave-ra era el leu cun nus e raschunava bugen cul bab.

Cun quei che Felici haveva giu fatg pli daditg e fageva aunc ussa denteren empau il marcadont da stiarls e cavals, raquintava el il pli bugen da ses viadis e da sias aventuras a Sebiast, Ligiaun e Varesa, nua ch'ei stuevan vargar giu schliats onns. A nus buobs fageva sia raquintaziun dil bandit «Malerba» adina la pli gronda impressiun. «Malerba» era il capo d'ina banda laders, che periclitava la via sur il Lucmagn e che haveva principalmein en egl ils marcadonts, che returnavan cun lur tschentas pleinas d'aur dalla fiera da Ligiaun. Felici era fiug e flomma cura ch'el vegneva cun siu «Malerba». – Landjeger Duri Maculin da Rueras ha alla finala giu pudiu tier il «Malerba» ellas alps da Scona e fatg fin a quei prigulus cumpogn cun sia suita. Sentelli, che Felici ludava buca pauc la curascha e forza da Maculin!

Haveva Felici finiu siu solver, sche semtgava el da far siu tur a Selva; metteva entuorn schui la termenta tastgacurom, enten la quala ei er'en mintg'enzacu ina brev si da «Schuobalan» e lu pli tard, la sonda, in per numers dalla Gasetta Romontscha, aschiglioc schuber vivamein nuot. Lu vegneva in hazer caput blau cun nuvs alvs, grevs e liungs, che Felici stueva, malgrad sia pulita grondezia, runar suenter ella neiv. Alla finala suandava la capiala aulta, dira e steria, cun duas ualti grondas ruosnas da mintgamaun dil cup, che Felici hagi, surtut frestg il tgau – in um da circa 60 onns! Felici era cunscienzius, denton era pratics e metteva si mintgamai igl emprem sia capetscha e per lu la capiala.

En verdad, ina empau fasierlia mondura, snueivel tappa sisum la Val Tujetsch, per in pot da Selva! Nus essan savens sesmarvegliai pli tard, ch'il bien Felici ha buca tratg vi Sumsassi la capiala daleugiu, quei malengasi pategl! Da basegns e pratic fuss ei stau: in pign, lev turnister, ina cuorta pelerina da launa, ni craga sco nus schein, in per liungas osas tochen sur schanugl, ina capetscha da pial uors cun ureglas, in pèr vons ed in fest liung enferrau. Quei fuss stau e fuss aunc adina la megliera mondura temps d'unviern per in pot da Selva.

Felici ha stuiu far biaras gadas gronds strapazs sin siu tur. Beinenqual ga ha el giu de-tgavunda. Ei ha era buca muncau, ch'el ha stuiu traversar il Rein a Carmihut e sfullar tras la neiv da tschei maun per arrivar a Selva e cumplenir sia obligaziun. E tgei paga retergeva quei um? All'entschatta 35.–frs. per onn, che landrehter A. Condrau haveva

cumissiu da pagar ora. Per ordinari scheva Felici dar in sac segal ed in sac salin persuenter. Pli tard, nua ch'il tur mava tochen Tschamut, fuva la paga 100.–frs. e mintga tons onns la fasierlia mondura.

Beinduras fageva sia feglia il tur ordinau e turnava a casa cun ina schuba schelada sco fier. Ina gada eis ella arrivada tochen las Vals. Ina gronda lavina era vegnida buca daditg. Nunpudend e nunsavend ir vinavon, ha ella entschiet a grir e pudiu susentar entgins umens, che stevan a Selva avon baselgia – ei era ina dumengia –, ils quals ein vegni encunter e priu giu las caussas dalla posta e schau turnar anavos la giuvna. Felici turnava savens tard a Dieni e miez schelaus. Selamentar era mai sia moda. El ses-caldava empau, prendeva cun bien appetit siu gentar, raquintava puspei dalla fiera da Ligiaun, dils mulissiers, dil strangugl che ses cavals havevan enqualga e natural dil «Malerba» e dil landjeger Maculin e mava puspei a perver ella Rufna.

Felici haveva tscheu e leu miseria cun lenna da barschar e sche Filomena deva vid ils pleders da slondas, sche fuv'ei buca bialaura. Mav'ei encunter la primavera, sche haveva Felici per ordinari scart da fein el mava enasi Valmala e fageva nitschuns e beinduras era siu davos refugi a Dieni: «Tge té Duri desses in blah fain!»

Pot Felici haveva in oreifer bien cor. Dalla fiera da Ligiaun fuss el mai turnaus senza purtar a nus buobs enzatgei, il bia in cunti per in. Quei havevan nus il pli bugen ed era il pli da basegns, perdevan gie quel per ordinari entochen l'autra fiera. Sinaquei che nus sefigessen denton buca mal en nossas differentas manipulaziuns, haveva il cunti il bia in «péz rodund».

Da Daniev fuv'el igl emprem vischin, al qual nus aguravan in legreivel bien niev onn. La buna mumma visava il Felici, da nuota dar enzatgei e far cuosts. Quei stridava el. «Quai fuss ina biala, bétga dar dus raps a quels buebs!» Felici haveva bugen nus affons e nus era el. Havessen nus saviu far enzatgei per el, nus fussen i tras in fiug. Nus encurevan sias nuorsas e cun bien cor gidavan nus, cura ch'el mava a mises ora Sisum-Praus.

Suenter la mort da sia dunna, ina pietusa, buna femna, steva Felici persuls cun sia feglia. Dus feglis eran serendi gia da giuven el «Schuobalan» ed ein restai leugiu. Felici ha fatg pot da Selva entochen sia mort. Pudev'el buc ir, sche mava sia frestga, curaschusa feglia, la quala ha fatg bien, oreifer bien cun siu bab. Ell'ei semudergiada, ha luvrau e spargnau cun el onns ora e – Niessegner ha benediu rehamein. Ell'ei maridada pli tard ed ha tratg si ina brava famiglia, che fa era vinavon il pot da Selva tier aunc haver il biro postal da Rueras. Martin Felici ei morts ils 2 da mars 1874 en la vegliadetgna da 69 onns ed avon treis onns (1906) ei era sia feglia Filomena ida ella perpetnadad. Ils buns vischins rauassien en sontga pasch !

• • • •

Remarcabel eis ei, che Selva e Tschamut ein mo circa in'ura lunsch naven dils ulteriurs vitgs da Tujetsch ed han tonaton en biars plaids ina tuttavia autra pronunzia. Nuslein allegar mo enzacons exempels.

| <b>Selva e Tschamut</b> | <b>Tujetsch, (Sedrun, Rueras)</b> |
|-------------------------|-----------------------------------|
| affon                   | uffaun                            |
| caglia                  | tgaglia                           |
| camon                   | tgamon                            |
| encarden                | entgarden                         |
| marenda                 | marianda                          |
| perdananza              | perdanaunza                       |
| perdevons               | perdevauns                        |
| venter                  | vianter                           |
| sera                    | sèra                              |
| dens                    | dians                             |
| contents                | cuntiants                         |
| tonaton                 | taunataun                         |
| denton                  | dentaun                           |
| anavon                  | anavaun                           |
| ensemem                 | ensiamen                          |
| é?...                   | tgei?...                          |

Sco ins vesa ord quels exempels pronunzieschan ils Dadens igl uaul biars plaids tenor la scartira; denton regia ei buca adina consequenza. Sche nus mein buc en errur, sche deriva quei particularmein dall'influenza dil lungatg dils caplons jasters, che Selva ha giu triepa dad onns. Plinavon d'entginas famiglias vegnidias neutier, sco per exempl Condrau, che deriva da Breil, Hitz da Sursaissa tudestga, las qualas ein vegnidias a Tujetsch all'entschatta dil 18 avel tschentaner, sco era dalla pintga communicaziun, che Selva haveva pli baul culs habitonts dall'ulteriura vallada. Quellas differenzas svaneschan denton ussa pli e pli, essend la communicaziun cun ils auters convischins dapresent pli cumadeivla e pli frequenta.

Las expressiuns: che te desses... che vus vegnisses... che te schesses... che vus purtasses etc., che nus havein gia udui dil pot da Selva, essend el staus nativs da Tschaumut, paran ussa da vuler svanir, ferton che quei fuva pli baul usitau a Selva e Tschaumut. Quellas expressiuns fan endamen il lungatg franzos cun siu conjunctiv. E nus cartein quei ton pli, essend ch'ei vegn raschunau, che la schlatteina Riedi, dad in temps ualti populada, seigi ina schlatteina franzosa. Dus frars Riedi seigien vegni ord Savoia; in seigi secollocaus a Sursaissa tudestga, l'auter a Selva e quel hagien ins numnau adina il «Savoiard». El hagi giu maridau ina certa Marionna Merian da Balzers (Liechtenstein), che fuvi a Selva in'excellenta apicultura e targevi ord ses biars aviuls onn per onn 200 renschs rendita.

Il num «Terlep» han ils Dadens igl uaul buca bugen, els considereschan quei per in surnum. Tgei quei plaid vegli atgnamein dir,lein nus schar explicar ils filologs. Ad interim manegein nus, che quei plaid savessi derivar da dus plaids latins: ter = treisga e lapis = crap, e vegli, dar d'entellir, ch'ils habitonts da leu seigien in pievel saun e robust, treisga pli dirs, ruhs e ferms, che crap. Ed en quei senn fuss ei buca surnum, anzi ina gron-

da honur, la quala els meretan en sesez era, essend ch'ei regia Dadens igl uaul quasi adina in'oreifra buna sanadad, aschia ch'els san strusch tgei docter e medischina vul dir.

Ch'ei seigi stau glieud ferma Dadens igl uaul, quei raquentan las plattas dalla punt-nuegl e dil nuegl sez da Gion Martin Peder amiez il vigt Selva, las qualas ins hagi pertau orasi dil Rein. Vi Surrein, el mises da Selva, hagien perfin ils Franzos giu respect avon in «Terlep», che pertavi dus curtès plein latg, in per maun ord tschaler. Ed ina Onna Catrina Riedi seigi sestratga vidaneu cun Franzos, che levien ir cun in briec pieun. Gronda e ferma glieud erien cunzun ils Hetzs e Peders. Selva viveva e viv'aunc ussa bia cun latgiras e quei mantegn la glieud sauna e robusta.

• • • •

Denton lein nus ussa resdar dad entgins trests schabetgs, succedi entras lavinas Dadens igl uaul, cunzun a Selva. Nus vegnin a relatar quei cronologicamein. Il material tier nossas notizias havein nus rimnau tscheu e leu ord differentas scartiras e tradiziuns. En particular havein nus fatg diever dils cudischs da morts nr. 5 e 6 ord igl archiv da Tujetsch. Plinavon igl urbari da Selva: «Unglück von Selva im 13. Tag des Christmonats. 1808» da pader Placi a Spescha ed entginas gasettas. Beinenqual vischin ha raquintau e comunicau a nus enqual caussa. A tuts nies cordial engraziamenti persuenter!

•

1708, ils 21 da mars, ein Gion Rest Peder e Simon Oliva vegni ella lavina dadens il vigt Tschamut.

1719, ils 10 da schaner, ein duas femnas da Selva, Catrina da Vienna e Maria Margareta da Vienna vegnididas ella lavina ellas Vals.

1730, ils 31 da mars, ei Martin Rumias Curschellas vegnius pella veta entras ina lavina a Vidauas sper Tschamut.

1736, ils 26 da schaner, ei Giuliana Schrefer da Tschamut vegnida tschaffada dalla lavina en la Val s. Martin e suenter dus dis cavada ora morta.

1806, ils 19 da fevrer, mesjamna dalla tschendra, ei la lavina vegnida giu dalla Val da Plaun (sur Selva) entuorn l'ina dil di ed ei ida cun ina casa dubla gronda, nua che la glieud eran per ventira fugi ual avon pign mument. Era in clavau dador baselgia cun enzacons tiers manedels ei vegnius sfraccaus ensemen; cun ils tiers gronds fuvan ins untgi ora il di avon.

1808, ils 12/13 da december. Quei ei stau la pli stermentusa lavina, che la historia rauenta sur Selva. Ei haveva dau ina nevada da treibratscha e miez, che tunscheva tochen si tiella secunda latta dil chischner. Quei fageva tema e sgarschur als paupers habitonts. Ei neveva e cuflava aunc adina vinavon. Baul fuva ei stgir e baul clar; alla finala fuv'ei aschi sgarscheivel, che biars ughiavan buca pli dad ir ord casa, da per-

ver e buentar lur animals. La cufla vegneva da tuts mauns cun tala vehemenza, ch'ins astgava buca setener si ordaviert, sch'ins leva buca riscar da vegnir tschocs e stinschen-taus vi.

La sera dils 12 da december fa il caplon, sur Pieder Fidel Weller da Sedrun, ch'era gia dudisch onns leu sco premurau pastur dallas olmas, aunc dir ils vischins in paternies, che Niessegner vegli pertgirar els dalla lavina. Els secusseglan lura sin tgei maun fugir, sisum ni giudem il vitg? Ils biars suspectavan e temevan il pli fetg la lavina dil Plaun e cartevan che giudem il vitg seigien ins il pli segirs. Auters temevan pli ferm la lavina da tschei maun, dalla Val Ruinatsch, e secartevan pli segirs sisum il vitg. Plein carezia e quita per lur venerabel caplon han ils buns vischins supplicau el da serender en il liug il pli segir, regurdond el vid la lavina avon dus onns, che hagi gie giu cuvretg en sia casa e la baselgia sisum il vitg. Sur Pieder ha engraziau per lur buontad e maniau, la divina providentscha ha destinau ussa mia casa per mei ed jeu vi restar en quella e parter cun vus il prighel, che smanatscha a nus tuts. Dividi en lur supposiziuns danunder la lavina pudessi vegnir, prendan els trestamein cumiau in da l'auter e serendan, tgi sisum e tgi giudem il vitg – biars per buca seveser pli sin quest mund.

Ei fuva profunda stgiraglia; l'aura aunc adina stermentusa. Ils suffels menavan la cufla cun vehemenza encunter las casas, che las preits tgulavan. L'ura haveva dau las dudisch. Ils vischins eran per part semess a ruaus, auters vegliavan e fagevan oraziun. Ei dat l'ina. Cheu, tuttenina rebattan las vals dad ina stermentusa camera. Ina sgarscheivla lavina rump'ora sisum la Val Ruinatsch. Entras la stremblida semetta era la spunda dadens ils Benaus en moviment e cun furibund fraccass e terribla forza sederschan sco in cametg las duas lavinas ella profunditat, sfraccond ensemes tut, tgei che vegn encunter. Arrivond giu el Rein sebettan ellas cun horribla forza neuvi sur in rieven si e pudend la lavina da Benaus (Benaults, Vanaults)<sup>6</sup> dar la direcziun in tec encunter la damaun, han ellas attaccau il vitg enagiudem e satrau quel anorasi encunter la baselgia. Allas casas sisum il vitg ha il buf scarpau si las slondas e purtau quellas tochen si tier igl Uaul da Rusas. La crusch e la cuppa dil clutger ein vegnidas ruttas e purtadas naven.

Sis casas ein vegnidas sfraccadas ensemes, ad ina autra fatg grond donn. Alla casa pervenda ei vegniu scarpau si il tetg ed urschegiau il gebel. Dils clavaus ein mo dus restai senza donn; in da quels fuva il clavau dalla pervenda. 42 persunas, pia circa la mesedad dil vischinadi, eran sut la lavina; 25 da quellas han anflau cheu la freida mort, ferton che las otras 17 han pudiu vegnir liberadas baul ni tard ord lur stermentus anguoschas. 37 armauls e circa 200 tiers manedels ein i sutsura.

---

<sup>6</sup> Sut ils Benaults schai il liug cul num la «Caltgera», nua ch'ei exista aunc ozildi restonzas d'in fuorn da barschar caltschina. La crappa da caltschina vegneva menada enagi dalla Val Ruinatsch.

Plein tema e snavur cuora sur Pieder ed arriva cun mala breigia en baselgia. El tucca da stuornas per dar avis als vischins da Tschamut ed als perveseders da Caspausa. Ils habitonts da Tschamut, che havevan giu udiu il fraccass dalla lavina, ein, udend ils zenns da stuornas, dai neutier cuninaga, ughiond lur atgna veta per porscher agid a lur sventirai convischins. Ils perveseders da Caspausa han ins per neu encunter di pudiu susentar. Era quels ein curri neutier, nunditgond il grondissim prighel, che la senda dil Calcogn enagiu stueva porscher en quella stermentusa nevada.

La glieud mitschada va cun palas e fassuir per cavar si ils sventirai. Il caplon, accum-pignaus dad in buobet, Vigeli Venzin, cun ina latiarna e provedius cul s. ieli, va prua-mein entuorn e porscha agid e consolaziun als moribunds cavai si. Sco pader Placi a Spescha raquenta, ha il caplon «exercitau miraclas da vertids e valerusadad per spin-drar ses convischins.»

La lavina era vegnida il mardis endamaun. Dalla vischnaunca anora han ins per l'au-ter di, la mesjamna, pudiu dar is. Tut consterni e plein premura per vegnir en agid a lur paupers convischins ei ina partida umens semessa cun inaga sin via encunter Selva. Alla testa sesanflava il plevon da Sedrun, sur Sep Lurenz Schmed, nativs da Rueras, in um da sissonta onns. Essend denton la via suten serrada giu e tier quei aunc fetg prigulusa pervia da novas lavinas, han quels umens stuiu prender la via da Sudada a Caspausa e dil Calcogn enagiu. Tgi ch'ei enconuschents cun la cuntrada, vegn a saver s'imaginar, tgei enorm strapaz quei ei stau per quels bravs umens.

• • • •

Sil plaz da sventira ei vegniu luvrau cun tutta forza. Treis umens ed in mattatsch han sez pudiu sedeliberar ord la massa neiv; 13 persunas ein vegnidas cavadas ora vivas e quasi senza blessuras; 25 han ins cavau ora mortas.<sup>7</sup>

Horriblas ein las descripziuns, che certins liberai dalla mort han fatg sur lur sgarschei-vla situaziun sut la neiv en.

Rest Giusep Riedi, in um da circa curonta onns e sia famiglia ein restai quandisch uras sut la lavina senza negina vivonda. La «Nova Gasetta Romonscha» da 1857 nr. 14 scri-va sur quella famiglia: «En ina casa eran ils geniturs en stebli en letg, sper els in affon en tgina, e dus buobs en stiva sin pegna. Bargend il pign en tgina, pren la mumma el en letg e beingleiti suenter aud'ella lura in terribel ramplunem e grescha: «Jesus! la lavina vegn!» In stausch e la casa ei sfraccada ensemen! Il plantschiu vegn giu sil

---

<sup>7</sup> Malgrad tutta tscherca eis ei buca reüssiu a nus d'anflar ina completa gliesta dils numbs dallas persunas disgraziadas. – Vigeli e Gion Martin Peder da Selva han saviu comunicar a nus suandonts numbs: Statalter Hans Gieri Riedi e sia dunna Margreta Castgina naschida Monn; Giusep Hetz e sia dunna Cresenzia; Onna Maria Condrau (emprema dunna da Martin Casper Condrau) cun ina feglia; Gion Mihel Riedi cun duas soras, treis persunas lìbras, (ad ina da quellas soras han ins stuiu tagliar giu omis-duas combas per saver deliberar); Bistgaun Sievi, in mat vegl persul; Gion Paul Diogg, in vieu vegl; Onna Margreta Caviezel.

letg, mo il lenn da plantschii impedescha, che quels en letg vegnan buca totalmein smaccai. Igl uvierchel dalla pegna vegn fretgs sin dus mauns ed ils buobs dattan giu sillla lenna stuppada en pegna senza pegliar entgin donn. Vargaus il fraccass enqueraan ils geniturs da sussentar ils affons. « Nus essan en pegna sillla lenna, havein cauld e bien, » rispondan ils buobs frestgamein. En bucca alla mort, seconsolond che tuts sei-gien aunc vivils ed implorond igl agid da Diu cun caudias oraziuns, vegn quella famiglia finalmein liberada ord fossa la sera sissu. Ell'auda mond umens sulla neiv vi, che vulevan ir a casa e schevan: « Cheu savein nus far nuot, cheu suten ei tut ventschiu. » « Udis buobs a plidond? di la mumma, « ussa gri, quei che vus pudeis. » Tut grescha e cloma. La glieud suravi audan enzatgei ed entscheivan a cavar. Ventireivlamein vegnan tuts liberaui ord fossa, ed en tgina anflan ei il gat-casa smaccaus dalla neiv, havend quel priu plaz cheu suenter che la mumma ha giu priu si igl affon, che fuss schiglioc era daventaus in'unfrenda dalla mort. – In da quels buobs ei staus Tumaisch Riedi, ch'ei maridaus pli tard a Rueras ed il qual nus havein aunc enconuschiu.

Gion de Plaz, in um da sissonta onns, circumdaus mo cun in batlini, ha luvrau pliras uras ella neiv. Havend el negins adattai instruments, ha el alla finala stuiu schar schelar sia dunna. Miez schelaus e privaus dalla vusch han ins anflau e purtau el sco morts en ina casa. Ins ha scaldaus si las solaspei cun plattas a plaun a plaun eis el puspei revegnius. En in pèr loghens haveva la lavina splanau las combras dallas casas surora, purtau ellas in toc senza discaveglier enzatgei.

Ina matta purtada en siu letg ora ella neiv, vegn anflada tras il fried d'in tgaun e ventireivlamein discuvretga; in'autra serrada en ina profunda ruosna cun sias combas denter lenna en senza negina speronza da puder rabbitschar ora. Ella retscheiva ils ss. sacraments e lai lura tagliar giu las combas; mo paucas uras suenter eis ella ina bara.

• • • •

Dalla damaun dil mardis entochen venderdis sera havevan ins cavau ora scheniv cada-vers, ils quals ins ha cavegliau en bara el clavau dalla pervenda. Denton, co transportar tontas baras el santeri a Sedrun, varga in'ura lunsch? Purtar las baras si Caspausa e da leu oragiu fuss strusch stau pusseivel; la via ordinaria sutora era serrada giu ed aunc adina sil pli ault grad prigulusa. Finalmein ein ins tonaton seresolvi dad ir sutora. Cun stentusa fadigia ed ughegiond la veta han ins rut via. Ils cadavers, schelai sco fier, per part en vischals, per part zugliai en blahs, ein vegni cargai si sin schliusas a maun. En profunda dolur ed immensa tristezia, resignai, culs ecls plein larmas, ha la sonda damaun il serius conduct da bara entschiet – il pauper bien caplon, sfraccaus da lavur e dolur, ordavon cun ina sempla crusch lenn. En verdad, ina greva crusch!

Sez ils grugns e fistatgs ners dalla Val Ruinatsch e dils Benaus parevan da mirar cun commiseraziun neuvigiu sin il vitg devastau e sin la tgeua processiun, che setergeva en solemnia lingia tras las Vals; els parevan da star mal ussa dallas trestas unfrendas, ch'els havevan garegiau en lur crudeivla furia.



Selva, davontier Sutcrestas ed el funs Carmihut

L'entira vischnaunca, tut tgi che ha pudiu, era ensem en ha priu viva part dalla dolur da lur cumbrigiai vischins. Tut che cridava e bargeva. Las baras ein vegnidas satradas tuttas scheniv en la medema fossa. Ils auters sis cadavers ein vegni satrai il di suenter, la dumengia. Il cronist, pader Placi a Spescha, metta vitier: «Ins sa buca descriver la consternaziun e dolur, ch'empleneva il cor da tuts presents. Cuolms e vals resunavan dil plirar e bargir. Ed ei fuva ina ferdaglia, che las larmas schelavan vid la vesta.»

Pilver, il poet ha raschun:

*Gie, cheu ei stau zun bia sgarschur,  
Ch'ha fatg anguoschas e snavur,  
Cheu san ins numnar la val da larmas,  
Cheu gida nuot, neginas armas!*

•

1809, il schaner, ein dus ferms umens vegni mazzai dalla lavina gest dador il vitg. Senza saver dar en il datum, havein nus aunc anflau suandonts schabetgs da disgrazias a Selva: In cert Rest Riedi ei vegnius per la veta dador Selva entras in crap ryclont. In Balzer Riedi ei daventaus l'unfrenda d'in squatsch lavina ed ha anflau la mort ella Bullatscha. In Schnoz cun aunc in auter ein vegni ella lavina dadens Carmihut. Lur baras han ins anflau per la primavera. In Barclamiu Berther ei ruclaus elllas Vals cun encurir ses tiers, in Curschellas dad ir per cristallas.

1809, ils 14 da fenadur ei sur Pieder Weller serendius a Wassen, cantun Uri, sco caplon. La raschun pertgei savein nus buc.

En ina brev dils 23 d'october 1809 alla vischnaunca per mauns dils dus vischinadis Selva e Tschamut, ha uestg Carl Rudolf de Buol, Schauenstein garegiau da far uorden cun la pervenda e d'augmentar quella. Denter auter ei vegniu stipulau...

5. «Da schar prender si il beneficiat la stad 7 mutgs: 3 en l'Alp da Tschamut e 4 sin la pastira da Selva...»

8. «Da cheu en in onn baghegiar ina casa en Sutcrestas dapersei, e denton far in'ustonza sufficienta sur casa per dustar la lavina – prender si ina casa per el a Tschamut, ch'el possi star leu ils treis meins d'unviern (december, schaner e fevrer), sch'el vul.»

Quella ordinaziun ei vegnida dada pervia dil prighel da lavina a Selva e cheutras sligiau la cunvenziun fatga pli da vegl cul reverendissim caplon, nua ch'ei steva scret:

«Fünftens: Soll Er (numnadamein il caplon) laut unsren accord, und Gewohnheit Selva und Tschamut, es seye Fest, oder Feyertag, und Werktag, einmall zu Selva, und einmall zu Tschamutt alle ämbtern Mess... Vesper... Kinderlehre alternative halten. In denen drey Wintermonath aber, da die von Selva zu Caspausa wohnen, so seye Er die Feyrtäge, und Sonntäge nicht schuldig auf Tschamuth zu gehen, so weit aber die Werktäge antreffen thut, wohl.»

• • • •

Ils 22 da december 1809 ei pader Placi a Spescha vegnius sco caplon a Selva. Beingleiti ha era el saviu far enconuschientscha culla lavina. El scriva:

«Igl onn 1809 ils 31 da december ei stau ina notg ed in di da tema e da horrur per Selva. La cufla ha entschiet la sera avon da haregiar, cuflau tutta notg ed entuorn las tschun dalla damaun vegn la lavina da Tschenghels da Rusas e rumpa en la casa entadem il vitg, la preit sisum da quella dil maun dadens ed igl esch dado da tschaler ed emplenescha en cun neiv. Sut casa ein dus clavaus fregi en, rut portas e lenna ed empleniu en cun neiv, ed il tierz fregts encunter cun neiv. Sur la casa dalla pervenda ora ei ida la lavina tgu-lond e saccudend la casa. Suenter messa gronda, allas dudisch, duront ch'ils umens da Tschamut eran en casa pervenda per prender resti dil beneficiat dad ir a Tschamut, vegn la lavina dil Ruinatsch, siglent'en las finiastras dalla casa ora giudem dil vitg sut il clavau dalla pervenda e dadens dus eschs nuegl. Tschella lavinabett'en ina talina e questa in chischner e spuorla sin las finiastras dalla casa dalla pervenda bien e ferm e stgira la stiva.» – Quella notizia sesanfla egl urbari da Selva ed ei suttascreta: «Pader Placi, viu cun mes agens egl. Hai scret e sun serendius a Tschamut aunc quei medem di.»

Omisdis onns, che pader Placi ei staus caplon a Selva, eis el setenius si temps d'unviern a Tschamut tier Gion Giusep Riedi.

1812, igl october ei sur Pieder Fidel Weller puspei turnaus a Selva sco caplon. En da Wassen ha el priu duas frestgas fumitgasas tudestgas, Marionna, che rugalava ils fatgs en casa e Catrina Loretz, che fageva las lavurs da fumegl. Ei era duas soras. Sur Weller fuva dretg aug dils dus spirituals Josef Maria Camenisch (†1847) e Giachen Martin Camenisch (†1899), ils quals el ha gidau tiel studi. El sez ha giu fatg ses studis da teologia el collegi helvetic a Milaun 1786–1791, nua ch'el ei probablamein era vegnius

benedius ora sco spiritual. Sur Pieder capeva buca mal l'economia e gidava beinduras era sez a luvrar la pervenda. Sia casa privata a Selva, sco era ils Ruvens dalla Bullatscha, ch'el possedeva, ha el giu testamentau ad ina paupra famiglia. Las ustonzas davos las casas sisum il vitg paran dad esser vegnidas construidas quels onns, sco era l'ustonza entroma sur il vitg, che duei menar il prigulus material dador il vitg oragiu. En l'ustonza davos la casa pervenda ha sur Weller giu ranschau en ina camona sutterrana, nua ch'el saveva prender siu refugi en prighels da lavina. Sche nus sbagliein buc, sch'existan aunc ussa restonzas da quei «staup.»

Sur Weller er'in um pign, sempel e pratics. Siu temps liber applicav'el era per tagliar e turniclar ora caussas en lenn, sco p. ex. ramas, crucifixs, che han aunc ozildi lur valeta. 1817 ei rutta ora a Selva ina malsogna epidemica, dalla quala biars, cunzun glieud veglia, seigien morts. Quella malsogna hagi ina pupratscha, «la veglia Claua», che mava dalla tiara giu a rugar, runau tier. «Ils cavels mavan tut ora, la carn luava quasi naven ed ei vegnevan da fleivel spért; ins numnava quella malsogna il «sturnez». Aschia ha ina veglia persuna raquintau a nus. Ins sto dasperas buc emblidar, che 1817 ei stau igl onn dalla fom e che quei onn ha era purtau sias atgnas miserias en Tujetsch. Ins fagevi paun cun borlas; vegnev'ei ora in truffel d'arar la primavera, sche furschav'ins giu il tratsch e magliava criu. Ina femna da Selva mavi la primavera ora si Davet per urteis mangiauns, per haver enzatgei da magliar.

Sur Pieder Fidel Weller ei era daventaus ina unfrenda da quella epidemia, dil sturnez, ed ei morts ils 29 da schaner 1818 suenter haver pastorau ed operau 22 onns per ses cars convischins da Selva e Tschamut.

Duront il temps da vacatura e da quella epidemia vegnevan ils da Selva a Rueras tier il survetsch divin. Sentelli, ch'ils da Rueras havevan sterment dad els muort prighel da sepigliar. Denton ils da Rueras mavien els bauns enasisum, ils da Selva els bauns ora-giudem. Era «ina» precauziun!

• • • •

Muort ils cuntinuai prighels da lavina er'ei ussa grev da survegnir in caplon per Selva. Negin leva surprender quella pastoraziun. Cheu ha alla finala in giuven spiritual da trenta onns giu il cor e la curasca dad ir a Selva. Igl ei stau sur Gion Giusep Deplaz, sez nativs da Selva. Per carezia e commiseraziun cun ses convischins ha el bandunau sia emperneivla posta a Dardin ed ei vegnius aunc quei onn 1818 a Selva. Cun gronda premura e cun veseivla benedicziun ha quei spiritual pastorau Dadens igl uaul varga curonta onns, entochen sia mort, ils 25 d'october 1859. Il cudisch da mortoris a Sedrun remarca tier il datum da sia mort: «Igl ei stau in spiritual secund la veglia da Diu, pietus, amabels e veramein premuraus per las olmas.»

Sut la pastoraziun da sur Deplaz ei il missiunari pader Francestg Sales Brunner da Mümliswyl, cantun Solothurn, ord la congregaziun dil preziosissim saung, dil pievel numnaus «il pader sogn», vegnius 1832 tochen Selva ed ha teniu leu ina missiun. Ina

remarcabla persunalitat, che ha teniu dall'entschatta digl unviern 1831 entochen Pastgas 1832 pliras missiuns ella Cadi e quei cun oreifer success. Ei er'in um grond, pietus, che fageva gia cun sia cumparsa ascetica ina buna impressiun. La missiun cuzzava per ordinari treis dis. El mava da vitg tier vitg, nua che la glieud cumpignava el recitond il sogn rusari; fageva treis entochen quater priedis per di, enten ils quals el plidava sin fetg sempla, capeivla moda sullas verdads fundamentalas. Denter en fuv'el di e notg occupaus cun dar penetienzia.

El medem temps collectava pader Brunner tiel pievel per ereger ina scola per buobs. En uniu cun in cert Probst ha el encuretg da prender si per quei intent in local per tscheins ella Cadi. Nunsurvegnend la casa dil beneficiat si Nossadunna a Trun ed era buca il Hof dalla claustra, eis el serendius a Schluein e priu si leu il casti da barun de Mont per tscheins. Beingleiti ha Brunner cumprau quei casti per la summa da 4500 renschs, dils quals el ha gia igl atun sissu saviu pagar giu cun 3000 renschs. Gia quei onn 1832 han circa 35 scolars frequentau sia scola.

Gl'atun 1833 ei era sia mumma Anna Maria Brunner, naschida Probst, ina pietusa vieua da 70 onns, vegnida da Ruma a Schluein ed ha ranschau en leu in institut per soras dil preziussim saung.

Pader Brunner ha operau per sia congregaziun en differents loghens, era ell'America, cun gronda premura. El ei morts a Schellenberg (Liechtenstein) ils 29 da december 1859.

• • • •

Sur Deplaz ha era giu effectuau, ch'ils da Selva han finalmein 1842 survegniu la lubientscha da puder salvar si per adina il Sontgissim en lur baselgia. Levan ils Dadens igl uaul far lur devoziun firaus e dumengias, sche savevan els mintgamai sepervergiar pér da messa gronda. Cun la sura lubientscha ha quei calau si.

Denton, sur Deplaz era buca mo premuraus per il beinstar spiritual da sia muntanera, era per il beinstar corporal panzava il bien pastur. Co pertgirar sias nuorsas dalla lavina? Quei ha fatschentau dis ed onns siu spért. La lavina ha duront sia pastoraziun a Selva buca caschunau ual grondas sventiras, denton savens anguoscha e tema detgvunda. Pér igl onn 1850 ha ina lavina puspei sfraccau ensemens ina casa e quei ha lu dau caschun da menar atras siu plan – da dislocar il vitg.

Igl ei seformau ina cumissiun, la quala ha sedau tutta breigia da metter en ovra quei plan, numnadamein dad ira cun igl entir vitg Selva talis e qualis per adina a Sutcrestas, ina idea per la quala sur Deplaz ei staus seprius en cun tutta energia. Buca mo la vischnaunca, era ils auters conburgheis dil cantun han ins supplicau dad esser gideivels tier quell'ovra. Denter ils premurai commembers dalla cumissiun sesanflavan plevon sur Durgiai, gerau Lucas Cavegn e landrehter A. Condrau. Era ils Dadens igl uaul havevan lur special comité: statalter Vigeli Venzin, statalter Gion Antoni Peder da Selva e statalter Stiafen Schmed da Tschamut. Quels treis han surpriu da menar ora quella lavur.

«In clom d'agid dalla fontauna dil Rein anterius als avdants dil Rein,» cumparius ella gasetta Amitg dil Pievel, Cuera, scriva sut il datum dils 4 da mars 1853 denter auter il suadont:

... «La situaziun da Selva vegn dad onn ad onn pli prigulusa, essend ch'ins sto far la tresta observaziun, ch'igl uaulet silla spunda sur Selva pirescha vi pli e pli. Cheutras gudogna il revier dalla lavina ina bia pli gronda extensiun tochen sigl ault e las lavinas vegnan aschia bia pli grondas e prigulusas. Tier quellas vegn lu aunc a vegnir ina deva-stonta bova, ton pli ch'igl ei tier plievgias gia pliras gadas vegniu menau giu bia glera encunter il vitg. Sch'ils paupers habitants da Selva ein duront gl'unviern buc in mument segirs da lur veta e rauba, sche vegnan els uss'era la stad a stuer temer e tremblar pella ruina da lur casas.

La suprastanza dalla Vischernaunca Tujetsch ha secartiu da buc astgar uardar tier pli a quei smanatschond prighel da siu vischinadi e sin in pareri daus giu dad in expert clamaus neutier, ha la vischernaunca decretau da translocar Selva empau pli anen sin in emperneivel e sulegliv crest. Per ton pli tgunsch vegnir tier quella dislocaziun, eis ei gia la stad vargada vegniu menau si leu in baghetg, che cuntegn en sia emprem'atzada la baselgia, ella secunda il local pil caplon e pella scola. Uonn duei il baghetg vegnir baghiaus ora interiuramein. L'entschatta dalla dislocaziun duei lu d'atun daventar entras il signur caplon – in venerabel vegliuord da varga 70 onns, che ha sco fideivel pastur buca vuliu bandunar ses parochians, e che ha cun quels gia bia notgs stuui encurir in refugi en nuegls isolai e leu implorar igl agid divin cun cauldas oraziuns!

Ils cuosts dalla translocaziun vegnan tenor calculaziun digl expert sin 28 000.–frs.; la mesedad dalla populaziun da Selva auda denton pli u meins ella classa pauperila ed aschia sto la vischernaunca sezza haver quita, co cuvierer la mesedad dils cuosts. Tujetsch ha purtau ils davos onns grondas unfrendas per scolas, pils paupers e per outras comunitivlas interpresas, tal'uisa che las autoritads cantunalas han per renconuschientscha da sias bialas prestaziuns schau vegnir tier alla vischernaunca bein enqual susteniment. – Per segirar veta e rauba da ses cars vischins da Selva ha la suprastanza concludiu la translocaziun, aber ses mettels tonschan per bia buc ora cheutier. Tal'uisa eis ella necessitada da prender siu refugi tiella beneficenza cristiana.

Essend ch'ei setractescha cheu da liberar in pauper vitg spella fontauna dil Rein dad ina gronda sventira, sche sevolv'ins cun quei clom d'agid oravon tiels avdants e roges per in pign susteniment. Cur che «Novaselva» sesaulza entras lur agid spella tgina dil bi e liber Rein enamiez il tschupi dils glatschers dil Crispalt, Badus e Curnera; cura che tiella consecraziun dalla nova caplutta las oraziuns dils paupers Selvaners, liberau ord lur sgarscheivla situaziun, s'uneschan plein engraziament ed imploreschan per lur cars benefacturs la benedicziun dil tschiel: gie lu sa il Rein far da saver quei bi di a ses avdants e quels pon lu selegrar giud il bi mument da lur caritat.»



Sutcrestas cun la caplutta

Tgei success quei clom d'agid ha giu savein nus buca dir exactamein. La primavera 1852 han ins entschiet a baghiar la caplutta culla casa pervenda e casa da scola. Lenna e caltschina ha la vischnaunca dau per nuot; ils vischins da Selva e Tschamut han surpriu da metter il material sil plaz. Umens e femnas han fatg cheu bia laver cumina; era firaus e dumengias vegnev'ei dau lubientscha da luvrar per quei intent suenter il survetsch divin. Ils cuosts per las lavurs vid il baghetg sez han ins encuretg da cuvierer cun regals e collectas, il qual ei era daventau cun bien success. Landrehter A. Condrau ha sedau gronda breigia en quei risguard ed ha gronds merets per Sutcrestas. Il plan da quei baghetg ha arhitect Faller da Glion giu fatg, al qual la laver ei era vegnida surdada.

La caplutta ei vegnida dedicada a «Nossadunna digl agid» (Marihelf). Plirs onns han ins giu dus zenns ad emprest, in da S. Brida e l'auter da S. Bistgaun. 1865 ei vegniu mess si dus zenns novs, che han custau 600.– frs. Quei deivet han il bia ils respectivs padrins e madretschas pagau, il rest ils vischins. Stau baghiau la caplutta han ins dacheu naven era fatg la stad las usitadas processiuns dalla sonda a Sutcrestas enstagl a Tschamut. La caplutta cun la habitaziun pil caplon e cul local da scola era ussa finida. Igl unviern 1853/54 ei sur Deplaz serendius per l'emprema ga a Sutcrestas per habitar e tener survetsch divin leu. Ussa dueva era l'autra part dil plan vegnir realisada – transportar las casas da Selva a Sutcrestas. Denton era quei ina caussa, che biars vischins levan buca capir e quei ord differentas raschuns. Per l'ina savevan ils vischins, che Sutcrestas seigi pli umbrivaun e pli humid che Selva. Per l'autra fuv'ei a Sutcrestas tonaton buca dil tut-tafatg segir da lavinas, cunzun da vart da Scharinas. Per la tiarza, havess ins vuliu rugadar quellas casas veglias a Selva, sche riscavan ins, che bia massi empaglia. Ultra da quei astgan ins buca emblidar – ins era naschius, tratgs si ed endisaus leu ed ins have-

va cumadeivel cul vischinar. Bandunar Selva per adina, quei mava vess. Tgei far? Alla finala ei il patratg semadiraus da schar las casas dil vitg Selva agrad eri, da far si a Sutcrestas atgnas casas, mintgin sin siu cuost e da habitar leu mo in cert temps digl unviern. Quei ha plaschiu a tuts e quei plan ei era vegnius menaus atras.

Atgnamein havevan vischins da Selva gia pli baul baghegiau clavaus e casas a Sutcrestas, sco plirs suloms vegls laian percorschcr quei aunc ozildi. E buca ditg avon che la caplutta vegni eregida han ils vegls Venzins baghegiau leu ina casa cun lenna dalla casa da lur aug statalter Hans Gieri. Cuort suenter han ils Gion Martins Peder fatg si ina stivetta ed uniu quella cun il clavau per saver habitar leu cass da malaura e perver il muvel. Mo quella ei barschada giu il schaner 1850. La caschun ei stada sequenta. Ils perveseders eran muort tema da lavina seresolvi da star sur notg en Sutcrestas ed havevan scaldau bravamein la pegna. Avon ch'els han giu pervesiu ei la lavina vegnida ed il prighel era varghentaus. Els ein lura serendi a Selva. Duront la notg ei lura il fiug ruts ora en consequenza d'in defect dalla pegna ed ha consumau stiva, clavaus, fretg e muvel. – Era Francestg Werth e Franz Loretz han giu baghegiau ina cassetta per in sper lur clavaus. Denton, pér suenter che la caplutta ei stada finida ed il survetsch divin vegneva tenius leu duront igl unviern, ein las casas semultiplicadas.

Statalter Gion Antoni Peder e Gion Martin Peder han cumprau ina casa per in a Cavigia-Plaun s. Leci e tratg a Sutcrestas e baghegiau leu. Statalter Vigeli Venzin ha fatg si ina casa nova. Statalter Giachen Venzin ha cumprau la gronda casa dubla a Cavigia-sura da Giachen Martin Biarth<sup>8</sup> e translocau quella a Sutcrestas. Barclamiu Geronimi ha construiu cun agid da ses frars ina casa da mir cun in ferm e beintschentau tetg da plat-tas. Era Vigeli Werth ha engrondiu la cassetta da siu bab Francestg.

Plaun a plaun ei vegniu menau si a Sutcrestas (a Martinauns, Costas e Clavadi) otg casas, aschia ch'ils vischins da Selva savevan, priu ora ina ni duas famiglias, habitar tuts a Sutcrestas temps d'unviern. Entuorn ils firaus da Nadal, il bia suenter Daniev, entschava l'emigraziun. Ins setergeva cun lur tenercasa a Sutcrestas, nua ch'ins haveva gia igl atun mess suttetg ina gronda part dils fretgs per glieud e tiers. Ils vischins segidavan in l'auter. Oravontut vegnev'eit dau agid al prer. In di suenter, ch'il caplon era setratgs viaden, entuorn las diesch ni allas duas suentermiezd, vegneva Niessegner cumpignaus en processiun a Sutcrestas, ordavon dus buobs cun bransin e latiarna ed ils

---

<sup>8</sup> Igl uclau Cavigia-sura, sin intsches da Mustér e che udeva tier Tujetsch, ei svanius totalmein dapi 1867. Las treis davosas casas, che fuvan leu, udevan: ina a Giachen Martin Biarth (oriunds da Medel), l'autra a statalter Sigisbert Monn (transportada sin Gonda, che Gion Antoni Deragisch habitescha ussa), e la tiarza a Rosa Cresenzia Casparin, la quala casa treis vischins da Rueras: Duri Berther, Giachen Fidel Cavegn e Tumaisch Huonder han cumprau giu e duvrau per lenna da barschar. – La davosa famiglia, che ha habitau a Cavigia-sura ei stau Sep Antoni Deplazes, oriunds da Laus, maridaus cun Madleina, feglia da statalter Sigisbert Monn, e ch'ei setratgs 1867 vi Surrein-Tujetsch. – Giachen Martin Curschellas, ch'ei curdaus el cumbat culs Fanzos a Rehanau 1799, fuga da Cavigia-sura. – Statalter Sigisbert Monn da Cavigia-sura, morts igl 1. d'october 1864, ei staus il davos, che ha portau terschola en Tujetsch, sco ei era usitau tscheu e leu tier beinstonta glieud; – ina moda, ch'ei senza dubi vegnida ord Frontscha.

affons da scola. L'auter di mavan ins en cun tuts animals. La dimora a Sutcrestas cuzava il bia entochen entuorn miez mars, s. Giusep, e l'emigraziun semetteva puspei en moviment anora.

Ils vischins da Selva eran ussa suenter plirs onns da bia lavur e grondas spesas alla finala ord temas e prighels da lavinas. Rumplanavan e stremblavan las lavinas la cuntrada, sche seconsolavan ins e scheva: Ussa essan nus segirs!

Sutcrestas ei in liug lev e porscha in bi aspect anora. Emperneivel bi eis ei cheu da contemplar, cura ch'il sulegl va da rendiu e sularescha il Péz Tgietschen. Era ves'ins da cheu ano il meglier, tgei che passa e repassa ella cuntrada. Ins era cuntsents e ventireivels e saveva buca ludar avunda la cumadeivladad ed emperneivladad da Sutcrestas. Cunzun la giuventetgna vegneva bugen en cheu. E sez ils vischins da Tschamut selegravan e ludavan, havend els ussa negin prighel pli per frequentar il survetsch divin e la scola. Perquei conta era il poet puspei plein consolaziun:

*Mo in refugi han ei aunc,  
Che fa ad els in meglier saung;  
In bien quart ura pli anen,  
Han aunc in vitg cun casas lenn;  
Lu aunc la «Mumma digl agid»,  
Ch'ei aunc ad els pli grond profit.  
Smanatsch'ad els gl'unviern lavina,  
Lu fuijan spert en cheu adina.*

• • • •

1859, ils 25 d'october ei sur Gion Giusep Deplaz morts anetgamein en la vegliadetgna da 71 onn. El era staus in tempset enzatgei maldisposts; ina damaun han ins anflau el morts en letg. La «Nova Gasetta Romonscha» scriva en siu nr. 44: «Ier ei vegniu satrau a Tujetsch igl aultreveriu sur Giusep Deplaz, ch'ei staus varga curonta onns caplon egl isolau e pella lavina prigulus vischinadi da Selva. El er'in um d'ina exemplarica conduita ed in fideivel survient dil Segner, che veva da far zun pauc cul mund. R.I.P.»

Ins ha stuiu sedar ora ussa per in auter caplon. Dus vischins, statalter Vigeli Venzin, il principal um da Selva e Stiafen Schmed da Tschamut, ein serendi ils 6 da december 1859 a Segnas per acquistar il caplon da leu, sur Casaulta. Turnond anavos dat statalter Vigeli, ferton ch'el raschuna, per tiara vi amiez il vitg Sedrun ed ei en paucs muments ina bara e vegn tratgs morts a casa tier sia numerusa famiglia.

Enstagl da sur Casaulta ei pader Sigisbert (Thomas Fidel) Monn da Mustér serendius sco caplon a Selva ed ha pastorau leu quater onns. Alla fin d'october 1857 era el secularisus e fuva da lu enneu entochen ussa staus caplon a Sedrun. Cun pader Sigisbert ei igl emprem clavazin vegnius Dadens igl uaul. La scola en casa pervenda a Sutcrestas ei stada malengasi ad el, e perquei han ins stuiu retrer ina casa privata, entochen che la

casa da scola ei stada baghiada 1863, per la quala Selva ha survegniu l'auter onn sissu in premi cantunal da 400.– frs. Per saver augmentar il fondo da scola a Selva, ultra dal las unfrendas privatas, er'ei vegniu vendiu 1854 el mises vi Surrein in bien ton pastira per schar far praus ordlunder a Franz Giusep Loretz ed a Giachen Venzin.

En quei medem temps, 1860, ils 23 d'avrel, ei la pervenda da Selva vegnida carschen-tada entras ina collecta libra tiels habitonts da Selva e Tschamut, che ha purtau en la summa da 2804.– frs. (Selva 1824.– frs. Tschamut 980.– frs.) – Tier quei ha la vischnaun-ca aunc contribuiu in capital da 1426.– frs.

1863 ei vegniu vendiu las Gravas, in toc pastira sur la punt davart ils praus da Selva a Barclamiu Geronimi ed igl Uaul miez sin Rusas a Vigeli Werth per carschentar la pervanda.

• • • •

Co sei passau cullas lavinas suenter ils anno 1850? Per ventira raquenta la cronica fetg paucs cass da disgrazia, e quels ein daventai plitost ordlunder, buc el vitg da Selva.

1863, ils 11 da schaner ei la lavina vegnida giu dalla Val dil Plaun e priu dus clavaus a Selva. En in, nua ch'ei era en tiers, ha ella per ventira mo splanau surora il clavau e schaniau il nuegl. Era encunter Sutcrestas er'ei vegniu giu da Scharinas ina massa neiv, ch'ins ha stuiu far tunnels tiels nuegls e per saver buentar. Essend serrau giu da tutta communicaziun han ils da Selva stuiu salvar si plirs dis ina bara en baselgia.

1865, ils 4 da fevrer ei Flurin Venzin, in ferm e bi giuven, serendius visavi Selva alla catscha sin gaglinas selvadias. Vulend el tschuncanar in cuflau, ei quel ruts plinensi e zugliau el ella lavina ed ha menau el giu tiel Rein. Morts han ins aunc quella sera cavau el ord la neiv e transportau el a Sutcrestas en casa paterna.

1876, ils 10 da schaner ein statalter Stiafen Schmed, in bab da nov affons ed il giuven Gion Fidel Peder da schotg onns, omisdus da Tschamut, vegni ella lavina fagend els via ellas Vals da Curnera per vegnir ora cun fein a pastg. Dus auters giuvens, in da sedisch e l'auter da schotg onns, han ins aunc pudiu cavar ora vivs.

1888, ils 14 da fevrer, per mardis tscheiver, ein dus giuvens frars, in da quendisch, l'auter da gissiat onns, fegls da statalter Gion Antoni Peder a Selva, i cun ina sliusa da maun per ina vaulta draussa per in, e gia beinmarvegl ei la lavina vegnida en Plaun Viradas e bess omisdus sur in ault grep giu el Rein. Tut encuir e luvrar da massa umens dalla vischnaunca ei stau adumbatten. Ils 28 da matg ha ina sia sora anflau il giuven, ch'era vegnius menaus dil Rein empau pli ano. Malgrad che l'aua haveva scarpau naven tutta vestgadira, purtav'el aunc il scapulier entuorn culiez. – Paucs dis suenter han ins era cattau adagur l'auter, fermaus vid in tschaffun sec amiez il Rein a Carmihut. Cun gronda fadiglia han ses dus padrins rabbitschau el ord l'aua e purtau a casa.

La davosa gada, che la lavina ha fatg tema a Selva, ei stau 1892, ils 7 da fevrer. Statalter Gion Antoni Peder da Selva ha da lezzas uras, ils 13 da fevrer, giu scret a nus il suan-dont:

«La lavina ei vegnida las siat dalla damaun. Ella ei rutta naven dad ensum Caspausa, da sum Milez enasi Greps, dallas Rivas da Scharinas en entochen entadem il Plaun dalla Riva sut Scharinas enagiu entochen en Runs. Cun forza immensa ei quella gronda nevada da circa dua bratscha neiv nova semessa en moviment. En in mument er'il territori naven dad enasisum Sutcrestas entochen lunsch dador il vitg Selva ina mar da lavina e quei en bia loghens entochen Rein. Pitiu donn vid glieud e tiers ha negin; quels ein mitschai cun tema e sgarschur. Ils vischins eran ils biars tenor usit serendi a Sutcrestas; ils restai el vitg eran muort tema dil pli ault prighel, che smanatscha-va, serendi giudem il vitg, essend che dil Ruinatsch eran ei segirs. Las casas sisum il vitg ein da maun sura totalmein stuppadas en cun lavina. Otg chischners, dus dadens e sis dador il vitg, ein vegni sfraccuai ensemble, sco era in sin Tschamut dador il vitg, numnau ora sin Stavel. Dapli ha ei a Selva rut en las portas clavau e catschau en plein neiv da statalter Fidel Venzin e Sep Antoni Loretz; a Sutcrestas ha ei rut en la preit clavau cun las portas vitier da Vigeli e frars Venzin, sco era stuppau cun lavina tuts aquaducts. Aunc oz ves'ins sin quella lavina dador e dadens il vitg Selva romas e len-nes, sfraccadas giu digl uaul Rusas sin la Val da Plaun. Serecumandond per nus pau-pers pereclitai, restel...»

• • • •

Ei era ils 8 da settember 1908, la naschientscha. Nus fuvan a Dieni en vacanzas. Il sulegl era levaus e salidava la vallada, che paradava aunc tscheu e leu el bi verd da risdiv. In stupent bi di dat quei. Buc in tac nebel. Il Culmatsch leusi ella tarlischtur dil sulegl mirava giu serius, sco sch'el fagess l'oraziun dalla damaun. Las ruinas dil casti da Putnengia sedestadavan ord lur emperneivels siemis dil 12avel tschentaner, bitschond ellas ils emprems radis dil sulegl. La Bullatscha fageva sia solita ramur. Il cavrer mava da trutgs si cun sia frestga muntanera. A Rueras tuccav'ei l'emprema.

In um vegl va leu suten. En in maun il fest, en l'auter la corda paternos. E puspei vengnan dus – treis dels, giuvens e vegls – entiras famiglias, stuschond ils pigns culla rassa biala ella leva crotscha. Aschia eis ei iu leu tras Dieni tutta damaun ora, umens e fem-nas ord tuts vitgs ed era beinenqualin ord otras vischnauncas. Tut mava tier la mumma digl agid, en «Mariahelf». Ei era fiasta leu oz.

Strusch che nus havein giu gentau, ch'era nus essan vegni envidai en tier in pelegrinadi a Sutcrestas. Bugen havein nus acceptau l'invitaziun. La cumpignia era fetg emper-neivla. Ei deva cauld. Il pign Battesta haveva avunda da purtar siu tschiep. Tier quei havev'el aunc da dir rusari culla mumma; mo da Tschuppina en mirav'el sils stgirats e tedlava co ils utschals cantavan e schulavan. «Tscho sai puaunas! Covi sai in vadi dels fravis!» – Bst!...

Nus arrivein a S. Brida, sin territori da Selva. Ina bufatga caplutta sepresenta cheu tut isolada enamiez in bi prau verd, osum in grep cun uaul dasperas. In stupent bi liug per in, che less ruassar ora ed emblidar vi empau il mund cun sias cruschs e sia rueida.

«Tgi o fatg se quella baselgia? – Tgi stat co? – lo sé mu in zain!» – damonda il pign, che spitgava ussa senz'auter ina pausa ella devoziun. «Tgi o fatg sé quella baselgia?» – Quei stuein nus aunc raquintar. Ei exista ina zun biala tradiziun sur igl origin da quei sanctuari.

«Ign'èda plé da vegl, forsa avaun plérs tschien onns, er'ei rut ora ina malsogna, tge tuttas vaccas stuèvan ventscher. I fuva ina malsogna del lom. Quella malsogna era rut' ora giu ella bassa e vegneva lu dalla vallada sé, adina plé e plé damanaivel. Finalmain sè quella nauscha malsogna vegnida tochen Tujetsch. Endarschent ils da Selva, tge quella malsogna seigi rut'ora ain Tujetsch, sche sen dus umens da Selva vegni ora tocan quai liug, nua tge la baselgia da s. Brida stat uss. Lo sen ai semez enschanuglias ed on fatg oraziun tier Diu ed empermess da bagagiè grad lo sen quai plaz tg'els seigien, ina caplutta en honur da Diu e dedicar quella a s. Brida, sinaquai tg'ella roghi Diu, tg'els vegnien preservai da quai strof. E prendai mira! la malsogna è grad lo calada se, ed ella val Selva oni piars bétg in tier e pel Tujetsch enturn è bétga plé.»

«Da gliez tiams er'ai ain baselgia da Sedrun mu gl'uta gron e quai era lu quel, tge stat uss da maun dretg, nua tgi vegn fatg sé la s. fossa. Ils auters utas en vegni fatgs plé tard. Gliè lu era vegniu baghegiau in uta ella parochiala ain honur da s. Brida e legiu ora quella per secunda patruna sianter s. Vigeli.»

Aschia havein nus anflau en ina scartira. La caplutta da s. Brida ei vegnida baghegiada 1736. En ina brev da 1737, ils 11 da ? ein ils vischins da Selva e Tschamut s'obligai visavi agl uestg Josef Benedetg de Rost da mantener quella. Suttascret han: «Julius Riedi, im Namen aller als Vogt; Hans Jörg Berr, Jacob Biart, Parochus».⁹ Il sulom da quella caplutta hagi Gion Hasper de Plaz da Carmihut regalau.

Il maletg sin igl altar porta la suttascripziun: «J. C. Brandenberg pinxit. Anno 1738.»



S. Brida

<sup>⁹</sup> La brev originala sesanfla egl. archiv episcopal a Cuera.

Ina harta pendida vid il mir ei suittascretta: «Antoni Deplatz hat diese Taffel machen lassen. Anno 1739.» Ina autra harta porta la suittascripziun: «Giachen Cundrau e Maria Catrina sia massera e ses fegls Gion Pieder e Giachen Antoni ex voto anno 1740.» Il zenn porta igl onn 1741 culla inscripziun: «Ave Maria, gratia plena, Dominus tecum!» Avon entgins onns sesanflava leu ella caplutta ina biala plauna da curom. S.Brida vegn venerada cun s. Bistgaun sco particulara patruna dil s. h. muvel.

• • • •

Entupond differents trops, che returnavan da lur pelegrinadi, eran nus arrivai enasi spella biala fontauna da crap. Nus semenein enagiu tral vitg Selva cun sias bassas, pintgas casas neras. Ils affons vegnan gest orda viaspas. Ina frestga roscha, buobs e buobas, che miran gradagraden, cotschens e bials sco striaunas. Prest arrivein nus a Sutcrestas. Devozius pelegrins fuvan el bein decorau sanctuari, engraziavan e rugavan tier la mumma digl agid. Auters mavan e vegnevan.

Avon la caplutta, damaneivel dil grep da scalegl, ord il qual ils da Sutcrestas han fatg ora lur pegas, essan nus silsuenter fruntai ensemen cun in um vegl.

«Bi sei cheu e cheu haveis Vus bien gl'unviern,» havein nus entschiet. Ed il bien vegl ha entschiet a raschunar. –

«Gie, bi sai co, quai è vair; ins veza co tochen o Bugnai e l'entira Val Dadains gl'uaut on ins co avaun egl. Ed era bien vevan nus co igl unviern e stevan ugen. Dentaun, ussa sai tut semidau. Sulettamein, il Gion Martin, quel bèn, quel vegn aun ain co gl'unviern a sta, schegliuc negin plé, gia bièrs onns bétg. Quel fo aun scu nos vegls e di mintga sèra tut persuls cun sia famiglia il rusari ain baselgia. Sur Deplaz, Dius a si'olma!, ju a aun encunuschiu bégn el, quai è stau in bien um per nus, quel lev ingnèda vegni ain co cugl entir vitg da Selva. Mirai, co da cuoragiù lev'el fa la via pels tiers da tgèsa, per schè i vi Surain. Mu ussa, ussa stat tut luora gl'unviern. Depi tg'on pluntau ain uaut sen Rusas<sup>10</sup> e cavau foss, sefida tut da sta luora. Mu, ju tem adina aun empau, schi vess da da grondas nevadas.»

«Ils augsegners vutan nuéta vegni ain plé. Sur Dosch (1864–1866) vegnev'ain; sur Maculin (1866–1886) vegnev'ain; mu ils dus davus onns sèl bétga vegnius ain pervia dalla schliata sanadad e vegliadetgna. Sur Siedler (1891–1893) è staus il davus caplon, tg'o habitau co gl'unviern. Sianter vegnevan las famiglias bèn aun ain, mu cun quai tge sur Muoth (1897–1905) steva luora, o Selva, sche sel diember dels habitants da Sutcrestas sesminuius onn per onn. Gie, ussa fon i perfin giu las tgèses co e von naven cun elllas. 1901 on i fatg giu la tgèsa dal Werth e transpurtau ella o Zarcuns; ils frars Riedi on fatg se lo ella sur baselgia. Uonn on i fatg giu quella del statalter Gion Antoni Peder

---

<sup>10</sup> La plontaziun da Rusas sur Selva ha la vischnaunca entschiet 1891 e mess gronds cuosts. Il Cantun e la Confederaziun han contribuiu leutier frs. 7697. 20.

e baghegiau se ella grad dado'l vitg da Selva. – I on franc viu ella, cu i en vegni anain?» «Gie, els tiams semidan. Avaun tschunconta onns trevan nus anain las tgèses e fagevan se co. Ussa fon i giu co ellas e tilan anora. Avaun tschien onns pliravan nos buns vegls da pudai fugir gl'unviern naven da Selva ed ussa, tut tge vut sta luora; perfin cun la scula vutan ai ir anora. Las tgèses, tge en aun se co, von ain decadenza. Era ils bials ladretschs fain da vidavaun en i ussa anavus per ina tiarza. I tegnan bétga se schi bégn ils praus co plé.» «Dentaun, quai tg'ju a el plé ugen, quai è, tge Nossadunna vegn venerada co ferventamain. La primavera e la stad vegn ai ain co firaus e dumengias biè gliut per devoziun. Oz è stau massa gliut co.»

Aschia ha il bien vegl raquintau, plein carezia e pietad per siu Sutcrestas.

E leuvisi ella caplutta cantavan ei il quart cuors dalla canzun da Nossadunna digl agid:

*Surtut, o Mumma teidl'il riug  
Dils habitonts cheu en quest liug,  
Che han quei tempel baghegiau  
E quel a ti cheu dedicau.  
Da prighels da lavina  
Pertgira, nus rughein!  
Sin tiu agid adina,  
Nus fermamein seschein.*

• • • •

Cun agens sentiments havein nus priu cumiau dil pur da Sutcrestas. Bugen havein nus mess nies maun en siu ruh maun da rubaglias ...

Il sulegl sclareva migeivel. Leu sisum la Riva da Scharinas stevan ils pasters dil Cuolm e schavan resunar lur grius da legria. Da Rusas en mava ina partida giuvens el cuolm a maner. Els fagevan fein a pastg en Val. Dil stradun enasi vegneva la posta en pass tempbau. Unfis e stauchels dil seser mavan ils passagiers a pei. Velocipedists sgulavan sco paliats anoragi. Il niev, clarverd Uaul da Rusas, la speronza da Selva, tarlischava el bisulegl, che mava da rendiu. Era il Ruinatsch e las Vallettes dils Benaus miravan neuvigiu curteseivlamein, sco sch'els havessen nuot silla cunscienza. – Avon tschien onns! – Il paster da casa stavlava leuvi. Nus mein.

Al Battesta levan nus aunc mussar la fontauna da zuolper ellas Palius, mo nus havein buc anflau. «In'autr'ièda!» A Selva visitein nus s. Gion e s. Paul, la baselgia, che sur Muoth ha renovau e decorau gustusamein 1901 ed enrihiu cun ina pintga orgla – l'em-prema Dadens igl uaul...

Orasi spella fontauna da crap essan nus aunc sefermai ina ga ed havein mirau anavos. Cheu di il Sep: «Selva o ain biè graus meglier tge nus. Schi cumadaivel culla pastira da tgèsa e cul vischina o nagin ain Tujetsch. I son pertgira lur tiers da fenestra anora e cun sta sel frust. Truffels on i apparti buns e senza fin. Quai tge maunca co è: I mun-

glassen savai schienta se las palius ed arar ellas; lu i giu ail Rain ne fa chis cullas muschnas entul vitg, e lu empau plé biè uaut. Ils vischins stessen béggn co.» – Quei ei ver, mo leutier drov'ei plan ed agid dad autras varts! Nus mein vinavon, passein Carmihut cun siu migeivel clima, sper Nacla forsa il pli migeivel dall'entira Val Tujetsch, e nua che pumera prosperass forsa aunc. Nus contemplein gradsu l'emprema plontaziun d'aul, che Tujetsch ha fatg avon circa biabein trenta onns e che fa honur.

Igl alv dalla caplutta da s. Brida resplenda tras ils pegns ed il poet da Selva conta puspei ironicamein:

*Persula stat cheu sontga Brida  
E mira co il temps semida;  
Ella mir'anen e mir'ano  
E vesa bein, ch'ei va zaco!*

Il pign Battesta mira, sch'ils stgirats ein aunc el medem liug... Nus arrivein a Sumsassi, nua che la val sesarva anetgamein e porscha in maiestus bi aspect sur Tujetsch, – il liug, nua ch'il renomau scribent docter Hansjakob ha returnond da Mustér buca vuliu mirar anavos pli, per buca schar encrescher aunc pli fetg per la biala vallada e nua ch'el ha detg a nus, ch'il Segner hagi il pli bugen ils purs, perquei detti quel ad els era ils pli bials tocs tiara.

Nus essan puspei a Dieni, nua che la Barla haveva pinau in bien caffè. – Ils plaids: «Avaun tschunconta, avaun tschien onns» dil pur da Sutcrestas tunavan adina en nossas ureglas e nus essan buca vegni libers, entochen che nus havein buca giu secret questas lingias, las qualas nus dedichein cun in cordial salid a nos stimai vischins dadens igl uaul.

## A Camischolas

Notizias culturhistoricas ord la Val Tujetsch

Amiez la biala vallada, en plascheivla planira, circumdada cun migeivlas spundas, pli ad ault cun extensivas alps e giganta pezza, stat en emperneivla tgeuadad sper l'aua dalla Val Strem il vitg Camischolas. Sur e sut paradeschan retschas chischners, «apparats per miserar temps d'unviern l'altezia dalla neiv», sco in jester ha pretendiu inagada. Dador il vitg ora han ils Franzos mazzau ils 6 da mars 1799 sin crudeivla moda; ins sa buca pertgei – dus buns vischins da Rueras: sur Giachen Antoni Condrau e Gion Fidel Venzin. Vieifer sesanfla il vitget da Zarcuns, che vischina cun Camischolas e che salida neu curteseivlamein cun siu bi sanctuari da Nossadunna; leuvisi Camischolas-sura cun plirs baghetgs e nua ch'ei steva ina casa entochen 1901. Il stradun dall'Alpsu traversa permiez il vitg e vegn flancaus da brineras casas, ornadas gustusamein temps da stad cun geranis e neglas.

Aschibein il vitg sco era ses habitonts han in bien num ella vallada, scriva gie il poet Josef Steiner:

*«Il pli bi vitg ei Camischolas,  
Sche buc la cufla fies cambrolas;  
Denton brocs piun sei els tschalès  
Ed ellas stgaffas zugls danès;  
E sin tgombra plunas tgarn,  
De tuttas uisas senza spargn.  
Teman lu nueta quai alv fem,  
Che vegn ora de Val Strem.»*

Pli baul haveva Camischolas empau schliet cundrez cull'aua. Baul currev'ella en abundonza, baul pauc ni nuot diltut. Fuv'igl emprem il cass, sche scutinavan maligns vischins d'auters vitgs, mond sper la fontauna vi: «Uss on ei bétga frina»; era il davos il cass: «Ussa vessen ei frina, aber bétg'aua.»

• • • •

Sut via amiez il vitg stat la pintga casa da scola, il centrum dalla sabientscha. Camischolas, en uniu culs vischins da Zarcuns, ha adina demussau gronda premura per la scola. 1862 han ei baghegiau la casa da scola ed il cantun ha giu regalau al vischiniadi in premi da 350.–frs., ch'ins ha saviu duvrar per pagar la scola ni applicar tier in fondo. 1863 han els giu mess in'entschatta tier in fondo per lur atgna scola tras ina collecta voluntaria, che ha purtau 393 frs. 63 rps., ch'els han augmentau cuntuadamein e saviu pagar aschia onn per onn lur agen scolast, entochen che la scola da Camischolas ei vegnida unida 1892 per gronda malcontententscha dils vischins cun quella da Sedrun.



Zarcuns e Camischolas

Avon onns stuevan las vischnauncas, ils singuls vischinadis, baghegiar sezs las casas da scola ed haver quitau per il scolast. Negin che havess giu schiglioc marveglias, priu ora la baselgia. Ed igl ei remarcabel cun tgei tschaffen bia vischnauncas e vischinadis han luvrau e spargnau per scaffir in fondo da scola, co biars privats han purtau grondas unfrendas per tal intent. Tujetsch ei mai staus anavos en quei risguard, anzi ha adina mussau grond interess e sacrificau bia per l'instrucziun dalla giuentetgna. Il «Romonsch,» ina gasetta da 1847 scriva denter auter ina gada il suandont: «La Vischnaunca de Tujetsch ha ils 30 de Matg unitamein tschentau si in fondo de scola de 11 000 fl., ditgel indischi melli renschs. In bi e zun legreivel progress e segiramain mai seudius ellas annalas tuatschineras suenter la mort dil glorius Pieder de Pultengia!»

Sco auters vitgs dalla vallada, ha Camischolas giu sia scola atgnamein ditg avon ch'ina casa da scola vegni baghiada. Vischins, ch'eran stai empau naven a scola, ni che savevan in tec pli bia ch'ils auters, sedevan sez neu ed instruevan temps d'unviern ils affons dil vitg. Aschia ha per exempl statalter Tumaisch Beer, in capavel e rutinau vischin, che haveva giu studiau tiels gesuits a Brig, dau plirs unviarns scola en casa d'Ignazi Beer sper la caplutta. Aschia era in onn in Gion Andriu Berther ella medema casa. Plaun a plaun suondan lu reguladamein scolasts e scolastas cun admissiun ni patenta:

|                   |  |
|-------------------|--|
| 1859/60 – 1861/62 | Mihel Antoni Maissen, Mustér en casa presentamein da Vigeli «Pign».  |
| 1862/63 – 1865/66 | Giusep Steiner, Cumpadials, paga 125.–frs.   |
| 1866/67 – 1867/68 | Elisabeth Huonder, Disla, paga 350.–frs.   |
| 1868/69           | Duri Riedi, Rueras.  |
| 1869/70           | Vigeli Berther, Camischolas.   |
| 1870/71 – 1872/73 | Rosa Berther, Selva.   |
| 1873/74 – 1874/75 | Sigisbert Monn, Mustér, paga 240.–frs.   |
| 1875              | Maria Ursula Desax, Mustér, che ha dau scola mo tochen Nadal; suenter han ils affons stuiu ir a Sedrun per quei onn e persu-enter ha Camischolas giu da bonificar als da Sedrun. |
| 1876/77 – 1879/80 | Anselm Capeder, Mustér   |
| 1880/81           | Onna Maria Caplazi, Surrein-Sumvitg, che ha giu quei onn 23 scolars ed ina paga da 430.–frs.   |
| 1881/82 – 1891/92 | Sigisbert Monn, Mustér, per la secunda gada cun ina paga da 340.–frs., che fuss turnaus bugen, essend oreifer cuntents cun affons e geniturs.                                    |

Ei era denton paucs affons a Camischolas, circa diesch, ed igl ei vegniu concludiu sin vischnaunca, d'unir la scola cun quella da Sedrun per spargnar cuosts ed havend ussa Sedrun ina nova, pli gronda casa da scola, baghegiada 1887. In recuors dils vischins da Camischolas tiel Cussegl pign ei vegnius enviaus anavos. – Da 1908 enneu survecha la casa da scola da Camischolas sco local per la scola reala dalla vischnaunca.

• • • •

Camischolas, dian ils perderts, vegli dir ton sco casa dil Mihel (ca = casa, Mischol = Mihel) e vegn ad esser staus all'entschatta ualti pigns. Igl onn 1768 haveva il vitg 17 fiugs cun 78 olmas (38 umens, 39 femnas, 1 absent). 1791 dumbrava Camischolas 106, Zarcuns 32 olmas. – Dapresent dumbra Camischolas 111 olmas cun 15 fiugs ed ha 15 casas, en quei 7 dublas, e lu 14 clavaus gronds separai.

•

Sco pader Placi a Spescha raquenta, era la veglia e nobla famiglia de Florin, oriunda dall'acla Flurin orasisura Rueras, serertratga cul temps a Camischolas e habitava la casa enagiu sut la caplutta, dadens la casa da scola. Descendents da quella nobla e renomada schlatteina ein serertratgs a Mustér e Rueun, e nus dumbrein denter quels plirs mistralis e landrehters.

Il tschep, restaus a Tujetsch, ha dau a nus denter auters distingui umens, igl excellent avat a Mustér, Gallus Deflorin. El ei naschius 1663 e staus battegiaus cul num Martin.



Avat Gallus

Igl october 1680 ha el fatg profess sco frater Gallus e vegnius ordinatus spiritual 1687. Da 1703–05 eis el staus plevon a Pigniu, silsuenter econom claustral ed in onn decan. Ils 29 d'october 1716 eis el vegnius eligius avat. Dotatus cun in student talent administrativ e benedictus cun rihezia da casa anora, eis ei reussiu ad el buca mo da pagar giu ils gronds deivets caschunai da ses dus antecessors cun baghegiar la claustra e la baselgia gronda, ch'el ha baghegiu ora e decorau rehamein, mobein el ha era schau anavos tier sia mort la claustra en bunas finanzas. La scantschala, il garter ed igl altar da

s. Columban ella baselgia claustrala portan aunc ussa l'arma da sia schlatteina – treis gelgias. Avat Gallus ei buca mo staus in bien econom, el ei era staus in prelat da gronda savida, da prudenta disciplina e da profunda pietad, aschia ch'il cronist ha saviu scriver: «Monsignur avat Gallus ei staus pella claustra e ses religius in bien avat e grazius bab d'ina ventireivla famiglia, ils commembers dalla quala selegravan giud lur bien pastur, il qual ha bein buca giu in liung, mobein in ventireivel regiment.»

Denter auter vegn ei raquintau, che avat Gallus seigi era sepassaus si encunter la persecuziun da «striuns e strias», che vegnevan da gliez temps turmentai e sentenziai alla mort tscheu e leu aschi levamein, senza far la necessaria inquisiziun e che formescha ina tresta pagina da nossa historia.

Sesurvend dil dretg imperial, concedius a ses antecessors, ha avat Gallus era schau batter muneida. Aschia anflan ins bluzchers ord quei temps, d'in maun sia arma e da l'auter ils bustabs A.G.D. (Abbas Gallus de Florin). Avat Gallus ei morts ils 26 da matg 1724 e satraus en baselgia claustrala spegl altar da s. Placi, nua ch'ina platta indichescha sia fossa.

Ina memoria dalla nobla famiglia de Florin sesanfla aunc ussa ella caplutta da Zarcuns. Igl altar dil maun dallas femnas vegn ad esser in regal dalla famiglia per engraziamenti dad haver retschiert ina grazia tras l'intercessiun da Nossadunna. Sut il maletg da Nossadunna stat l'entira famiglia enschanuglias, vestgida tenor la moda da gliez temps. Leu denter sesanfla era pader Gallus de Florin, pli tard avat, en vestgiu benedictin. Sutvia sepresenta l'arma dalla schlatteina, treis gelgias, e l'inscripziun:

Votum fecit Gratiam recepit. Durig de Florin 1679, aetatis suae 49.

Plinavon vegn ei fatg menziun d'in Martin de Florin, mistral dalla Cadi 1600, 1613 e 1614, cumissari ella Valtlina 1603; d'in Duri de Florin, mistral 1722 e 1723 ( $\dagger$  14 da matg 1754), staus maridaus cun Onna Catrina de Castelberg ( $\dagger$  6 da mars 1756). La schlatteina Deflorin exista aunc oz a Camischolas.

• • • •

Ella medema casa steva pli tard, veggend neu da Zarcuns, Gion Rest Valentin Beer, mistral dalla Cadi 1804 e 1805. Dil temps dall'invasiun fonzosa fuv'el scarvon dalla

Ligia e sche nus sbagliein buc, gerau da vischnaunca, la quala el ha menau e representau cun gronda capacitat. Era sesanflava el da quellas uras denter ils tschun com-members dil Cussegl d'uiara. Denter auter vegn ei raquintau, ch'el hagi giu da purtar a Mustér en num dalla vischnaunca la contribuziun da 5000 flurins per ils Franzos. Veggend a Cuoz ha in Franzos attaccau el e priu giu ses daners. Tut consternius vegn el a Mustér e raquenta al cumendant sinceramein cun sempels plaids sia sventira. Il general damonda el, sch'el enconuschessi il lader, sch'el radunassi sia schuldada. «Gie, jeu tratgel bein,» rispunda il scarvon dalla Ligia. Sin quei lai il cumendant clamar ensemes tut la truppa, tschenta si ella en duas lingias e passa lura cun scarvon Beer tras quella. Vesend Beer il lader di el: «Quel eis ei e negin auter.» «Jeu augureschel, ch'els mondien buc en errur», rispunda il cumendant cun seriusa vusch, fa prender giu il dessignau schuldau siu turnister, fa arver si el ed – anfla la contribuziun da Tujetsch bial'ed entira.

Mistral Rest Valentin Beer ei morts igl 1. da december 1814. Pader Placi a Spescha fa la cuorta remarca: «Ier ei il barometer ius ferm engiu ed oz all'entschatta dil meins ei il retg da Tujetsch morts: Rest Valentin Beer, scarvon dalla Ligia e mistral dalla Cadi. Lein haver speronza, ch'el seigi buca ius aschi ferm engiu ella perpetnadad, sco il barometer tier nus».

La dunna da mistral Rest Valentin Beer senumnava Onna Maria Monn, fuva pia buca mo misterlessa, mobein era regina, e quei ton pli, ch'ella haveva denter auter giu da parter cun ina sora la «bagatella» da 40 armauls e 4 cavals. – Las rehas e bialas mattauns da Tujetsch eran dad in temps ualts tschercadas, era ord vischnaunca, – probabel aunc ussa! «Magnucs da paupra glieud e mattauns rehas ein gleiti seturnai».

Nus seregurdein dad haver legiu, che podestat Gilli Lombris da Sumvitg hagi giu per dunna ina Maria Monn da Tujetsch ed obrist e marschal Ludvic de Caprez da Trun ina Maria Margreta Monn. Ton sco nus savein ei quei stau duas soras, feglas da mistral Duri Monn (1734 e 1735; †11 da matg 1764), che habitava l'interessanta casa cun tschalers d'arviul ed esch fier, ed in remarcabel plafond en stiva sper la caplutta da Zarcuns e che seigi staus fetg rehs. Forsa ch'il poet conta perquei:

*«Aber ils pli grons rehuns  
Anfl'ins eunc el vitg Zarcuns,  
Paucas tgèses, bièrs clavaus,  
In vitg che stad a miez ils praus.»*

Mistral Duri Monn scheva enqualga misteriusamein: «Ju a mai mez tiarms, mias feglas stun metter ed ils veggentsianter mettessen, sch'i savessen.»

Plinavon legin nus en ina cronica da 1504, che landrehter Duri Berchter hagi giu duas feglas, «und beyde den allerfürnemsten sich verheurathet haben, nemlich eine Margaritham dem H. Michaeli de Monte Burgenmeister zu Chur, die andere Julianam dem Melchiori Heym von Uhri Amps Verwalter».

Perquei che biars giuvens studiavan e biaras mattauns maridavan ord Tujetsch, udevan ins pli baul: «Ils pli biars daners han ils students e las mattauns purtau ord vischnaunca.» Pli tard ei lu aunc ina tiarza classa vegnida vitier: «Quels ch'ein i ell'America!» In fegl da mistral Valentin Beer ei stau il spiritual Tumaisch Giusep Antoni Beer, duront sia entira pastoraziun plevon a Breil (1818–1845), nua ch'el ei morts ils 29 da matg. Sper sias funcziuns pastoralas administrav'el era sez cun grond tschaffen e pratica savida l'entira economia dalla pleiv.

Camischolas ha giu aunc auters spirituals. Aschia vegn ei fatg menziun d'in sur Giachen Antoni Berchter †1765 da 39 onns; plinavon pader Sigisbert Decurtins en claustra da Nossadunnaun †1840; pader Sigisbert Beer, premurau missiunari egl uorden dils Redemtorists, morts ils 18 d'october 1879 a Perouse sper Belfort.

• • • •

E buca mo mistrals ed augsegners, il pign vischinadi ha saviu e sa aunc adina dumbrar denter ses habitants excellentas forzas quasi ord mintga clamada: medis, professers, officiers, scolasts, impressaris, deputai, derschaders, geraus, in ni dus sil pli pauc per casa e lu surtut marcadonts, che mavan ton bugen a fiera en tiara taliana, seregurdond dil vegl proverbi: Ina buna fiera da Ligiaun vala pli che gartiar il graun.

La fiera da Ligiaun era dad in temps la speronza dalla Val Tujetsch, gie ins sa dir dall'entira Surselva, per la tratga da biestga e la pli reha fontauna da nos daners. Perquei fuv'ei buca da sesmarveglier, che pign e grond, reh e pauper spitgava mintgaga aschi vess sin las empremas novas da quella fiera e quei ton pli ch'ella fuva adina empau dubiusa. In proverbi di gie, che treis caussas seigien malas da lignar: «L'aura, la fiera da Ligiaun e la luna dil pievel sin cumin».

Baul mava la fiera bein, baul mal e beinduras er'ei ina fiera da péz a cup, da pauc gudignar e pauc riscar. Aschia raquenta per exempl la cronica da 1850, che la fiera seigi ida fetg bein e gia igl onn sissu 1851 anflein nus la notizia: «La fiera de Ligiaun ei ida malisim; stau catschau circa 30 000 tgaus; sternada marcadonts, mo da Tujetsch fuv'ei 24». E puspei raquenta in marcadont tut consternius digl onn 1858: «Tschuncont'onns sun-del jeu staus la fiera da Ligiaun, mo d'ina schi miserabla sco uonn saiel jeu aunc mai seregurdar. Ins ha vendiu denter auter otg pulits vadials per 13 marenghins e miez ensemble, 20 mutgs per 6 marenghins il pèr, in Glarunes 4 vaccas per 26 marenghins ed in quart e sia davosa vacca stuiu scugliar naven per 50.–frs. Plirs marcadonts havevan gnanc smasau lur roschas a Ligiaun, biars ein vargai giu, ed il vargar giu Ligiaun ei adina ina mala; auters eran intenziunai da schar leu lur biestga tochen la fiera da Numnasontga».

Pilver, enqual onn vegnevan ils marcadonts mess a scola. E quei ch'ils pli perderts professers dalla historia naturala havevan mai anflau ora, quei savevan ils marcadonts da stiarls. Els savevan dar risposta sill'a damonda: «Tgei tier ha il tissi ella cua?» – «La fiera da Ligiaun!».

Mav'ei denton puspei ina ga pulit, sche secumblidavan ins vi ed ins era cuntents. Aschia vegn ei raquintau digl onn 1859 da marcadonts, ch'eran returnai baul da Ligiaun, ch'ei seigi vegniu vendiu bia biestga sin via, ch'ils Talianers vegnevien encunter e pagavien brav. E nos marcadonts erien da buna luna e buevien era in glas vin dapli ch'auters onns. Denton mavi sco ei levi e fuvan las tschentas era buca emplenidas adina cun marenghins sin lur retuorn, enzatgei nizeivel pertavan els adina a casa: ris e castognas, capialas bergamascas, parisols blaus e cotschens, cuntials, capetschas liungas da seida cun grossa miserocla e lu buca d'emblidar ils bials e custeivels fazalets seida, che las mattauns ed era dunnauns pertavan las fiascas sur il giocli oragiu, che formava cun la schlappa ina stupenta ed edificonta moda per las femnas da Tujetsch. Igl ei zun da deplorar, che quella veglia, sempla e biala moda entscheiv'era a svanir ella vallada spel-la tgina dil Rein per far tuppamein suenter allas modas modernas, che vegnan ord ils marcaus. Veras mattauns da purs duessen star tier la moda veglia ed esser loschas sin la moda da lur venerablas mummas e tattas.

In um, ch'era enzatgei, haveva e pertava pli daditg la capetscha seida nera, aschi cumadeivla e cuzzeivla. Quella dev'ad el in agen tip, alzava quasi sia autoritad. Nus seregurdein aunc bein, ch'ils reverendissims augsegners da Rueras pertavan era la capetscha seida visitond la scola ni stuend ir en ina casa dil vitg. Negin che havess fatg curvien, anzi! E nus buobs miravan cun particular respect sin in um cun capetscha seida e tertgavan, sche mo nus havessen era ina!

Dils da Camischolas ha Tujetsch era empriu da magliar la pulenta. Co quei? Il stradun dall'Alpsu, naven da Mustér entochen Ursera, ei vegnius baghiaus ils anno 1860 e surdaus al traffic 1864. Ils dus capavels ed intelligents frars Giachen Martin e Duri Battesta Berther da Camischolas, che havevan, senza neginas scolas, giu construiu en differents cantuns ed era en Tiaratudestga plíras vias, han era supriu duas secziuns dil stradun sull'Alpsu, il toc dils cunfins da Mustér entochen S. Brida e lu dils cunfins d'Uri entochen il secund caraun encunter Ursera, che vegn aunc ussa numnaus dils vischins dad Ursera «Berther's Kehr». Quels dus frars han giu ranschau en cun quella caschun a Camischolas in magasin per lur luvrers e la pulenta fuva in dils principals artechels per «i fratelli». Ils habitants dalla vallada han lu era entschiet a mirar sin quella frina melna e cumpravan all'entschatta in ni dus funs per far in'oprova. Denton prest han els giu anflau ora, che pulenta e latg seigi in bien ton meglier, che «put e penn». Ussa formescha la pulenta ina dallas pli essenzialas ed usitadas spisas en mintga famiglia dalla vallada.

Pia da tuttas respectablas clamadas e professiuns anflein nus el vitg da Camischolas; perfín il Gieri Dumeni Gieret, che mava mintg'onn cun affons giul «Schuobalan», fuva da Camischolas. Denton fagev'el bien marcau. D'ina, che ha fatg il viadi ina gada cun el, havein nus enderschiu, ch'ei custavi mo dus renschs. Da tuttas clamadas anflein nus dentter ils vischins, era aunc pietusas muniessas, denton ina clamada maunca – ustiers! Il vitg ha neginas ustrias e tut che stat bein. Tut che fa il pur. Els tegnan enzatgei sin bials praus e bialas vaccas ed han dasperas, sco tuts auters dretgs purs da Tujetsch, ell'eco-

nomia mo dus principis: «Luvrar e spargnar». E las masseras lavuran e spargnan culs umens pruamein, fideivlamein ed aschia han ins da viver e da vegrin atras cun dil siu. Sez dalla forza corporala dils da Camischolas stat ei secret. Pader Placi a Spescha raquenta dad in giuven da 24 onns cul num Giachen Mihel de Pally, che alzavi cun ses dus dets pigns ina brell cun 50 mesiras odembora, ferton ch'auters fagevan buca quei cun lur dets gronds. Dil reminent dat ei aunc ussa leu excellentas forzas, che seschassen en da luvrar e purtar cun tgi ch'ei fuss. «Tganvaus scu la via – burdis scu tgèses.»

• • • •

Gest sur la casa da scola sesanfla il centrum dalla pietad, ina plascheivla caplutta, dedicada a s. Onna. Quella caplutta mereta ton pli nossa particulara attenziun, havend ella survegniu ils 4 d'avrel 1916 in custeivel bi ornament, in altar gothic. Igl altar ei per part novs, per part veders, denton construius ed ornaus ussa tal'uisa, ch'el formescha en tuttis risguards in'ovra da valeta artistica e porscha in oreifer bi aspect. Caplutta ed altar han lur historia.

1822 per il di da s. Placi, ina mesjamna avonmiezdi, ei igl entir vitg da Camischolas barschaus giu. Il fiug ei ruts ora entadem il vitg, da maun sut e sco la tradiziun raquenta, dau fiug da dus valanuots jasters, che seigien lu scappai sul Rizli. Quasi tuttis vischins, priu ora glieud veglia ed affons, eran serendi sin la fiasta da s. Placi; plirs umens fuvan pellas alps entuorn. Ei era in onn tumpriv tut aparti. Pader Placi a Spescha di: «Per in meins ordavon ad auters onns». Ins haveva gia avon entgin temps giu cargau ad alp e fatg quasi tut il fein grass. Ils baghetgs tut da lenn ed il bia pavel sec els clavaus han giu nutriu sil pli ault grad il furius element. Ditg seigi ei stau sil plaz dil barschament mo treis umens: sur decan Giusep Hetz, plevon a Sedrun, sur Vigeli Venzin, caplon a Rueras cun aunc in auter um, probabel Toni Beer da Sedrun, che ha aunc saviu spindrar enzatgei scartiras ord la casa da gerau Tumaisch Beer.

Immediat han ins giu schau saver a Mustér la disgrazia e culs habitonts dalla vallada er'ei serimnau plaun e plaun sil plaz ina massa umens ord las vischnauncas, perfin ord la vischnaunca da Breil. Denton memia tard. 15 casas e circa 16 clavaus eran daventai en cuort temps in'unfrenda dallas flommas. Denter auter tschun grondas bialas casas cun tetg baselgia, ina da mistral Rest Valentin Beer, in autra da statalter Sep Venzin odem il vitg sur via, che pertava l'inscripziun:

*Tgei va quei tier a ti narrun,  
Sch'ei plai aschia al patrun?*

Statalter Sep haveva numnadamein giu baghegiau sia casa empau alla gronda e buca giu parti en ton bein e perquei stuiu tedlar bia critica. La risposta sin tut quei ha el lu giu nudau alla fin vid la casa. – Ins ha saviu spindrar quasi nuot, resalvond ord las duas casas odem, quella da statalter Sep, nua ch'ins haveva pudiu scarpar giu tut l'escha

e l'autra da Hans Giachen Deflorin sut via, nua ch'ins haveva perfin saviu far ora la pegna e ruclar dils plauns giu. Las casas sezzas ein era barschadas.

Il pli deplorabel ei stau, che duas persunas ein restadas el fiug, numnadamein ina matta sils onns, Onna Maria de Pally, che habitava en casa, presentamein da Martin Pally e ch'era turbelada empau da spért ed ina buoba da circa siat onns cul num Maria Librata Rothmund. Ils geniturs da quella mattella, Clau Giusep Rothmund e Maria Librata naschida Berther, oriunds da Mumpé-Tujetsch, che habitavan la casa presentamein da Clementina Beer, eran serendi a s. Placi confidond lur affon alla sura matta Onna Maria. Vagnend sur Venzin tral vitg, che haveva entschiet a barschar, hagi el viu la matta sin laupiet dend la bratscha. El hagi dau il camond da spindrar quei ch'ella sappi. – Probablamein vegn Onna Maria ad esser stada totalmein perplexa ed ei forsa dalla tema ed anguoscha seserrada en cun la buoba ed ein veginidas stinschentadas quell'uisa.

Sin camond dils reverends han entginas femnas veglias rimnau ils affons pigns ed ein serendidas da Mira ora. Denter quels fuva era la pintga Onna Maria da siat onns, feglia da statalter Tumaisch Beer, che ha priu siu frar pign en tgina ed ei currida quei ch'ella ha pudiu a Sedrun. Quei pign ei daventaus pli tard igl enconuschen redemptorist pader Sigisbert.

In buobet, che pertgirava la poppa sin in tapet sur in clavau, ha per ventira saviu spin-drar sia soretta, denton buc il tapet. Ina mumma, Turtè Berther, haveva giu pinau avon ch'ir a s. Placi in fagot resti sin baun pegna per ses dus buobs ad alp si Nual, mo era quel ei restaus ellas flommas. La medema famiglia haveva giu paucs dis avon plirs dis il latg ell'alp e purtau, sco usitau, tut purment a casa. Tut ha il vehement fiug lagutiu. Il latg er'aunc buca pagaus giu ed igl ei buca da sesmarvegliar, sche la mumma plirava: «A nus ei perfin il latg egl iver dallas vaccas barschaus.» Buobets da Rueras, che pertgiravan tiers vi Plaunmiez, havevan giu cattau adagur il fiug ed eran plein tema, ch'el savessi serasar ed era barschar Rueras. «Il fiug vegn della saif ain, della saif ain e brisch'era giu nies vitg.» Ina sempla harta da lenn cul maletg dil vitg da Zarcuns e da tschei maun Tgamaura il vitg da Camischolas en fiug, che penda en pierti dalla baselgia da Zarcuns, regorda aunc oz il pelegrin vid la horribla catastrofa dils 11 da fenadur 1822.

• • • •

In sa comprender la gronda dolur dils vischins returnond da s. Placi en vestgadira da firaus, stend en profunda encarschadetgna avon las ruinas da lur casas e baghetgs, ils eglis plein larmas. E tgei miseria per quella paupra glieud, che ha stuiu seretrer cun schuber nuot per in liung temps, per part en auters vitgs, per part en nuegls dil contuorn, entochen che las casas ein puspei stadas baghegiadas danovamein. Da cheu deriv'ei era, che quasi tuttas casas dil vitg present portan il medem onn.

Bein ha la vischnaunca gidau en tuts risguards ton sco igl ei stau pusseivel, cunzun era cun dar damaneivel lenna da baghiar ed esser gideivla leutier. La gronda part dalla lenna per niev Camischolas ei veginida pinada vils Diratschs, ch'ins ha numnau aunc ditg suen-ter «Uaul da Camischolas».



Il barschament da Camischolas

Tgei la Cadi ha prestau en tala disgrazia savein nus buca dir. Ina collecta el cantun Grischun ordeifer la Cadi, concedida dalla regenza e tratga si dils 15–29 d'uost 1822 cun stentusa breigia da dus vischins da Camischolas, probabel da statalter Sep Venzin e statalter Tumaisch Beer, ha purtau, quintau las victualias vitier, circa 3000.–frs. Ordeifer il cantun aunc circa 500.–frs., denter quei la Val d'Ursera cun 100 renschs, a proporziun la pli generusa donaziun sper quella da Sursaissa tudestga el valzen da 220 renschs. La respectiva

interessanta giesta da quella collecta cul num dils donaturs e dil liug sesanfla aunc oz en mauns da signur gerau Vigeli Berther-Flury a Camischolas.

• • • •

Tier quella sventira sil di da s. Placi ei era la bufatga caplutta da s. Onna daventada ina unfrenda dil fiug. Sulet ils mirs ein restai ed entginas caussas moviblas, ch'ils dus premurai reverendissims augsegners dalla vallada han aunc pudiu deliberar.

Tenor notizias historicas ei quella caplutta stada fundada 1655 da Duri Soliva, consecrada dad uestg Gion VI Flugi d'Aspermont ils 4 da settember 1656 (tenor auters 1658). Denton, sco ei para existeva gia avon ina caplutta da s. Onna a Camischolas, essend che landrehter e cumissari Pieder Berchter da Tujetsch, forsa sez da Camischolas, ha giu fundau leu 1563 ina messa perpetna, da leger mintgamai ils 21 da november. Plinavon legin nus en in rapport dalla visitaziun episcopala fatga a Tujetsch 1643, che la caplutta da s. Onna a Camischolas havevi da gliez temps ina facultad da 480 renschs ed annualmein dabien 30 crenas pieun, che vegneva applicaus per allimentar la glisch. Dapli fuv'ei fundau leu tschun anniversaris, ch'il plevon haveva da tener leu ils dis fixai. Persuenter retergev'el per mintga anniversari 5 bazs. Ultra da quei vegn ei menziunau en quei rapport, ch'ei seigi obligaziun dil reverendissim plevon dad ir inaga per meins culla messa a S. Onna ed el vegneva bonificaus persuenter cun 2 renschs. La dedicaziun curdava lu sin la secunda dumengia d'uost; dapresent croda ella sin l'emprema.

In'altra notizia rauenta, che la caplutta da s. Onna possedevi 1731 ina facultad da 640 renschs ed hagi contribuiu 150 renschs per gidar a baghiar danovamein quei onn la baselgia da s. Giachen a Rueras.

Pader Placi a Spescha, che ha aunc giu viu la caplutta da s. Onna avon il barschament, – el ei gie staus 1809 – 1812 caplon a Selva e 1812 – 1814 caplon a Sedrun – quel scriva en ina da sias scartiras il suandont sur tala caplutta: «Der äusserliche Bau derselben ist unansehnlich, die innerliche Auszier aber vorzüglich, was die Altäre anbetrifft sehr angenehm». Ed en in auter liug: «Die Kirche St. Anna in Camigolas ist inwendig fein ausgeziert».

Quels plaids han menau nus sil patratg, che la caplutta possi haver giu avon il barschament buca mo in bi altar, mobein ch'ella stoppi era esser stada decorada cun differen-tas, bialas picturas. Ed ina remarcabla isonza, suletta ella Val Tujetsch ch'exista aunc oz a Camischolas, lai sminar cun buna raschun, che la caplutta possedevi, seigi vid ils mirs ni vid il plantschiu sura, ch'era construius da lezzas uras en fuorrna horizontala, differents maletgs ord la passiun e mort da Niessegner Jesus Cristus. Ei fuva forsa ina specia da «biblia pauperum», quei vul dir maletgs dessignai e destinai per instruir il sempel pievel ella sontga ductrina e per stimular el tier la pietusadad. La sera suenter rusari vegn ei numnadamein recitau ella caplutta la sontga tscheina. Quella devoziun consista ord ils misteris, als quals ei vegn mess vitier mintga ga in babnos ed ina salidada. Ils misteris ein ils suandonts, ch'entscheivan tuts cun:

En laud e honur cu Niessegner

1. ha fatg sia sontga tscheina. Bab nos...
2. ha urau egl iert.
3. ei vegnius pigliaus.
4. ei vegnius sgomiaus, en fatscha spidaus e ris ora.
5. ei vegnius ghesliaus.
6. ei vegnius encorunaus culla cruna da spinas.
7. ei vegnius mussaus da Pilatus agli pievel.
8. ha purtau la crusch sil Cuolm dil Calvari.
9. ei vegnius crucifigaus.
10. ei vegnius prius dalla crusch e tschentaus el ravugl da sia sontga mumma.
11. ei vegnius satraus.

Era la tradiziun raschuna, che la caplutta seigi stada, decorada cun picturas e che la sura remarcabla devoziun seigi fetg veglia.

• • • •

Suenter il barschament han ins giu fatg ella caplutta in sempel arviul cun aissas. El chor fuv'ei gia avon in arviul en crusch da crap, che ha probablamein giu pudiu resister al fiug. Per metter neu ina porta han ils vischins, en lur miseria stui tagliar pustretsch sin las cauras. In tetg da slondas ha cuvretg alla finala la caplutta, che fageva ussa in'atgna impressiun amiez tontas trestas ruinas.

Endadens han ins cavegliau sils treis altars, empau in denter l'auter, las differentas statuas, reliquias, hartas, ch'ins haveva giu deliberau ord il fiug. Plaun e plaun han ins encuretg da remplazzar quei che muncava. Aschia 1826 dus zennets, retratgs ord il Valleis dalla firma Josef L. Penual da Reckingen, che furneva gia da vegl enneu ils zenns per Tujetsch. Hans Giachen Deflorin da Camischolas ha giu menau d'Ursera ils zenns sin bast e giu empau miseria orasi encounter il cuolm, essend ch'il buordi peginav'en ils trutgs.

Pli tard ha la caplutta survegniu in ualts grond maletg da s. Onna, fatgs da pictur Georgi, sesents a Glion, denton da pintga valeta. Quel ei vegnius tschentaus en ordinaria rama sulerada sigl altar grond e decoraus da mintga vart cun ina colonna. Vid mintga colonna ei lu vegniu fermau ina porta gotica. Quellas duas portas sesanflavan avon sigl altar dil maun dils umens. Duas outras statuas veglias eran postadas da mintga maun sper il maletg da s. Onna. Igl entir altar era encorunaus d' ina statua da s. Onna, ina aschinum-nada metterza (Selbdritt), cun in affon sin mintga bratsch, ch'era denton cul temps vegnida colurada e sulerada tut uliv. Autras statuas, pintgas e grondas, empau sbantunadas e disfiguradas, eran plazzadas sils dus pigns altars laterals.

1899 / 1900 ei la caplutta vegnida renovada da fundament anora. Per tener naven la humidad ei vegniu construiu egl interiur da maun sura in graschel mir; igl entir plantschiu ei vegnius cementaus. Igl arviul cun aissas ei vegnius remplazzaus cun in arviul da lattas e gep. Plinavon novs bauns e nova porta ed alla finala ei vegniu fatg alv dadens e dadora. Tier quella caschun ei deplorablamein ina inscripziun egl interiur sil mir sur la porta svanida, che indicava il barscharnent dils 11 da fenadur 1822.



Aschia eis ei restau e vargau entochen avon entgins onns, pia quei da tschien onns. Ins saveva da nuot auter. Cheu han ins entschiet a mussar entgina attenziun als maletgs ed allas statuas dalla caplutta da s. Onna. Ins ha studiav e cumbinau ed ins ei vegnius sil patratg: Tgi sa, schebein quellas diversas statuas antiquas udevan buca inaga tuttas ensemes?

Intercurrent sil revers dallas duas portas goticas ils stgirs maletgs da s. Catarina e s. Ursula, han ins anflau sin l'ina las cefras 15, sin lautra 17. Cavigliond las portas ina encounter l'autra, sco ellas audan, deva quei igl onn 1517, pia restonzas dad in altar gothic ord quei temps. La scaffa digl altar sez cun las respectivas decoraziuns sto esser barschada. Denton aschibein la grondezia digl altar, sco era ils ornamenti da quel, laschavan presumar exactamein ord la grondezia dallas portas ed ord las bein conservadas figuradas en relief da s. Gieri e da s. Maria Madleina. Ins ha priu neunavon las otras figuradas: Nossadunna cugl affon Jesus sin bratsch, ch'era denton ualts disfornunada, tschentau da maun dretg la statua da s. Clau, da maun seniester in'autra da medema grondezia, alla quala ins ha cartiu da stuer dar il num s. Conrad. Miserond e confruntond quellas statuas cullas portas goticas parev'eit da corrispunder oreifer. Ei restava aunc treis statuas pli

pintgas: Niessegner en dolur, Nossadunna cun stuorz en malencurada ed in'autra figura da medema grondezia cun cavels tschuors, ch'ins ha priu per s. Gion evangelist. Quei ha dau ina nova grappa, ch'ins ha tschentau ad ault en differentas tuorettas, che encoruneschan gie in altar gothic. Ussa fuva aunc da plazzar la statua da s. Onna, la metterza, la quala ei senza dubi ord in temps pli tard. Ferton ch'enqual pretendeva, ch'ella audi sisum, han auters cartiu cun buna raschun, ch'ella audi a bass e decoreschi la predella digl altar. – Ins ha construiu in dessegn provisoric e scaffiu quell'uisa ina idea, co igl altar vegl pudessi esser staus e savessi puspei veginr reconstruius.

Denton il dessegn ei veginus mess cun engraziament el truchet digl ugau baselgia e restaus leu ruasseivlamein plirs onns ora. Duront quei temps da pazienzia ha s. Onna encuretg benefacturs, che lessen schar restaurar quei vegl monument e tschentar aschia ina memoria en honor dalla mumma da Nossadunna. Ed igl ei iu bein. Niessegner ha benediu. La projectada idea ha survegni nova veta.

• • • •

Duas caussas stuein nus menziunar cheu, che meretan special laud e da veginr imitadas en talas relaziuns. Per igl emprem han ils vischins da Camischolas giu vendiu neginas figuras da lur caplutta ni alienau talas e per l'autra han ins surdau la reconstrucziun e renovaziun digl altar ad in dils pli capavels artists, ch'ins enconuscha dapresent en talas lavurs.

Igl ei stau ina gronda ventira ed ins ha giu ina particulara satisfacziun tier la restauraziun digl altar, che las differentas statuas ein stadas conservadas tuttas, quasi in tschen-taner ora ella caplutta, schegie ch'ins enconuscheva ni la valeta ni la connecziun da quellas. Savens han amaturs ed enconuschents da talas antiquitads, traversond temps da stad la vallada, vuliu cumprar ina u l'autra statua e pagar in bi daner. Nuot ei veginu vendiu, sil pli concediu da fotografar. Aunc avon paucs onns ha in signur vuliu cumprar il «pign, tschuor s. Gion» e giu purschiu alla bial'entschatta 300.–frs. Fuss ins seschaus en da marcadar, sche havess el senza dubi purschiu pli ch'il dubel.

Che tuttas figuras digl altar ein restadas conservadas, havein nus d'engraziar al special quitau ed alla prudentscha dils ugaus dalla caplutta. E buca meins era alla flotta energia dalla dunna digl anterius ugau baselgia. Quella fuva versada, empau el lungatg tudestg, e sch'ei vegneva temps da stad ella pli gronda fuola da fenar, ferton ch'ella fageva gentar, in u l'auter signur, che leva plidar cugl ugau pervia dad ina statua, sche'vella cuortamein: «Nichts verkaufen! Katholisch!» E leva tal dispetamein far clamar igl ugau giud il frust, sche fuva la resoluta risposta: «Nichts da! Keine Zeit! Kirche alles dableiben!» – Tonta filosofia capevan quels signurs, che pudevan esser gronds e perderts professers, che, sch'ins sa buca gudignar la dunna, sche persevez era buc igl um, e – mavan puspei resignadamein per lur fatg.

In bi exempl, ozildi tua ch'ei vegn vendiu ed alienau tontas caussas antiquas ord nos-sas cuntradas. Mo daners! Persuenter havein nus lu la honour – naturalmein cun pagar –

d'admirar ina ga ni l'autra cun in agen sentiment nossas bialas antiquitads en museums e collecziuns da privats jasters.

L'autra caussa, che mereta tut laud, ei che la reconstrucziun e restauraziun digl altar ei vegnida surdada ad in capavel e fin artist gest el stil gothic, numnadamein a signur Theodor Schnell da Ravensburg. Tal signur ha gia furniu pliras excellentas lavurs, era per nies cantun, sco per exempl a Degen, Vignogn, Poschiavo, Sursaissa tudestga, senza vuler numnar sias finas lavurs en outras cuntradadas. Signur Schnell gauda grond renomé ed ha demussau gia tier differentas occasiuns siu senn artistic, buca mo sco sculptur e cun far novs altars, mobein era sco arhitect e restauratur. Per exprimer sias profundas ideas ha el anflau siu agen stil e quei ei adina in'enzenna d'in grond talent.

•

1914, il mars, han ins clamau signur Schnell a Camischolas per schar studiar quellas differentas restonzas, prender las mesiras necessarias per saver elaborar aschia in eventual plan. Igl artist ha demussau alla bial'entschatta grond interess per quellas caussas antiquas, ha approbau la projectada idea ed ei semess cun tschaffen vid il studi per in plan detagliau.

En buca ton ditg temps arriva tal plan cun la calculaziun dils eventualls cuosts. Il plan ha plaschiu oreifer e monsignur uestg Georgius ha dau bugen sia approbaziun. Igl accord ei vegnius suttascrets; ins ha fatg en las figuras per tarmetter a Ravensburg. Cheu entscheiva la sgarscheivl'uiara ed ins ha giu empau tema da tarmetter tala rauba suls cunfins. Nuotatonmeins, cuort suenter Daniev 1915, ein las figuras vegnididas spedidas a Ravensburg e quei senza difficultads. Stau vargau biabein miez onn era signur Schnell alla fin cun la lavur e semtgaus da vegnir e tschenttar si igl altar. Denton en consequenza dall'uiara ha il transport sur ils cunfins giu nundumbreivlas difficultads, che han caschunau in'empau unfiseivla correspondenza vi e neu. Alla fin da



Igl altar gotic a S. Onna

fevrer 1916 finalmein eis ei tonaton reussiu da survegnir anavos igl altar. Quater candelors da metal, corrispondents agl altar, ch'in generus benefactur haveva giu schau empu-star, ein vegni salvai anavos e sappi Dieus, sche quels vesan aunc Camischolas. Igl altar ei vegnius tschentaus si, sco detg, ils emprems dis d'avrel. Las excellentas bialas statuas cun lur marcanta e tonaton migeivla expressiun, il reh e splendid ornament en fina colur, fan ina stupenta cumparsa. Igl altar plai generalmein a tgi che viseta la bufatga caplutta. Vegg ei cul temps aunc dau in auter colorit al chor e dau in auter clar allas finiastras, sche vegg il custeivel altar a sepresentar aunc meglier. E vegg plaun e plaun l'entira caplutta restaurada tenor plan e correspondend agl altar, sche daventa il pign sanctuari da Camischolas bein il pli bi e custeivel monument dall'entira vallada, che posseda dil reminent buca paucas bialas e plascheivlas baselgias e capluttas. La caplutta da s. Onna ha già ussa gronda attracciun e perfin buntadeivels, fins mauns jasters han tschaffen da gidar ad ornar ed embellir altar e caplutta, sco già pli da vegl, nua che la cronica raquenta, che Anna, feglia da mistral Giachen Berchter, pli tard mari-dada cun statalter Gilli Berchter a Camischolas, hagi (ca. 1670) «in St. Anna kirkhen ein schönes sidenes geblüombtes rothess antipendium mit 2 paar Mayen auf dem Altar lassen machen».

• • • •

Tgei artist ha ussa giu fatg quei altar all'entschatta, pia 1517? Nus havessen aunc dau bugen risposta sin quella damonda, mo nus havein anflau neginas positivas notizias malgrad tutta tscherca. – Forsa Iwo Strigel, che ha construiu 1489 igl altar gotic, che sesanfla ella baselgia da s. Gada a Mustér? Ni in da ses scolars? – Nus cartein plitost Kendel da Biberach, che ha giu furniu 1516, pia ual igl onn avon in semegliont altar gotic ella caplutta da S. Gion – Medel, dapresent restauraus e tschentaus ella baselgia da Vignogn, Lumnezia.

Nus fagessen aunc bugen menziun dils benefacturs, che han surpriu aschi generusa-mein tuts cuosts dalla custeivla restauraziun senza mulestar ni vischins ni fondo dalla caplutta. Mo nus stuessen temer, ch'ei massi cun nus, sco igl ei iu cun igl artist signur Schnell, che haveva indicau en in encarden digl altar mo dalunsch tut bufatg ils numbs dils benefacturs. En in mument maluardau ha in ferm pennel cun colur, giu strihau atras tut radicalmein. Reproschas han gidau nuot. «Il maun seniester duei buca saver tgei il maun dretg fa!»

Il Segner, il remuneratur da tut bien e s. Onna, en honur dalla quala quei antic monum-ment sesaulza en nova splendor ord las ruinas da quasi tschien onns, veglien denton benedir e remunerar persuenter! Ils vischins da Camischolas, sco era l'entira vischnaun-ca san bien grau. Dieus paghi!

Avon che prender cumiau dalla caplutta drizzein nus aunc ina gada nos egls sil bi altar. Las noblas, vivas fatschas da Nossadunna cul divin affon Jesus sin bratsch, dils uestgs s. Conrad e s. Clau, da s. Gieri e da s. Maria Madleina miran carinamein sin nus, veramein sco ord il reginavel dils beai. Els perdegiān migeivladad, aulzan nies cor e muentan nus tier pietad e fidonza. E ual sura en plascheivlas tuorettas, stattan Jesus en dolur, Nossadunna en dolur, s. Gion en dolur ed era nus vegnīn commuentai tier dolur e compassiun. Bugen stein nus enschanuglias el tgeu sanctuari per far ina ferventa oraziun. E sbassein nus in tec ils egls, sche sepresenta danovamein en carinadad la statua da s. Onna, sil bratsch dretg il divin affon Jesus, sil bratsch seniester siu agen affon, Maria sanctissima. S. Onna tonscha encunter nus ils dus carins affons, mussond cun cor matern la fontauna da tut agid, da tut cunfiert: Jesus e Maria! – S. Onna ei la patruna dalla caplutta, ella ei denton era la particulara patruna dallas mummas. Possien e veglien quellas serender savens cun lur cars pigns en cumpleina fidonza tier quella pussenta patruna, svīdar ora leu lur cor ed anflar nova curascha, nova legria per ademplir lur grevas, sublimas obligaziuns.

Da mintga vart dalla statua da s. Onna legin nus aunc sillā predella la significonta inscripzion en relief: «Haec est Mater Anna, quam in prosperis adiutricem, in adversis auxiliatricem habemus». Quei ei la mumma s. Onna, che protegia nus en ventira e che porsch'a nus agid en sventira. Possi quei adina restar quell'uisa e semanifestar da tut temps, buca mo tier ils vischins da Camischolas, mobein era tier tuts quels che prendan cun fidonza lur refugi ella caplutta da s. Onna.

• • • •

Nus bandunein la caplutta. Avon la porta dil sanctuari sefermein nus aunc ina ga sil bi pastg verd e mirein empau entuorn. Il di ei schi bials ed emperneivels. Da tuttas sorts maletgs ord la historia dil vischinadi, legreivlas e trestas regurdientschas, tut in denter l'auter fatschentan nossa fantasia.

Ei leva parer, sco nus vesessen avat Gallus cun siu pader econom, vegnend a cavagl per far ina viseta als ses e per rugalar fatschentas. Haveva gie la claustra da lezzas uras differents beins a Camischolas sez e lu da trer en bia tscheins fier, cunzun a Dieni, Flurin sut e Bugnei, dasperas era tscheins per capitals ed alps. Principalmein havevan las grondas alps da Tschamut, Val Val e Val Giuv da pagar mintg'onn arvè, l'alp da Tschamut 142, Val Val e Val Giuv 600 crenas caschiel grass en rauba ni 18 rizzers per crena. Quels tscheins ein vegni pagai giu 1866. – Curnera udeva alla claustra, ch'ella ha vendiu 1540 a vischins da Faido per 400 flurins. Dapi 1913 auda quell'alp a privats da Tujetsch.

Anno 1622, sut avat Sebastian de Castelberg, ei la dieschma per ils beins «Denter auas» (Val Mila e Val Bugnei?) vegnida pagada giu.

Dad in temps possedeva la claustra aunc certas regalias en Tujetsch. Aschia rauenta la «Synopsis», che Adalbert II ensemblamein cul cumin dalla Cadi hagi schau vi 1658 tuts

fuorns da metal sin territori da Tujetsch per in tscheins annual ad in cert bandirel Duri Soliva.

Ils Franzos vegnan el tgau a nus; els van ils 6 da mars cun rabia tras il vitg; ins vegn buca ditg suenter cun la bara dil curaschus e brav giuven Giachen Martin Berther, ch'era curdaus sco emprema unfrenda dils Franzos a Putnengia. Ins porta el ussa en casa paterna. Ed ussa – Gliendisdis Tschuncheismas 1804 – encunter sera, co ei vegnan cun mistral Rest Valentin Beer a cavagl cun manti tgietschen. Pievelun cumpogna e selegra, misterlessa Onna Maria vegn cun ses affons ord casa, retscheiva cun legria siu carezau mariu en tonta honur, beneventescha l'entira suita. Avon casa vegn il pegr d'honur erigius, ornaus, cun matgs e tschupials e fiasta vegn ei fatg tutta notg.

Ei para sco sch'ils marcadonts turnassen da fiera cun tschentas plein aur, che discuoran e raquentan als vischins jamnas ora nuot auter che da Sebiastg, Munt Schiember e Ligiaun, da paintgas, dall'oreifra busecca, dil vin els buccals, aschi buns e bienmarcau...

Cun dolur ed encarschadetgna mirein nus entuorn si pellas casas, salidassen aschi bugen in tat ed ina tatta, che han giu da supportar aschi grev entras il barschament ed ils quals Niessegner ha priu tier el in di l'in ed in di l'auter (18 e 19 da fevrer 1830; Vigeli Giusep Berther e Maria Turtè Pally), che nus havein mai enconuschiu; purschessen puspei il maun a tons parents ed enconuschents, che han bandunau nus aschi spert... Nus alzein ils eglis envi. Ei para sco nus udessen la ramur ed il fraccass dalla lavina da Londadusa. Ella vegn cun furia encunter Zarcuns e satiara sur Giachen Biart, plevon da Sedrun, cun tschun outras persunas: Giusep de Medell (il davos da quella schlatta), Casper Durschei, Sep Maria Caviezel, Onna Maria ed Onna Barla, feglias da Giachen Berther. Plevon Biart, numnaus silsuenter sur Giachen dalla lavina, leva purtar cun quels treis umens gl'emprem agid als vischins da Rueras tier la terribla catastrofa dils 6 da fevrer 1749 ed ein daventai sez ina heroica unfrenda da carezia proximala ed han augmentau la profunda consternaziun dall'entira vallada. Ina gronda crusch lenn, fermada vid la casa da Sep Antoni Schmed a Zarcuns, da maun sura, nua che la via menava pli daditg speras ora, regorda aunc ozildi vid quella stermentusa disgrazia. – «Sur Biart haveva giu benediu la platta dil barlot si Caschlè e grittentau cheutras sil pli ault grad las strias, che han giu engirau perpetna vendetga sil mument senza stola ed ussa pudiu menar atras lur plan, purtond neutier massa neiv e stuschond quella encunter Zarcuns. – Stuschei, stuschei avon che s. Giachen greschi!» aschia raquentan fablas e detgas da Tujetsch...

Tuttenina resunan trestamein ils dus zennets dalla caplutta per in car vischin. Ei portan la bara da Rest Valentin Beer, ch'ei daus giu d'in precipezi sill'a Puoza, els Netschs, ils 23 d'uost 1829 – in'unfreenda d'in fideivel nurser.

S. Onna tucca puspei da miert e plira per la mort da sur Vigeli Venzin, premurau caplon da Sedrun. El era vegnius avon in per dis culla messa a s. Onna, daventa maldisposts duront quella e serenda silsuenter tier sia sora, maridada cun Hans Giachen Deflorin e miera leu ils 15 d'avrel 1854 ella biala vegliadetgna da 78 onns. Avon dus onns haveva el giu celebrau per Buania solemnamein siu giubileum sacerdotal da 50 onns, nua che

la vischnaunca haveva priu viva part, havend sur Venzin surviu adina fideivlamein alla vischnaunca sco caplon a Rueras ni a Sedrun naven dall'entschatta da sia pastoraziun. In um pign, zaclin, d'oreifer bien humor. El ha atgnamein giu raschun da murir a Camischolas, nua ch'el haveva sedau tonta breigia tiel barschament, cunzun era cun spindrar las figuraz digl altar gothic. Nus essan aunc oz engrazieivels persuenter. Speronza ha s. Onna era mess en in bien plaid tier sia bilanza finala.

E puspei cloman ils zenns da s. Onna aschi lamentabel enderschend, ch'ils dus giuvens frars Paul Giusep e Vigeli Giusep Valier seigien, cun ir per lenna, vegni ella lavina en las Ruinas da Pardatsch ils 4 da fevrer 1892. Ina nova disgrazia da lavina, dallas qualas Tujetsch ha giu el decuors dil temps aschi biaras.

• • • •

Oz la davosa dumengia d'uost, era stau messa e viaspas ensemens. Suenter il survetsch divin haveva il statalter giu clamau: «Oz vegn vendiu las pastiras – el liug solit». Liug solit? Quei fuva Camischolas; quei ei tut che sa. Las femnas eran perquei libras suentermiezdi. Tgi va en Marihelf, tgi o S. Giusep, outras giu S. Antoni: «Nus vein giu empermess dad ira». Enqualina mira il glin.

Laura dalla stad era stada oreifra; ins era ualts bein a cantun cul fein. Buna qualitat, quantitat anzi mediocra. Gest perquei spetgavan ins oz empau pli bia veta tiel vender las pastiras. Ils umens, cunzun ils giuvens, han in agen ardiment dad ir el «quelm; in toc stu nonavaun».

Entuorn l'ina semovan differentas gruppas, umens dadens e dadora, encunter il «liug solit». Senza saver aunc atgnamein positiv encunter quala spunda la ventira betti, setschintschavan e manegiavan certins: «Nus lain sebetter ensiamen; quai fuss ina buna per nus. Co catschain nus. Cartaivlamain vutan quels del «Crest» è quella. Dentaun nus catschain.»

Stau neutier ina gronda partida umens, che seraschunavan curteseivlamein sin via amiez il vitg, ha la caussa priu sia entschatta. «Ussa vegni notier», ha in um clamau.

Amiez ina punt nuegl, plitost osum, seseva in gerau sin ina sutga, las schanuglias en crusch, ina buccada pupi e rispli enta maun. In tec pli anavos stevan ils stagiadars sepusond encunter igl esch-nuegl, pinai da dar sclariment sur ils cunfins da mintga sort. Dentuorn en miez rudi stevan ni sesevan sin lennas ed aissas ils purs en buna luna. Beinenqualin pareva da vuler far concurrenza cun sia pipa als tgamins leu entuorn. «La pipa fo bial'aura». Cul vender vegn ei entschiet odem uonn ed iu anen, naturalmein da maun sura.

Cun marcanta, clara vusch ha igl ufficial entschiet ad ingantar las sorts destinadas da schar segar igl onn dad uonn. «Pêr l'emprema... e pêr la secunda... tgi pu dê plé?» All'entschatta ei stau pign fiug, denton vegnend encunter Vons e dil Caschlè viaden mavan las flommas pli ad ault. Ed igl ufficial silla sutga haveva bien egl; el enconuscheva exact sia glieud, capeva era da cudizzar e da far catschar. Denter en vegneva dau

enqual pintga strihada, fatg enqual remarca, che teneva si da frestg la radunanza, denton adina en egl ils interess dalla vischnaunca.

Era ina sort vendida, vegneva il cumprader e prezi nudaus e lu explicau la suandonta – «buna de siè, naidia sculs praus Salins e spir matun» – schegie magari plein fogas e nuot auter che tschêrs e nétschs. Denton ils purs savevan quei bia meglier, savevan exact tgei fein, cons blas quella dat e cura quella era stada segada la davosa gada.

E vegneva ina sort memia damaneivel da pastira dad alp ni da casa legida giu, sche saveva ei dar caneras e sbarradas davart dils pursanavels dall'alp ni dils vischins dil vitg. «Co schain nus bêtga dar ora, uonn tge vegn aunc scart de maglia! Schi dengiu schain nus bêtga siè, quai vegn malsegir pellas vaccas! Sé Foppa verda schain nus absolut bêtga dar ora plé, quai vegn malsegir, della lavina!» Tgi era persuenter, tgi encounter – alla finala secunvegn ins.

E vegn ina gronda e biala sort en nomina, cheu seregheglian las gruppas. «Co catschain nus,» scutinan certins ellas ureglia. Ed igl ufficial sillä sutga strehla barba, selegra suten e tratga tier sesez: «Co lain nus schè seglir.»

«50.-frs. per l'emprema... tgi pû de plé?» – «55 per l'emprema e secunda... tgi pû de plé?» – 56 per l'emprema e secunda... tgi pû de plé?» – «Tgi o catschau?» Quei saveva bunamein negin. Denton igl um sillä sutga, quel saveva tut. El saveva en tgei cantun la mur dil fein ferdava il meglier. Davos il dies dad in auter haveva in mussau discussamein siu maun; quei leva dir aunc 5.-frs. dapli. In auter haveva mussau siu polisch – aunc in franc. Denton era aviertamein vegneva ei catschau. E levan plirs haver la biala sort e negin ceder, sche vegneva ei beinduras salau, pli che salau. «Stagn tgèr, dentaun bi de luvra e bien fain», era aunc adina la gronda consolazion dils ventireivels socis.

Aschia era ei vargau biabein quater uras e ualti tuti, tgi che haveva giu tschaffen, eran vegni tier in ni dus tocs pastira. Umens vegls entscheivan ad ir encounter casa discurrend aunc sur quella e tschella sort. «Quella vai ju siau in onn cul Toni ed o dau 35 blas, bien fain, tge magliavan ugèn. Ussa sai tut memia tgèr; plé tga 50 rps il bla munglass i bêtga sta.»



Camischolas

Las femnas stattan avon casa e spetgan sils umens. Ei tucca gleiti da rusari. Veggend tral vitg in u l'auter dils umens vegn ei dumandau tscheu e leu: «Savais era sche'l nies o cumpbau enzatgei?» «Taun scu ju a memoria ol cumpbau la Valmala. I en sebess ensiamen ina partida.» «Quai, quai! Lu pudain nus aunc ir a pinar tier enzetgei cuschinau; quels von franc damaun schon bégan marvegl.»

• • • •

A Camischolas vegn ei pli e pli quiet; la fatschenta ei finida. La suprastonza quenta aunc spert ensemes, tgei igl ingant ha purtau. Ella ei cuntenza. Auters han endamen cura entscheiver a segar la sort e tgei mintgin hagi da prender. Las femnas dil vitg havevan pinau caffè e beinenqual pren il quinau ni bien amitg a marendia. Ils auters van tempradamein encounter casa. Nus mein era.

Passond sper la davosa casa vi vegn il barschament da 1822 aunc ina gada endamen; il fiug era gie ruts ora cheu. Nus havein salidau la schitta statua da Nossadunna el mir dalla casa. Vegli Nossadunna pertgirar il vischinadi da disgrazias, da tut mal!

Veggend vi sut Zarcuns havein nus aunc mirau inagada vi encounter Camischolas. Da cheu anora seprep il vitg ora il meglier. Pintgas casas, gronds clavaus ed ils novs veggan aunc pli gronds. Cumpatg ch'ins ha da metter en enzatgei. Tetgs cun ziaghels cotschens e casas cun colur clara fan disperer igl emperneivel vitg. E casas alzadas mo dad ina vart, paran sco in, che ha unflau la fatscha mo dad in maun. – Il zenn da s. Onna tucca da rusari. Ei paress bunamein, sco sch'il clutger balluccass in tec, – denton, sche mo la car-dientscha ballucca buc!

E mond vinavon vegn puspei el tgau igl altar gotic da 1517, che sa celebrar uonn il giubileum da 400 onns.

Dutg grond – ed il vitg Rueras cun sias casas brinas e neris representava nos eglis. E leuvisi l'imposanta ustonza, che regorda era gest uonn vid in centenari, vid la lavina da 1817, che meritass era in per notizias. Denton, sche Dieus vul, in'autra gada.

# **Baselgias, capluttas e spiritualessor da Tujetsch**

La gloria dils affons ein lur perdavons.

(Prov. 17, 6.)

## **Indroduzion**

Tujetsch ha senza dubi retschiert la grazia dil cristianissem entras la casa da s. Sigisbert, la quala ha era giu quitau silsuenter per la pastoraziun dalla vallada. Da tgei temps denton la vallada ha survegniu sias empremas baselgias e sia atgna pastoraziun, ei grev da dir. Ei maunca leutier ad interim il necessari material. Segiramein han Rueras, Tschamut e Sedrun giu baul lur sanctuaris.

Igl emprem spiritual per Tujetsch vegn probabel ad esser secolocaus a Sedrun. Da leu anora ha el pastorau l'entira vallada. Aunc tard silsuenter, avon che fundar las duas caplanias da Rueras e Selva, e nua ch'il plevon haveva beinduras in ni dus gidonters cun el – aschia fuv'eit a Tujetsch 1525 in plevon, in vicari ed in primissari – vegneva tutta pastoraziun procurada da Sedrun anora.

Denton fuva tut normau. All'entschatta dil 17avel tschentaner per exempl haveva il plevon l'obligazion da celebrar la s. messa inaga per meins en tschun capluttas e lu aunc il di da dedicaziun. A Rueras stueva il plevon vegnir mintga quendisch dis culla messa, siu gidonter duas ga per jamna. Firaus e dumengias stueva tut serender igl entir onn ora ella baselgia parochiala, priu ora la dedicaziun dallas tschun capluttas.

Nossa lavur porscha mo fragments, notizias, cunzun quei ch'appartegn l'entschatta. Sper nossas lavurs da mintgadi, essan nus sedai onns ora tutta breigia per rimnar nossas notizias. Igl ei stau ina tgeua, plascheivla occupaziun. Nus havein encuretg e rimnau nua ch'igl ei mo stau pusseivel. En particular ei quei daventau egl archiv episcopal ed egl archiv dalla pleiv. Deplorablamein entscheivan ils differents cudischs officials dalla pleiv pér cun 1664 ed ein concepi anzi sil cuort. Tscheu e leu perfin enqual largia. Anteriuras notizias sur battens e mortoris, ch'ins ha scadin cass giu fatg, e che havessen purschiu fetg giavischeivel material, ein buca d'anflar pli. – Las notizias biograficas dils spirituals nativs da Tujetsch han caschunau in'extensiva correspondenza.

Ils spirituals nativs da Tujetsch – natural aunc ditg buca tuts! – schein nus suandar ton sco pusseivel tenor igl onn dall'ordinaziun sacerdotala. Spirituals, dils quals nus essan buca stai segirs dil tuttafatg, schebein els seigien oriunds da Tujetsch, havein nus buca menziunau, sco per exempl: Andriu Decurtins, plevon a Sedrun 1656–1672; Barclamiu Deflorin, plevon ad Andiast 1682–1684 etc.

Ultra dils spirituals nativs ha Tujetsch giu differents spirituals, la mumma dils quals ei stada da Tujetsch e dils quals plirs ein naschi e tratgs si en Tujetsch. Aschia han giu la mumma da Tujetsch: Aporta (de Portas) Giusep Antoni da Sumvitg (mumma, Maria Catrina Venzin); Lombris pader Pieder Bruno da Sumvitg, Karthäuser ad Ittingen (Maria Monn da Zarcuns); Sachi Gion Antoni da Mustér (Castgina Macolin da Rueras);

Camenisch Giusep Maria da S. Roc-Medel (Maria Catrina Lisabet Weller da Sedrun); Tuor Gion Gieri da Rabius (Onna Maria Berther da Camischolas); ils dus cusrins benedictins a St. Vincenz, America, Niesslein dr. pader Virgil (Castgina Riedi da Rueras) e Werpfer pader Robert (Tresa Riedi da Rueras); ils dus frars paders gesuits Duri e Placi Fidel Sialm da Segnas (Victoria Venzin da Rueras).

Per buc engrondir memia zun nossa lavur, essend ils cuosts da stampa aunc adina aschi gronds, havein nus stuiu serestrenscher mo sin cuortas notizias aschibein ariquid las baselgias, sco era il spiritualess, notizias, che nus essan denton stai sespruai da dar historicamein aschi exact sco mo pusseivel. Tier tons datums san denton tgunsch errurs sesluitar, ch'ins vegli gentilmein perstgisar e curreger. Las notizias san forsa animar in u l'auter giuven cumpatriot da far cul temps pli detagliai studis sur in u l'auter sanctuari ni meriteivel spiritual dalla vallada.

Nies intent tier quella lavur ei stau da metter ensemes ina gada quei spatitschau material historic da nossa vallada e porscher quel als stimai convischins. Cun nossa lavur havein nus plinavon vuliu leventar e cultivar danovamein il spért da pietad ed engrazieivladad encunter ils perdavons, che han purtau tontas unfrendas cun baghegiar e mantener ils custeivals, bials sanctuaris; che han sacrificau ton per schar scolar lur fegls, ch'il Segner ha clamau en sia misericordia tier siu sogn survetsch; lu era per conservar adina en pia ed engrazieivla memoria tuts spirituals, che han enzacu operau e pastoraу ella Val Tujetsch, che han sacrificau lur meglieras forzas dil spért e dil tgierp per il beinstar dalla vallada. Sogn Paul admonescha gie: «Seregurdei da vos superiurs, che han annunziau a vus il plaid da Diu.» (Hebr. 13, 7.) Possi quei spért adina semantener e crescher en nossa vallada!

Per conclusiun bien engraziament a tuts quels, ch'ein stai gideivels en mia lavur, cunzun a differents reverendissims signurs spirituals, che jeu hai stuiu mulestar beinenqualga. – Medemamein special engraziament a mes stimai reverendissims confrars e prezai amitgs dalla vallada, che han surpriu generusamein ils buca pigns cuosts per ils maletgs dalla broschura ed han aschia levgiau la publicaziun da quella. A tuts: Cordial Dieus paghi!

pader Baseli

## Sedrun

El vegl «Anniversari» dalla pleiv da Tujetsch dil 15avel tschentaner, in custeivel document, stat ei secret sper il datum dils 27 da zercladur 1205, che la dedicaziun dalla baselgia a Sedrun crodi sin l'emprema dumengia suenter la fiasta da s. Vigeli (26 da zercladur), ch'ei il patrun dalla baselgia.

1408, 11 da matg ei igl altar inferiur vegnius consecraus en honor dalla beatissima purschala Maria.

1490, 10 da schaner ha papa Innocens VIII incorporau la baselgia da s. Vigeli alla claustra da Mustér, che haveva senza dubi da vegl enneu la collatura.



Baselgia parochiala da s. Vigeli

Sur la baselgia, ch'existeva avon quella dad ussa e la quala era vegnida baghegiada probablamein all'entschatta dil 13avel tschentaner, dat il rapport dalla visitazion episcopala da 1643 in ualti clar maletg. Ella fuva situada pli enneu encunter il Drun ed era pli pintga che la presenta. Ella formava in quadrat el liung; il chor haveva arviul, ferton ch'il plantschiu-sura dalla nav fuva plats cun aissas, sustenius da duas retschas petgas. Sco altar grond el chor steva igl altar gothic, ussa altar lateral dalla s. fossa, cun las statuas da Nossadunna, da s. Leci e s. Flurin, da s. Vigeli e s. Bistgaun. Dil maun dallas femnas sesanflava in altar da s. Bistgaun cun figuras veglias, probabel en relief bass, che representava Jesus, che vegn prius giud la crusch. Sper quei altar steva la porta dil clutger, che fuva quel dad ussa. Dil maun dils umens sesanflava igl altar da Nossadunna dil s. rusari cun siu maletg e quels da s. Dumeni e s. Catrina da Siena. Sper quei altar steva el mir da maun sut il battisteri. Ina bufatga gallaria da lenn circumdava aschibein igl altar, sco era il battisteri.

Ultra da quels treis altars fuva amiez baselgia avon ils pass dil chor in quart altar en honur da s. Brida cun sia statua, ed in pign, bi maletg da Nossadunna, consecraus il zer-cladur 1630.

Ina biala scantschala, carteivlamein quella dad uss, steva da maun dallas femnas dentier chor e nav. In pierti da lenn cun in carner serrava giu la baselgia. – Schebein ei hagi existiu aunc in'autra baselgia ni caplutta a Sedrun avon la sura descretta, savein nus buca dir; il datum 1205 dil vegl «Anniversari» lai sminar bein.

1691 han ins rut giu la baselgia veglia e baghiau ina nova, la presenta. U ch'ella fuva en decadenza, ni plitost periclitada dil Drun, ni forsa era memia pintga. En quellas lavurs ei in quader daus giu sin Margreta, dunna dil Giachen Gion Pieder ed ha caschunau immediat la mort ils 12 d'uost 1691.

La baselgia nova ei vegnida baghiada pèr circa 2/3 pli anora. Il clutger, ch'ei restaus quel dalla vedra, stat ussa a pèr culla porta dall'entrada, ferton ch'el steva, sco gia detg, tier la baselgia vedra enasisum visavi il teschamber. La presenta baselgia ei pli gronda ed ha tschun altars. Il present altar grond, sco era ils dus laterals da s. Brida e s. Bistgaun, ein, quei ch'appartegn la construcziun e decoraziun ina oreifra lavur dil renomau sculptur Gion Ritz, Valleis, ferton ch'il maletg dil marteri da s. Vigeli ei ina ovra dil pictur Sigisbert Frey da Mustér, finida 1703 per 100 «Landgulden».

Igl emprem batten ella baselgia nova a Sedrun ei staus ils 22 da november 1692.

• • • •



Altar dalla s. fossa

1617 han ils dus ugaus da S. Vigeli, Clau Paul e giuncher Gion de Medell, schau midar il tetg da plattas dil clutger, tratg quel pli ault en péz e cuvretg cun slondas. – La tradiziun raquenta, ch'il clutger sez, in'ovra ord il 13avel tschentaner, seigi vegnius construius cun crappa da natira sco tagliada, ch'il pievel hagi purtau ord Plidettas sper Burganèz. – Il maletg da s. Gieri sil clutger ei fatgs dil pictur Felici Diogg (1762–1834), la mumma dil qual, Maria Catrina Deflorin, ei stada da Tschamut. Era in maletg da s. Cristoffel duei haver ornau pli baul il clutger.

• • • •

Sin clutger pendan tschun zenns, dils quals ils treis gronds ein vegni cullai a Mustér en santeri da s. Gion igl october 1821 da G. B. Monziano da Bergamo. Ina canzun romontscha ha perpetnisau quell'ovra. Il quart zenn ei cullaus 1759 da A. K., Zug,

ferton ch'il pign ei sefess 1906 e vegnius cullaus danovamein dalla firma Rüetschi ad Aarau.  
– Dils dus zenns pigns el clutger sur il chor ei il grond cullaus 1628 a Lindau, il pign 1759  
da A.K., Zug.

• • • •

1888 ei l'entira baselgia vegnida renovada tenor plan da reverendissim domvicar Dengler, Regensburg, dalla firma artistica Frars Goss, Stadtamhof-Regensburg, Baviera. Las respectivas expensas, libras unfrendas dil pievel dalla vallada, han muntau sin varga 10 000.–frs.

L'orgla steva pli da vegl sin la laupia el chor sur il secund teschamber. 1805 ha Silvester Walpen, Valleis, engrondiu e translocau quella sin la laupia nova sur il portal dalla baselgia. Tier la renovaziun, da 1888 han ins engrondiu quella laupia per l'entira ladezia dalla baselgia e 1899 ha la firma Frars Maier da Feldkirch furniu ina nova orgla cun 16 registers e dus manuals.

1917 ein la baselgia sco era ils dus clutgers vegni cuvretgs cun plattas dil Valleis.

• • • •

La confraternitad ni uniun da s. Giachen, ch'exista buca pli, era stada fundada 1609 dils pelegrins stai a S. Giachen en Galizia ed haveva per intent da far bien per ils commembers suenter lur mort. L'uniun era partida en quater ugadias: Sedrun, Camischolas cun Zarcuns, Rueras e Dadens igl uaul. Mintga commember pagava tenor decret da 1767 in rensch. Il rodel dils commembers vivs vegneva legius giud scantschala inaga per onn, quel dils defuncts mintga tschun onns.

La confraternitad dil s. rusari ei stada menada en baul a Sedrun ord motiv, che gia la baselgia vedra haveva in altar da Nossadunna dil s. rusari cun in'atgna ampla ed ina casetta per las unfrendas. L'emprema dumengia dil meins vegn ei fatg ina processiun. – La confraternitad dil s. scalpulier ei erekida ils 18 da schaner 1703.

1908 han ils da Mustér fatg per la davosa gada lur processiun a Sedrun sin la fiesta da s. Vigeli. – Dapi 1909 celebrescha Tujetsch la fiesta da s. Vigeli cun speciala pumpa e cun processiun encunter Mira.

## Plevons a Sedrun

- |    |   |              |
|----|---|--------------|
| 1. | Zobel Gieri de Passeyr                        | (1453, 1456) |
| 2. | Gisel Gion                                    | (1481)       |
| 3. | Gabler pader Oswald OSB, Mustér               | (1485, 1491) |
| 4. | Calbiert (Cadalbert) pader Martin OSB, Mustér |              |
| 5. | Martin da Set                                 | – 1508       |
| 6. | Giger Gion ord la diocesa da Constanz         | 1508 –       |
| 7. | Soliva Lurenz                                 | (1522)       |

|     |                                       |               |
|-----|---------------------------------------|---------------|
| 8.  | Busch Gion                            |               |
| 9.  | Lucius                                |               |
| 10. | de Castelberg Cristian, Mustér (avat) | 1555 – 1566   |
| 11. | Tyron Nicolaus, Trun (avat)           | 1566 – 1574   |
| 12. | Andreas da Lumnezia                   | 1574 – 1577   |
| 13. | Cristoffel, Mustér                    | 1577 – 1580   |
| 14. | Liem Gion, Trun (morts dalla muria)   | 1580 – 1584†  |
| 15. | Durig Gion, Tujetsch                  | 1584 – 1587   |
| 16. | Caretus (Cargiet) Bistgaun            | 1587 – 1590   |
| 17. | Teodor da Italia                      | 1590 – 1595   |
| 18. | Hool pader Gieri OSB, Mustér          | 1595 – 1604   |
| 19. | Pancraci (Caplaci?) Placi, Sumvitg    | 1604 – 1606   |
| 20. | Nasser Giachen, Blizuna               | 1606 – 1609   |
| 21. | de Castelberg Bistgaun, Mustér (avat) | 1609 – 1614   |
| 22. | de Rungs Gioder, Mustér               | 1614 – 1616   |
| 23. | de Rungs dr. Barclamiu, frar dil sura | 1617 – 1629   |
| 24. | Friberg Giachen, Mustér               | 1629 – 1642 † |
| 25. | Sgier dr. Mattias, Ruschein           | 1642 – 1656   |
| 26. | Decurtins (im Hoff) dr. Andriu        | 1656 – 1672   |
| 27. | Sgier dr. Gion, Ruschein              | 1672 – 1690   |
| 28. | Jagmet Lic. Ludivic, Trun             | 1691 – 1716   |
| 29. | Schmed dr. Giachen, Casti             | 1716 – 1718   |
| 30. | Huonder Giusep, Mustér                | 1718 – 1730   |
| 31. | de Castelberg Gion Giachen, Mustér    | 1730 – 1736   |
| 32. | Biart Giachen, Sedrun                 | 1736 – 1749 † |
| 33. | Degonda Giachen Antoni, Rueras        | 1749 – 1788   |
| 34. | Venzin Vigeli I, Rueras               | 1780 – 1800 † |
| 35. | Schmed Giusep Lurenz, Rueras          | 1800 – 1810   |
| 36. | Hetz Giusep Antoni, Tschamut          | 1810 – 1846 † |
| 37. | Durgiai Giusep Antoni, Mumpé-Tujetsch | 1846 – 1863 † |
| 38. | Desax Maurus, Acletta-Mustér          | 1863 – 1881 † |
| 39. | Beer Tumaisch Giusep, Gonda           | 1881 – 1885   |
| 40. | Muoth Franc. Eduard, Breil            | 1885 – 1897   |
| 41. | Engler Gudegn, Surava                 | 1897 – 1922   |
| 42. | Fetz Giachen Antoni, Domat            | 1922 –        |

### Caplania a Sedrun

Beinenqual plevon ha giu pli da vegl a Sedrun denteren in u l'auter gidonter, ch'el stueva denton mantener sin siu quen, forsa bein era cun agid dalla vischnaunca. La caplania da Sedrun sco tala ei vegnida fundada pér ils 4 da zercladur 1749, nua ch'il plevon da gliez temps, sur Degonda, ei staus ferm encunter.

La principala obligaziun da quei caplon fuv'all'entschatta da dar scola als affons stad ed unviern, mussar da leger e scriver; plinavon far ductrina alla giuventetgna las sondas suentermiezdi. La vischnaunca prendeva si numnadamein da lezzas uras, cun votar giu onn per onn, da far firau las sondas suentermiezdi. Dasperas haveva il caplon da far la messa marveglia firaus e dumengias e dad esser gideivels in ton ella pastoraziun. – Fuvan ils caplons meins habels da dar scola pervia dil lungatg, sche surpriseva beinduras il plevon la scola. Quei ha cuzzau entochen laics han entschiet a dar scola. Pli tard han entgins caplons da Sedrun surpriu l'aschinumnada «Scola tudestga», ord la quala la scola reala ei naschida cul temps. Il davos caplon, che ha dau scola, ei stau sur Tuor 1870/74.

Il caplon habitava dad in temps en casa parochiala, silmeins dapi 1745, nua ch'ins ha giu cumprau la presenta casa parochiala da famiglia Monn. Pér cun 1849, nua ch'ins ha baghegiau la casa da scola sin Cadruvi, ha era il caplon survegniu en quella, ella secunda alzada, sia atgna habitaziun.

Local da scola fuva primarmein la stiva da maun sura en casa parochiala, nua ch'ins sa observar aunc ozildi beinenqual noda «dil levseñ».

Tenor tradiziun sesanflava l'anteriura veglia casa dil plevon en Dulezi dador il baghetg. Il rapport dalla visitaziun episcopala da 1643 dat suandonta descripziun da quella: «La casa ei pintga e da lenn, ha ina stiva cun stivetta vitier, cuschina, dus tschalers, suren treis combras; il tett ei buns e las finiastras ein en bien uorden; in nuegl ed in iert ein uni cun la casa.»

Il Drun era da lezzas uras mo pigns; ina atgna senda menava naven dalla casa pervenda entraviers viagiу tier la baselgia, ch'era lu in bien ton pli enneu. – La historia raquenta digl onn 1610 dad ina erupziun d'in cuolm «eruptio montis». Forsa ch'igl ei maniau cun quei il Drun, l'aua dil qual curreva pli daditg pacificamein baul suenter la spunda da Valtgeva enagiu ell'aua da Strem, sco ins encorscha aunc ussa il vau, baul sper Salins-Gonda giu. Ussa ha il Drun magliau afuns, ei serasaus e sa far canera, tema e snavur.

### **Caplons a Sedrun**

|     |                                      |               |
|-----|--------------------------------------|---------------|
| 1.  | de Laurentis Giusep, Trun            | 1750 – 1751   |
| 2.  | Monn Vigeli, Sedrun                  | 1751 – 1754   |
| 3.  | de Castelberg Gion Giachen, Mustér   | 1754 – 1759 † |
| 4.  | Berther Giachen Antoni, Camischolas  | 1759 – 1762   |
| 5.  | Friberg Cristian, Trun               | 1762 – 1764   |
| 6.  | Spazzini Pieder, Blizuna             | 1764 – 1765   |
| 7.  | de Porta Giusep Antoni, Sumvitg      | 1766 – 1767   |
| 8.  | Rothmund Gion Valentin, Mumpé-Medel  | 1767 – 1768   |
| 9.  | Tafelli Gion Battesta, Trient        | 1768 – 1771   |
| 10. | Föhn Giusep Antoni, Muotathal, Sviz  | 1771 – 1772   |
| 11. | Frossard Caspar Isidor, Valleis      | 1772 – 1773   |
| 12. | Jäger Gion Battesta, Mulins-Surselva | 1773 – 1776   |

|     |   |               |
|-----|---|---------------|
| 13. | Degonda Giachen, St. Duri, Rueras           | 1776 – 1780   |
| 14. | Caminada Gion Battesta, Savognin            | 1780 – 1784   |
| 15. | Condrau Giachen Antoni, Rueras              | 1784 – 1787   |
| 16. | Degonda Giachen Antoni, Rueras              | 1788 – 1802   |
| 17. | Venzin Vigeli II, Gonda                     | 1803 – 1806   |
| 18. | Venzin Vigeli II, Gonda (2a ga)             | 1807 – 1810   |
| 19. | a Spescha pader Placi OSB, Mustér           | 1812 – 1814   |
| 20. | Gieriet Gion Antoni, Rueras                 | 1816 – 1820 † |
| 21. | Camenisch Giusep Maria, S. Roc-Medel        | 1821 – 1832   |
| 22. | Camenisch Giachen Martin, S. Roc-Medel      | 1832 – 1845   |
| 23. | Venzin Vigeli II, Gonda (3a ga)             | 1845 – 1854 † |
| 24. | Venzin Vigeli III, Gonda                    | 1854 – 1856   |
| 25. | Monn pader Sigisbert, Buretsch-Mustér       | 1857 – 1860   |
| 26. | Schuler pader Augustin OSB, Mustér          | 1861 – 1866   |
| 27. | Casanova Gion Antoni, Vrin                  | 1868 – 1870   |
| 28. | Tuor Gion Gieri, Rabius                     | 1870 – 1874   |
| 29. | Augustin Giachen Antoni, Alvaschein         | 1874 – 1878   |
| 30. | Beer Tumaisch Giusep, Gonda                 | 1878 – 1881   |
| 31. | Berther Tumaisch Giusep, Dieni              | 1881 – 1885   |
| 32. | Alig Rest Martin, Sursaissa tudestga        | 1886 – 1887   |
| 33. | Macolin dr. Giachen Andriu, Rueras, la stad | 1888 †        |
| 34. | Giger Giachen Antoni, Mustér                | 1889 – 1894   |
| 35. | Solèr Flurin Antoni, Vrin                   | 1895 – 1901   |
| 36. | Simeon Calixt, Lonsch                       | 1920 – 1922   |
| 37. | Rageth Lurenz, Domat                        | 1923          |

## Rueras

Rueras ha scadin cass survegniu baul ina caplutta, sche buca l'emprema a Tujetsch. Quei vitg ei gie in dils pli vegls dalla vallada. Rueras sesanfla damaneivel dil casti dils nobels da Putnengia, ch'eran sesents leu gia el 13avel tschentaner. Giuncher Hans de Putnengia ei staus seregurdaus generusamein gia avon 1500 da caussas pias, senza dubi era dalla baselgia da s. Giachen. – Las principalas possessiuns dalla claustra da Mustér a Tujetsch sesanflavan entadem la val. Dasperas setenevan ils migiurs dalla claustra si a Rueras e sco tal vegn in cert mistral Martin da Rifèren (=Rueras) numnaus gia 1390. Ultra da quei stat Rueras (S. Giacomo, St. Jacob) al pei da dus pass, Cuolm d'Ursera e Rizli, che havevan pli da vegl tutt'autra muntada ch'ozildi. Che Rueras seigi denton stau pleiv avon che Sedrun, sco pader Placi a Spescha pretendea ed enquera da mussar si, savein nus buacrer.

Tier la davosa restauraziun dalla baselgia da Rueras (1893) han ins anflau encounter i gl iert dil maun dadora restonzas da mirs vegls, che pon derivar dalla emprema caplutta a Rueras.



Rueras

1491, ils 4 da december ha Balthasar, coadiutor digl uestg da Cuera Heinric VI, consefrau la baselgia cun treis altars.

Igl altar grond en honur da Nossadunna, digl apiestel s. Giachen maior e da s. Cristoffel; igl altar dil maun dallas femnas en honur da s. Ursula, s. Catrina, s. Turtè, s. Cecilia, s. Barla etc.; quel dil maun dils umens en honur dils 10 000 s. marters etc.

Il zenn grond, dalla firma Walpen, Reckingen, Valleis, porta igl onn 1790 (?), ferton ch'il zenn pign ei dedicaus a s. Giachen ed ei da 1567.

1730 han ins baghegiau ina nova, pli gronda baselgia cun treis altars ed in teschamber, ch'ei vegnida consecrada da Benedetg de Rost, uestg da Cuera, ils 9 d'october 1730. Igl altar grond ei puspei dedicaus agl apiestel s. Giachen maior ed a s. Cristoffel, ferton che quel dil maun dallas femnas ei dedicaus a Nossadunna, a s. Gion Battesta ed a s. Giusep, e quel dil maun dils umens en honur dils s. aunghels, da s. Martin e s. Benedetg. Ils altars laterals ein ornai cun las statuas dils respectivs sogns. – La dedicaziun croda sin la secunda dumengia d'october.

1744, ils 15 d'avrel ha Rueras survegniu la lubientscha da celebrar la fiasta dil Sontgilcrest mintgamai la dumengia digl otgavel. – 1744, ils 30 da zercladur ei vegnied concediu da salvar si per adina il Sontgissim, ch'ei vegnius cumpignaus en solemla processiun da Sedrun a Rueras.

Ils 30 da zercladur 1848 ei la confraternitad dil sogn ed immaculau cor da Maria vegnieregida e cun quella caschun ha Duri Battesta Venzin da Rueras, litinent en survetsch



Intern dalla baselgia da s. Giachen

franzos, regalau la statua dil cor da Maria, fatga tenor la statua dalla archiconfraternitad a Paris, e ch'ei vegnida tschentada sigl altar dil maun dils umens.

1892, ils 28 da matg ei la confraternitad dil sontgissim cor da Jesus vegnida fundada e la nova statua dil sontgissim cor da Jesus, dalla firma Mayer a München, ei vegnida pustada sigl altar dil maun dils umens, ferton ch'ins ha translocau la statua dil cor da Maria sigl altar dil maun dallas femnas, ch'era gia vidavon dedicaus a Nossadunna.

Las duas fiastas dil cor da Jesus e dil cor da Maria vegnan celebradas cun gronda pumpa, la davosa ils emprems onns cun priedi ordaviert.

1893 ei la baselgia vegnida restaurada gustusamein intern ed externamein da Benedetg Kopp da Oberhelfenswil, S. Gagl, ferton che Otto Holenstein da Wil, S. Gagl, ha renovau ils treis altars, mettend vitier in niev tron sur il tabernachel, treis novs antipendis e treis novas passeras.

L'orgla veglia da Toni Sachi, Mustér, era en decadenza e 1899 ei vegniu tschentau si in'orgla nova da Metzler a Favugn. Igl onn 1911 ha la baselgia survegniu in niev tetg cun tablas da stuors galvanisau.

Dapi 1893 han ins applicau varga 14 000.– frs. per la baselgia, la pli gronda part unfrendas libras dil pign vischinadi, nua che plirs vischins da Rueras ein semussai sco gronds benefacturs, ils numbs dils quals ein nudai el «cudisch dalla veta».

• • • •

Tier la visitaziun episcopala da 1643 han ils vischins da Rueras giu supplicau igl uestg Gion VI Flugi, ch'il gidonter dil plevon a Sedrun possi habitar sco caplon a Rueras. Quei vegn concediu aschi spert sco Rueras hagi baghegiau ina adattada casa pervenda, surlaschi in iert dasperas e che l'entrada per il caplon seigi carschida cumpeten-tamein.

L'emprema casa pervenda a Rueras vegn ad esser baghegiada da quei temps, ferton ch'ei vegn fatg menziun, ch'ina autra seigi vegnida baghegiada, ni probablamein mo renovada 1782. – Aschibein la baselgia, sco era la casa pervenda ein restadas intac-tas ellas duas grondas lavinas da 1749 e 1817.

## **Caplons a Rueras**

|     |  |               |
|-----|--|---------------|
| 1.  | Defect Giachen, Sedrun                     | 1645 – 1677 † |
| 2.  | Jagmet Ludivic, Trun                       | 1677 – 1685   |
| 3.  | Derungs Paul, Trun                         | 1690 – 1691   |
| 4.  | Callemburg Pieder, Schlans                 | 1691 – 1701 † |
| 5.  | Martini Plaisch, Domat                     | 1701 – 1707   |
| 6.  | Decurtins pader Ildefons OSB, Mustér       | 1708 – 1710   |
| 7.  | Derungs Gelli Duri                         | 1710 – 1712   |
| 8.  | Camenisch Mathias, Trun                    | 1712 – 1725   |
| 9.  | de Castelberg Gion Giachen, Mustér,        | 1726 – 1730   |
| 10. | Biart pader Martin OSB, Mustér             | 1730          |
| 11. | Biart Giachen, Sedrun                      | 1731 – 1733   |
| 12. | Jagmet Flurin, Mustér                      | 1733 – 1734   |
| 13. | Tgetgel G. Leci Augustin, Sumvitg          | 1734 – 1736   |
| 14. | de Castelberg Gion G., Mustér (secunda ga) | 1736 – 1741   |
| 15. | Degonda Giachen Antoni, Rueras             | 1741 – 1749   |
| 16. | Pfister Fr. Bistgaun, Donaueschingen       | 1749 – 1753   |
| 17. | Monn Vigeli, Sedrun                        | 1654 – 1762   |
| 18. | Genelin dr. Giachen Mattias, Mustér        | 1762          |
| 19. | Friberg Cristian, Trun                     | 1762 – 1765   |
| 20. | Pally Giachen Antoni, Rueras               | 1766 – 1771 † |
| 21. | Pally Placi, Surrein-Sumvitg               | 1772          |
| 22. | Leimpach Giachen, Müstair                  | 1773 – 1776   |
| 23. | Schmed Giusep Lurenz, Rueras               | 1776 – 1783   |
| 24. | Venzin Vigeli I, Rueras                    | 1784 – 1788   |
| 25. | Venzin Martin Felici, Rueras               | 1788 – 1789   |
| 26. | Rothmund Gion Valentin, Mumpé-Medel        | 1789 – 1790   |
| 27. | Monn Vigeli, Sedrun (secunda ga)           | 1790 – 1791 † |
| 28. | Condrau Giachen Antoni, Rueras             | 1791 – 1799 † |
| 29. | Riedi pader Martin OSB, Mustér             | 1799 – 1804   |
| 30. | Venzin Vigeli II, Gonda                    | 1806 – 1807   |
| 31. | de Castelberg Gion Rest, Rueras            | 1807 – 1809   |
| 32. | Riedi Gion Evangelist, Tschamut            | 1809 – 1810   |
| 33. | Venzin Vigeli II., Gonda (secunda ga)      | 1810 – 1844   |
| 34. | Capeder Math. Antoni, Curaglia (matg-uost) | 1844          |
| 35. | Andreoli pader Martin OSB, Mustér          | 1844 – 1847   |
| 36. | Riedi Giachen Lurenz, Rueras               | 1847 – 1849   |
| 37. | Beer Gion Bistgaun, Gonda                  | 1850 – 1853   |
| 38. | Berther pader Adalgott OSB, Mustér         | 1853 – 1856   |
| 39. | Venzin Vigeli III, Gonda                   | 1856 – 1867   |
| 40. | Solèr Flurin Antoni, Vrin                  | 1867 – 1873   |

- |     |   |               |
|-----|---|---------------|
| 41. | Stiefenhofer Gion Giusep, Mustér          | 1873 – 1875   |
| 42. | Riedi Giachen Lurenz, Rueras (secunda ga) | 1877 – 1884 † |
| 43. | Alig Rest Martin, Sursaissa tudestga      | 1885 – 1886   |
| 44. | Venzin Gion Antoni, Selva                 | 1886 –        |



Selva

1909 dalla firma Rüetschi, Aarau. Cun quella caschun han ins mess il zenn pign da Selva a Sutcrestas e priu navev leu il zenn grond e translocau quel a Selva, aschia ch'ins ha ussa a Selva in zenn da 1865 e l'auter da 1909 cun oreifra sonanza, ferton ch'ils dus zenns a Sutcrestas ein ussa da 1828 e 1865 e tunan meins emperneivel.

1842, ils 11 d'october ei vegniu lubiu da salvar si per adina il Sontgissim a Selva. 1901 ei la baselgia vegnida renovada dadens e dadora ed ha survegniu in'orgla. – 1917 ei il tett dalla baselgia vegnius cuvretgs cun plattas dil Valleis.

• • • •

Tier la visitaziun episcopala da 1658 han ils vischins dadens igl uaul fatg pass tier monsignur uestg per puder obtener in beneficiat a Selva. Stau mess ensem en comensurau fondo per tal beneficiat, ha uestg Duri VI de Mont approbau la caussa entras document dils 13 da mars 1666, nua che landrehter Conradin de Medell, Sedrun, ei staus sepius en zun fetg per tal benefeci. (Autras notizias mira: «Selva avon 100 onns».)

### **Caplons a Selva**

- |    |                                |             |
|----|--------------------------------|-------------|
| 1. | Callemburg Pieder, Schlans (?) | 1664 – 1681 |
| 2. | Valaulta Plaisch, Pigniu       | 1681 – 1684 |

### **Selva**

La baselgia cun treis altars ei vegnida consecrada ils 13 da zercladur 1630 da Giusep Mohr, uestg da Cuera ed ei dedicada a s. Gion evangelist, s. Paul e s. Valentin. Dedicaziun emprema dumengia da fenadur. 1785, ils 15 d'october ei igl entir vitg da Selva barschaus giu ed era la baselgia cun siu tuchiez ei daventada l'unfrenda dallas flomas. Il zenn grond ei vegnius cullaus 1788, il pign 1828, omisdus dalla firma Walpen a Reckingen, Valleis. Il zenn grond da 1788 cun sia ruosna ei sefess Nadalnotg 1908 ed ei vegnius cullaus danovamein

|     |  |               |
|-----|--|---------------|
| 3.  | Toscanus Antoni                          | 1692 – 1693   |
| 4.  | Derungs Paul, Trun                       | 1693 – 1700   |
| 5.  | Alig Nicolaus, Sursaissa tudestga        | 1701 – 1708   |
| 6.  | Zegg Gion Francestg, Müstair             | 1708 – 1709   |
| 7.  | Decurtins pader Ildefons OSB, Mustér     | 1710 – 1715   |
| 8.  | Torson Giusep Nicolaus                   | 1715          |
| 9.  | Rothmund pader Sigisbert OSB, Mustér     | 1716 – 1718   |
| 10. | Bischoff pader Baseli OSB, Mustér        | 1719 – 1726   |
| 11. | Silvester Gion, Sursaissa rom.           | 1726 – 1728   |
| 12. | Freyer Flurin, Breil                     | 1729 – 1733   |
| 13. | Biart Giachen, Sedrun                    | 1733 – 1736   |
| 14. | Friberg Cristian, Trun                   | 1738 – 1744   |
| 15. | Pfister Fr. Bistgaun, Donaueschingen     | 1744 – 1752   |
| 16. | de Castelberg Gion Giachen, Mustér       | 1752 – 1754   |
| 17. | Peder Gion, Tschamut                     | 1754 – 1759   |
| 18. | Monn Vincens Martin, Sumvitg             | 1759 – 1761   |
| 19. | Genelin Placi, Mustér                    | 1761 – 1762   |
| 20. | Berther Giachen Antoni, Camischolas      | 1762 – 1765 † |
| 21. | Genelin dr. Giachen Mathias, Mustér      | 1765 – 1766   |
| 22. | Leimpach Giachen, Mustair                | 1766 – 1772   |
| 23. | Föhn Giusep Antoni, Muotathal, Sviz      | 1772 – 1777   |
| 24. | Jäger Leci, Mulins-Sursaissa             | 1777 – 1785   |
| 25. | Nager pader Maurus OSB, Mustér           | 1785 – 1790   |
| 26. | Cabrin Pieder Antoni, Falera             | 1790 – 1791   |
| 27. | Rohrer Nicolaus, Sachseln, Sur-Uaul      | 1791 – 1792   |
| 28. | Arnold Giusep Maria, Spiringen, Uri      | 1792 – 1793   |
| 29. | Weller Pieder Fidel, Sedrun              | 1793 – 1809   |
| 30. | a Spescha pader Placi OSB., Mustér       | 1809 – 1812   |
| 31. | Weller Pieder Fidel, Sedrun (secunda ga) | 1812 – 1818 † |
| 32. | Deplaz Gion Giusep, Selva                | 1818 – 1859 † |
| 33. | Monn pader Sigisbert, Buretsch-Mustér    | 1860 – 1864   |
| 34. | Dosch Gion Geri, Tinizun                 | 1864 – 1866   |
| 35. | Macolin dr. Giachen Andriu, Rueras       | 1866 – 1886   |
| 36. | Sidler Francestg, Küssnacht, Sviz        | 1891 – 1893   |
| 37. | Muoth Franc. Eduard, Breil               | 1897 – 1905   |
| 38. | Elvedi Murezi, Cumbel                    | 1906          |

### Tschamut

La caplutta, dedicada a s. Clau ed a s. Bistgaun, stat dador il vitg ed ei fetg veglia. Probabel ha la claustra da Mustér baghegiau quella, havend ella leu ed el contuorn pli baul differentas possessiuns ed alps. Tschamut che ha giu entochen neu encunter miez



Tschamut

paran dad esser dall'entschatta dil 15avel tschentaner. Ina massiva ura da fier dat e repeata. Il maletg digl altar porta la suttascripziun: «Johan Christoph Guser M. 1679». Sigl arviul dil chor stat il maletg dalla sontgissima Trinitad, che duei esser maliaus da Diogg, bab dil renomau pictur. Il plantschiu-sura ei plats, fatgs cun aissas, che cuntegn differents, interessants turniclems. La dedicaziun croda sin l'emprema dumengia da settember. Igl onn 1922 ha la caplutta survegniu in niev tettg da stuors.



Sutcrestas

refugi avon las lavinas. Ils dus zenns ein vegni cullai 1865 dalla firma Giachen Keller, Turitg. La usitada processiun dallas sondas temps da stad vegn dapi 1854 fatga a Sutcrestas, enstagl a Tschamut. «Nossadunna digl agid» a Sutcrestas ei in liug da pelegrinadi, che vegn frequentaus savens temps da stad aschibein dils habitonts dalla vallada, sco era dad jasters. – (Dapli mira: Selva avon 100 onns.)

dil 20avel tschentaner ses agens dretgs e regress e che ha dertgau pervia da quels cun la vischnaunca, vegn ad esser stau all'entschatta in hospezi, nua che viandonts, mond e vegnend sul «Krispaltenberg» (Cuolm d'Ursera), anflavan albiert. Il clutger dalla caplutta ei baghegiaus osum il gebel sur la fatschada, semegliond als hospezis sur il Lucmagn. Primarmein sesanflava la porta ella fatschada, ussa stat quella da maun sut encunter il stradun. Chor e teschamber ein vegni baghegiai pli tard.

Ils dus zenns han negin datum e

### Sutcrestas

La caplutta, unida dasperas sut il medem tettg cun ina habitaziun per il caplon ed ina stiva da scola, che vegnan denton ussa buca duvradas pli, ei baghegiada 1853 ed ei dedicada a Nossadunna digl agid. Sur Deplaz, caplon da Selva da 1818–1859, ha zun gronds merets per quest sanctuari, ch'ei vegnius eregius cun las casas dasperas, ch'ein denton ussa puspei transportadas naven, per haver temps d'unviern in

## Sontga Brida

1736, ils 12 da zercladur ha Giusep Benedetg de Rost, uestg da Cuera, dau la lubientscha als vischins da Selva e Tschamut da baghegiar la caplutta en honur da s. Brida. Entras brev dils 27 da matg 1737 ein ils vischins dadens igl uaul s'obligai visavi igl uestg da mantener quella. Il clutger stat era osum il gebel sul portal sco a Tschamut e Selva, e porta in zenn digl onn 1741 cun l'inscripzion: «Ave Maria, gratia plena, Dominus tecum.» Il maletg digl altar, s. Brida, ha pictur J. C. Brandenberg fatg 1738. (Dapli mira: Selva avon 100 onns.)

## Giuv

Sper entgins clavaus, tut bandunada stat sigl ault dalla Rufna la caplutta da s. Bistgaun, che porta in zenn digl onn 1780 cun l'inscripzion: «Sancta Maria, ora pro nobis.» Quei zenn deriva dalla firma Giusep Bonifaz Walpen da Reckingen, Valleis. Il vitget, che dumbrava aunc 1768 tschun fiugs cun 22 personas e nua ch'ei steva aunc all'entschatta dil tschen-taner vargau quater casas, exista buca pli. La davosa casa, che steva dadens il baghetg da frars Cavegn, Rueras, ei vegnida transportada a Tschamut. La lavina da 1836, la sera dils 25 da december, ha giu fatg negin donn alla caplutta. (Dapli mira: Sas era nua Giuv ei?)

## Zarcuns

La baselgia ei baghiada 1622 en quei liug, nua che Nossadunna ei tenor la legenda cumparida ils 8 da schaner 1622 al pietus Gionet (Beer) da Giuv, sco il maletg sigl arviul dalla baselgia indichescha. Igl altar grond ei vegnius consecraus ils 13 da zer-cladur 1630 da Giusep Moor, uestg da Cuera, en honur da Nossadunna dalla neiv, da s. Maria Madleina e da s. Marta, ferton che la baselgia sezza ei consecrada ils 8 da fena-dur 1672 da Duri VI de Mont, uestg da Cuera. Dil maun dils umens sesanfla in altar en honur dil sontgissim num da Jesus, e dil maun dallas femnas in en honur da Nossadunna, il qual, senza dubi, la nobla famiglia de Florin da Camischolas ha fundau 1679, sco las figuras, la arma e l'inscripzion sil maletg digl altar dattan d'entellir. – La dedicaziun croda silla dumengia suenter la fiasta dil s. scapulier.

1750 e 1775 ei vegniu concediu dif-ferents perduns per questa baselgia.

1763 ha Barclamiu Broder de Castel-berg maliau ora l'entira baselgia.

1788 han ils vischins da Zarcuns procurau per dus zenns novs, cullai dad Anton Brandenberg da Zug ed han supplicau monsignur avat da Mustér da vuler benedir quels.

Ils 16 da fenadur 1887 ei la confraternitad da Nossadunna dil son-tgissim cor vegnida eregida en quest sanctuari.



Zarcuns

1882/84 ei la baselgia vegnida renovada; igl ei vegniu frestgentau ils maletgs digl arivul, cementau il plantschiu, fatg novs bauns ed ina porta nova; 1910 tett da stuors. 1914 ei vegniu fatg ina nova suschna avon baselgia e menau la via davostiervi.

• • • •

Da s. Placi entochen la fiasta dil s. rusari vegn ei fatg mintga sonda da Sedrun e da Rueras anora circa allas  $6\frac{1}{2}$  ina processiun a Zarcuns, nua ch'ei vegn celebrau la s. messa, cantau las veglias canzuns romontschas accumpignadas dad ina pintga orgla, e nua ch'ei vegn rugau per ina buna raccolta, principalmein, che Niessegner laschi sin la pussenta intercessiun da Nossadunna madirar il graun.

Suandontas veglias processiuns dalla pleiv da Tujetsch ein vegnidas fatgas per la dava-  
sa gada: la vigelgia da s. Gion Battesta a Segnas 1904, da s. Gieri a Mustér 1907, da  
s. Martin a Mustér 1907, da s. Pieder e s. Paul a Tschamut 1911. Persuenter vegn ei fatg  
ussa sin quels dis da Sedrun anora ina processiun a Zarcuns.



S. Onna a Camischolas

### Camischolas

La caplutta ei dedicada a s. Onna e posseda in custeivel altar gotic da 1517. Supponiu, ch'igl altar seigi vegnius fatgs direct per la caplutta da s. Onna, astgan ins concluder, che l'emprema caplutta a Camischolas seigi vegnida baghegiada entuorn 1515. Ina nova, probabel in tec pli gronda, ei vegnida construida 1655 e conse-  
crada ils 4 da settember 1656 da Gion VI Flugi, uestg da Cuera. – Dedi-  
caziun emprema dumengia d'uost.

1822, ils 11 da fenadur ei igl entir vitg Camischolas cun la caplutta barschaus giu. Cun las differentas figuras digl altar gotic, ch'ins ha giu spindrau tiel barschament, ei il pre-  
sent altar vegnius construius digl artist Theodor Schnell da Ravensburg e tschentaus si all'entschatta d'avrel 1916. 1899/1900 ei la caplutta vegnida renovada dadens e dado-  
ra; 1917 ha ella survegniu in tett niev cun plattas ord il Valleis.

Ils dus zenns ein cullai 1826 e derivan dalla firma Joseph Walpen da Reckingen, Valleis.  
1922 ei il zenn pign sefess. Per obtener in pli bi e harmonic tuchiez (Gs. B.) han ins cun quella caschun schau cullar omisdus zenns danovamein e quei empau pli gronds, il qual ei daventau 1923 dalla firma Guglielm Egger a Staad, S. Gagl. La solemnidad dalla benediciun da quels zenns novs ei stada ils 23 d'october 1923 suentermiezdi, nua che ple-  
von Gion Antoni Fetz ha era silsuenter benediu en la casa da scola leu speras, ch'era vegnida restaurada danovamein. (Dapli mira: A Camischolas.)

## Bugnei

1774 ha Giusep Benedetg de Rost, uestg da Cuera, consecrau la caplutta en honur da s. Giusep. Ils 17 da mars 1775 ha la caplutta retschiert ina brev d'indulgenza entras cardinal de Comitibus. Dedicaziun mintgamai la davosa dumengia da settember.

Il zenn pign ei cullaus 1816, il grond 1843 dalla firma Theus a Favugn. – 1903 ei la caplutta vegnida restaurada, nua ch'igl arviul dad aissas ei vegnius remplazzaus cun in da gep.



Bugnei, s. Giusep

## Surrein

Cun brev dils 11 da november 1679 ha Duri VI de Mont, uestg da Cuera, recumandau la collecta, che vegni tratga si per saver pagar las spesas dalla caplutta da s. Antoni da Padua, baghiada 1679. Ils vischins da Surrein, Foppas e Nacla s'obligheschan visavi igl uestg entras ina brev dils 10 da zercladur 1683 da mantener la caplutta, ch'ei vegnida consecrada ils 20 da zercladur 1683 da Duri VI de Mont, uestg da Cuera. La dedicaziun croda sin la dumengia suenter Anceinza.

Il zenn grond ei cullaus 1775, fer-ton ch'il zenn pign ha negin datum ed ei bia pli vegls. 1906 ei la caplutta vegnida renovada dadens e dadora ed ha aunc survegniu vitier in pieri cun aissas. 1917 ei la caplutta vegnida cuvretga cun plattas ord il Valleis.



Surrein, anteriura caplutta si Foppas

• • • •

Tier Surrein-Foppas udevan pli daditg ils dus uclauns Nacla e Cadanal, ch'ein ussa svani totalmein. Quels dus uclauns havevan aunc 1768 ensemen quater fiugs cun 18 persunas. 1768 dumbrava Foppas sis fiugs cun 19 persunas, Surrein siat fiugs cun 35 persunas. Il di da s. Antoni, ils 13 da zercladur, vegn ei fatg da Sedrun e da Rueras anora ina processiun a Surrein, la quala duei remplazzar ensemen cun quella da s. Pieder e s. Paul a Tschamut, la veglia processiun sil S. Gottard, che vegneva fatga il di avon s. Pieder e s. Paul e cuzzava dus dis, e nua che mintga famiglia stueva tarmetter in representant

sut peina dad in rensch. – La caplutta da s.Antoni sesanfla osum in precipezi, che seslucca adina pli e pli, e sa perquei vegnir cul temps en grond prighel.



Cavorgia, s. Leci

### Cavorgia

La caplutta ei dedicada a s. Leci e vegn ad esser ord il 16avel tschen-taner. Negliu havein nus anflau notizias, che havessen indicau l'entschatta da sia existenza. Dils dus zenns ha il pli vegl negin datum, ferton che l'auter ei digl onn 1609. La dedicaziun croda sin l'emprema dumengia suenter la naschientscha da Nossadunna, Num da Maria. Pli da vegl mava la communicaziun

denter Tujetsch - Medel - Lucmagn per la pli gronda part tras Cavorgia - Plaun S. Leci. Igl uclaun Cavorgia-sura, sin territori da Mustér, che haveva aunc 1768 treis fiugs cun 12 persunas e ch'ei dapi 1867 svanius totalmein, udeva tier Cavorgia.

S. Leci ha teniu bein casa ed ha acquistau cul temps in pulit fondo, cun il qual el ha susteniu pliras gadas generusamein baselgias, pervendas e scolas dalla vallada. Aschia denter auter 1731 cun 250 renschs per gidar a baghegiar la baselgia da Rueras. Persuenter ha il caplon da Rueras l'obligaziun dad ir 12 ga per onn culla messa a S. Leci, denton ei l'applicaziun libra.

Ferton ch'il perti ei vegnius baghegiaus vitier circa 1880, han ins renovau la caplutta dadens e dadora 1908 e fatg en in plantschiu cun plattas da cement. 1911 ei vegniu construui in tett cun stuors galvanisau.

Ella caplutta sesanfla ina biala statua dalla Immaculata, che sculptur Josef Berther da Rueras (Regensburg), morts ad Augsburg sco Oberbauführer a.D. ils 20 da zercladur 1923, ha giu tagliau ora per la baselgia parochiala e ch'ei vegnida translocada a Cavorgia.

### Caplutta a Flurin-sura

In document dils 10 da november 1368 (renovaus ufficialmein igl 1. da zercladur 1664 ed ils 28 da november 1834), che sesanfla en mauns da Vigeli Riedi da Zarcuns, tracteschia ina dispeta denter vischins da Flurin-sura, Flurin-sut e Camischolas-sura pervia da dretgs vid l'aua da Londadusa. Entras questa scartira eis ei vegniu renconuschiu e decidiu, che tala aua hagi da cuorer a Flurin-sura «dadora la baselgia giu» ed hagi da survir allas casas ton a Flurin-sura, sco a Flurin-sut.

Ord tala decisiu san ins concluder, ch'ei existevi pli baul ina caplutta a Flurin-sura, probabel dadora ils baghetgs da Flurin-dadora, dalla quala ins ha denton anflau entochen ussa negins fastitgs e ch'ins sa era buc a tgei sogn ni sontga ella fuva dedicada.

## Sontgets

### Sontget dils mats a Gonda

Il sontget dils mats sesanfla sper la punt a Sedrun, giudem Gonda. El representa Niessegner vid la crusch e porta sin la fatschada l'inscripziun «Ecce homo». Il present sontget ei baghegiaus 1864 sin sulom, che famiglia Martin Beer, Gonda, ha giu regalau. Da vegl enneu existeva cheu in tec plinengiu in sontget fatg sin petgas e tabliaus cun aissas, che ha denton stuiu ceder vegnend il stradun sull'Alpsu baghiaus. Dad in temps serimnava la cumpignia da mats avon quei sontget per rugalar mintgamai lur fatschentas, sco per exemplu metter capitani, reparter las bandieras per las fiastas etc.

Il sontget auda alla cumpignia da mats, che ha baghiau e mantegn el. Per quei intent vegn ei priu si mintg'onn la fiasta da Sontgilcrest in'unfrenda denter la cumpignia da mats. 1909 han ins enrihiu el cun in niev garter da fier; 1911 renovau el. Pli daditg vegnev'eis era schau arder glisch en quei sontget ils davos dis dalla jamna sontga.

### Sontget dils gedius a Sedrun

Odem il vitg Sedrun sper il stradun sesanfla il sontget dils gedius. El cuntegn quater figuras da lenn en grondezia da persuna, che representan la IV. staziun dalla via dalla crusch, nua che Nossadunna entaupa siu sogn fegl.

Statalter Gion Antoni Curschellas, il «Nisler vegl» da Bugnei, era staus ius in onn cun statalter Sep Antoni Caviezel da Sedrun a Nossadunnaun. Sin lur pelegrinadi han els giu viu, mond sur il Hacken, in sontget, che representava il sura misteri e che ha fatg gronda impressiun sin els. Els ein seschais giu da schar far in medem a Tujetsch. Stai returnai a casa ei sculptur Gion Battesta Andreoli da Mustér vegnius tarmess en quei liug per studiar quellas figuras e lu far in semegliont. Denton ei Caviezel morts (25 da settember 1836) e statalter Curschellas ha pagau persuls ils cuosts per il sontget ed ei era s'obligaus da mantener quel.

Havend Andreoli giu finiu sia lavur tenor ils models, che sesanflan aunc ozildi a Mustér el caplut a Sontget, ein las figuras vegnididas transportadas a Sedrun e tschentadas ad interim en casa dil plevon. (Da cheu deriva forsa il num «stiva dils gedius», la stiva da maun sura, nua ch'il caplon ni era il plevon devan pli baul scola.)



Sontget dils mats

Venderdis Sogn – 1837, sche nus sbagliein buc – ei vegniu arranschau ina gronda processiun; las statuas ein vegnidias pertadas naven dalla casa pervenda tiel sontget, il qual ei vegnius benedius en e surdaus alla publica devoziun. Pli tard ha Tumaisch Curschellas da Bugnei, sutnevs da statalter Curschellas, giu quitau per quei sontget, e cun 1923 han frars Soliva, Gonda, surpriu il manteniment da quel. Ins patratga ussa d'engrondir e restaurar quei interessant sontget.

### **Sontget da Nossadunna a Cavorgia**

Amiez il vitg Cavorgia stat in sontget, che famiglia Jacomet da leu ha baghiau circa alla fin dil 18avel tschentaner, sco la tradiziun raquenta ord motiv, che tala lètg haveva giu dus affons morts senza batten e lu empermess da baghegiar in sontget cun ina statua da Nossadunna dallas dolurs. Silsuenter seigien ils auters affons arrivai tier il s. batten. Il sontget vegn manteniis dils artavels ni dil possessur dalla casa da famiglia Jacomet.

### **Sontget a Dieni**

In pign sontget sesanfla a Dieni, che Duri Battesta Berther da Dieni ha schau construir circa 1875. La crusch fier steva gia avon leu en memoria da Giusep Maria Peder da Rueras, ch'ei vegnius pella veta en in squatsch lavina en Val Giuv sut il Draus ils 23 da matg 1843 cun far nitschuns. – Ina crusch lenn, che stat medemamein en quei sontget, ei ina memoria da Giachen Fidel Maria Cavegn da Rueras, disgraziaus ils 12 da settember 1872 en Val Giuv cun cavar cristallas. Las duas pintgas statuas da s. Giusep e s. Vendelin han Vigeli Giusep Berther da Dieni e sia sora Maria Turtè tschentau, ils quals han era quitau per il manteniment.

### **Sontget a Camischolas**

In tschunavel sontget steva pli da vegl entadem il vitg Camischolas da maun sura, nua ch'ins numna aunc ussa il «prau sontget». Forsa ch'il buf d'ina lavina giud il Pegn dil Tgapi ha ruinau el ina gada. Vagnend il stradun sull'Alpsu construius 1864 ei il sontget svanius totalmein. La pintga statua da Nossadunna, che ornava quel, ha statalter Gion Andriu Berther spindrau e tschentau quella el mir da sia casa a Camischolas.

## Spirituals nativs da Tujetsch

**1. de Pontaninga Pieder**, avat OSB a Mustér, ord la nobla e reha famiglia, che habitava il casti Putnengia sper Dieni. El ei serendius ella claustra da Mustér tiels studis, nua ch'el ha priu il habit. Leu eis el daventaus pader custos e 1402 vegnius eligius avat. Scotal ha el giu bien quita per la disciplina ed economia dalla claustra ed ha pagau giu beingleiti ils gronds deivets, ch'ins haveva stui far si muort il horribel barschament da 1387. El ha mantenu e consolidau las bunas relaziuns cun ils pievels vischinonts dalla Val Blegra (13 da fenadur 1406) e dad Altdorf, nua ch'el ha acquistau in casti cun tuor e curtins (8 da settember 1407), e nua ch'ins ha honorau el cun il dretg da burgheis. A Ruma gudev'el gronda simpatia, aschia che papa Bonifaci IX ed Innocenz VII han incaricau avat Pieder cun differentas fatschentas ufficialas. Avat Pieder ei staus stimaus dils imperaturs Ruprecht e Sigismund, che havevan lur agen interess politic, che la claustra prosperassi.

Alla fin digl onn 1414 ei avat Pieder serendius cun uestg Hermann II da Cuera sil cussegli ecumenic a Constanța, dil qual el ei returnaus suenter in onn. Staus finius quei cussegli 1418, sin il qual Martin V ei vegnius eligius sco papa, ei avat Pieder puspei serendius a Constanța, nua che tutt dretgs e privilegis dalla claustra da Mustér ein vegni ratificai dil papa entras la bulla da 1418.

Avat Pieder ha baghegiau danovamein la baselgia da Nossadunna e da s. Pieder, sco era la maiestusa tuor da s. Placi, las restonzas dalla quala ein stadas semantenidas entochen 1448. Las duas baselgias, da Nossadunna e da s. Pieder, ein vegnidias consecradas 1423 da Guglielm V da Raron, uestg da Sion, Valleis. – 1421 ha avat Pieder baghegiau e dota la baselgia da s. Gada per urbir ora protecziun encunter il fiug e forsa era per levigar la pastoraziun per Tujetsch e Medel.

1424, ils 16 da mars, ha avat Pieder, capend las relaziuns ed ils basegns dil temps, fundau en uniu cun ils nobels ed il pievel la Ligia Grischa a Trun. El vegn numnaus perquei cun raschun il bab dalla patria, promotur dalla libertad ed autur dalla Ligia Grischa. – Niev contract culla Val d'Ursera ils 8 da fevrer 1425. In document da 1426 raquenta dalas bunas relaziuns denter la claustra da Mustér ed il cont Filipp Maria da Milaun. – Plein merets per la claustra e per la patria ei avat Pieder morts ils 17 da december 1438.

**2. de Pontaninga Gion**, plevon a Mustér entochen 1409, nua ch'el ei morts quei onn. El vegn ad esser staus in tierparent dad avat Pieder de Pontaninga.

**3. Durig Gion da Tujetsch**. Staus plevon a Sedrun 1584 – 1587.

**4. Catani Antoni Maria** «ex Daveggio-Tawetsch». Plevon Gedeon Furrer ad Erstfeld fa menziun da tal spiritual en sia scartira: «Die Gnadenkapelle unserer lieben Frau in Jagdmatt zu Erstfeld» (XII. Histor. Neujahrsblatt) e di pag. 60, che sur Catani seigi staus il tschunavel caplon dalla sura caplutta 162? – La famiglia Catani seigi setratga pli tard ad Engelberg.

**5. Beer Martin** «ex Tafetsch»; naschius 1597 (?); studiau a Lucerna tier ils gesuits, nua ch'el ha retschiert sin recamondaziun dil mistral e cussegli dalla Cadi «paun e buglia el

spital» da leu. Da 1614–1700 han plirs giuvens dalla Cadi studiau aschia a Lucerna. Daventaus spiritual ils 21 d'october 1622. Il patrimoni da 1000 renschs «bona moneta» ha Gion Oliva, cavalier dalla s. fossa, da Tujetsch giu prestau. Pader Placi a Spescha scriva: «1623 ei stau a Trun in caplon Martin Beer, dils perdavons dil qual il present signur seckelmeister Hans Gieri Beer deriva. Silsuenter plevon a Falera, nua ch'el ei morts e satraus 1624.»

**6. Defect Giachen**, Sedrun. Retschiert il subdiaconat ils 24 da settember 1639 «Jacobus da Fecht, Tavetschensis, ad propria bona sita in Surdrun». Sacerdot ils 3 da mars 1640. Primissari a Sedrun 1640–1645 (?); caplon a Rueras 1645–1677. – El ei staus igl emprem caplon sesents a Rueras, nua ch'el ei morts ils 23 d'uost 1677 e satraus a Sedrun en santeri.

**7. de Medell Adalbert II**, avat OSB a Mustér. El ei naschius 1628 a Sedrun e fuva frar da landrehter Conradin de Medell († 1691). Ha studiau tschun onns a Ruma el collegi dalla Propaganda, nua ch'el ha doctorau ella filosofia e teologia; ordinatus leu ils 16 da zercladur 1651. Eligius avat egl emprem scrutini ils 30 da fenadur 1655.

Nunzi Frideric Borromeo ha cun caschun dalla benedicziun dad avat Adalbert a Cuera, ils 29 da settember 1655, exprimiu il giavisch da vuler metter 18 vischnauncas dalla Surselva, ch'eran stadas incorporadas pli daditg alla claustra, sut la giurisdicziun digl avat, cun la cundiziun, ch'el paghi agl uestg da Cuera 2000 renschs en aur per levgiar ils deivets digl uestgiu, sco uestg Gion VI Flugi ei era staus cuntents. Avat Adalbert, che haveva ni giavischau ni giu encuretg quei, ha corrISPUNDIU e persuenter era aunc retschiert la cumpleina exempliun dalla claustra. Quella caussa ha purtau grondas dificultads denter igl uestgiu e la claustra. Finalmein ha papa Alexander VII, sut datum dils 11 da schaner 1660, fatg fin e tschentau danovamein las 18 vischnauncas sut igl uestg. La claustra ha survegniu mo 800 renschs anavos, mo ei restada vinavon exempta. (Pli bia mira: Il Cumin dalla Cadi da 1656. Mustér 1911.) – Ina liunga controversa denter uestg e la claustra ha l'aschinumnada «fatschenta» da Sumvitg (1681–87) per-via dalla pastoraziun da paders giu caschunau.

Sut Adalbert II ei l'imposanta claustra dad ussa vegnida baghegiada tenor il plan, atgnamen mo per part, che frater Caspar Moosbrugger da Nossadunnaun ha giu fatg. La gronda baselgia claustralha el giu entschiet a baghegiar. 1658 ha avat Adalbert II eregiu la confraternitad dil s.scapulier en baselgia da Nossadunna.

1665 ha Adalbert II cumpriau «Salaplauna-sut» e 1666 «Valdauna», che udevan a mistral Barclamiu Baliel. – 1675 ei il «Hof» a Trun vegnius baghegiaus. – Sut il regiment dad Adalbert II ei vegniu mess neu 1689 ina stampa a Nossadunna dalla Glisch, Trun, la quala ei denton vegnida translocada gia 1690 en claustra.

Sper la disertaziun da doctor «De Deo Trino et Uno», ch'ei vegnida stampada a Ruma 1655, ha Adalbert II elaborau in cudisch da meditaziuns en romontsch, sco era entginas pintgas scartiras sur la historia dalla claustra, ch'ein denton idas a piarder. Adalbert II, bein il pli meriteivel avat, che la claustra ha giu enzacuras, ei morts ils 11 da fevrer 1696 ella vegliadetgna da 68 onns suenter haver regiu 41 onn sco avat. El ei satraus en baselgia da Nossadunna.

**8. de Florin Gallus (Martin)**, avat OSB a Mustér, (Duri...), Camischolas; naschius 1663; profess 1680; sacerdot 1687. – Plevon a Pigniu 1703–1705; econom claustral; decan 1715. – Eligius avat ils 29 d'october 1716 e benedius sco tal dil nunzi Carraciolo quei onn igl 1. da november. Sco avat ha el buca mo pagau giu ils gronds deivets, caschunai da ses dus antecessurs cun baghegiar la claustra e la baselgia gronda, la quala el ha baghegiu ora e decorau rehamein, mobein era schau anavos la claustra en buna disciplina e bunas finanzas.



de Florin Gallus, avat

Sesurvend dil dretg imperial, concedius a ses antecessurs, ha avat Gallus era schau batter muneida, bluzchers, che han sin in maun sia arma (treis gelgias) e sin l'auter ils bustabs A.G.D. (Abbas Gallus de Florin). El ei morts da 61 onn ils 5 da matg 1724 e satraus en baselgia claustral sper igl altar da s. Placi, nua ch'ina gronda platta cun sia arma indichescha aunc oz sia fossa. (Mira: A Camischolas.)

**9. Venzin pader Maurus** (Giachen) OSB a Mustér, da Rueras; naschius 1682; profess 1702; sacerdot 1706. – Plevon a Sursaissa tudestga 1709–1711; plevon a Surcuolm 1711. – Superiur e magister dils novizs 1730; decan 1731; administratur claustral suenter che avat Marianus a Castelberg ha giu resignau 1738. In pietus e zun erudit claustral. Il settember 1742 ei pader Maurus sereratrgs da ses uffecis e sepinond tier sin ina beada fin eis el spartius da quest mund da 64 onns ils 18 (tenor auters ils 26) da matg 1746. Pader Maurus ei staus aug da sur Cristian Venzin (nr. 17), autur dil cudasch da legendas. Decan Maurus Venzin ha schau anavos differents manuscrets, dils quals ils biars ein i a piarder. Suandonts ein vegni stampai pli tard:

1. Ina scartira sur la dispeta dalla dieschma. Nossadunnaun. (sparida.)
2. «Ina quorta, mo fideivla informaziun della emptiun et immunitat della venerabla Casa de Diu.» Elaborau 1716, augmentau 1748 e stampau tenor quei exemplar, che existeva scadin cass mo en manuscret, forsa suenter 1820, sco professer dr. Ed. Böhmer pretenda.
3. «Descriptio brevis Communitatis Disertinensis.» Publicau da dr. C. Decurtins, Stans 1882. Ina zun interessanta ova per la historia claustral da pader Maurus, ch'ei denton ida a piarder, haveva il tetel: «De viris illustribus et benefactoribus, fautoribus Monasterii Desertinensis,» 12 cudaschs.

**10. Genin pader Anselm** (Melchior) OSB a Mustér (Melchior – Maria Beer (?), Rueras; naschius 1689; profess 1707; sacerdot ils 3 da settember 1713. – Professer dalla scola claustral a Sondrio; administratur claustral a Postalesio, nua ch'el ei morts da 58 onns ils 23 da november 1747 ed ei satraus leu en baselgia parochiala.

**11. Biart pader Martin** (Gion) OSB a Mustér (Giachen – Maria dil Giachen Gion Pieder), Selva; naschius ils 12 da schaner 1695; studiau a Mustér; profess 1713; sacerdot ils 4 da mars 1719. Superiur; archivar e bibliotecar; decan 1724; econom 1732; Jubilat. – Sco pader Placi a Spescha raquenta, haveva pader Martin in'admirabla memoria, aschia ch'el saveva

denter auter ordadora igl entir «Cudisch de suandar Cristus» ed igl entir «Virgil». Pader Martin ei morts da 79 onns ils 30 da mars 1774 suenter esser vivius 62 onns en claustra.

**12. Biart Giachen** (Giachen – Maria Capieder), Sedrun; naschius ils 21 da november 1703; studiau a Mustér; sacerdot ils 28 da matg 1728. – Caplon a Rueras 1728–1733; caplon a Selva 1733–1736; plevon a Sedrun 1736–1749. – Vulend ir en ina stermentusa nevada en agid als da Rueras, disgraziai tras la gronda lavina dils 6 da fevrer, eis el sez cun otras tschun persunas vegnius ella lavina dadens Zarcuns ils 7 da fevrer 1749 ed ei restaus morts ella vegliadetgna da 46 onns. El ei satraus a Sedrun en baselgia sper igl altar da s. Brida.

Dil pievel vegn el numnaus «sur Giachen dalla lavina». Ina gronda crusch lenn si pella casa da Sep Antoni Schmed a Zarcuns, da maun sura, nua che la via vedra mava pli baul speras ora, regord'aunc ozildi vid quella disgrazia. (Mira: A Camischolas.)

**13. Beer Giusep** (Andriu – Catrina Degonda), Gonda; naschius ils 4 da mars 1709; sacerdot ils 21 da settember 1737. – Primissari a Sedrun 1739–1745; caplon a Peiden 1745–1753; caplon a Pleif 1754–1774, nua ch'el ei morts ella vegliadetgna da 65 onns ils 7 da fenadur 1774 e satraus leu en baselgia parochiala.

**14. Venzin pader Giusep** (Duri) OSB a Mustér (Cristian – Onna Maria Beer), Rueras; naschius ils 8 da settember 1715; profess 1737; sacerdot ils 24 da settember 1740. – Pader Giusep ha gidau a satrar a Sedrun ils disgraziai entas la lavina a Rueras ils 6 da fevrer 1749. 1755 fuva pader Giusep buca pli en veta.

**15. Degonda Giachen Antoni** (Giachen – Barla Oliva), Rueras; naschius ils 19 da schanner 1716; sacerdot ils 12 da mars 1740, caplon a Rueras 1741–1749 ed ha fatg atras leu la lavina dils 6 da fevrer 1749, nua che 64 persunas han anflau la mort. Plevon a Sedrun 1749–1788; caplon a Sedrun 1788–1802. Spossaus ella vesida ha sur Degonda resignau quei onn ils 25 da december ed ha privatisau silsuenter.

Duront sia pastoraziun sco plevon a Sedrun ha el giu 1396 battens e la populaziun da Tujetsch ei carschida duront quels onns da 700 sin varga 900 olmas. – Secretari (1762), camerari e decan dil Capitel grond dalla Surselva. Jubilat. – Sur Degonda ei morts a Sedrun dad 88 onns ils 30 da mars 1804 ed ei satraus leu en baselgia sper igl altar da s. Brida. – El ha giu reformau 1769 las statutas dalla «Confraternitad da s. Giachen», la quala era vegnida erekta ella baselgia parochiala 1609 e ch'ei sparida all'entschatta dil 19avel tschentaner. – Sur Giachen Antoni Pally (nr. 22) e sur Giachen Antoni Condrau (nr. 29) ein stai nevs da sur Degonda.

Sur Degonda ei staus il menader dils dudisch pelegrins da Tujetsch, ch'ein serendi 1775 tier il giubileum grond a Ruma tut a pei en agen vestgiu da pelegrin, visitond aunc auters loghens sogns. Il viadi ha cuzzau da miez october entochen entschatta da fevrer 1776. – Ina harta, entras la quala statalter Sep Antoni Beer da Rueras ha retschiert tier tala caschun a Ruma da papa Pius VI in perdun cumplein sin pugn da mort per tuts ses parents egl emprem grad, sco era aunc per 12 particularas persunas, sesanfla en possess da Giachen Giusep Cavegn a Sedrun. – Gliendisdis dallas Rogaziuns «annual» a Sedrun per ils 12 pelegrins stai a Ruma 1775.

**16. Monn Vigeli** (Vigeli – Urschla Casparin), Sedrun; naschius ils 20 da november 1723; sacerdot 1748. – Primissari a Sedrun 1749; caplon a Sedrun 1751–1754; caplon a Rueras 1754–1762; plevon a Rueun 1762–1779; plevon a Pigniu 1779–1790; caplon a Rueras 1790–1791, nua ch’el ei morts da 68 onns ils 14 da fevrer 1791 ed ei satraus en baselgia a Sedrun sper igl altar da s. Brida. Ses geniturs ein morts e satrai a Rueun.

**17. Venzin Cristian** (Cristian – Onna Maria Beer), Rueras; naschius ils 25 da matg 1725; ha studiau a Mustér, Lucerna, nua ch’el ei vegnius ordinaus igl 1. da zercladur 1749. – Plevon a Tersnaus 1752–1800; caplon a S. Martin-Lumnezia 1800–1804. – Vicari episcopal 1763; secretari dil Capetel grond 1782; decan 1798. Jubilat. – 1758 ei la caplutta Bucarischuna vegnida baghegiada.

Sur Venzin ha cumponiu il «Cudisch da legendas», che mistral Cristian Venzin da Rueras e sur Camenisch Giusep Maria, plevon a Surrein-Sumvitg han schau stampar: I. tom a Nossadunnaun 1830; II. tom a Surrein-Sumvitg 1839 ed il III. tom era a Surrein-Sumvitg 1845. – Dasperas ha sur decan Venzin scret la historia dalla pleiv da Tersnaus en lun-gatg latin, che sesanfla leu egl archiv sco manuscret. – El ei morts da 79 onns a S. Martin-Lumnezia ils 14 da fevrer 1804 ed ei satraus en baselgia a Tersnaus. In zun pie-tus e premurau spiritual.

Anflond la pastoraziun a Tersnaus stagn greva per sia vegliadetgna, ha sur Venzin resi-gnau sin la pleiv il di dallas olmas 1776. El haveva gia obtenu la vacanta pleiv da Surcasti. Suenter cuort secussegliar ein denton tut ils umens dalla pleiv serendi suen-ter messa en casa pervenda ed han supplicau il plevon instantamein da vuler star vina-von cun els. Sur Venzin fa danovamein attents sin sias forzas spossadas ed ha il mument buca saviu sedecider.

La pleiv era tut consternida. La sera ha sur Venzin vuliu far il rusari en baselgia sco il solit. Entschavend quel ha la glieud nuota saviu rispunder dalla dolur e tut che ha ent-schiet a bargir. Sur Venzin ha spitgau in mument ed ha lu cun siu bien cor saviu far nuot auter, che rugar il pievel da tonaton recitar il rusari ed ha declarau, ch’el vegli star vinavon.

Enteifer otg dis ei la caplania da S. Martin stada fundada senza plaid dil plevon, ed igl emprem caplon sur Bertsch G. ei arrivaus en cuort temps sco gidonter da sur Venzin.

**18. Peder Gion** (Gion – Maria Martin dil Clau), Tschamut; naschius ils 9 da mars 1727; studiau a Dillingen; ordinaus a Lucerna ils 7 d’octobre 1753. – Caplon a Selva 1754–1759; plevon a Dardin 1759–1760; plevon a Lumbrein 1760–1776. Staus circa 13 dis mal-sauns e morts ella vegliadetgna da 49 onns igl 1. da fevrer 1776. El ei satraus a Lumbrein en baselgia avon igl altar grond.

**19. Berther Giachen Antoni** (Giachen – Onna Maria Decurtins), Camischolas; naschius ils 19 da november 1726; studiau a Milaun; sacerdot 1756. – Primissari a Sedrun 1757–1759; caplon a Sedrun ils 24 da fevrer 1759–1762; caplon a Selva 1762–1765, nua ch’el ei morts ils 8 d’avrel 1765 ella vegliadetgna da 39 onns. El ei satraus a Sedrun en basel-gia sper igl altar da s. Bistgaun. Sia fossa cuvreve ina platta cun l’arma dils Berthers, ch’ei vegnida allontanada tier la restauraziun dalla baselgia 1888.



Hetz p. Christian

**20. Hetz pader Cristian SJ** (Jodoc – Mengia Riedi), Selva; naschius ils 25 da decembre 1718; entraus egl uorden dils gesuits 29 da novembre 1743 ed ha fatg ils davos vuts ils 2 da fevrer 1756. Daventaus spiritual probabel 1752. – Ha operaou sco missiunari, catechist, operarius e directur da differentas congregaziuns denter auter a Pottenburg, Amberg, Ottingen, Landsberg, Rottweil, Feldkirch etc. Sco ei para ei pader Cristian staus vinavon a Feldkirch, era suenter ch'igl uorden dils gesuits ei staus sligiaus si (1773–1814) ed ha operaou sco spiritual secular. El ei morts a Feldkirch ils 26 d'uost 1780 e satraus a Rankweil en pierti baselgia, nua che siu purtret penda vid la preit.

**21. Schmed Martin** (Gion – Maria Beer), Gonda; naschius ils 18 d'avrel 1734; sacerdot ils 12 d'octobre 1760. – Caplon a Sumvitg 1760–1767; plevon a Schlans 1767–1799. Schegie confirmaus danovamein ils 3 da mars 1799 per otg onns, sco ei era usitau, ha sur Schmed resignau voluntariamein sill a pleiv ils 14 d'avrel ed ha privatisau a Schlans tier parents circa dus onns. Silsuenter caplon a Cavardiras 1801–1805, nua ch'el ei morts da malcostas per il di da Daniev 1805 ella vegliadetgna da 70 onns. El ei satraus en baselgia da s. Gion a Mustér sper igl altar dil s. rusari.

**22. Pally Giachen Antoni** (Carli – Maria Turtè Degonda), Rueras, nevs da sur decan Degonda (nr. 15); naschius ils 31 da fenadur 1734; sacerdot ils 21 d'avrel 1764. – Caplon a Trun 1764–1765; caplon a Rueras 31 da mars 1765–1771, nua ch'el ei morts da 37 onns ils 3 d'avrel 1771 ed ei vegnius satraus da pader Thomas a Bergamo OCap, viceplevon a Mustér, en baselgia a Sedrun sper igl altar da s. Brida, ella fossa da siu padrin plevon Giachen Biart.

**23. Alig Duri Curdin Gallus** (statalter Giachen – Maria Nescha Francisca Deflorin), Sedrun; naschius ils 29 da decembre 1747; studiau a Milaun; sacerdot 1771. – Caplon a Sumvitg 1771–1774; plevon a Dardin 1775–1777; plevon a Ladir 1778–1794; caplon a Peiden 1794–1799; caplon a Pleif. – Ella campagna dils Lumnezians encunter ils Franzos 1799 ha sur Alig funczionau sco caplon campester.

Mond ina sera tard d'aura stemprada encunter a siu fumegl, che vegneva ord la Val s. Pierer, ei sur Alig disgraziaus sut Pleif ed ei vegnius anflaus morts la damaun dils 12 d'uost 1804. El era arrivaus sill a vegliadetgna da 57 onns. Satraus en baselgia a Pleif.

**24. Schmed pader Beda** (Giusep Maria) OSB a Mustér (Giachen – Barla Decurtins), Gonda; naschius ils 5 da schaner 1745; profess 1767; sacerdot ils 21 da decembre 1771. – Pastorau a Curaglia duront ina vacatura, probabel 1772; econom clastral 1786; beneficiat a Zignau 1787–1789, nua ch'el ei morts da 45 onns ils 28 da decembre 1789 e vegnius satraus leu en baselgia sper igl altar da Nossadunna.

**25. Schmed Giusep Lurenz** (Giusep – Maria Castgina Pally), Rueras; naschius ils 9 da fevrer 1748; studiau a Friburg-S.; sacerdot 1713; ha cintinuau ses studis ed acquistau il licenziat teologic. – Caplon a Rueras 1775–1784; plevon a Siat ils 14 da matg 1784–1800; ple-

von a Sedrun ils 25 da matg 1800–1810; caplon a Segnas ils 23 d'avrel 1810–1815; plevon a Surrein-Sumvitg 1815–1827; caplon a Rabius 1827–1830, nua ch'el ei morts dad 82 onns ils 8 da zercladur 1830 ed ei satraus en baselgia a Sumvitg.

Pader Placi a Spescha scriva da sur Schmed: A quei perdert ed hospital um, che fuva era bein versaus ella medischina, hai jeu d'en-graziar per la pli gronda part quei, che jeu hai secret sur Tujetsch.»

**26. Soliva pader Gallus** (Duri Vigeli) OSB a Mustér (Giachen – Maria Castgina Venzin), Sedrun; naschius ils 18 da november 1748; studiau a Mustér; profess ils 8 da december 1769; sacerdot ils 28 da matg 1774. – Beneficiat si Nossadunna a Trun 1778; caplon a Sumvitg 1800–1805; caplon a Cavardiras 1807–1810 e 1816–1828. – Senior ed jubilat. Pader Gallus ei morts a Cavardiras dad 80 onns ils 28 d'avrel 1828 ed ei satraus en baselgia claustral a avon igl altar da s. Columban.

**27. Degonda Giachen Stiafen Duri** (Giachen Antoni – Onna Maria Victoria Peder), Rueras; naschius ils 30 da fenadur 1750; studiau a Mustér ed a Milaun; sacerdot ils 31 da december 1775. Caplon a Sedrun 1776–1780; coadiutor a Sedrun 1780–1786; caplon a Segnas 1786–1792; caplon a Sumvitg 1792; caplon a Curaglia 1792–1799; plevon a Dardin 1799–1803. Il december digl onn 1803 ei sur Degonda serendius sco caplon a S. Bernardino, nua ch'el ei morts entuorn 1810.

**28. Gieriet Gion Antoni** (Gion Gieri – Catrina Berther), Rueras; naschius ils 11 d'october 1750; studiau a Milaun; sacerdot 1775. – Coadiutor a Sedrun 1779; plevon a Platta 1779–1814. El ei staus il davos plevon da Medel, ch'ei vegnius presentaus digl avat da Mustér agl uestg da Cuera; caplon a Curaglia 1814–1816; caplon a Sedrun 1816–1820, nua ch'el ha habitau en sia atgna casa sin Cadruvi (dapresent casa da Lucas Cavegn), ch'el ha giu cumprau. – Camerari dil Capetel grond. Sur Gieriet ei morts a Sedrun ella vegliadetgna da 70 onns ils 21 da zercladur 1820 ed ei satraus leu en baselgia sper igl altar da s. Brida.

**29. Condrau Giachen Antoni** (Giachen Antoni – Maria Barla Degonda), Rueras, nevs e figliel da sur decan Degonda (nr. 15); naschius ils 7 da november 1752; sacerdot ils 18 d'avrel 1778. Plevon a Surcuolm 1779–1783; caplon a Sedrun 1784–1787; caplon a Sumvitg 1788–1790; caplon a Rueras 23 da mars 1791–1799. – Sur Condrau ei vegnius mazzaus barbaricamein dils Franzos a Mira ils 6 da mars 1799 ella vegliadetgna da 47 onns. Ina pintga crusch lenn vid il clavau a Mira regorda ils habitants dalla vallada vid quella crudeivla mort. El ei vegnius satraus a Sedrun en baselgia sper igl altar da s. Bistgaun.



Schmed Giusep Lurenz



Gieriet Gion Antoni



Condrau Giachen Antoni

Sur Condrau ha schau stampar danovamein la 6avla ediziun dil cudisch «La mira da bein murir», Nossadunnaun 1792.

**30. Venzin Vigeli I.** (Vigeli – Maria Culastia Decurtins), Rueras; naschius ils 18 da november 1757; studiau a Milaun; sacerdot ils 21 da settember 1782. – Caplon a Sumvitg 1782–1784; caplon a Rueras 1784–1788; plevon a Sedrun 6 d'avrel 1788–1800, nua ch'el ei morts da 43 onns ils 23 da matg 1800 ed ei satraus en baselgia sper igl altar da s. Brida. Tier l'invasiun dils Franzos, ils 6 da mars 1799, ei buca mo la baselgia da Sedrun vegnida sblundergiada e la casa pervenda dersentada, era Fidel Venzin, frar dil plevon, ch'era vegnius cun sur Condrau da Rueras per visitar e porscher agid al plevon e caplon da Sedrun, ei vegnius runaus ord casa pervenda e mazzaus crudeivlamein cun sur Condrau a Mira. – Il general austriac Bellegarde, che haveva giu fatg inspecziun allas postas a Tujetsch sils cunfins e giu priu quartier tier il reverendissim plevon, ha giu bandunau la casa senza pagar. Persuenter ha il cumin bonificau pli tard ils artavels da sur Venzin cun 50 renschs.

**31. Beer Gion Antoni** (statalter Giachen Antoni – Maria Veneranda Emerentiana Deflorin), Camischolas, frar da mistral Duri Battesta Beer a Sedrun; naschius igl 1. da december 1761; studiau a Dillingen; sacerdot 1786. – Caplon a Morissen 1789–1799. Deportaus dils Austriacs el Vintschgau, ferton ch'ils auters deportai ein vegni menai ad Innsbruck. Suenter siu retuorn il mars (?) 1801 eis el staus in temps gidonter dil plevon a Sedrun; caplon a Curaglia 1802 dils 18 da matg entochen november; plevon a Surcuolm 1802–1810; plevon ad Andiast 1811–1816; plevon a Bonaduz 25 d'avrel 1816–1817, nua che sur Beer ei morts da 56 onns ils 2 da mars 1817 ed ei satraus leu en baselgia.

**32. Venzin Felici Martin** (Tumaisch Giusep – Onna Margreta Durschei), Rueras; naschius ils 24 da mars 1764; studiau a Dillingen, nua ch'el ha fatg, tenor rapport da ses superiurs agl ordinariat episcopal a Cuera, ses studis cun gronda distincziun; sacerdot ils 7 d'avrel 1787. – Caplon a Rueras 1788–1789. Silsuenter ei sur Venzin daventaus caplon aulic ed educatur dils affons dalla nobla famiglia da Salis a Zezras, nua ch'el ei denton morts gia da 25 onns ils 17 da zercladur 1789 ed ei vegnius satraus leu en baselgia parochiala.

**33. Monn pader Sigisbert** (Placi) OSB a Nossadunnaun (Placi – Maria Castgina Deflorin), Sedrun; naschius ils 16 da december 1761; profess 4 da matg 1783; sacerdot ils 20 da matg 1787. – Vicecustos; catechist ad Egg ed Euthal; professer dil gimnasi; viceplevon a Nossadunnaun. Pader Sigisbert ei morts ella vegliadetgna da 37 onns ils 5 da mars 1798.

**34. Weller Pieder Fidel** (statalter Giusep Maria – Maria Gada Caviezel,) Sedrun; naschius ils 30 d'octobre 1761; studiau a Milaun; sacerdot 1788. – Caplon a Curaglia 1791–1792; caplon a Sumvitg 1792; caplon a Surrein 1792–1793; caplon a Selva 1793–1809; caplon a Wassen 14 da fenadur 1809–1812; caplon a Selva 1812–1818, nua ch'el ha stuui far atras la gronda lavina dils 13 da december 1808 e surportar las consequenzas dall'invasiun dils Franzos 1799.

Sur Weller ha giu testamentau sia casa privata a Selva, sco era ils Ruvens dalla Bullatscha

ad ina paupra famiglia. El capeva era da tagliar ora en lenn caussas artificialas. Sur Weller ei staus aug da sur Camenisch Giusep Maria, il qual el ha gidau tiels studis. El ei morts da 57 onns a Selva dil sturnez ils 29 da schaner 1818 e satraus a Sedrun en baselgia. Duront sia pastoraziun ha sur Weller copiau cun biala scartira il manuscret dil «Legendari sin mintga di digl onn», che sur Cristian Venzin, plevon a Tersnaus, ha giu cumponiu 1787 e ch'ei vegnius stampaus en treis toms da 1830–1845. Il manuscret da sur Weller cumpeglia in tom en folio da 1142 paginas ed ei vegnius pli tard en possess da Gion Martin Peder da Selva, il qual ha vendiu quel a professer dr. Ed. Böhmer a Strassburg e che sesanfla ussa ella biblioteca a Berlin (Mira: Selva avon 100 onns.)

**35. Riedi pader Martin** (Gion Antoni) OSB a Mustér (Gion – Maria Castgina Beer), Rueras; naschius ils 24 da fenadur 1769; profess 29 da settember 1791; sacerdot ils 21 da mars 1795. – Caplon a Rueras 1799–1805; econom claustral 1807–1812; beneficiat a Rumein 1813–1820; econom claustral 1821–1831. Siu oreifer bien humor ei aunc ussa en buna memoria. Pader Martin ei morts da 62 onns ils 20 da november 1831 ed ei satraus en baselgia claustrala avon igl altar da s. Giusep.

**36. de Castelberg Giusep Antoni** (Flurin – Maria Giuliana Soliva), Rueras; naschius ils 19 da fenadur 1773; sacerdot ils 26 da december 1796. – Caplon a Laax 1797–1798; plevon a Termin 1798–1799; plevon a Ruschein 22 d'avrel 1799–1802; plevon a Domat 1802–1805; plevon a Sumvitg 6 da fevrer 1805–1817; plevon a Razen settember (?) 1817. – Vicari episcopal; canoni extraresidenzial. Vegnend pervia da fatschentas a Sumvitg eis el vegnius malsauns e morts leu ella vegliadetgna da 44 onns ils 25 da november 1817 ed ei satraus leu en baselgia.



de Castelberg Giusep Antoni

**37. Venzin Vigeli II.** (statalter Giachen – Maria Librata Schmed), Gonda, numnaus dil pievel «sur Vigeli vegl», naschius ils 21 da fevrer 1776; studiau a Dillingen, Meran, nua ch'el ei vegnius ordinatus ils 19 da december 1801. – Caplon a Sedrun 1803–1806; caplon a Rueras 1806–1807; caplon a Sedrun 1807–1810; caplon a Rueras 1810–1844, nua ch'el ha baghegiau sper la baselgia in'atgna casa (ussa da Crist Giachen Giossi); caplon a Sedrun 1844–1854. Sur Venzin ha celebrau sia secundizia Buania 1852. – El ei morts da 78 onns en casa da siu quinau Hans Giachen Deflorin a Camischolas ils 15 d'avrel 1854 ed ei satraus a Sedrun avon porta baselgia, pli tard translocaus en santeri. (Mira: A Camischolas.)



Venzin Vigeli II

**38. de Castelberg Gion Rest** (Flurin – Maria Giuliana Soliva), Rueras, frar da nr. 36; naschius ils 22 d'uost 1778; sacerdot ils 14 da fevrer 1802. – Caplon a Domat 1802–1807, denteren staus a Sumvitg 1805 matg – uost, probabel per gidar ora siu sur frar, che fuva plevon leu; caplon a Rueras 1807–1809; caplon a Sumvitg 1810–1811; plevon a Tersnaus igl 1. da fenadur 1811–1824; plevon a Surcasti 1824–



de Castelberg Gion Rest



Hetz Giusep

28 e 29 da zercladur. Persuenter ei vegniu menau en la processiun a Tschamut per il di da s. Pieder e s. Paul, la quala ins ha dismess ils 11 da fevrer 1912 e remplazzau ella cun ina processiun a Zarcuns sin il medem di.



Gieriet G. Franzestg

1836. – Domcantor 1836; scholasticus 1849. – Special benefac-  
tur dalla claustra da Mustér tier il barschament da 1846. – Sur  
Castelberg ei morts a Cuera ella vegliadetgna da 78 onns igl 1.  
da mars 1856 ed ei satraus leu avon la catedrala. (Mira: Il  
Grischun, 1856 nr. 10.)

**39. Hetz Giusep** (Gion – Maria Giuanna Decurtins), Tschamut;  
naschius ils 7 da schaner 1778; studiau tiels gesuits a Brig,  
Feldkirch, Dillingen, plitard a Meran, nua ch'el ei vegnius ordi-  
naus ils 5 da fevrer 1804. – Plevon a Ruschein 1804–1810; ple-  
von a Sedrun avrel 1810–1846, nua ch'el ei morts da 68 onns  
anetgamein suenter haver giu fatg messa e staus serendius en  
casa pervenda, Gliendisdis Tschuncheismas, di da cumin, igl 1.  
da zercladur 1846. – Secretari, camerari e decan dil Capetel  
grond dalla Surselva.

En igl urbari dalla pleiv a Sedrun stat ei secret tier il datum da  
sia mort: Fuit sacerdos in omni scientiarum genere pereruditus,  
zelatissimus pro salute animarum et probitate vitae et fautor  
pauperum.» – Sur Decan Hetz ei staus il davos plevon da  
Tujetsch, ch'igl avat da Mustér ha presentau alla Curia episcopala  
ed il davos spiritual, ch'ei vegnius satraus en baselgia a  
Sedrun. Tujetsch ha fatg sut decan Hetz 1827 per la davosa gada  
la processiun sil S. Gottard, che cuzzava mintgamai dus dis, ils

**40. Gieriet Giachen Francestg** (Paul Andriu – Maria Barla  
Simonett da Medel), Rueras; naschius ils 4 da schaner 1780;  
ordinaus a Meran ils 14 da december 1806. – Caplon a Curaglia  
1807–1811; plevon a Trun 1811–1858; caplon si Nossadunna a  
Trun; canoni extraresidenzial 1824; vicari episcopal 1825;  
decan dil Capetel grond; inspectur da scola. – Canoni Gieriet ha  
celebrau sia secundizia per la fiesta dil Num da Maria 1864, nua  
ch'ei fuva ual 200 onns, che l'emprema caplutta da Nossadunna  
dalla Glisch era vegnida baghegiada a Caltgadira. El ei morts  
ella vegliadetgna da 87 onns ils 16 da december 1866 ed ei  
satraus a Trun en baselgia sper igl altar da s. Brida.

Il pli trest di da sia veta hagi el giu da buob – «nua che sil medem di il bab seigi sedis-  
graziaus ella Val Milà (Palla digl Andriu!), ina vacca seigi ruclada ella Rufna da Dieni ed  
el aunc giu piars in calzer» – aschia raquintava sur Gieriet pli tard. Quei ei stau ils 2 da  
settember 1789.

Canoni Gieriet ha dau ora suandonts cudischs:

1. Cuortas devoziuns per petschens affons, ch'ei cumparius en sis ediziuns da 1834–1868.

2. Ina cuorta ductrina cristiana enten damondas e rispostas mess vitier zacons bials mussaments per prender penetienza e pervergiar. Cuera 1822 e Nossadunnaun 1846. (Mira: Nova Gasetta Romontscha 1858 nr. 12; 1864 nr. 36 e 38; 1866 nr. 51.)

**41. Riedi Gion Evangelist** (Gion Gaudios – Margreta Deplaz), Tschamut; naschius ils 16 da mars 1782; sacerdot 1808. – Caplon a Rueras 1809–1810, 23 d'october; plevon a Ruschein 1810–1816; plevon en Val s. Pieder 1816–1817; plevon a Sumvitg 23 da november 1817–1833, 23 d'avrel; plevon a Ladir 25 d'avrel 1833–1843, nua ch'el ei morts da 61 onn ils 25 da matg 1843 ed ei il davos spiritual, ch'ei vegnius satraus leu en baselgia. Sur Riedi vegneva numnaus dil pievel «sur Gion pign» – «quia statura pusillus erat» da ses reverendissims confrars numnaus «la tiba dalla teologia». En igl «Amitg dalla Religiun e dalla Patria», emprema gasetta romontscha conservativa, che sur Camenisch Giusep Maria ha fundau e dau ora a Surrein-Sumvitg 1838, scriveva sur Riedi mintgamai ils artechels sur «Religiun», ferton che Casanova G. B., plevon a Pleif, pli tard Cancelari episcopal, scriveva ils artechels sur la «Patria» e sur Camenisch il current.

Plevon Riedi ha ediu suandonts cudischs romontschs:

1. «Catolicas instrucziuns dil reverendissim pader Goffine ni cuortas explicaziuns dils evangelis sin tuttas dumengias.» Cuera 1823, – La II. part sur fistas e firaus ei screta da sur Degonda G. Giusep, Cumpadials.
2. «La veta da S. Genoveva» (Chr. Schmid). Nossadunnaun 1837.
3. «La trost dil gest e la sgarschur dil pucont.» Surrein-Sumvitg 1837.

Ultra da quei ha sur Riedi auc giu translatau ord il talian en romontsch: «Il burgatiere aviarts si alla pietad dils vivents cun quotidiens perduns dasperas», ed ord il franzos: «Della necessitat, vertid e condiziuns tier l'oraziun» da s. Alfons da Liguori, lavurs, ch'ein denton buca cumpardidas en squetsch.

**42. Decurtins pader Sigisbert** (Gion Giachen) OSB a Nossadunnaun (Gion Giachen – Margreta Nescha Berther), Camischolas; naschius ils 28 da matg 1790; profess 17 da zercladur 1810; sacerdot ils 17 d'avrel 1813. – Professer dil gimnasi 1814–1816; viceplevon a Nossadunnaun 1816–1826; catechist ad Euthal 1818–1834; directur dalla fabrica claustrala da ponn e vestiarius 1835–1840; directorist 1826–1840. Pader Sigisbert ei morts ella vegliadetgna da 50 onns ils 14 da fevrer 1840.

**43. Quinter Anselm II** (Vigeli) avat OSB a Mustér (Martin Caspar – Maria Culastia Venzin), Bugnei; naschius ils 5 d'avrel 1792; studiau a Mustér, nua ch'el ha fatg profess igl 1. da matg 1811; vegnius ordinatus 12 da zercladur 1814 da uestg Frascina Corintus OCap ella catedrala a Lugano. Ha celebrau sia messa nuviala ils 12 da fenadur 1814 duront ch'ins celebrava in triduum en memoria dil 12avel centenari dalla fundaziun dalla claustra.



Decurtins p. Sigisbert



Quinter Anselm II, avat

Pader Anselm ei staus secretari digl avat, professer e moderator dalla scola claustral, beneficiat si Nossadunna a Trun 1826–1833; el ha provediu la caplania da Trun firaus e dumengias 1833–1838 ferton ch'el deva scola en claustra duront la jamna ora; caplon si Nossadunna a Trun da s. Gieri 1838 cun l'obligaziun da survigilar l'economia dil Hof a Trun; caplon a Zignau da s. Gieri 1839–1846.

Ils 21 da fevrer 1846 ei pader Anselm vegnius eligius avat egl emprem scrutini, suenter che avat Adalgott Waller ha giu resignau; benedius ora avat a Nossadunnaun dil nunzi Macioti ils 20 da settember 1846. Returnaus a Mustér e strusch giu entschiet siu uffeci abbazial, che la claustra ei ida si en flommas la sera dils 28 d'october 1846, la catastrofa, che ha engreviau siu buordi e siu operar en tuts risguards sil pli ault grad. Avat Anselm, in um da gronda pietad e migeivladad, ei morts da 66 onns ils 5 da fevrer 1858 ed ei satraus avon porta baselgia claustral en santeri, il qual el sez ha giu benediu en ils 25 da fenadur 1853 (Mira: Il Romonsch 1846 nr. 9; Nova Gasetta Romontscha 1858 nr. 7.)

**44. Deplaz Gion Giusep** (Giusep – Onna Catrina Riedi), Selva; naschius ils 4 da mars 1788; studiau a Salzburg, nua ch'el ei era vegnius cresmaus; daventaus spiritual a Salzburg ils 13 d'avrel 1816 ed ha era celebrau leu sia messa nuviala. Caplon en Val s. Pieder 1816–1817; plevon a Dardin 1817–1818. Per commiseraziun cun ses convischins ei sur Deplaz serendius a Selva e staus caplon leu 1818–1859.

Planisond cun plein quitau co saver untgir dil prighel da lavina a Selva, ha sur Deplaz baghegiau cun gronds sacrificis baselgia, habitaziun per il caplon e local da scola en in baghetg a Sutcrestas (1853) e stimulau ils vischins da far si leu casas per igl unviern. Otg casas ein sesalzadas leu en cuort temps, las qualas ins ha ussa denton puspei transportau naven.

1838 ha sur Deplaz schau far in niev altar grond a Selva e dasperas ina scaffa per las reliquias dils apostels s. Pieder e s. Paul, las qualas Selva haveva giu retschiert da Ruma ils 14 da mars 1810.

Ina bufatga harta ella caplutta da «Nossadunna digl Agid» a Sutcrestas regorda aunc ozildi vid siu pli grond benefactur, ch'ei staus 40 onns caplon e «schulmeister» a Selva. – Ella vegliadetgna da 71onn ei sur Deplaz morts anetgamein ils 25 d'october 1859 ed ei satraus a Sedrun avon porta baselgia, pli tard translocaus en santeri. (Mira: Selva avon 100 onns.)

**45. Deflorin Gallus Flurin** (Gion Bistgaun – Margreta Catrina Soliva), Tschamut; naschius ils 5 da mars 1792; sacerdot ils 13 d'avrel 1816. – Caplon a S. Martin Sursaissa tudestga 1816–1817; curat a Morissen 1817–1832; plevon a Schlans 1832–1835, nua ch'el ei morts dil treranavos ils 11 da schaner 1835 ella vegliadetgna da 43 onns ed ei satraus leu en baselgia.

**46. Condrau pader Giachen Autoni SJ** (Gion Fidel – Maria Rosa Monn), Rueras; naschius ils 27 da settember 1779. – Condrau ei entraus en igl uorden dils gesuits en Weiss-Russland

ils 24 da zercladur 1805 ed ha fatg ils davos vuts ils 15 d'uost 1817. – Pader Condrau ei staus 30 onns professer dalla matematica e historia naturala, igl emprem silla Academia da Polotsk (Russia), silsuenter, vegnend ils gesuits bandischai ord il reginavel dil zar, professer el collegi da Tarnapol (Austria Galic. Polonesia), che haveva 394 students 1822. – Ils 20 d'avrel 1837 ei pader Condrau morts a Tarnapol ella vegliadetgua da 58 onns.

Pader Condrau, ch'era bein versaus en endisch lungatgs, ha publicau suandontas ovras:

1. «Elementa geometriae theoreticae et practicae» Polociae 1818.
2. «Opisanie rzadkicogo Kompasu zwanego: Panta deicnyon». (Descripziun dall'aschi numnada ura «che indichescha tut».) Cumpariu ella scartira periodica: «Miesiecznik polocki». Polociae 1818.
3. «Trigonometria plana et sphaerica.» Polociae 1819.

**47. Venzin Vigeli III** (Gion Fidel – Maria Dumenia Schmed), Gonda; naschius ils 2 d'avrel 1792; sacerdot ils 19 d'october 1817. – Plevon a Razen 1817–1854; caplon a Sedrun 1854–1856; caplon a Rueras 1856–1867. – Spossaus ella vesida ha el resignau e privatisau a Bugnei 1867–1880. – Secretari dil Capetel da Surmir. Jubilat. – Sur Venzin ei morts a Bugnei ella biala vegliadetgna dad 88 onns ils 4 da fevrer 1880 ed ei satraus a Sedrun en santeri.



Venzin Vigeli III

**48. Beer Tumaisch Giusep Antoni** (mistral Rest Valentin – Onna Maria Monn), Camischolas; naschius ils 1 da mars 1793; sacerdot ils 16 da matg 1818. – Eligius plevon da Breil, ch'el fuva aunc el seminari ed ha pastorau a Breil da Numnasontga 1818 entochen sia mort ils 29 da matg 1845. Sur Beer ei staus il davos plevon da Breil, ch'igl avat da Mustér ha presentau agl uestg da Cuera. – Morts anetgamein sper in malsaun, ch'el ual visitava, ella vegliadetgna da 52 onns ed ei satraus a Breil en baselgia.



Beer Tumaisch Giusep Antoni

**49. Schmed Rest Antoni** (Giachen Andriu – Maria Catrina Venzin), Rueras, nevs da sur Schmed Giusep Lurenz nr. 25 e da sur Venzin Felici Martin nr. 32 e frar dad assistent Tumaisch Giusep Schmed; naschius ils 10 da fenadur 1795; sacerdot ils 19 da december 1818. Plevon a Dardin settember 1821–1822 ils 25 d'avrel; plevon a Rueun 1822–1829. – Suenter ina cuorta zun dolorusa malsogna, provedius cun tuts s.sacraments dils moribunds, ei sur Schmed morts a Rueun ils 4 da mars 1829 ella vegliadetgna da mo 34 onns ed ei vegnius satraus leu en baselgia ella cripta dils spirituals.

Tenor differents indecis semussai suenter la mort e sco la fama cursava da lezzas uras, seigi vegniu dau tissi a plevon Schmed ed el seigi morts en consequenza da quei. Da quei temps luvrava la cullafier a Rueun.

**50. Riedi pader Gallus** (Vigeli Giusep) OSB a Mustér (Martin Felici – Maria Ursula Friberg da Trun), Gonda; naschius ils 9 da mars 1798; studiau a Mustér; daventaus spi-

ritual secular ils 29 da mars 1823. – Plevon a Schlans 1826–1832; caplon a Rabius 1832.

Silsuenter ei sur Riedi serendius a Sviz ed ha studiau leu filosofia tiels gesuits ed ei entraus suenter en claustra a Mustér, nua ch'el ha fatg profess ils 25 d'uost 1839. Ei staus magister dils novizz e professer; caplon a Cavardiras 1847–1851 beneficiat ed econom a Rumein 1860–1879, nua ch'el ei morts dad 81 onn ils 2 da mars 1879 ed ei satraus el santeri a Pleif sper la porta dil teschamber. Jubilat.

**51. Hetz Giachen Giusep** (Anton Fidel – Maria Onna Catrina Berther), Gonda; naschius ils 20 d'uost 1806 a Ruschein, nua che ses geniturs luvravan ils beins dalla pervenda, essend siu aug, sur Giusep Hetz (nr. 39), leu plevon. – Ha studiau a Feldkirch, Solothurn, Cuera ed a München (filologia); sacerdot ils 28 d'october 1834. – Professer dalla scola cantunala catolica a Mustér 1834–1842; professer e rectur dalla scola cantunala catolica a Cuera 1842–1846; professer dalla scola cantunala catolica a S. Gagl 1846–1857; professer el collegi a Sviz 1857–1863; caplon a Kaltbrunn, S. Gagl, la primavera 1863–1871, nua ch'el ei morts da 65 onns ils 10 d'uost 1871 ed ei satraus leu avon il portal dalla baselgia da maun dretg.

Hetz Giachen Giusep  
Muort sia gronda savida el lungatg latin vegneva sur Hetz numnaus «La viva grammatica latina». – Alla biblioteca dil collegi a Sviz ha el regalau 350 toms. (Mira: Gasetta Romontscha 1871 nr. 33.)

**52. Riedi Gion Adalgott**, frater SJ (Gion Fidel – Barla Catrina Berther), Rueras, frar da nr. 57; naschius ils 27 da december 1811; ha studiau a Sion, Valleis ed ei entraus egl uorden dils gesuits ils 7 d'october 1831. Suenter haver fatg ils studis usitai ed havend mo cuort temps pli tochen dir messa, ei frater Riedi morts dil treranavos ils 30 da december 1838 a Friburg-S. ella vegliadetgna da 27 onns ed ei satraus leu.

**53. Soliva pader Bruno** (Gion Giusep) OSB a Nossadunnaun (Giachen Antoni – Maria Castgina Solèr), Sedrun; naschius ils 16 da zercladur 1816; profess ils 7 da settember 1834; sacerdot ils 13 d'uost 1837. – Professer a Nossadunnaun 1837–1838; professer dil

gimnasi da Nossadunnaun a Blizuna 1838–1842; catechist ad Euthal 1842–1844; curat ad Euthal 1844–1853, 23 d'october. Ils 11 da fenadur 1854 ei pader Bruno secularisaus ed ei daven-taus plevon a Mons 1854–1855; plevon a Vrin 1855–1859; curat a Schlatt sper Appenzell 1860–1879, nua ch'el ei morts da 63 onns ils 28 d'uost 1879 ed ei satraus ad Appenzell.

**54. Cavegn pader Lucas** SJ (scarvon Rest Lurenz Lucas – Maria Margreta Beer), Rueras; naschius ils 24 da mars 1805; studiau a Brig, Friburg-S.; entraus egl uorden dils gesuits 5 d'october 1830; sacerdot ils 21 d'avrel 1840; fatg ils davos vuts ils 2 da fevrer 1844.



Hetz Giachen Giusep




Soliva p. Bruno

Igl onn 1847 ei pader Lucas serenius ell'America, ella missiun da Canada dil nord, nua ch'el ha opearu quater onns, baghegiond leu duas baselgias ed ina casa pervenda. Silsuenter ei pader Lucas vegnius ella missiun dalla provincia tudestga da Buffalo ed ei daven-taus superiur da quella missiun. Sin giavisch dad uestg Gion Timon da Buffalo ha pader Lucas supriu leu la pleiv tudestga «Sogn Ludivic», e fundau 1852 ina scola e l'Uniun de s. Mihel. Carschend la populaziun catolica a Buffalo, ha pader Lucas Cavegn baghegiau leu duas grondas e bialas baselgias, ina en honur da s. Mihel e l'autra en honur da s. Onna.

Pader Lucas Cavegn ha publicau differentas brevs sur sia missiun en las scartiras periodicas: «Lettres des nouvelles missions du Canada,» tom 4, ed «Annales de la Propagation de la foi,» tom 21. – Differentas, interessantas brevs romontschas da pader Lucas Cavegn sesanflan en mauns da Gion Fidel Cavegn-Jacomet, Rueras. Pader Lucas ei morts da 57 onns a Buffalo en fama da sontgadad ils 27 da schaner 1862. (Mira: Nova Gasetta Romontscha 1862 nr. 11.)

**55. Macolin dr. Giachen Andriu** (Duri – Maria Catrina Schmed), Rueras; naschius ils 18 d'uost 1816; ha studiau a Ruma el collegi germanic, nua ch'el ha fatg il doctorat ed ei vegnius ordinans ils 19 da settember 1840. Professer dalla teologia el seminari da S. Leci Cuera 1840–1850; plevon a Mols, S. Gagl 21 da decembre 1851–1857; beneficiat si Nossadunna a Trun 1858; professer dalla scola secundara ad Ursera 1859; plevon a Surcasti ils 2 da fenadur 1859–1863; plevon a Pasqual 1863–1866; caplon a Selva 1866–1886; caplon a Sedrun 1888, nua ch'el ei morts da 72 onns ils 30 da november – il di da siu s. patron – 1888 ed ei satraus leu en santeri. – En siu testament eis el seregurdaus dalla baselgia parochiala cun 1000.–frs., dil pauperesser cun 1000.–frs. e dall'Uniun da s. Leci cun 500.–frs. Dr. Macolin sedistinguева sco predicatur. Datier da 700 da ses priedis romontschs en manuscret, elaborai cun grond quita ed en excellenta caligrafia, ein vegni regalai alla Biblioteca romontscha dalla claustra a Mustér. (Mira: Amitg dil Pievel 1851 nr. 49; Gasetta Romontscha 1888 nr. 50.)

**56. Beer pader Sigisbert OSsR** (Tumaisch – Maria Margreta Decurtins), Camischolas; naschius ils 19 d'october 1821; ha studiau a Mustér, Nossadunnaun e Sviz; ei entraus egl uorden dils Redemptorists a Bischenberg ils 23 d'october 1843; profess in onn



Cavegn p. Lucas



Macolin dr. G. Andriu



Beer p. Sigisbert



Riedi Giachen Lurenz

1877–1884, nua che sur Riedi ei morts ella vegliadetgna da 64 onns ils 22 d'avrel 1884 ed ei satraus en santeri a Sedrun.

**58. Beer Gion Bistgaun** (Vigeli Giusep – Barla Catrina Zanetti), Gonda; naschius ils 20 da schaner 1820; studiau a Friburg-S., Cuera; sacerdot ils 26 da fenadur 1850. – Caplon a Rueras 1850–1853, fagend il medem temps era scola; plevon a Schlans 1853–1858; plevon a Ruschein 22 da november 1858,



Beer Gion Bistgaun

nua ch'el ei sereratratgs alla fin da 1875, a motiv da fleivla sana-dad; caplon a Laax 1877 avrel entochen october; caplon a Zignau 26 d'october 1877–1889. Ha resignau e privatisau silsuenter a Cuera el spital dalla Crusch, nua ch'el ei morts ils 24 da fenadur 1899 ella vegliadetgna da 79 onns ed ei satraus el santeri silla spunda sut il seminari da s.Leci.

**59. Monn Giachen Antoni** (Giachen Antoni – Onna Maria Beer), Sedrun, nevs da sur Tumaisch Giusep Antoni Beer nr. 48; naschius ils 16 da fevrer 1829; studiau ella scola episcopala a Mustér, silsuenter a Cuera. Benedius ora spiritual ils 21 d'uost 1859 a Feldkirch cun auters sis Grischuns. – Caplon a Breil 2 d'uost 1860–1870; caplon a Laax 2 d'uost 1870–1872, nua ch'el ei morts ils 26 da december 1872 ella vegliadetgna da 43 onns ed ei satraus leu avon porta baselgia.

**60. Caduff pader Alois SJ**, (Giusep Antoni – Maria Ursula Peder), Rueras; naschius ils 6 da matg 1843; studiau a Mustér, Cuera, Feldkirch; entraus egl uorden dils gesuits a Gorheim ils 7 da december 1861; sacerdot ils 19 da settember 1875; profess ils 2 da fevrer 1879.

Staus otg onns pader minister a Ditton-Hall (1879–84), a Blyenbeek (1884–85), ad Exaeten (1885–87); silsuenter ha pader Caduff giu dudisch onns il difficil uffeci da procuratur dall'entira provinzia tudestga, che dumbrava da lezzas uras ell'Europa, ell'America (Stats Uni, Brasilia, Chile) ed ell'Asia (missiun da Bombay) varga 60 casas cun circa 1350 personals. El ei morts da malcostas ella vegliadetgna da 56 onns ad Exaeten ils 14 da mars 1899.

Cun caschun da sia mort, ha siu confrar pader Anton Huonder da Mustér scret denter auter il suandont ella Gasetta Romontscha: «...Sco procuratur dalla provinzia havev'el d'administrar las finanzas. Quella impurtonta e difficultusa plazza, che garegia gronda prudentscha e bia enconuschientschas, ha el provediu sin distinguida maniera e cheu-tras acquistau gronds merets per la provinzia.»

«Personalmein fuva pader Caduff in um fetg simpatic, tut che carezava quei pign, ruasseivel e quiet pader, che fuva tonaton adina da buna veglia. Sia opinuin valeva zun bia tier gronds e pigns. Dasperas fuv'el in fetg edificont religius, punctuals sco in'ura, mudests senza neginas pretensiuns, survetscheivels e che dumignava cumpleinamein sesez e survev'aschia per in exempl all'entira casa. Sia patria retica tenev'el adina en buna memoria...» (Mira: Gasetta Romontscha 1899 nr. 12)

**61. Beer Tumaisch Giusep** (Vigeli Giusep – Maria Ursula Gieriet), Gonda; naschius ils 9 da mars 1851; studiau a Nossadunnaun, S. Murezi (Valleis), Sviz, Cuera; sacerdot ils 5 d'uost 1877. – Caplon a Sedrun 26 da matg 1878–1881, 27 da mars; plevon a Sedrun 1881–1885, 25 d'avrel; plevon a Sumvitg 1885–1905, 16 da november; caplon a Zignau 1905–1918, 10 da schaner; spiritual dil spital da s. Clau a Glion 1918. – Vicari episcopal 1896. Canoni extraresidenzial 1897.

**62. Berther Tumaisch Giusep** (Duri Battesta – Onna Maria Ursula Schmed), Dieni; naschius ils 7 da mars 1853; studiau a Mustér, Sviz, München, Eichstätt, Cuera; sacerdot igl 1. d'uost 1880. – Caplon a Sedrun avrel 1881–1885; plevon a Surrein-Sumvitg 21 da zercladur 1885–1908; plevon a Vignogn 17 da november 1908–1909; plevon a Platta 10 d'october 1909.

Sper la pastoraziun ha sur Berther luvrau intensivamein per l'apicultura. El ha fundau 1893 l'Uniuon d'apicultura dalla Cadi; ha teniu sin giavisch dalla Regenza cantunala 28 cuors sur l'api-cultura en differentas vischnauncas dils cumins dalla Cadi, Rueun, Foppa e Lumnezia, ed ha fatg enconuschent ses auditurs



Beer Tumaisch Giusep



Berther Tumaisch Giusep

particularmein cul «magasin mobil». – Sur Berther ha era fundau ina «Uniun de pomologists della Cadi» ed ha teniu differents referats per promover la pomologia e la meglioraziun dalla cultira. – President dalla secziun cantunala dalla Uniun populara catolica svizra 1906–1909.


Plevon Berther ha publicau suandontas scartiras:

1. In quart ura avon il ss. Sacrament, Mustér 1885, II. ediziun
2. La frequenta communiu, Mustér 1885.
3. Pomologia (P. Chrys. Amrein), Mustér 1896.
4. Igl alcohol e sias consequenzas, S. Gagl 1907.
5. Liber rationum missarum tam manualium quam fundatarum in usuni Sacerdotum, Nossadunnaun, II. ediziun
6. Relaziun denter scola e casa paterna, Gossau 1913.
7. La cassa de Raiffeisen, Gossau 1921.

**63. Berther pader Baseli** (Giachen Martin) OSB a Mustér (Duri Battesta – Onna Maria Ursula Schmed), Dieni, frar da nr. 62; naschius ils 11 da november 1858; studiau a Mustér, Sviz, Friburg-S., Eichstätt, Cuera. – Premlitinent dalla infanteria 1882. – Profess 16 da december 1884; sacerdot ils 17 da matg 1885. – Prefect dalla scola claustral 1888–1906. – Fundatur e conservatur dalla Biblioteca romontscha claustral.

Pader Baseli ha ediu suandontas scartiras:

1. Pren mira, tiu retg vegn tier tei!, Mustér 1887
2. Il Tschundubel scapulier, Nossadunnaun 1890
3. Sas era nua Giuv ei?, (I. tom Crestomazia) 1896
4. Il Spazzatgamin, (Annalas) 1896
5. Cudisch de messa per pietus affons, (G. Mey.) Nossadunnaun 1903. – II. ed. 1922
6. Sin Cadruvi, Solothurn 1904
7. Selva avon 100 onns, Mustér 1909
8. Il Cumin della Cadi da 1656 e mistral Giachen Berchter, Mustér 1911
9. Notizias sur ils zenns da S. Gion a Mustér, Mustér 1916
10. A Camischolas, Ingenbohl 1917
11. Sontga Catrina a Mustér, Mustér 1919
12. Ils Bannerherrs della Cadi, Ingenbohl 1920



Venzin Gion Antoni

**64. Venzin Gion Antoni** (Giachen Fidel – Maria Mengia Nescha Condrau), Selva; naschius ils 15 da december 1858; studiau a Mustér, Sviz, Nossadunnaun, Cuera, nua ch'el ei vegnius ordinlaus ils 19 da fenadur 1885. – Caplon a Rueras ils 28 d'october 1886. – Sur Venzin ha eregiu a Rueras ils 28 da matg 1892 la confraternitad dil sontgissim Cor da Jesus e menau en leu la solempna fiesta dil sontgissim Cor da Jesus, che croda mintgamai sin la dumengia suenter igl otgavel da Sontgilcrest. La secunda dumengia d'october 1910 ei vegniu celebrau ina solempna fiesta dall'entira vischnaunca en memoria dil giubileum

sacerdotal e pastoral da 25 onns a Rueras da reverendissim caplon Venzin, nua che plevon Engler ha fatg il priedi, ses dus fegls spi-rituals sur Brugger e sur Venzin han funcziunau sco levits e nua che pader Basel ha teniu suenter viaspas il plaid festiv avon casa pervenda. – Cun caschun ed en memoria da quella fiasta han ils vischins da Rueras fundau en lur baselgia da s.Giachen ina s. messa perpetna per lur reverendissim giubilar.Sur Venzin ha ediu in fascichel «Poesias religiusas». Mustér 1918.



Biart Duri Vigeli

**65. Biart Duri Vigeli** (Giusep Antoni – Margreta Castgina Decrusch), Bugnei; naschius ils 14 da decembre 1859; studiau a Mustér, Nossadunnaun, Eichstätt, Cuera; sacerdot ils 18 da fenadur 1886. – Caplon a Rabius settember 1887–1889 avrel; plevon a Cazas 1. da matg 1889–1901; confessur ed administratur dalla claustra da Cazas 1901–1918. Secretari dil capetel da Surmir 1894. – Morts a Cazas da 59 onns ils 23 d'avrel 1918 ed ei satraus leu en santeri dallas muniessas.

Sur Biart ha ediu suandonts cudischs:

1. «Lerne gut sterben!», Ingenbohl, II. ediziun 1898.
2. «Cor Jesu Sacratissimum. Cudisch della devoziun dil sontgisim Cor de Jesus.» Immensee, II. ediziun 1915.
3. «Der heiligste Namen Jesus als Heilmittel in unsern Krankheiten.» Ingenbohl 1913.



Gieriet Giachen Antoni

**66. Gieriet Giachen Antoni** (Giachen Antoni – Onna Maria Caduff da Schlans), Rueras; naschius ils 7 d'octobre 1867 a Schlans e tratgs si leu; fatg per part ses studis a Schlans tier plevon G. G. Wellinger, silsuenter a Friburg-S., Cuera; sacerdot ils 24 da fenadur 1892. – Caplon si Nossadunna a Trun 1893–1896; caplon a Rabius 1896–1897, nua ch'el ei morts da 30 onns ils 19 da matg 1897 ed ei satraus a Sumvitg en santeri.



Brugger Giusep Alois

**67. Brugger Giusep Alois** (Alois – Maria Culastia Muggli), Rueras; naschius a Messina (Sicilia) ils 5 da settember 1871; studiau a Mustér, Friburg-S., Cuera; sacerdot ils 14 da fenadur 1895. Plevon a Trun 23 d'octobre 1895–1912; plevon a Mustér 1912. – Vicari episcopal 1918; canoni extraresidenzial 1921. – «La scola,» referat silla dieta catolica a Trun mira «Gasetta Romontscha» 1920 nr. 41–45. «Ein freies Wort über die Churer-Pädagogik» en la scartira «Pädagogische Blätter» 1910 nr. 29–31.



Venzin Gion Giachen

**68. Venzin Gion Giachen** (Gion Fidel – Onna Maria Deflorin), Selva; naschius ils 15 d'uost 1871; studiau a Mustér, Nossadunnaun, Friburg-S., Cuera; sacerdot ils 16 da fenadur



Beer Giachen Giusep



Venzin Giusep



Deragisch p. Placi



Deragisch p. Teodosi

1899. Plevon a Siat ils 8 da settember 1900–1906, 30 da november; plevon a Sumvitg 1. da december 1906. – Sur Venzin ei separticipaus digl emprem pelegrinadi svizzer ella Tiarasontga 1903, che ha cuzzau dils 11 d'uost entochen ils 22 da settember.

**69. Beer Giachen Giusep** (Giachen Fidel – Barla Catrina Brida Deflorin), Sedrun; naschius ils 12 d'uost 1872; studiau a Mustér, Nossadunnaun, Cuera, nua ch'el ei vegnius ordinaus ils 16 da fenadur 1899. Plevon a Schlans 7 d'october 1900–1910; plevon a Ladir 22 da matg 1910–1913; plevon a Rueun 15 d'avrel 1913.

**70. Venzin Giusep**, Selva. Naschius ils 20 da schaner 1878 ad Ebersberg, Baviera, nua che siu bab Giusep ei staus maridaus cun Sabina Fischer d'Ebersberg. Ha fatq ses studis gimnasials a Scheyern e Freissing ed ei serendius a Cartagena (Columbia, America meridiana), nua ch'el ha absolviu ils studis dalla filosofia e teologia el seminari dalla missiun. – Benedius ora spiritual 1905 a S. Francisco, Ecuador, ed ha celebrau leu sia messa nuviala ils 21 da matg e nua ch'el pastorescha dapresent sco plevon d'ina extensiva pleiv. – Sur Venzin ha fatg 1909 in pelegrinadi ella Tiarasontga ed ha sin siu retuorn visitau ses da casa ad Ebersberg.

**71. Deragisch pader Placi** (Giusep Antoni) OCap. (Emanuel – Maria Luisia Valier), Bugnei; naschius ils 10 d'avrel 1875; studiau a Mustér e Nossadunnaun; ei entraus egl uorden dils caputschins a Lucerna ils 12 da settember 1905; profess ils 12 da settember 1908; sacerdot ils 10 da fenadur 1910, pader Placi ei missiunari pil pievel e dat era exercezis spirituals a differentas clamadas. Visitatur dil III. uorden da s. Francestg.

**72. Deragisch pader Teodosi** (Tumaisch Baseli) OCap. (Emanuel – Maria Luisia Valier), Bugnei, frar da nr. 71. – Naschius 15 d'avrel 1888; studiau a Mustér e Stans; entraus egl uorden dils caputschins a Lucerna ils 8 da settember 1909; profess ils 14 da settember 1910; sacerdot ils 29 da zercladur 1915. Pader Teodosi operescha sco missiunari pil pievel ed ei directur dil III. uorden da s. Francestg.

**73. Venzin Gion Benedetg** (Vigeli Giusep – Rosa Simonett, Acla-Medel), Selva; naschius ils 13 da schaner 1892; studiau a Sarnen e Cuera; sacerdot ils 22 da fenadur 1917. – Plevon a Breil 11 d'uost 1918.

Sur Venzin ha publicau el «Calender Romontsch» da 1922 ina lavur sur: «Felici Diogg, il pictur da Tschamut.» – «Pertratgs sur l'elecziun dalla clamada» mira «Gasetta Romontscha» 1923 nr. 13 e suandonts. – Sur Venzin Gion Benedetg ha surveggiu 1923 il honorific clom sco caplon dalla Guardia Svizra a Ruma, al qual el ei denton secartius da buca saver corrispunder per grond plascher dil pievel romontsch.



*Als vivs ventira e benediczun,  
Als morts sogn e perpeten ruaus!*

Venzin Gion Benedetg

## La sera da pustretsch

In maletg dalla veta purila ord nossa biala Val Tujetsch.

Quei studi cultural en fuorma da skizza, ha Guglielm Gadola, Mustèr, scret sin fundament d'in fragment da pader Baseli Berther sco era sin fundament dad outras notizias cultur-historicas ord la Val Tujetsch.

Ei va encunter Sogn Martin. Igl atun ei staus emperneivels, bialaura e ditg buca neiv. Il graun ei staus setschurius ora stupent sils chischners; ins ha fatg tgunsch da scuder ed ei ha engarnau pulit, malgrad ch'igl uost veva giu schau suenter empau cul sulegl. Il pastg digl atun ei staus d'engrau e per cletg han ils armauls saviu guder ditg quel uonn. Cauras e nuorsas cuostan aunc pauc. Il davos temps han ins saviu far bia emperneivlas lavurs digl atun, che spargna da far la primavera. Ir ad uaul, better ora grascha els mises ed en acras, trer si zuolc e tscheu e leu ein umens sepostai sper ina muschna per runcar ora quella – buca la pli malnizeivla lavur. Cul far ora ieli va ei era encunter la fin ed ils giuvens ston tener adaquen las seras, sch'els vulan aunc gidar enzatgi a strucular e litgar ieli. Ins auda aunc tscheu e leu ord in nuegl ni zona isolada la canera dil spatlar glin, nua che sgarscheivlas figuras stattan davos il pei e smeinan cun vigur la spatla, denton sco detg mo tscheu e leu da quellas, ch'eran s'entardadas ni che levan far quitar, ch'ellas hagien pli bia che las otras. Las biaras han gia daditg rugalau naven quella lavur e miran denteren cun veseivla satisfacziun sils biars e bials pops, che vevan dau gronda e liunga lavur, denton bi, alv glin havein nus uonn e lu in entir briec pieun d'ie-li sper ina biala partida paun d'iel, ch'ins veva daditg destinau da dar in ton als vadials ed in ton ad in auter, ch'ins veva mess en avon cuort temps ad engrasch.

Ei era pia stau in bi atun, era in pulit onn en general, andantamein fretg ed ils tiers han ins era saviu vender per prezis ordinaris, buca extravagants, quei buc, mo ei tergeva. Ils purs savevan esser cuntents ed ei fuvan era, mo il temps da Sogn Martin leventa adina si agens sentiments – ils deivets. Duront igl onn san ins plitost scurlar giu da dies quels patertgaments, ins sa schar ruclar empau e – biars laian era – mo da Sogn Martin, cheu vegnan ils nuvs el petgen e mintga galant um enquera e sesprova da far ora quels, sinalquei ch'ins sappi teisser vinavon e ch'ei detti ina buna teila.

In dils emprems deivets, ch'il pur da Tujetsch rugalescha ei adina il quen d'alp. Il bia la dumengia avon ni grad suenter Sogn Martin, cheu vegn ei tagliau pustretsch da mintga caschada tier il cautegia e quei ei mintgaga ina sera, che porta empau veta denter ils purs.

Ei era gl'emprem onn, che las treis caschadas da Val Val havevan giu emprau in niev cundrez, da numnadamein pladir ensemble la fumeglia d'alp e da purtar ils cuosts generals ulivamein ensemble. Quei veva era la consequenza, ch'ils pursanavels da quellas treis caschadas stuevan trer pustretseh ensemble. Quei fuva enzatgei resch niev e schon daditg dumandava in l'auter: «Tgi so nu'l de Val tilan uonn pustretsch? Tauns umens druva ina pulita stiva!» – Basta, ina dumengia suenter messa vegn gl'aug Toni, che veva funcziunau igl onn dad uonn sco cautegia dils «Signurs» a casa e di si pils ses: «L'autra dumengia vutan ai tagliè pustretsch co tier nus; tschels dus tgautegias on memi stretg.»

Las femnas han sco pigliau tema, «nua cavagliè giu da maun taunta gliut.» Denton las feglias, treis frestgas, bravas mattauns, han dil rest giu bugen quei suten ed han teniu quei per ina honur.

Daferton han ils treis purtgès survegniu las ordras dil paster grond da visar ils pursanavels e pasturs, mintgin da sia caschada, che la dumengia avon Sogn Martin vegni tagliau pustretsch tiegl aug Toni – in num che in'entira vallada enconuscheva. Fideivlamein ein ils treis purtgès serendi duront la jamna ora casa per casa e visau ufficialmein ils purs. Ils treis buobs spitgavan vess sin la dumengia, pertgei els selegravan buca schi strusch d'astgar cumparer per l'emprema gada tier in pustretsch, dil qual els havevan udiu tontas gadas a tschintschond. Dasperas tenevan ils pigns per ina honur d'astgar seradunar cun tons umens.

Tiegl aug Toni havevan las femnas era buca fatg serasontga duront la jamna ora. Ellas vevan lavau en stiva e stebli ed il zuler, mess si auters umbrivals, pinau tier aunc in per outras meisas, eran sedadas ora per supprias e bauns e temprau en buns lameglis ellas cazzolas, pertgei cazzolas vevan ins da lezzas uras aunc buca dapertut.

La dumengia da gentar ha la famiglia digl aug Toni giu da tschintschar mo dil pustretsch. Tuts selegravan e tenevan per ina honur da saver retscheiver tons umens, giuvens e vegls. Il pign Battesta, il benjamin dalla famiglia, quintava schon giu davos tgei meisa «ils Signurs», «ils Magnancs» ed «ils Purs» hagien da seser e nua ch'ils pasters e purtgès hagien da star, cun ils quals el leva lu era tener cumpignia e manegiava alla finala: «In auter onn scheis vus era ir ad alp mè.» La mumma pudeva rir, «aber sche té vegnas culla brocca, lu catschain nus puspè anainasé!» – Las mattauns manegiavan, ch'ils umens duessien ir oz in tec pli baul a pver e lu buca emblidar da purtar questa sera empau pli bia latg a casa. Pertgei, saveva mintgin. Era eis ei vegniu fatg giu da tschenar pli baul e da dir immediat suenter ils paternos.

Ei pudevesser entuorn las siat. Ei finescha ual da tuccar d'Ave Maria. Ina dallas feglias, la Catrina, ch'era stada a rusari, manegia: «Ussa vegnan ei cun ignèda.» Igl aug Toni finescha ils «paternos» cun aunc dir las sontgas tschun plagas. Las mattauns dattan aunc ina rugalada las meisas, supprias e bauns, caveglian ina cazzoletta on zuler e rugaleschan lur fatgs en cushima. La mumma sesa sin baun-pegna e seregorda vinavon tut persula da quel e tschel culla corda paternos. Igl aug Toni ha aunc dau in'egliada ella gasetta, ferton ch'il Placi, il mat-grond, pren neunavon las stialas ed il carnet dils quens dalla caschada. Il Battesta cuora traso vidaneu, mira tras las finiestras, sche negin vegnessi aunc. «Ussa vegn enzatgi!»

E pilver, ei vegnan. Trops e tropa da treis e quater ensemes a sediscurrent bien e dad ault, sco igl ei moda tier nus. Ils dalunsch ein, sco ordinari, ils emprems: Il Fidel Flurin, il Fidel dils Giachens, il statalter Peder, Vigeli Peder, Franz Giusep, Gion Martin, tuts vischins da Selva e lu il Sep da Dieni cun els.

«Buna sèra!» – «Bien onn!», e l'entira famiglia fa beinvegni tier nus! «Prendai plaz enzanua!» «Co survegnis vus il dètg urden questa sèra, manegia il Fidel Flurin. – «Mu vus stuais vai pazienza cun nus», manegia la mumma e gl'aug, ch'eran levai si per sali-



Fumeglia d'alp si l'Alp Tiarms

dar ils umens. «Vus vais giu gliunsch de vegni ora». – «Cun quai tgi fo de quella aura, sche s'ei bi ira.» – E puspei audan ins novas caneras sut casa ed on zuler. E neuadensi ed en stiva vegnan entiras roschas, umens serius, temprai e bein stampai, umens cun barbas cuortas pauc cultivadas, cun fatschas frestgas, scardalidas dall'aura, umens en lur sempel vestgiu da carpun, cun camischa da lenziel alv sco la neiv e nua ch'il culier ei vid la camischa. Ils biars cun l'usitada capetscha liunga da seida sin tgau cun la gronda miserocla, che tonscha sper l'ureglia senistra giu tochen sil pèz; ils umens pli vegls cun pintgas capetschas neras cun tingalin agradsi. E denter quels umens serius era giuvens plein veta e plein forza, cun vestas cotschnas e barbis bein strihai. Era quels portan la capetscha seida, che negin pren giu en stiva. A tuts vegn ei fatg da vart dalla famiglia digl aug Toni cordial beinvegni e prendei plaz. Canera e rueida, sgnoccas e risadas vi e neu detgavunda. Tuts eran gie enconuschents, buns vischins e da stupenta luna. Enteifer ina mes'ura eis ei serimnau ina massa umens, quasi tuts pursanavels dallas treis caschadas cun lur fideivla fumeglia dad alp. Ei fuva cheu ina entira banda Giachens e Gions, Giachen Antoni, Giachen Giusep, Giachen Fidel, Gion Mihel, Gion Andriu, Gion Felici, Gion Paul. E lu Vigeli pign, Vigeli dalla Maria, Lezi dil farrer, il Catriner, il Gader, il grond Madlainer, il grond Stèn, il grond Cavegn, il Giossi pign, Vigeli dalla Tina Hoha, Gion Antoni dil Stiafen, Toni Hasper, il grond da mulin, Rest Valentin dalla Gada, Sep Flurin, Sep Martin, Sep Antoni Paul Mariusch. Basta da quei da 40 pursanavels e lu da quei da diesch pasturs cumpigliau ils starlers dallas genetschas, il starler pign ed il starler grond.

Pia da quei da 50 umens tiegl aug Toni questa sera, ina detga partida! Bien che la stiva ed il stebli grond eran ualti spazius; tut ha oreifer plaz. Igl emprem audan ins aunc ora enqual vusch singulara, per exempl quella dil Vigeli dalla Tina Hoha, mo ei vegn lu pli e pli viv ed en buca ditg eis ei ina cusseida, sco da gentar da s. Placi on claustra. Havend tratg ina tarmenta presa, leva il grond da mulin sin peis e di che tut auda: «Ju

fuss dal maini d'entschaiver ingnèda, sinaquai tg'ins sappi ira bien a baud a letg. Damaun stu ju ira se Cungieri e runar giudora fain a pastg.» «Te as raschun, nus lain entschaiver», grescha il cautegia denteren, «i è nuéta memi baud!» «Sche tut è co, sche vi ju leger giu ils quens»; cloma gl'aug Toni, in um brac cun ina brava barba grischa, «ju a è priu ansiamen ils quens de tschels dus tgaustegia!» «Gie, fagiai vinavaun», marmugna il Rest Valentin dalla Gada, «i o dau las siat!» «Bien, lu cuschai, tg'ins audi», dian plirs.

|   |        |
|---|--------|
| Quen dall'alp Val Val                       |        |
| sco usitau las messas                       | 15.00  |
| il starler                                  | 335.00 |
| igl emprem paster grond                     | 210.00 |
| il secund paster grond                      | 125.00 |
| il tierz paster grond                       | 115.00 |
| 8 sacs sal                                  | 88.80  |
| tscheins per treis preuls                   | 28.50  |
| paster pign ha giu                          | 85.00  |
| l'auter                                     | 45.00  |
| il tierz                                    | 40.00  |
| purtger dils «Signurs»                      | 27.00  |
| purtger dils «Magnancs»                     | 25.00  |
| purtger dils «Purs»                         | 18.00  |
| per ieli da cazzolas e fildirom             | 3.35   |
| per pinar ils dus scutgers                  | 6.25   |
| per metter si in tscherchel sillla panaglia | 0.80   |

Notabene: «Ussa fuss ai aun co quels 6.–francs pel donn tg'els pors on fatg; il gerau o fatg ora 6.–francs, a quels stuain nus piè.» «Quai daien ils purtgès piè; quels smarschannèns», grescha il Vigeli dalla Tina Hoha, «fagevien lur obligaziun, tochen tge vegnevan giun Scharinas a mavan pels clavaus della gliut enturn a mu fa dagrettas.» – Ils paupers purtgers ein vi davos pegna e sgratan davos las ureglías.

«Per posta de 6.–francs fagiai nus bétg uiara, quai pudain nus bèn piè», manegia Gion Felici. «Tgi vut fa scarvon? Ju sun vegls a vai bétga buna memoria. Quai daien quels dus giuvens lo fa, il pign Hetz al Gion Flurin; quels en stai on claustra, son bèn fa quai; té Placi sas era gidar», camonda il cautegia dils Magnancs, il Leci dil farrer.

«Nus main on stebli; lo vain nus ruaus», di gl'aug Placi. Pia van els treis on stebli per buca vegnir mulestai da far ora ils quens. Mo en stiva entscheiva ei ussa da camifo.

Ils umens empau sils onns ein entuorn ina meisa e fan politica sur dalla stad vargada. Plirs ein dil meini da transportar las tegias «sél Cuelm» empau pli ensi; auters protestan. Il Giachen Martin dil scarvon vul far remediar la via dallas pegas ed era quella dallas petgas. Sin quei meini rispunda tut da vilau in ord la caschada dils «Signurs».

«Gl'emprem rugalai ils tetgs, tg'ins hagi selmains suscht en létg.» – Sin quella remarca dat ei ina hazra rueida e quei ch'in sa buc, recloma l'auter.

Vi entuorn in'autra meisa, sesa in'entira roscha «Magnancs». Els prendan neunavon la stiala da latg, in conti, in rispli e la buorsa. Els rugaleschan giu il latg, ch'ei han da ver ni da dar in a l'auter. Mintga crena cuosta tschun raps. Tgi che ha d'haver survegn treis raps e tgi ch'ha che maunca sto dar tschun raps per crena.

Il starler, ils pasters gronds e pigns ed ils purtgers sesan giu el cantun sper la pegna cull'onda Tina e sias mattauns e raquentan ad ellas il pli daniev e las pli bialas praulas ch'els san. Las mattauns pon rir da bien cor sullas storgias e stuccas dil purtger pign, Tgetgel. Per siu cletg s'el buca presents questa sera. Il Giachen Antoni Gader raschuna: «Quei di ch'il Giossi pign ei vegnius si a caschar, ha ei dau la detga cumedia. El ha cu-mandau al Tgetgel, ch'el dueigi ira si ella tegia dils Magnancs e dumandar il scutger grond da metter en il latg, pertgei ch'ei hagien buca curtès avunda. Ils Magnancs han lu detg, che sch'ils «Purs» hagien ch'ei catschi aschi dil gianter, sche veglien ei pia far quei survetsch – ed han cargau en il cucu e schau purtar quel giu tiels purs, mo han aunc dau ad el la cunzina da far avon ina viseta alla caschada dils «Signurs»: ed aschia ein quels chezers vegni da bastardar l'entira busecca.»

Sin quella historia suondan aunc outras pli legras: Tuttenina dat il paster grond ina menada al raschieni – ed ussa vegn ei dau la tecca ton da gries, che l'ureglia senistra da tut las casarinas han franc e seguir entschiet a schular. Il tema principal ei il resti da letg. Il purtger dils «Signurs» fa valer, che las mattauns dil Stèn hagien dau si uonn lenzeuls, ch'erien cuntschai tondanavon cun outras scrottas, ch'ins fussi mai vegnius ora tgei toc materia eri propri lenziel e tgei scrottas; la cozza dallas Mihèllas erien aunc mender; lezza veva alla fin dalla stad tanientamein scarps, che la damaun cu ei sede-stadavien, vegnevi il purtger grond per ordinari tras ina ruosna cul tgau, il paster pign cullas combas ed il signun culla bratscha. Propri sco'l peschs ella reit. Il madrat che las Mariuschas hagien dau si questa stad, eri schubers sco'l scussal da cuschina dalla «de pors» da Tschamut. Quei füss denton aunc stau ina; il pir seigi stau, che las miurs cartevien ch'ei retracti d'ina patgna grascha-nuorsa, ed hagien fatg pigliola enamiez il madrat. – Dils curtès tschufts e dallas sadialas cutridas, ch'enqual dils «Signurs» dettien si, seigi meglier da quescher; lezza descripziun savessi far render da gigin perfin. Quei ch'ils pasters pigns raquentan ussa dallas spisas, che mintga pur porta cu'l vegn si a caschar, gliez ei è buca tut hanau. L'emprema gada cul grond Madlainer ei vegnius si ha'l pertau ina termenta «petta cun uettas», mo els hagien tuts ensemen stuiu magliar da schluppar, avon che vegnir tier in'uettas.

Mo la pli gronda fiasta han ei giu culs tagliarins dallas mattauns dil Toni. Il starler manegia: «Tgei futra haveis vus otras e fatg lezza ga? In di beinmarvegl vegn vies bab da tegia en e di, che sias «buebas» hagien lu dau in bien solver oz. El pren neunavon in hazer mantun tagliarins ord la brenta e fa la remarca: per far vegnir pli buns els, ha la mumma dau vegn raps allas buobas, per schar cumprar e metter en uettas manedlas!» A nus mavan las sbabas bihurti per la bucca entuorn. Nus dein lu buca maufer vidlun-



En stavel

der; mo strusch dau ina laguttida, che tuts fan si ina tschera, sco sch'ei vessen la bucca plein – strighel. Vus stodas zeplas vevas mess en peiver enstagl uettas els tagliarins.» Quei ei stau ina fatala praula per ellas.

Mintgaton empiara ussa in ni l'auter, sche quels en stebli hagien buc aunc finiu. Mo lezs ein aunc fatschentai e perquei entscheivan ils Purs, Magnancs e Signurs en stiva in'autra fatschenta.

Ils Purs davos las meisas han finiu cun igl ulivar il latg e mettan en sac stialas e buorsas. Els han aunc da trer ora in cautegia per caschada sin la proxima stad. Quei dat all'entschatta empau da sestrer, pertgei che negin vul neu – e tuttina eis ei denteren da quels, ch'ein loschs sin quei uffeci.

Mo la fin finala reussesch'ei e tuts ei cuntents che quei ei vargau. Lu suonda zatgei pli delicat, zatgei ch'ein beinsavens stau il crap da scarpetsch da beinenqual segrida.

Ei vegn numnadamein tratg ord la capiala la caschada, che sto ira en Val Giuv la proxima stad. Ils pursanavels dall'alp Val Val ein enconuscentamein parti en treis caschadas: Signurs, Purs e Magnancs. Ina quarta caschada consista ord purs da tuttas treis caschadas e senumna «Bastardada.» Quellas treis caschadas consistan ord 30–35 purs. L'alp porta circa 180 vaccas. Pér ussa vegn ei propri tagliau pustretsch! Igl esch-stebli sesarva e neuaden stiva vegnan ils quintaders, che han giu da smaccar beinqual nusch. Els han buca mo giu da quintar o il quen dallas expensas; gliez fuss alla finala stau pipas, il pir ei co rabbitschar en pustretsch las entradas!

Culs pors eis ei aschia, che sin miatga duas vaccas ha il pursanavel il dretg da cargar in: quels che survargan in per duas, pagan in franc per piertg. Las midadas vegnan dadas sin mintga duas vaccas ina. Tgi che ha fatg dapli vegni pagau in franc per midada, e quels ch'han fatg memia paucas, ston pagar in franc per ga.

Cura che tut ei stau stediamein en quen, eis ei aunc vegni quintau ora, con ei tuchi sin mintga vacca e genetscha. Era per la marendan han ei tagliau en 15 funs pieun, diesch funs caschiel e 20–25 liters vin. Il Placi fa da saver ch'il quen seigi en uorden: «Nus vain quintau ora tge vegn sco suonda:

Genetschas 6 francs e 27 raps l'ina e vaccas 5 francs e 27 raps l'ina.

Tratg giu rubas e strubas restass ei lu aunc ain cassa in plé de 32 francs. Co dund'ju aun a mintga pastur il rodel, tg'el sappi con e tua tg'el hagi de tra ain. – E dal reminaint, spetg'ju sen propostas tgei pagliè a mauns culs 32 francs tge vonzan?»

Il purtger dils Magnancs veva daditg spitgau sin quella nuviala e cloma perquei tut dad ault: «Ussa main nus pel vin!»

«A da té duess ins dar vin anzau'auter, té ragner!» dat il Paul Mariusch in giap dentren. Mo spert sissu il Catriner: «Quai vegn dau pellas olmas, tge té bégn sappies!»

Ils biars denton, cunzun ils Magnancs, dattan ina scurlada il tinghelin e fan valer, che cun 10–12.– francs per las olmas fussi ina bufatga. Ei vegn votau – e quei meini peggia il pli.

Pér ussa vegn ei propri il legher. Il cautegia camonda als pasters da prender las brentas digl aug Toni ed ira vidoragiu tiella Maria Barla Muggli e far dar 20–25 liters vin. Ils pasters fan buca dir duas gadas e van cullas brentas, sco'l da Medel cu'l ei ius pil sulegl. Denton peina l'onda Tina il puschechn e sias buobas rasan tuaglia. Pil scarvon camonda gl'aug Toni da far in bien caffè, pertgei el hagi mal il tgau. Quei ei ver, mo tut che ri cul pauper scarvon da caffè. Igl ei ina tanienta mahoia glieud en stiva ed els dus steblis, ch'ils glas da vin pon buca tonscher. Perquei ston las femnas vegnir neunavon culas miolas bialas, ch'il hab veva purtau neuasi da Ligiaun in onn d'ina bona fiera. La mumma ei da quei nuota pli ch'inton cuntenza – mo la Catrina ha il bi quét da survir si en quellas bialas miolas da porzellan als mats dils «Signurs».

En tut ein ei tschunconta persunas. Era l'onda Tina e sias stupentas mattauns ston tener cumpignia. Quei tuts che pretendan: ils Signurs, Purs, Magnancs e Bastards. Igl emprem ein las buobas schenadas, mo ei va buca ditg, ch'ellas ein pli che contentas dad esser en quella legra sociedad.

Mo il puschechn da pustretschi ei persuenter veramein oreifers. Sin tagliors tarlischonts; vegn ei surviu ina pischada melna sc'in aur ed in caschiel fin plein rusneclas e d'ina colur «scu piun culau». Sin auters tagliors meins tarlischonts, mo tuttina sereins sco l'aua da Val Val, portan las femnas neuaden stiva entiras plunas talgias-petta e barbalada. Purschend ina detga talgiuna al purtger, manegia la Rosa: «Quell'ièda stus te speronza bétga schluppar de maglièavaun tgè vegni tier in'uetta!»

«Gliez depiand'aun, sch'i e bétg ain paiver?»

Sin quei suonda ina risada che las finiastras tremblan. Lu manegia il Vigeli dalla Tina Hoha: «Té purtgè pign, meritar meritasses té schagliuc nuét. Cons signals as té fatg giu questa stad sél Calmut? Nevétg, quai arda meglier tge la draussa! Té mu traffica usché vinavaun, epi sietta il militer giu té in dé.»

«Quels lo ben», rispunda il frestg mattatschet, «quels on avunda de sittar giu la crappa, numdir lagagier sélla gliut!»

Puspei ina legra risada.

Sin quei tenta il Sep Flurin, il paster pign! «Té tuler lo vigiu el cantun della maisa, a da té dess ins da mu aua. Cuntas ièdas as té schau ira las vaccas a magliè de quei dils tudestgs; té sas bèn tgei ch'ju manegia; ils ensolvers dils cotschens d'Ursera?»

Biars pon rir da bien cor; auters fan sco sch'ei sesmarvegliassen: «Udis, udis...?»

Il paster pign ei buca da penn e dat prompta risposta: «Vus Sep Flurin duvreibs nuéta selamentar pervia de gliez; sche vossa Crutscha – ladra – vess bétga magliau dals tudestgs, vessess vus franc e segir bétga tratg taunta stèra. Gliez mu cartai!»

Puspei risadas; il paster grond metta aunc vitier: «Bravo, petta pagada!»

Aschia vegn ei raquintau e ris e puspei ris e raquintau ad incuntin. Vonzeivi entscheiva il Rest Valentin dalla Gada a vegnir leghers e lu han tuts da far avunda mo cun tedlar. Denter bia bialas detgas e praulas, raquenta el oz ina reschnova, era per cudizzar in techet il caluster: «Ina gada ei la davosa dunschala da Putnengia vegnida fetg malsuna. Avon che murir ha ella cumandau, ch'ei stoppien satrar ella cun tut siu resti. Era las



Fumeglia d'alp

rintgas ed ils anials d'aur astgien ei buca prender naven. Ell'ei lu morta ed ils ses han fatg sco ella veva cumandau. Il caluster ha viu ch'ei han mess ella el vischi cun quellas custeivladads. La notg sissu eis el vegnius en santeri per cavar si la dunschala e prender igl ani d'aur. Cura ch'el ha vuliu prender quel ord il det, ha la dunschala tratg anavos il maun. Il caluster ha pigliau ina stermentusa tema ed ei currius ton sco'l ha pudiu a casa. La dunschala ei è levada si ed ida a casa ed aunc vivida bia dis ed onns.»

Tut che muossa interess ed il Rest Valentin dalla Gada rauenta e rauenta senza trer giud bucca. Tuttenina dat ei las dudisch ed in'entira partida seglia sin peis, svid'o ils glas e fa tschera dad ira.

Mo enaquella camonda il Toni allas femnas da vegnir cul caffè. E neuden vegnan ei cun termentas caffetieras da treis peis e ruoguns dil Vigeli hafner senza fin. Quels feman sco tgamins e derasan in fried da nuir. Capeivel che negin protesta pli encunter ina tala splendida hospitalitat. Gnanc il Testa buc, il purtgè dils Magnancs, che veva buiu bravamein vin e che schemeva buca legher mintgatton: «Mû Dius de miu vianter!» Il caffè ha denton scappentau il schani e fatg bein a tuts.

Ei dat l'ina ed ussa ha ei num ir a casa. Mo avon engrazia il cautegia dils Magnancs, il Lezi dil Farrer, en in cuort plaid, er en num dallas otras caschadas al Toni ed alla Tina – e fagend profunda reverenza – era allas treis frestgas mattauns, che hagien fatg honur oz a lur vegls. El plaidi segir en num da tuts ils presents, sch'el exprimi gia oz il giasch e la speranza da puspei saver tagliar pustretsch in'auter onn ella medema stiva ed en medema pasch e harmonia.

Cun quels plaids van ils pursanavels encunter casa, havend dau il maun agl aug Toni ed all'entira respectada famiglia.

«Mû sche Dius partgiri e sen savasai in'auter onn!»

# Suenter viaspras

Reminiscenzas ord la Val Tujetsch da Guglielm Gadola

Cumpariu en Glogn 1937

Remarca: Questa skizza cultur-historica havein nus secret sin fundament d'enzacons fragments da pader Baseli Berther p.m., che nus havein per part schau star grad eri e per part ligiau ensemens. Pli che la secunda mesadad havein nus sez cumponiu per arundar il maletg. Quella part havein nus assimilau tonsco pusseivel al stil da pader Baseli. Ella sefundescha sin notizias cultur-historicas ord la Val Tujetsch, che sesanflan ella Biblioteca romontscha a Mustér, sco era sillas notizias sur dil derscher chischner, che nus havein supplicau e retschiert da Felici Monn, Camischolas. Ad el engraziein nus era cordialmein, ch'el ha repassau il manuscret e curregiu il lungatg da Tujetsch, che nus savevan era «da bueb». Sco Muoth, raquenta era pader Baseli egl imperfect e perquei havein era nus raquintau il bia en quei temps.



Chischner

Oragiu sut il vitg Rueras stevan già daditg duas grondas plunas lenna. Ei mav'ussa encunter la primavera e sin las plunas era la neiv stulida. Ins veseva bein, che las cauras dil vitg havevan fatg savens cheu lur excursiuns d'unviern e ch'ellas havevan priu suenter quei che sigir e scursel havevan schau anavos egl uaul.

Duas hazras plunas, ina cun liungs, bials quaders e l'autra cun ina massa lattas da diversa grossezia e lunghezia. La lenna era veginida en digl Uaul Surrein. Da vegnir da Mila si havevan ils umens giu enzacontas ga miseria da far la storscha sur ils baghetgs, havevan gie quater quaders la lunghezia da 25–30 bratscha. Ultra da quei havevan ins aunc stuui bardeglar in bov avon il cavagl naven dalla punt entochen sil plaz. Ils quaders eran rauba verda, denton bellezia plontas. Ils buobs da scola han naturalmein buca targlinau da far lur viseta als quaders aunc quei di, ch'ins era vegnius cun els. «Grads scu ina candaila! Safermust, quei dat bials posts,» aschia tschintschavan els, ferton che mintgin empruava dad ir sin peis sils quaders dil petgen entochen sil bueli.

Quella lenna era restigiada per far in chischner. Dis ed onns steva cheu sin quei plaz, numnaus las Palius, in chischner cun quater posts, ch'udeva a divers vischins. Actualmein havevan art e part: Giachen Lurenz cun in eiferpiest ed in aunz, Hans Gieri cun dus aunzs, Tumaisch Madlainer cun treis aunzs; la pli gronda part udeva denton agl aug Meltger, atgnamein Meltger Degonda, che regeva e cumandava era il pli bia sur quei chischner. Quei era il pli grond chischner dil vitg. In cun quater posts fuv'ei aunc via-giu Rueras; in cun tschun posts existeva en Tujetsch mo ora sin Gonda; in cun sis haveva da gliez temps mo la venerabla claustra on Cons e fuva ina remarcabladad ella Cadi. – Mo tgei leis: claustra ei claustra!

En num dils proprietaris haveva aug Meltger giu dumandau la lenna sin vischnaunca; haveva cumandau cura e co pinar ella. E cura ch'igl ei stau da menar en la lenna digl Uaul Surrein, eis el era puspei staus gl'emprem; havev'el gie in fermezia cavagl ed aunc in pèr buns bos. Aug Meltger er'in um inschignus, plein forza ed adina da bien humor, aschia che tut steva bugen entuorn el. El cumandava zuar empau bugen, mo el capev'era e luvrava sez il pli bia e cun tala glieud ein ins alla finala adina cunts. Bunamein in miez tschentaner era il chischner veder staus cheu e fatg fideivlamein siu survetsch. El havess saviu raquintar bia; da buns e schliats onns da graun, da spigias grassas e spigias magras, da spigias verdas ed encagliadas, da spigias melnas sco aur ed era da spigias brestgas cun ruina. El havess perfin saviu raquintar da bunas e schliatas zerclun-zas, pertgei savens vev'el udiu quels onns co zenavs, spassadurs e schellis ses-chignavan cun segal e dumiec, ferton ch'els ruassavan e secavavan ensemes denter ils inter-lats. El havess saviu raquintar da bialas seras da glina pleina, nua che plunas miass eran rasadas ora sin ponns, nua che sliusas e carrs empleni cun monas spitgavan suten, nua che legras mattauns targevan si las grevas monas al bab, che vulvev'en quellas, mettend tgau e tgil denter las lattas, ferton ch'il tuor fageva sia usitada ramur. El havess era saviu raquintar dils paternos, gie da sogns rusaris gronds, che stauchels luvrers uravan aunc tard cheu ensemes, ferton ch'els caschinavan, engraziond Diu per la reha raccol-ta. Il chischner era vegnius invalids. Las lattas eran per part marschas, las cuas dils arei-sens smutadas e sils posts carschevan tscheu e leu bulius e mescal e quei era enzennas da vegliadetgna. Il caschinar era prigulus. Tier quei havevan dus posts aunc pigliau donn tier in vehement suffel ord la Val Mila gl'atun vargau, ferton che miass pendeva. Els eran sefendi; da sum tochen dem. Quei haveva dau la frida mortala. La decisiun era dada: «Nus stuain fa sé in auter caschnè. Quel co fo bétga plé!»

Odem gl'atun, stau finiu il scuder, eran ils proprietaris cun aunc enzacons vischins vegni ensemes e tratg entuorn el. Schon pervia dils tiers schai lartg havess ins stuiu far quei. Las lattas aunc duvreivlas eran vegnidias messas dad in maun en pluna; l'autra lenna cavegliada en muns tenor part dil chischner. Ins ha tratg la sort e cun temps e peda menau a casa per survir leu per lenna da brisch.

Gia duront ch'ins tergeva la lenna nova havevan ins giu endamen, schebein ins vegli far il niev per in pèr lattas pli aults, in da 14 ni in da 17; sch'ins vegli tschentar el in tec pli entroma pervia dalla Val Mila e cu ins vegli entscheiver culla lavour. Ch'ins surdetti la

caussa als dus principals meisters dil vitg, al Giusep Alexi ed al Caduff, quei secapeva. Basta, il pli datier ei vegniu schau sura tut agl aug Meltger, ch'era plenipotents. La fantschenta fuva els dretgs mauns. Sulettamein deigi el schar saver mintgamai in di avon, cu mintgin hagi da dar la spisa als meisters. Gidar ils meisters, quei deigi mintgin far schi bia sco el sappi e possi tenor mun, sche mondi la laver era ordamaun, ins spargni temps e daners.

Las lavurs dalla primavera eran ussa prest finidas. Tgei bellezia dis! La neiv mava cun ried dallas plauncas e spundas si. Sil calcogn suandavan da tuttas sorts flurs e pastg savurus. Ora si Tschuppina havevan ils Pauls schon schau ora ina roscha stiarls, che pasculavan pacificamein dallas plauncas Flurin en; ei era ils emprems, ch'eran i a mises e gudevan ussa pastg entir. Ina dumengia suenter viaspas a Rueras setschintschavan enzacons vischins avon baselgia, anzi sin in maun. Ei era ils proprietaris dil chischner giu las Palius. Aug Meltger relatava la caussa ed era dil meini d'entscheiver l'autra jamna; damaun, gliendisdis. Las lavurs dil funs seigien quasi a cantun, ils meisters havessien ussa la megliera peda e «nus vessen era pletost tiams de gida ussa.» Pli tard stoppien ins ir a mises, ad uaul; il temps vegni pli scarts ed ins fetschi lu era pli grond donn al prau.

Tut era d'accord, priu ora Tumaisch Madlainer. Quel haveva grad priu a mauns enzatgei in faner si Pardatsch, al qual il buff dalla lavina dalla Pulanera haveva dau d'entellir ualti clar, ch'el deigi far plaz ad in auter. Tumaisch Madlainer stueva far enzatgei suten e sprunar anenasi il sgurdinau e declara: «Als emprems dis sa ju bétga gida. Dantaun pervia-de mè entschavai curchi è, damé tuchi taunataun bétga schi biè, per posta de trais auns, scu ju a. La spisa sa ju da curchi è.»

Aug Meltger manegia: «Nus fagiain al meglier d'antschaiver ussa, té sas gida cu té as peida.»

Ils dus meisters, che fuvan era leu damaneivel e discurrevan culs vischins, vegnan clamaui neutier e dumandai, sch'els savessien veginr damaun, ei fussi ina buna jamna, ina jamna entira. – «Gie, gie ju sun schon cuntians, mu fagiai vinavaun», di Giusep Alexi, «ju sa bétga sta co in onn a mira sé per vus; ju a aun ampermez da biers, api munglass ju aun ira da cuoragiu.»

Caduff fuv'era cuntents, el haveva gie rugalau gia daditg sias buccadas prau; enzatgei truffels metti la sora aunc ora. «Scha vus gidais empau stedi, sch'ain ina bun'jamna duessen nus ventscher, schi fo mu in tec aura, tg'ins so luvra,» manegia Caduff.

«Cû sai» empiara Giusep Alexi aug Meltger, «vais pinau tier gl'urden?» «O, la lenna è schon daditg sél plaz a daplé drûv'i ben bétg, tégn ju, per in caschnè?» di aug Meltger. «Gie, gie; quell'uisa sai adina! Sch'ins vegn bégn marvegl è vut entschaiver, sche munglass ins aun segli miez in dé tscho e lo, per quai e tschai. Mirai tga segi lo quater bûras per tschenta sé als quaders, enzacuntas cuas per da novisé; a lura in per zapins, punachels ed ina resgia. Als amprems dis munglass i esser in pèr umens per gida sé als lenns e da crena; a lu mirai tg'enzatgi dosti las stialas. Quai son dantaun era las femnas fa. Vais fatg giu cûntas lattas metter ain?»

Aug Meltger manegia: «17 duessen fa, al veider o giu 20 e quai e stau memi aut, empau la quélda, tg'el suffel o pudiu muanta el.»

«Mû tg'ins sappi, perquai gl'amprem antschavain nus culs posts.»

L'auter di beinmarvegl mava Giusep Alexi tut da fiug dil vitg vi cun sia trucca si dies per serender sil plaz dallas duas plunas lenna. Ella trucca greva, che vargava siadora in bien ton il tgau, havev'el ses uaffens, scalpers, traders, ina banera e la sigir aulta. La resgiutta pareva siadora empau, ferton ch'il scussal da curom pendeva oragiu e deva cun sia fiviala da mesch tier mintga pass encunter la trucca. En in maun purtav'el la sigir lada ed en tschel la burtgetta cun igl asp. El haveva strusch peda da ludar Niessegner entupond las femnas, che mavan vi begl. Il Tschimun vegl, ch'encugniava in fassuir avon sia casa, ha el gnanc viu.

Per ventira haveva aug Meltger viu a mond Giusep dil vitg via e di siper sia dunna: «Giaavtschain, al Giusep vo schon cosé!» Meltger til'en beinspert siu tschiep-stuppa, pren ina sigir e cuora suenter.

Giusep haveva tschentau sia trucca d'in maun, envidau sia pipa cuorta e mava vidaneu per mirar nua tschentiar las buoras. Quei che muncava, mava el semplamein si e prendeva giud il burer ed ord talina da Giachen Lurenz; haveva gie quel era art e part dil chischener.

Buca ditg ed era Caduff arriva sil plaz; el fuva adina pli tempraus che Giusep. Ses paucs uaffens purtav'el sin schui. «Quai tg'ju a bétga priu, o'l Giusep.» Aschia quintava Caduff, cura ch'els luvravan ensemen.

En in dai stevan ils dus emprems quaders sin las supprias, fermai dad omisdus mauns cun fetgategns. El moni dalla sigir aulta haveva Giusep nudau en sias mesiras e currrend vida-neu, ha el prest giu miserau giu il pei dil piest e la lunghezia per «in de gissiat.» Denton fu'vera Gion Crisost daus neutier; haveva aunc stuui gidar a pver. El represen-tava e gidava en num da siu bab Giachen Lurenz. Aunc in per strihadas cul toc dalla buna cut da Giusep sillas sigirs e la lavur entscheiva. Aug Meltger deva crenas cun Giusep e Crisost era postaus cun Caduff vid tschei quader.

Ei era in bi mirar e tedlar co frida sin frida curdava, tut el tact, ch'ei rebatteva pil vitg entuorn e si encunter Crestas. La toccanaglia dallas crenas siglieva sin tuts mauns. Ferton che Giusep deva sco in asen, senza fallir ina solia suletta frida e senza dir plaid ni miez, haveva aug Meltger avunda da tener suenter, tier aunc fallir enqual frida. Ils dus auters da tschei maun luvravan pli tempradamein e sediscurrevan mintgaton sur quei e tschei.

Aschia han ei luvrau e barhau tochen vi encunter las siat. Cheu ha in affon d'aug Meltger clamau da solver. Senza far ditg ceremonias ein ils dus meisters serendi cun aug Meltger tiel solver. Per Crisost haveva mumma Mengia era pinau zatgei.

Dunna Meltger, la cumar Castgina, havevan pinau sin meisa ina cazzetta put cun in lag pieun suren, nua che mintgin saveva aunc bugnar en il tschadun, sch'el leva, avon che spedir vinavon. Sur e sut la cazzetta steva in cup latg freid entir, ch'ins saveva prender

tier. Dentuorn steva carn criua en diversas sorts, paun e caschiel senza spargn. In grond pecli «bruda da tgarn» per dar suenter sco da cauld, spitgava sin pegna.

Ils dus meisters sisum la meisa, il fumegl grad speras, aug Meltger d'in maun sin la sup-pia dil «bab», visavi ils treis buobs suenter grondezia e vegliadetgna, giudem la mumma e sper ella las duas buobas, cotschnas sco rosas. La «pintga» haveva giu rasau tuaglia e mess ora pulit a mintgin siu tschadun e cunti.

Tuts stai secavegliai, ha aug Meltger entschiet dad ault il paternies: «Bab nos...» che tuts han recitau ensemblamein tenend mauns a Diu. Alla fin ei aunc vegniu mes vitier: «Segner, benedescha spisa e bibronda, ch'ella vegni sanctificada entras ils merets da Niessegner Jesus Cristus. Amen.» E la sontga crusch.

«Ussa prandai scu i è a sesurvi senza fa d'anvida. Tgi che lavura dai magliè,» manegia aug Meltger. Il bien appetit dils luvrers ha fatg tutta honour alla cuschiniera gia bein-marvegl. Denteren vegnev'ei discurriu e cungiu la tschavera cun bein enqual sgnocca. Giusep era dalla luna e raschunava denter en el lungatg da «quoragi», dils da Schlans, dils da Vrin, da mistral Lombris, nua ch'el era dapertut staus a luvrar. Quei plascheva als affons d'aug Meltger ed els tedlavan oz sco lieurs cun bucca rienta. Caduff raquintava bugen sco adina, da siu mistral Vetger d'Andiast, nua ch'el era staus in per onns migiur. Schon il plaid «Vetger» plascheva buca mal als pigns.

Stau finiu il solver e furschau tschadun, ha il bab da casa puspei entschiet il paternies, nua ch'igl ei aunc vegniu mess vitier: «Engraizius e ludaus... in paternies pellas olmas... salidaus seis ti bien s. Giusep...» ed il De profundis. Suenter ei puspei mintgin serendius vid sia lavur. Aug Meltger ha aunc dau sias ordras al fumegl ed als buobs entochen miezdi ed ei lu era ius puspei vi las Palius.

Cheu ei la lavur ida vinavon senza negina pausa e senza negin refrestg entochen las endisch. Tuccond da miezdi han ins calau agrad giu cun la lavur ed aug Meltger ha entschiet igl Aunghel da Diu. Prendend giu la capiala e sepusond encounter ils quaders ei vegniu recitau igl Aunghel dil Segner. Suenter han ins luvrau vinavon. Denton buca ditg ed ei vegn clamaau da gentar.

Cumar Castgina haveva giu mess si la vanaun. In hazer pecli suppa da carn cun ina biala cozza melna e buccadas paun suravi, ferton che fava e giutta sesanflava ella profunditat, fimava gia sin meisa, cura ch'ils umens ein dai dad esch en. En cuort steva puspei tut davos meisa, mintgin en siu plaz. Suenter la suppa ha ina gronda scadiala cun da pliras sorts carn e suren il taglier da lenn, occupau la meisa. Aug Meltger ha tagliau si cun siu agen cunti empau per uisa: dallas costas, dil calun caura, dalla missiala, dalla rempia, dil manetsch e tschentau tut amiez meisa, che tut ha pudiu tonscher. Sur e sut steva ina scadiala truffels e ruclas barsadas, nua ch'il pieun culava aunc clars e bials pil funs entuorn. La mesada haveva bien appetit; far schit munglav'ins era buca far tier aug Meltger; ei era cheu tut en abundanza. Da gentar er'e'i vanzau aunc bia carn; il spinal cun rassa havev'ins gnanc snizzau. «Quel magliain nus zèra fraids» manegia Caduff. Aug Meltger teneva en sia famiglia bia sin latgira, «sén quai della vacca», sco ei havevan per moda da dir. El mazzava mintg'onn ina mesa vacca, dus pors ed ina partida tiers



manedels. Ord casa vegne'vei vendiu nuot, denton era cumprau nuot, priu ora gala e guotas. Empau ris e castognas pertava el sez, cur ch'el vegneva dalla fiera da Ligiaun, nua ch'el mava adina sez cun sia roscha stiarls. Dil caffè, ch'entschaveva grad a vegnir si da quei temps en Tujetsch e ch'ins magliava aunc cun tschadun ord peclis, leva el saver nuot.

«Quell'aua da saleps, vi ju nuéta vai ain tgèsa», schev'el, sch'enztgji raquintava e ludava quella nova triacca. Sia dunna mav'era d'accord cun el ed aschia era sia famiglia sauna, frestga e cuntenta. Il docter

havev'el era aunc mai giu en casa dapi ch'el era maridaus e quei leva tonaton dir enzatgei!

Furschau tschadun e detg paternies, tut ch'ei iu puspei frestgamein vid la lavur. Entuorn las treis ei vegniu purtau enzatgei marendà schetga sil plaz, paun e caschiel e per tgi che leva «alv» en ina brocca. Ins ha luvrau entochen da brin. Culla lavur havevan ins dau ina buna entschatta. «Schi vo mintgadé quell'uisa odamaun, scha pudain nus manaivel ventscher tocca sonda», manegia Giusep. Ins ha cavegliau empau ensemens ils uaffens, envidau si las pipas e sediscurrend ein ins serendi plaunsu e plattamein tiella tscheina. Ina brava cazzetta bugliarsa e dus peclis fermentins sin meisa han beneventau e cumentau oreifer ils staunchels luvrers.

Duront la tscheina ha Caduff puspei raschunau dil mistral Vetger, ord ses dis ad Andiast. «Lo veva ignèda in ampau de signur, ins scheva di el «Martgun», quel veva in fumegl da Sursaissa tudestga. Dianter ain scheva quai Martgun savens di fumegl: «In bien fumegl duess saver pver dus, treis dis cun nuegl cauld.» «Ei po schon esser, scheva il fumegl e tertgava, té mu spètga! – Ils firaus da Nadal eran notier. Co o'l fumegl dumandau al patrun, sch'el schassi bétg'ira a tgèsa quels firaus. «Bein, bein, Vus mo moi, jeu vi schon rugalar ils tiers quels dis.» «Ils tiers vev'el sé liunsch, sé ain ina aclà; al fumegl veva schau anavus bétga tec fain ain clavau. Martgun o stiu fa vegnir umens e purta sé fain, tg'el vagi de parvai quels dis, perquai tga mida nuegl mavi bétga quels dis.

Cu'l fumegl e turnaus o'l manegiau, tg'el duevi taunataun di pervia del fain avaun ch'i a tgèsa. «O, els han detg savens, ch'in bien fumegl sappi pver in per dis cun nuegl cauld!» Sianter vagi Martgun mai raquintau plé dal bien fumegl.»

Giavischond la buna notg ein ils meisters serendi a casa, ferton che la famiglia d'aug Meltger ha aunc giu da far entginas pintgas lavurs en casa. Stau encunter mesa las nov ei vegniu detg communablamein il rusari ed ils «paternos» e lu serendiu a letg per rimnar novas forzas pil di vegnent.

Sco igl emprem di, aschia ein era ils auters dis vargai oragiu las Palius. La spisa als meisters vegneva dada en roda, sco ei tuccava tenor part dil chischner. Aug Meltger era quasi tudi leu sil plaz, schegie, ch'el fuss buca staus obligaus. Suenter dus dis eran ils quater posts e la mesadad areisens dulai e fatg ora las ruosnas e las buccas. Las lattas eran buca grad grossas ed ei mava spert cul dular; beinenquala stuevan ins dular mo sin dus mauns. Da far ora las ruosnas els posts, haveva Giusep in agen inschign. El fageva ora quellas tut mo cun la sigir aulta, strusch ch'el havess falliu zacu ina frida; en duas, treis minutias tagliav'el ora ina. Caduff luvrava cheu cun scalper e banera e quei mava bia pli ditg; denton dev'ei magari pli biala lavur. Giusep era meister numero in per purs, e siu ideal era: «Lenn e mo puder luvrar!» Caduff fageva sias caussas tut pli temprau e tertgava, quei ch'ins ventscha buc oz, fan ins damaun. Basta, ei era dus differents temperaments, dus originals ord il pievel, mo igl original da tut ils originals fuva il Caduff e quel meretta pilver, che nus considereien el in tec pli datier.

Meister Giachen Fidel Caduff, dils vischins numnaus semplamein: il Caduff, era in mat vegl, cuort, cun buna stgeina. El steva sisum il vitg, sil Crest cun sia sora en stiva dadens. La lavina da 1817 haveva ruinau la casa da ses vegls vin Suloms ed el era setratgs ora sil Crest. El haveva enzacontas bunas buccadas prau a Dieni ed a Cadentschuns, nua ch'el possedeva era ses baghetgs. Sper il fallun haveva el in pign curtin ed ina buccada nuegl per vischinar, segiramein aunc suloms, che la lavina haveva schau anavos. Sia envernonta era per ordinari ina ni duas vaccas ed ina mugia cun enzacons tiers manedels. Mises havev'el buc. Primavera e stad gudeva el pastira da casa. Savens mav'el cun ses treis armauls vin Tschuppina e schava magliar sin vias e chinettas. Schit, snueivel schit fagev'el cun ils tiers. Da magliar dev'el detgavunda; el haveva perquei era ils megliers tiers en vischnaunca. Ses tiers, pigns e gronds, havevan bugen el ed enconuschevan el gia da lunsch. En in sac dil libroc havev'el adina in tec sal, ch'el schava litgar denter en. «Puscha, puscha, ni tschutta, tschutta» ed ils tiers vegnevan suenter ad el, nua ch'el mava. Mai ch'el havess duvräu in fest; sil pli ina buccada torta, denton plitost per haver enzatgei entamaun, che per duvrar. El tschintschava bia cun ses tiers ed els enconuschevan e capevan sia vusch.

Tier la zavrada da nuorsas steva Caduff cun sia sora sper la geina e clamava: «Tschuttas, tschuttas!» e per smarvegl da tut il pievel, sias nuorsas vegnevan tuttas neutier. La presa sal ord il sac dil libroc muncava naturalmein è buc. Ils buobs sesmarvegliavan buca pauc. «Vaises tema da Diu a fagiai schit culs tiers, scu'l Caduff, sche fon i e bien cun vus», aschia admonevan las mummas lur buobs avon che schar ir a mises.

Caduff saveva, ch'il latg ei il meglier nutriment pils vadials. El scheva perquei tetar els schi ditg e schi liung sco ei levan. «He, gl'auter, quai è enzatgei natural, cun nuét vegn

i nuét», fuva sia clara filosofia. Quei deva denton en cuort temps vadials sco mugias, ch'el dumignava strusch. El metteva perquei in vadi silla medema punt culla vacca, rentava cun ina comba e schava il sughet aschi liungs, ch'il vadi saveva tetar cumadeivlamein e da tuttas uras. Aschia havev'el era neginas miserias cun menar vidaneu. Aunc tard la primavera sin pastira tetavan ils vadials las vaccas e perfin ils buobs fagevan curvien e relatavan quei a Caduff. «He, gl'auter, al pupratsch so mû teta, sch'el o de basegns,» fuva la risposta.


Ina gada ha Caduff giu disclelg cun in vadi. El haveva schau tetar quel pli che detgavunda. Vulend alzar quel sugl esch dil camon enagiu, ei Caduff daus cugl esch sul vadi en e schluppentau el. Quei ha giu irritau empau el, e per cuvierer in tec la historia, schev'el: «He, gl'auter, da quella sora vess ins è mai enzatgei agid!» sco sche la sora fuss aunc stada la cuolpa! Era culs anseuls havev'el commiseraziun. Il buccari consideravel per ina veritabla barbaria per quels paupers tierets, che fa ch'els san strusch ni beiber ni magliar. «He, gl'auter, i calan schon sé cu i è las uras.» Mo persuenter veva el era las pli grondas e bialas cauras dall'entira vischnaunca.

Caduff discurreva bugen e bein. Prescha haveva el mai; fageva tut cumadeivlamein ed era adina cuntents, pli che cuntents. Tgei vul ins e tgei drova ins dapli sil mund? A pèr cun el mava e steva adina sia sora en tuttas lavurs. Entupav'el enzatgi, sche vegnev'ei discurriu empau. La sora steva in per pass anavos e fageva il bia caltschiel, ch'ella pren-deva adina suenter. Perquei numnava Caduff sia sora savens: «Quella dal fil!»

L'entschatta ni l'introducziun da ses raschienis fuv'adina: «He, gl'auter.» El treva in bien hollender ord ina scatla aulta, ch'empleneva grad ora tschei sac dil libroc. Generusamein partevel ora las presas. Discurrent ni mond entuorn, teneva el ses mauns il bia si dies en crusch.

Sper sias lavurs dil funs e cun ses tiers, mava el empau suenter siu mistregn da meister, denton grond hers havev'el mai. Temps d'unviern pegliav'el uolps; tendeva sias fallas principalmein sin ils buntaduirs da Dieni. El fageva quei plitost per divertiment che per far daners. Ed el capeva buca mal. Per ordinari mavan las uolps cun la falla tochen avon tauna. «He, gl'auter, oz vai ju puspè ain ina; sa bétga nua l'è samanada. O Candentschuns vessi semegliau fastitgs.» La sera raquintava el lu liung e lad als perveseders da Dieni, nua el hagi anflau, co el hagi sturniu e fatg giu ella. «He, gl'auter!, quella lev'ju atgnamein nuéta pagliè; quella lev'ju schè razza.» El teneva buca pauc sin siu inschign da pigliar uolps e sch'in auter pigliava era ina gada ina, sche fuva el buns da dir grad en bucca: «He, gl'auter! quei è franc stau ina tschocca!

Turnond ina gada cun ina tala neu da Tschuppina, eis el vegnius cun quella a Dieni si en stiva, nua che las femnas filavan, ha bess ella a mesa stiva. «He, gl'auter, puspè 5, 6 francs. La sora co via so aunc ditg mana la staila (roda) tocca lo taun! Nua sè Duri?» E lu ha el entschiet a raquintar ses eveniments egl uaul Tschuppina, aschia che las fem-



La lavour da caschinar

nas han survegniu ina completa idea, co ins stoppi ir suenter las uolps. «He, gl'auter; quella da tschai dé o quella dal fil gidau a fa giu ad o rut giu la cua. Savai son las fennas taun scû nuét. Dantaun ju a cusiu cun in fil, tg'ini encorgia nuét plé. Per vender fuss quai schagliuc aunc donn.»

Era il temps da mezga neutier el vischinadi, sche stueva Caduff gidar tscheu e leu a catschar il cungi a tiers gronds. Quei capev'el puspei sco buc in auter e gidava bugen, naturalmein senza schar pagar enzatgei. Engraziavan ins ad el persuenter, sche scheva el semplamein: «He, gl'auter, porta bêtga no, quai è ju ain ina,» deva ina presa e mava puspei per siu fatg.

Caduff capeva era bein da pigliar talpas. La vischnaunca da Tujetsch ha stuiu far ina veritabla uiara per vegnir sura dils immens donns, che quellas fagevan als pli bials praus dalla vallada. All'entschatta haveva la vischnaunca decretau 50 raps per mintga exemplar e schau sura da pigliar a tgi che leva. Ei vegneva pigliau bia, cunzun era dils buobs, che vegnevan quell'uisa era tier enzatgei finanzas per parter quellas cul «Gambun».

Mo ei gidava tonaton buc. La vischnaunca ha stuiu pladir cun buna paga in agen talpè per ina troppa d'onns, che ha stuiu luvrar cun tutta forza per vegnir suren a quella razza dil huz. Ferton ch'ins veseva pli daditg ils megliers praus plein mantuns da talpas, aschia ch'ins saveva beinduras strusch metter en faultsch, ha quella miseria tonaton calau si ussa per la gronda part, suenter in combat da 20 onns e varga. La vischnaunca mantegn zuar aunc adina in talpè, mo ins observa ussa quellas mo si dad ault ed en discreta quantitat. Sillas scolas vegn ei perorau bia sur dil grond nez dallas talpas; che la talpa seigi in ton nizeivel tieret. En Tujetsch negin che crei quei!


Basta, Caduff ei sefatgs meriteivels per la vischnaunca cum pigliar talpas. El fageva zuar era quei plitost per recreaziun, che per far fatschentas. El pigliava gl'emprem en ses praus, denton era bugen a vischins, che supplicavan persuenter. «He, gl'auter, ju a cun ignèda giu ella; ju a tendiu sianter giantâ a dallas quater, cu ju sun jus speras ora, er'ella schon ain; l'era aun viva.» El tagliava mintga ga giu la cua, metteva quella el sac dil libroc sut la scatla en. Cun caschun mussava el quellas al Stoffel, ch'era dis ed onns ora tierz gerau e che haveva, sco persuna ufficiala, da scriver si las talpas che vegnevan pigliadas. Da S. Martin vegnev'e pagau ora dalla vischnaunca. «He, gl'auter, tscho sas puspè nuda se quellas traïs.» Stoffel prendeva las cuortas cuas cun tschera da magistrat, nudav'en e spedev'ellas en in liug meins enconuschent, schon pervia dils buobs; als quals ei mava beinduras bia pli lev d'encurir cuas, che da pigliar las talpas sezzas.

Firaus e dumengias suenter viaspras deva Caduff bugen in scart troccas. Denton era cheu plitost per recreaziun che per pissiun, schegie ch'el saveva magari sescaldar el giug, cunzun cura che sia partida perdeva. «He, gl'auter, quai e miu sulet divertimain!» Tumaisch Huonder, in bien e beinvesiu vischin, steva orasimum il vitg e fageva ustria, tier haver aunc ina stizunetta dallas caussas las pli necessarias. Cheu tiel Huonder, sco ins numnava el semplamein, seradunavan plirs vischins suenter viaspras. Ei era tut umens sils onns, giuvens mai ni fetg darar. Ei era atgnamein buca per spender daners ni per beiber; il motiv era plitost per seruschanar e per sedivertir e s'instruir. Era «ils dadora», certins da Zarcuns e Camischolas vegnevan en bugen tiel Huonder. Per esser anavon cul temps seradunavan ei a Rueras schon da viaspras ed havevan persuenter il privilegi dad ira «sill'orgla».

Ei vegnevan pia ensem ena venerabla, emperneivla cumpignia cun lur pipas cuortas cun spel grad ed ils biars cun lur capetscha liunga da seida nera e la miserocla grossa. La capetscha seida era moda da gliez temps e zuar ina biala, che deva ad in um in agen respect. In um ni in giuven, che haveva buca ina capetscha seida, quintav'ins strusch per um. Firaus e dumengias suenter viaspras, miezfiraus, sin radunonzas da vischins e pustretschs, ni lev'ins ira la sera en ina casa ed esser tschecamein vestgius, sche purtav'ins la capetscha seida. Sez ils augsegners da Rueras pertavan da lezzas uras la capetscha seida pil vitg entuorn. Las biaras da quellas vegnevan dalla fiera da Ligiaun, custavan 5–6 francs, ina e tenevan cun far schit ina vet'ora. – Ozildi ei quella biala moda totalmein svanida ed igl ei da deplorar.

Persuenter vegn ei ussa pertau da tuttas sorts fuormas, importadas da tuttas parts dil mund, aschia ch'ins sa strusch nua ch'ins ei pli.

Caduff muncava darar en quella cumpignia. El deva bein troccas, in dils megliers; mo pauper siu camerat, sche lez steva anavos ad el e sch'ei sperdevan. Ei era cheu duas entochen treis meisas, che devan troccas. Ils auters vischins sesevan sils bauns, miravan tier e sediscurrevan. Duront il giug vegnev'e darar, darar tschintschau enzatgei dils giugadurs, sil pli spluntau. Era il giug finius, sche buevan ins in sitg ed ei suandava la



critica, savens seriusa discussiun critica. «He, gl'auter, vesses té bez la femna avaun, sche vessen ai fatg bétg in sté plé. Ju veva scartina da bastuns. El narr duevas té bétga better schi glaiti, sche savevas té spindra tiu tgavai. Il retg de cuppas duevan nus pudai tier, ju veva scart sen cuppas. Sch'ju vess aun giu duas troccas da plé, sche fagevan nus manaivel sé als nos. Té duevas metter anzatgei ail scart. Quai tg'ju veva, er ail funs; l'emprem'ièda sai stau giug da Meidel, fertaun tg'el Stoffel tscho saveva schon rametter. Fagevas «autras» la secund'ièda, sche bettevan nus ain. Cavegl' ansiamen empau api dain nus nuf quel'ièda!»

Aschia tunav'ei vi e neu e la critica era interessanta. Treis ga entuorn e la partida che perdeva pagava ina mesa vin. Quei fuva tut. Suenter in pèr uras mavan ei puspei a casa, ils biars havevan giu in bi divertiment, eran stai da schetg e gnanc stuivu prender ora la buorsa.

Giu las Palius mav'ei vinavon, ch'ei fuva in plascher; per ina fagev'ei ina aura narra e per l'autra tut «las parts» che gidavan, aschia ch'ins saveva quintar da «derger caschnè» dumengia proxima. «He, gl'auter, scha quai co va vinavaun usché, sche vain nus finiu avaun la sonda», manegia il Caduff envidond si plaunsiu e plattamein sia pipa.

«Té Caduff, manegia Giusep Alexi, savessas forsa serra giu las tschetschas, tg'ju a pinau tier eir sera.»

La tschetscha ei numnadamein quella part, che varg'ora il piest da mintga vart e che vegn serrad'en dallas lattas.

Sustenius dils vischins e dils proprietaris dils aunzs, fageva Caduff quei ruasseivlamein e cun saung freid, sco sch'el fagess scart dus honors. Aug Meltger e Giusep Alexi devan aunc enqual davosa miserada: schebein las tschetschas seigien buc'ina pli lada che l'au-

tra, sco era ils «interlacs». Tut che mava fil-filau, sco sch'ei füss miserau cul millimeter. «He, gl'auter, igl Alexi fallescha mai, gnanc pel nair d'in'ungla betg», manegiava il Caduff, vesend ils dus a miserond. Da mirar da tier stuevan tuts dir, ch'ils dus meisters da Rueras havevan fatg ina lavur en tuts graus scoiauda. Tgei agen ed interessant bughetg, ch'in chischner ei schiglioc! E cheu schischeva in per tiara, per liung e per lad e fuv'ussa ton sco finius.

Il pli fin e bein parevan ils quater posts d'esser luvrai. Quei ei quater bellezia plontas, grossas giufuns sco pulitas buoras, mo che vegnan vargond si successivamein pli e pli satellas, exact sco ellas creschan egl uaul. Ils posts ein la part principala dil chischner; quels tegnan agradsi el. En quels fan ils meisters ruosnas da sum tochen giu aschi dus meters sul tratsch. Atras quellas ruosnas vegnan las lattas catschadas; tenor la lunghezia ed ils posts dil chischner ein quellas savens d'ina termenta lunghezia. – In chischner mo cun dus posts (in eifer) numn'ins «ina giaina» en Tujetsch. – Quels aschi pigns vegnan denton erigi il bia encunter ils clavaus e senumnan allura era «talina». Ils lenns (2 ni 3), che tegnan a bardun ina talina dalla vart ch'el ei fermaus vid il clavau numnan ins «tgauns».

Ils chischners da treis e quater posts, sco il nies dallas Palius, han ils posts aschi in meter e miez tochen dus in'ord l'auter. Tier tals chischners vargan las tschetschas ora ils posts per circa miez meter. Las lattas ston esser lenna tagliada, schiglioc targess ei en l'aua e smarschentass en buca ditg il lenn; il medem val'era pils areisens, ch'ein fatgs per tener il chischner agradsi; era quels ston esser lenna grossa e liunga. Per esser complets han ils chischners era in tetg – e vi da quel luvravan ei ils davos dis giu las Palius. «He, gl'auter, ju less mû di taun, tg'in caschnè scu quei co, son ins i ad encuri tochen on claustra!» E gl'aug Meltger sissu: «Ussa tg'ins veza el co bunamain finius, stu ju era di, tg'el seigi propi ferms a greivs. Da mé par'ai tg'agl aifer-piest dal veider eri bétga schi lads, scu tier quel co (eiferpiest ei il spazi denter dus posts); per consequenza en'als aunzs plé cumadaiveis da caschinar.»

Per Giusep Alexi, ch'era vid il finir a trer tetg, fuvan quels plaids ord bucca d'aug Meltger, sco mèl, pertgei che lez striblava cun nuot pli fetg, che cun ludems. El aulza il tgau, stat sidretg e di agl aug Meltger, mo era per schar udir las outras parts: «Ju sun ampau sels onns ad ha fatg biè caschnès, era da quoragiù, mû in cun lenn scû quel co savais vus ancuri. Quel vai ju schon fatg tg'el tegn. El veider e staus dalla bial'antschatta empau de leivs, parquai o'l buff della Val Mila e pudiu sdarna el bunamain.

Mû quel co garantesch'ju tg'el tegn vetas de gliut.»

«He, gl'auter, fa ussa il Caduff, envidond pacificamein sia pipa tut agrado, «quel co la aun pasantar enzatgi! Ju sun dal maini tge mû nus da Rueras vagnin nuéta her. Dantaun suppon'ju tga vegni nodain dumengia ina partida dals «dadora» a viaspas. Lezs on bravas vuschs ad e bratscha scû pals-fier.

Ussa havevan els aunc da far las davosas lavurs: schubergiar ensemens stialas, toccanaglia da lenna, burels, scorsas, uaffens e giavel a quater. Havend fatg quei, mavan els

plaunsiu a sediscurrent encunter il vitg a tscheina. Els fuvan cuntas da haver pudiu en cun las davosas lavurs suentermiezzi vi, avon ch'ei fetschi da brin.

Tgei bellezia dumengia! Propi ina dumengia da matg senza macla; lunsch entuorn buc in nibel en tschiel e dapertut ina sontga ruasseivladad, sco sche Niessegner sez mass tras nossa biala Val Tujetsch.

A Rueras ha ei tuccau da viaspräs e tut ch'ei iu stediamain, umens e femnas, mats e mat-tauns, sco era ina roschada buobanaglia. Ils «dadora» ein era neuaden entirs trops, cun-zun ils da Zarcuns. Els han priu plaz sil'orgla e gidan a cantar tenor meglier saver e puder. Il Caduff era staus la sera avon vido'ls Plauns Zarcuns e tendiu enzacontas fallas, pér suenter tscheina, e cun quella caschun fatg da saver ad enzatgeinins, che damaun suenter viaspräs vegni derschlu chischner giu Palius ed ei füssi schon surviu, sch'ei vegnessi neuaden ina partida tafers umens per gidar. «He, gl'auter, i è in dels gronds ain vischnaunca ad i füss schon gidau, sche nus füssan 40–50 umens per da'l damogn.» Susteni dals «dadora» han ils da Rueras cantau frestgamein il «magnificat», cun lur enconuscentas vuschs sonoras, sereinas, ed havend il sur caplon strusch dau la benedicziun, entscheivan ils buobs enasisum a sezappitschar per ira giudora. En aquella sesaulza aug Meltger enasi miez ils bauns e semanond encuntar ils umens, di el cun vusch franca e segira: «Quels umens vegnan supplicai da vagni pa l'amur da Diu a derger sé il caschnè giu las Palius. Ins vegn supplicaus da vagni stedi, parquai tgè in greif da quater posts ad o sé tetg.» Suenter haver detg quels plaids sesvida l'entira baselgiada – pli dabot che d'ordinari. Ils buobs van quei ch'ei mo pon trer la comba tras il vitg per esser ils emprems sil plaz. Havend dau ina raschunada avon baselgia, entscheivan er ils umens a serender discurrent e riend giun Palius. Arrivai sil plaz, controlleschan zacons schebein ei seigi avon maun sufficien-tamein aissas, cuortas e liungas, sco ei drova. «He, gl'auter», manegia Caduff, «ju crai tge nus dumagnien; nus essan co curonta a vain era tut gl'urden tge druva!»

Sper mintga post sepostan ussa dus umens, mintgin cun in pal-fier, per spurunar ils posts ch'ei mondien buca suto. Giusep Alexi seglia entuorn, sc'ina miur en pagliola e parta giu ulivamein las aissas sillla ladezia dil chischner. Havend el aunc dau in'exacta controllada, ch'ei seigi tut per uorden ed era umens avunda sil plaz, clom'el malpazien-tamein: «Scheia ussa lain nus entschaiver; tgi vut da vusch?»

«He, gl'auter, di Caduff dabot sissu, ju managias gl'aug Meltger; lez o'ls biè dretgs ad o era la megliera vusch!»

Sco sch'el havess spitgau sil commando, stenda aug Meltger il culiez, e camonda cun vusch ferma ed entelgieivla: «Scheia, ussa sapinai!» Ils umens ein attents in e scadin, sco'l giavel silllas olmas ei mintgin pinaus en siu plaz per liung suenter il tetg e da min-tga vart circa mesa lunghezia suenter la tschetscha. –

«Hooo...dai!» cloma uss aug Meltger cun vusch imperiala. E sco sche sia vusch havess la patenta sin miraclas, sesaulza il chischner per circa in meter ed otgonta or dalla tiara. «Uss aun ina sfurzada: Hooo...dai!»

Gianteren tgei forzas dad uors! Il chischner va puspei per ca in meter egl ault. «Uss ain callas aissas cuértas!» grescha il commando e sin ses plaids omnipotents vegn il chisch-



ner ussa spuranaus da mintga vart dils posts encunter ina latta cun aissas da dus meters e miez entochen treis. Pli ad ault encunter il tetg tegnan 4–5 umens vid in'aissa spuranau aunc aissas pli liungas da circa 4 meters, per saver stuschar, sin commando pli ault il chischner.

«Hoooo...dai!» grescha aug Meltger danovamein. Ed il chischner sesaulza puspei in bufatg toc. Da vart seniastra eran ils umens anzi pli fleivels ed il chischner ei restaus per circa miez meter anavos. Aug Meltger vesa quei e dat immediat igl ulterior commando: «Vus aintadem lo, essas bétga vagni sianter a stuais aun da ignèda mû vus! Sapinai! Hoo... dai!»

En aquella va el cun forza ad ault, schizun empau da memia, pertgei quella ga vev'il Caduff dau ina stoda sfurzada da vilau ed aunc mess vitier: «Hè gl'auter, in patagner eis té schon, mû ceder cedin nus mai.»

Stend tut grad eri, van circa la mesadad dils umens naven e vegnan neunavon cun aissas da 5 meters ed il chischner sesaulza puspei sin in recent commando. «Uss ain cun araisens, mû gl'amprem mirai tga las aissas saien bégn sprunadas!»

Plirs umens sedrovan da purtar neutier dus, treis areisens. Davontier vid il tgau, q.v.d. vid la bucca digl areisen tegnan dus, treis umens spuranau in'aissa ed aulzan cun quella igl areisen egl ault. Treis umens, in per areisen, van ussa tut alla bahutta dallas lattas dil chischner si, mintgin cun in terschiel e sepostan el liug nua ch'igl areisen vegn tschentaus en. Essend sin lur posts, vegn la cua digl areisen alzada mordio egl ault, per rabbitschar igl areisen ella latta. Quei reussescha oreifer, sco da metter igl effel ell'onzza. Mo

ussa vegn el aunc fermaus cun in terschiel per megliera segironza. Ils areisens ein bein fermai ed ussa seglian zacons umens neutier e catschan en mintgin da quels in punachel oragiudem; quei fan els per saver tschentar encunter quel in'aissa, sinaquei ch'ils umens sappien tschappar da stuschar. Ils areisens ein en e stattan en! La laver prigulusa e principala ei fatga; mo aunc ina stuschada, speronza ina buca memia da vilau ed il chischner ei derschius sidretg.

Aug Meltger ei loschs sin siu commando e dat las davosas ordras: «Hoo...dai!», mo grescha lu immediat sissu: «Mu plau! Calai, calai!»



Ussa rest'ei mo aunc dad ira si culs auters areisens. Giachen Lurenz, Hans Gieri e Tumaisch Madlainer laian ora tut ils cups. Els cangan mintgin in areisen cul tgau sil schuvi, van d'ina scala si e suenter dallas lattas si sco stgirats, ferton che 4–5 umens han pigliau scadin dils areisens per la cua, dont suenter ton sco i pon. Giachischoras en, co'l Hans Gieri ha oz caschun e vanagloria da manifestar sia fermezia! El va cugl areisen sil schui vi e dallas lattas si, sco sch'el havess si dies ina trapla da nuot ed el gresscha lu aunc anavos a quels che dattan suenter: «Anavaun! Mû sianter, sianter!» Mo per tschentar en igl areisen culla bucca ella latta, ston ils umens vid la cua alzar quel dil ridischen egl ault. Quel vid il tgau sin chischner, grescha lu: «Aun plé ad aut! Uss anavaun!» La bucca ei finalmein pinada da morder ella latta: «Uss aun ina strubagièda», ed igl areisen ei mess a canorta. «He, gl'auter i e ju scû ûgns!»

Il Caduff ha raschun; ils areisens ein lugai ed ussa vegn il chischner aunc mess schibein sco pusseivel el plumin. Cun dus areisens dattan els aunc in techet ensi e ton sco per in'idea engiu, exact sco aug Meltger, che stat d'ina vart e tschaghagna, camonda. La laver principala ei fatga. Ils umens enquoran e tilan en lur tschops, fruschan giu dil libroc e dallas caultschas enqual stiala e spriula, ch'ei sefitgada el carpun – e fan tschera dad ir a casa.

Cul tgau alzau, mo strusch aschi ault sco tiels commandos, semeina aug Meltger aunc inaga viers ils umens e di frestgamein en in tun humiliteivel, sco avon en baselgia: «Bien engraziamain, Dius paghi e Nossadunna sturtegia las olmas ail sogn parvis!» Cuntents d'haver fatg in bien survetsch per l'amur da Diu, s'allontaneschan ils vischins, ferton ch'ils proprietaris dattan aunc ina schubergiada e mettan ensemens ils uaffens. Prendend ina hazra presa, manegia il Caduff: «He gl'auter, nus savain esser cuntiants, tg'è ju tut bégn, ad engraziel Diu persianter!»

# A Sogn Giachen

(Ineditum)

Ei era la secunda dumengia da settember, il num da Maria. Nus eran a Rueras. Ils vischins eran serendi stediamain a Sedrun tier il survetsch divin, priu ora impedi e tscheu e leu enqual mumma cun affons. Era il reverendissim sur caplon, che veva giu fatg sias funcziuns leu el vitg entuorn las otg, era ius, sco sia obligaziun camonda, ella baselgia parochiala. Ei era tut quiet ed ins veseva negin per las vias. Perfin ils affons han da star en stiva, tochen ch'ei fa messa e dir enqual paternies culla tatta, che veva da survigilar la casa e da mantener il fiug sut la vanaun.



Entuorn mesa las diesch pudev'ei esser, che nus havein fatg ina viseta ad ina persuna malsavanaugh en casa, stada da mistral Gieriet. Cheu tuttenina udin nus il commando: «Antreten!» Surstai dumandein nus la malsavanaugh: «Tgé sè quai?» – «Quai è 'l Duri Vegeli, tge fo'gl asen; oz stu'l fa yacht cul Gion Fidel.» – Aha, nus capin la caussa. Giavischond buna pazienzia e bien megliurament bandunein nus la malsavanaugh e vegnin ora sin laupiet. Visavi nus steva cheu en bargia Duri Vigeli cun in hazer turschet enta maun ed in cudischet, ch'el fultscheva ual el sac dil tschiep. Nus mein in pèr pass ensemen dalla via si e clamein: «Antreten!»

Cheu sesarva ina finiastra dalla casa sisu ed ina vusch cloma: «Ju vegn cunignèda; stû aunc ventscher a rappar giu in tec tubac.» Buca ditg e da scala oragiu vegn Gion Fidel,

targend en la leva geppa-stuppa, e salida nus curteseivlamein. «Oz oi num fa siu uffeci scûiauda, sche nus vain da quella gliut co.» Bugen vegn ei concediu a nus d'era astgar far il tur cun els. Ussa eran nus treis e vulend semetter sin via, vegn davos ina pluna roma neuado aunc Giachen Antoni e di. «Ju vegn era cun vus, sche vus schais». «Persesez!» En «rote colonne» marschein nus dalla via si el stradun, ferton ch'il «rotmeister» porta il turschet sin schui.

Sediscurrend da quei e da tschei mein nus cumadeivlamein per il stradun sul vitg ora. «J è tut ruassaivel ed ins veza nuéta biè fem,» remarca Duri, ch'era plitost penetraus da cumplenir sia obligaziun sco guardia dil vitg duront ils uffecis divins. «Gie, stagn pauc fem,» di sin quei Gion Fidel. «Empau fem vez ju bèn ugen da quellas uras, firaus e dumengias; quai è in'enzenna tge vagien sé ina buna butgèda.»

Nus mein spella fravia nova ora. Toccanaglia dall'ura da Schlans paran siadora ord ina chista. Il giuven fravi ei empau da mecanist e sco tal enconuschents; sias excellentas sigirs han bien num lunsch entuorn. La fravia steva pli daditg da tschei maun dalla via en tschaler dalla casa dil Crest. Aunc pli da vegl fuva la fravia giu el vitg spella fontana, nua ch'il fravi statalter Duri Venzin ha aunc stuiu rugalar ils fiars d'ina massa cavals dall'armada da Suwarow, ils quals ins derschevi entuorn e schavi enferrar «sutsura».

Buca dalunsch sut nus stat la casa da scola sin in bi, sulegliv punct, che fa tutta honur al vischinadi. Nus vegnin sper la casa dil caluster ora. «Quella tgèsa o in cert Genin baghegiau 1791» entscheiva in a raquintar. «Co steva plé daditg il Giachen caluster ed il Tiner; omisdus on surviu sut la cruna; el Giachen ain Frontscha, nua tg'el o fatg atras la revoluziun dil fenadur 1830 e plé tard a Ruma scu survient del general Salis. Il Tiner è staus grenadié ain survetsch neapolitan e mava aunc en ses vegls onns agradsé scu in coniv.»

Gest dasperas sesanfla la casa dils Cavegns, il pli grond casament dil vitg e che scarvon Rest Lurenz Lucas Cavegn ha baghegiau, sche nus sbagliein buc. En quella casa ei stau beinenqual radunanza dil temps dil «Sonderbund». – Lu suondan duas casas veglias, che dueigien esser vegnididas transportadas si da Mila. La casa dalla posta sur via, ch'in cert Condrau hagi giu baghegiau e nua ch'il vegl pot da Selva, il bien Felici, steva. Ual sut la veglia ustria da Rueras, nua ch'igl ei dad in temps vegniu dau beinenqual scart. Ils camerats san far da tuttas interessantas remarcas ed han bien talent per cultura ed historia.

Nus eran denton arrivai odem il vitg, orasi sur Giassa, e fagend ussa «Ganze Wendung kehrt!» essan nus sefermai empau. Ins ha cheu la pli biala survesta sur il vitg da Rueras, cullas casas brastgas, neras, barschadas si dil sulegl, cun ses auters baghetgs e chischiners denteren.

Entadem il vitg sesanfla la baselgia da s. Giachen. In tec plienvi sesaulza Cadentschuns, sur la punt si l'imposanta ustonza; lu suonda la squadra da Dieni ed ussa entscheiva plaunsiu il terren a sesalzar successivamein formond las spundas da Budas, Nurschai, Giuv, Liets, Clavadi, Mulinatsch, Milez, Cuolm Val, che fineschan culla stgeina da Culmatsch e dalla Piazza. L'aua dalla Val Giuv, traversond denter caglias e cavigias ora-

giu, porscha variaziun denter quellas bialas tendas da praus maghers e mises. Plitost da maun seniester sesanfla igl Uaul Tschuppina cun sia via nova e giudapeis la ruina dil vegl casti Putnengia e dasperas la ramuronta Bullatscha. Gest sur gl'Uaul Tschuppina neuagiu tarlischa in tec dil Pez Badus en la splendor dil sulegl, ferton che la spunda da tschei maun dil Rein cun sias pastiras ed uauls setila da sera encunter la damaun. Leusura paradeschan Tgom e Nual, aunc verds tochen sum e nua ch'in grond diember genetschas pasculavan sut il stavel giu.

Quei tut purscheva in magnific aspect en la tarlischur dil clar bi sulegl da miezdi, ed il profund sogn ruaus che regeva entuorn entuorn schava encorscher, ch'ei era il di dil Segner; ei targeva ensi!

A Sedrun tuccav'ins il zenn grond e siu tun pareva a nus, sco sch'el mass a spass tras gl'Uaul Surrein e less tarmetter neu siu salid a nus. Igl ei in emperneivel tun, che resuna gleiti tschien onns dalla val viaden. In Talianer ha culau el ensemblamein cun ils zenns da s. Gion a Mustér el santeri da leu igl onn 1821 igl october ed el tuna pressapauc sco il secund grond dalla pleiv da Mustér.

Nus prendein ussa la via sutenagiu tras il vitg. Ils camerats raquentan cun tschaffen vinavon da lur vischins e remarcabladads dil vitg. Las casas porschan ussa lur fatschadas e fan tutt'autra impressiun. Tscheu e leu paradeschan avon las finiastras bialas flurs, cunzun neglas e geraniums en vivas colurs. Ellas embelleschan zun fetg la fatschada e dattan perdetga, che bravas giuvnas hagien tschaffen e quitau per tal emperneivel ornament. Denter las flurs ora miravan tscheu e leu cun bucca rienta carins affons giu sin nus, survigilai dalla tatta, che mirava sur siu spieghel ora, tenend enta maun il cudisch da legendas.

Nus mein sper la casa da Leci ruder enagiu, baghegiada 1839 dil famus seckelmeister Deragisch da Sedrun, ch'ei serendius cun sia famiglia 1860 ell'America ed ei morts leu 1901. El ha menau si pliras stupentas casas-lenn, cunzun a Sedrun, che dattan aunc oz perdetga da siu oreifer talent da quellas varts. La casa da scarvon Beer mira giu sin nus, il davos da Tujetsch che ha giu quei vegl tetel ed honur sin cumin, sche nus sbagliein buc; la casa da Tumasch Huonder, baghegiada 1829, la suletta che porta in ornament giu bass en sia fatschada.

La nova casa-crap da Leci Antoni Brugger, baghegiada 1904 orasisum il vitg, para da vuler far suenter ed ornar sia fatschada cun ina statua, che vegn a porscher entgina variaziun.

Mirond vi e neu las casas, per vegnir sissu igl onn da lur erecziun, eran nus arrivai plaunsiu tochen amiez il vitg, e cheu ha ina brava dunna giu commiseraziun cun nus: «Vegni giu e prendai enzatgei, vus veis franc da basegns;» ha ella detg si per nus riend e mirond buca pauc sill'a fideivla patruglia. «Quai savain nus schon fa» e nuota schenai essan i d'ina streglia giu e d'ina scala enasi ed en stiva. Sulettamein nies camerat Gion Antoni ei restaus in mument tut retratgs, grad eri, e fuss bugen seperstgisaus sin ina moda ni l'autra, mo vesend la gronda curascha dils auters ha el buca vuliu cunmeins ed ei era vegnius suenter. Il turschet en davos meisa en in cantun e sper in pulit refrestg

havein nus raquintau alla dunna da nossa expediziun per schurmetg dil vischinadi, ed ella ha naturalmein dau grond laud a nossa premura.

Nus havessen aunc giu da far quasi la mesadad digl ordinai tur pil vitg giu tochen la casa pervenda e giudem il vitg, nua che las famiglias Biscuolm e de Castelberg stevan dad in temps, traversond neu sur las casas da mistral Venzin, sper la veglia casa cumin neu dalla via sulada si sper la fontauna vi, per finir silla plazza principala dil vitg, avon casa da mistral Gieriet e dad assistent Schmed, nua che nus vevan entschiet nies tur. Denton savend, che aunc beinenqual duvreivel invalid da quella part dil vitg seigi restaus a casa e secumblidond nus empau cun nies refrestg, havein nus schau sutta-scriver nies «libret da guardia» ed essan i in ord l'auter. Ei era ner temps, pertgei pliras vischinas vegnevan gia ora si sur Giassa en da Sedrun; tier quei havevan treis dils gardists sez da pinar gentar!

Perquei: «Adia; quai o semagliau quért; engrazia Turtè!» E naven eran nus.



Da Giassa enagiu

# Disgrazias – Rueras – La Val Tujetsch

## Cruschs e disgrazias

manuscret (buca ediu)

Ei mava encunter la fin digl uost e nus havevan el senn da far in pèr dis vacanzas en Tujetsch, ella patria denter parents e vegls enconuschents. Cheu vegn jeu clamaus in di suenter messa gronda alla porta claustral. « Bien di, ludaus sei Jesus Cristus. Sch'jeu astgass rugar e supplicar! Els van probabel gleiti en vacanzas en Tujetsch, e cheu havess jeu ina gronda supplica. » « Bugen, sch'jeu sai far. » « Sch'Els schessen a miu nevs, al Gion Antoni, che stat grad sur il Gion Michel, ch'el dueigi surtut haver quitau e mirar che la crusch enta Nacla, che stat leu en memoria da nies bien bab, ch'ei sedisgraziaus leu, vegni mantenida. Jeu hai negin leuen pli datier ed jeu stess mal, sche la crusch svaness. » Bugen hai jeu empermess da drizzar ora quella cumissiun, gl'ei stau miu emprem quitau a Tujetsch, e mond l'auter onn tras Nacla per ir enta Nalps, hai jeu observau gia dalunsch, ch'ina nova crusch pendeva dador Burganez vid in pegn, ferton che la vedra steva dadens Nacla sin in crest sut via, nua che Sep Antoni Giossi da Surrein era sedisgraziaus 1848. La crusch a Nacla e quella cumissiun han fatschentau nus silsuenter savens, leventau novs patratgs e differentas regurdientschas. Contas disgrazias ein succedidas en Tujetsch, en quellas vals, cons ein vegni per la veta sin quels cuolms, en quels uauls, en quels stretgs, en lavinas, tier quella e tschella prigulusa lavur? Quei sa negin dir, quei stat scret negliu.



Crusch a Nacla

Quei bein, van ins dalla val viaden ni per ina ni l'autra senda e dattan ins bein adatg, sche vesan ins tscheu e leu ina crusch ord vegl e niev temps, che regarda vid ina disgrazia, vid la mort, che ha surpriu tut anetgamein in da nos cars vischins. Enconuschan ins la crusch san ins pertgei ella stat cheu, sche seregordan ins cun dolur e tristezia dalla disgrazia, ch'ei succedida leu ni leu el contuorn; ins ha beinduras tschentau la crusch damaneivel dalla via ni senda, sinaquei che scadin, che va speras ora, seregordi e roghi dall'olma, che Niessegner ha clamaus sur ura tier el. Ed ils avdonts dalla vallada fan quei stedium e cun pietad mond speras ora. E tgi ch'enconuscha la crusch ed ha peda, quel seferma bugen in mument e seregorda dalla dolur e dallas midadas, che quella disgrazia ha purtau en quella ni tschella

famiglia. Ins sa studiar cheu sper la crusch sin atgna moda la sort da bein enqual famiglia, la historia d'in u l'auter vischinadi. E bandunond commuentaus reciteschan ins bugen in «De profundis» mettend vitier il suspir: «Niessegner vegli po pertgirar da semegliontas disgrazias!»

Denton buca per tuttas disgrazias succedidas ella vallada stattan cruschs. A proporziun cullas nundumbreivlas disgrazias regordan mo paucas cruschs vid talas, e bein enquala crusch han ins schau ir sut cul temps.

La crusch a Nacla e la cumissiun dalla venerabla dunna oriunda da Tujetsch ha madirau cul temps in agen patratg, numnadamein da metter ensemes ina gada las disgrazias succedidas ella Val Tujetsch. Tscheu e leu havein nus el decuors dils onns anflau notizias. Glieud veglia raquenta bugen e cun temperamet da quei ch'els han udu e sez fatg atras. Denton eis ei nunpusseivel da dumbrar si tuttas e sez quei che stat scret cun-zun en cudischs vegls ei beinduras nudau aschi cuort, ch'ins survegn buc in clar maletg. Pia tut mo notizias, fragments ord la historia da Tujetsch.

Il temps da nossas vacanzas era arrivaus ed in di semettein nus sin viadi, il pli bugen a pei e tut persuls. Buca sil stradun. Ils autos destureschan la tgeuadad ed ins ei strusch segirs senza ir ella chinetta. Ultra da quei vegn ins dis da bial'aura tut alvs, dis d'in tec plievgia tut gagls. Pliras gadas e cun special plascher essan nus i per la via vedra Cuoz-Buretsch-Mumpé Tujetsch-Bugnei, ni aunc pli bugen da tschei maun: Valzeina, enagiu vida l'aua tras ils mises da Cavorgia, S. Leci, S. Antoni, tras igl uaul encunter casa. E bein enqualga havein nus duvrau in entir di per arrivar el destinai liug, denton era quei in di da particular legerment e resultat.

La via vedra da Tujetsch haveva in bien num e gia il patratg che tons dils perdavons eran i e returnai cun lur quitaus per quella via fageva sin nus impressiun. Aunc sin intschess da Mustér, in tschancun oragiusut il vitg Mumpé-Tujetsch steva pli daditg ina crusch si per in crap. Ils da Mumpé numnan aunc ussa quei liug: «Ora giu la Crusch.» Ils 4 da zer-cladur 1787 han ils da Tujetsch giu fatg ina processiun a Trun tier Nossadunna dalla Glisch. Returnond a casa ei statalter Giachen Antoni de Florin daus entuorn en quei liug e restaus morts.



Crusch sur Rueras

## Rueras

manuscret (buca ediu) 17.8.1915



Pressapauc amiez la vallada da Tujetsch sesanfla il vitg da Rueras. Situaus plitost en ina ruosna porsch'el dalunsch il maletg d'ignivs da hirundellas spess in denter l'auter, casas e clavaus brin-ners dil sulegl, denter ils quals la baselgia cun ses mirs alvs sepresenta vengonzamein. Nuotatonmeins traversescha per miez il vitg en ina grada buna via, la via vedra, che dat empau difficultads temps d'aura bletscha da mantener en solit bien uorden, ferton ch'autras vias, per part cun sulada, meinan sidengiu, vi e neu. Rueras haveva pli baul in'autra posiziun, fuva pli damaneivel dall'aua, che vegn ord la Val Mila. Sco ins encorscha aunc bein, divideva l'aua da Mila e dalla Pulanera, che haveva da lezzas uras sia cumpleina libertad, il vitg en treis parts. In ton dall'aua mava pil vau dad ussa e cuntentava mulins, resgia e falluns, l'autra part dall'aua cursava grad dadens la baselgia giu e la tiarza part spisgentava la fontauna e pistregn amiez il vitg dad ussa, curreva vinavon e menava giu Mila falluns e mulins. Mila vegn gie da mulins. La gronda part dil vitg vegl dadens la baselgia ei svanida ed ha schau anavos il num «suloms»; la part denter la baselgia e la fontauna ha las pli veglias restonzas, ferton che la part vargond ora ei da pli niev datum. Gest sur il vitg en meina dapi 1863, en quasi miez rudi igl emperneivel stradun e quei ch'ei modern, ustrias e stizuns, setschenta ussa sper la via. Cun quei che l'aua da Mila haveva dad in temps cumpleina libertad e traversava il vitg da tuttas auras sco ei plascheva, haveva Rueras atgnamein buca la megliera posiziun.

Entras l'ustonza han ins sfurzau l'aua da cuorer tschecamein e cuntuadamein dad in maun giu, denton grad sco sch'ella less prender vendetga, il terren nua ch'ina gronda part dil vitg stat, ei buca buns, el stat sin grava, sablun ed ei renda siadora, per aschi che beinenqual casa ei humida, freida, senza tschintschar dalla baselgia temps d'unviern. Il vitg fuss staus bia meglier ora si sur Giassa, pli sulegliv e sanadeivel. Denton, ils pievels, habitonts dils autls ein da tut temps setschentai bugen sper bunas auas, sper vias e sendas, sper trutgs e pastiras e quei ha Rueras en abundonza. Ed ils vischins fan era nuota cass, sch'ins descriva Rueras da ruina, grava, garvera.

Rueras ei senza dubi in dils pli vegls vitg dalla vallada. Dad in temps fuva el buc aschi gronds sco ussa. Sco ils historiografs pretendan havevi la claustra da Mustér siu ugau el casti da Putnengia ed il migiur dils beins stevi a Rueras. Ins manegia che la casa da Duri Riedi cun sia miraglia apparti seigi aunc restonzas da quels temps. Quels che havevan mintgamai ils beins claustrals s'udevan tiels nobels e senumnan de Rueras. Aschia vegn ei avon ella historia in cert Martin de Ryfären (senza dubi da Rueras), ch'ei staus 1399 mistral dalla Cadi.

Pli daditg, ed aunc ussa beinduras, numnavan ins Rueras semplamein tenor siu patrun baselgia S. Giachen. Sin cartas ed atlas vegls vegn ei per ordinari nudau: S. Giacomo. Ils d'Uri, che vegnevan pli da vegl sur l'Alpsu ni Pass las Cruschs mavan semplamein «uf St. Jacob aba». Rueras haveva da siu temps ina certa muntada. Da cheu ano mavan ins sul Pass las Cruschs vi ad Amsteg, cheu entschavevan ils trutgs ch'ins mava da Sudada (via sulada) si per serender vi d'Ussera, dasperas van ins da cheu anora ellas grondas alps Val Giuv e Val Val, che pagavan dad in temps lur tscheins alla claustra cun product natural.

## La Val Tujetsch

manuscrit (buca ediu)

Ei era emperneivels bials dis odem la stad. Nus setenevan si per in temps ella tgeua villa «Dieni» e fagevan da leu ano pintgas excursiuns per guder puspei ina gada ils bials prospects, che la maiestusa Val Tujetsch porscha en aschi gronda abundonza. In suenter-miezdi havein nus era priu avon da far ina viseta «Dadens gl'uaul» e suenter haver priu aunc in glas «Raverulas» ord tschaler dil Sep, essan nus serendi tut persuls sil stradun encunter Tschuppina.

Cheu essan nus sefermai e stend ell'umbriva dalla draussa d'in pegn havein nus gudiu ditg e bein la magnifica vesta ch'ins ha da cheu ano sull'entira Val Tujetsch. Giu da bass gaudan ins negliu ina pli biala vesta, che grad cheu sin quei punct. Grad avon nos peis las ruinas dil casti da Putnengia cun las aclas Satur, Casti e Putnengia. Vargond serasan las spaziusas squadras denter las auas Val Giuv, Val Mila, Strem e Drun e Val Bugnei. Dil maun sura encunter mesanotg sesaulzan emperneivlas spundas, mises, alps e pezza naven da la Puza viadoragiu entochen il Bostg formond quasi in miezrudi, che porscha stupenta variazion. Denter quellas squadras verdas sesanflan ils vitgs cun lur capluttas alvas e casas neris turidas e barschadas dil sulegl, ordlunder clavaus e faners sterni e

spuentai in ord l'auter. Plitost entuorn ils vitgs eran la glieud fatschentai sco furniclas, havevan ins grad entschiet cul risdiv, ferton che las femnas manipulavan sil pli ault grad glins e borlas. Ei fuva era l'aura persuenter! Il sulegl steva clars e bials neu sur miez il Tgom e barsava risdiv e borlas. Aunc dus da quels dis e las borlas san ins better e risdiv dat ei sco cocca.

In bi maletg che nus havein tschitschau en cun nos eglis e cun nossa fantasia entochen funs. Fuss nies plan buca staus fatgs dad ir vinavon, nus fussen buca vegni unfis da guder quei idilic prospect filaus e tessius cun da tuttas sorts reminiscenzas, tochen sera. Denton avanti!

Il stradun fa ussa tuttenina ina storscha encunter sera, ch'ei per carrs e cavals prigulusa. Cura ch'ins ha baghegiau quella via, han ils impressaris vuliu midar giu quella storscha sin lur agen quen, mo igl inschigner ha buca vuliu capir. Ins passa tras uaul, igl Uaul Tschuppina. Quel s'estenda naven dil Rein d'ina spunda si ed in crest liung viaden-si circa in'ura lunsch. Uolps e cavreuls setegnan si bugen cheu ed han era per oridnari bien ruaus. Quei dies cugl uaul para da vuler serrar giu la vallada e da porscher siu maun alla spunda Surrein da tschei maun dall'aua per formar aschi in bi rudi.

In per pass sin il stradun anavon tras gl'auul, ed ins ha nuot pli dalla biala vesta sur Tujetsch. Visavi da tschei maun sepresenta la spaziosa pastira da casa dils da Rueras, Surrein, nua che enzacons vadials remaglian sin crests e spuentan las mustgas. Sper «la Fontauna tgavrera» spassegian «cotschens» vi e neu e san buca tgei pigliar a mauns, ferton ch'enzacons pigns affons baghegian tegias.

Il stradun traversa ussa la via vedra, che haveva cheu inagada ina gronda pendenza dalla Foppa Tschuppina entochen ora sil Crest Tschuppina. Ins sa aunc perseguitar dapertut ils fastitgs dalla stretga via vedra, che menava tras la vallada avon ch'il niev stradun vegni construius, denton entscheivan quels fastitgs a svanir pli e pli. Pli grev eis ei d'an-flar indicaziuns d'ina altra via pli veglia, che menava da funs enasi; fastitgs da lezza anflan ins ora giu las plauncas a Rueras e lu principalmein damaneivel dalla ruina dil casti da Putnengia sur Bullatscha viasi. Aunc pli baul existeva la via sur ils vitgs, che menava tier differents hofs e las qualas ein tscheu e leu semidadas per part en sendas sco per exempl tras Flurin, Cascharulas, Nurschai etc. e ch'ein per part idas giu; per part ein ellas svanidas. A Pardatsch sur Rueras senumna aunc ussa in toc «Prau la gias-sa» ed ins encorscha quella aunc ca. 30–40 m liung, steva scadin cass en connexiun cun il vegl uclaun Flurin, ch'ei ussa totalmein svanius. In document vegl da ca. 1368 raquenta sur fatgs da quei uclaun e di denter auter, che l'aua dil dutg grond stoppi ir dador la baselgia giu. La schlattinea Deflorin derivi da quei hof. Dad in temps era la famiglia de Florin ina dallas pli noblas e rehas en Tujetsch ed ord quella derivan avat Gallus de Florin (1716–1724) e mistral Duri de Florin († 1754). Ina dunschala Maria Scolastica Angelica Joanna de Florin anflein nus sco munissa a Seedorf († 1769). In giuncher de Florin ei vegnius tarmess dils vischins da Tujetsch tier monsignur uestg Jos. Benedetg de Rost, 1749, nua ch'ei ha setractau d'ereger la caplania da Sedrun. La harta digl altar dil maun dallas femnas ella caplutta a Zarcuns porta giu bass l'arma dalla

schlatteina de Florin e sis persunas, denter en era in pader benedictin, vestgius cun cuculla e sutvia stat la suttascripziun:

Votum fecit Gratiam recepit Durig de Florin 1679, aetatis suae 49

Foppa Tschuppina, cheu dueigien en ina paliu enzacons Franzos esser satrai, ch'ins hagi sittau giu passond atras cheu ils 6 da mars 1799 l'armada da Loison. Il corps da catschadurs era sepostaus egl Uaul Tschuppina, in liug strategic ed hagien battiu per l'emprema ga cheu valerusamein vegnend ils Franzos tras Carmihut. In cert Rumias Curschellas da Selva, che sesanflava denter la cumpignia da Tujetsch eri cun auters viadenasi egl uaul e vesend el in officier sin in cavagl alv, hagi el detg: «Co vi ju tuttina mira, sch'ju gartegia bétga quel!», hagi tschentau la buis sin in cusch, laghegiau e sittau giu el. Ils catschadurs seigien lu sereratrgs tras gl'uaul e lu puspei sepostai sur ils baghetgs da Putnengia, nua ch'els ha puspei mazzau enzacons. Leu seigi era in dils lurs, in giuven da 18 onns, Giachen Martin Berther da Camischolas vegnius blessaus grevamein en in calun. Ils camerats han priu e purtau el sper il buntaduir da Putnengia davos in crest, dad in maun dalla via, secartend ch'ils Franzos vesien buc el; mo ils Franzos han cattau adagur el e mazzau el barbaricamein.

Il stradun meina ussa tras pli teissa spunda. Visavi vesan ins la Val Vadretg, prigulusa da lavinas; profund giu ella bassa ramura il Rein che va aunc sut in grond toc vadretg ora, cuvretgs cun crappa e tschaffuna. Dadens la Val Vadretg igl Uaul dalla Tgauma, igl Uaul da Crest scodialas e pli anenasi sper l'aua Nual il «Mund da femnas». Ferton che nus studiavan suenter danunder quei num pudessi vegnir, arrivein nus tuttenina tier ina caplutta postada viaden en ina verda cozza d'in bi prau verd che allegrescha dublamein il viandont. Igl ei la bufatga caplutta da s. Brida, che stat cheu tut isolada en profunda, emperneivla tgeuadad. Buc ina casa ni clavau vesan ins d'entuorn. Ins sa pilver buca far cunmeins, ins sto sefermar cheu e guder quei idilic plaz, che porscha en siu profund ruaus vivonda plitost pil cor, che per ils egls.

# **Notizias sur da Tujetsch**

rimnadas en archivs ed oravontut ord gassetas e da privats.

## **Notizias generalas**

### **Munconza da garnezi**

In Tavetsch aber ist 1578 das Korn fast gefehlt.

Anniversari da 1456 folio 15 /Brügger, Natur-Chronik pag.19

### **Munconza da garnezi**

In Tavetsch hat 1588 das Korn gefehlt.

Ord igl anniversari da 1456

### **Miseria da fein**

Die Heutheuerung und Noth im Frühling (1617) war hier (in Tavetsch) so gross, «dass die Richsten sind in Berg und Wald gangen, den Schnee hinweg gemacht und darus bracht, was sie mögen hand.» ... Dieses hat geschrieben Bartlime de Rungs d. Z. Pfarher daselbstens.»

Anniversari da 1456

### **Deflorin**

«...1552 finden wir einen Johannes de Florin, der Mistral war und auf dem Tridentiner Concil geadelt wurde. Sein Sohn Johannes war Dolmetscher des Königs von Frankreich. Ihm ging es aber im Strafgericht zu Ilanz schlecht. Obwohl er grosses Ansehen besass, sollte er zu den Unkosten verurteilt werden. Nach Juvalta wurde hierbei ein gewisser, im Alter bereits vorrgerückter Richter um seine Meinung gefragt, und sagte dieser: «Ich finde nicht, dass gegen den Dolmetscher irgend etwas bewiesen worden sei, um dessentwillen er verurteilt werden könne. Nichtsdestoweniger sind viele Unkosten aufgegangen. Irgendwoher muss Bezahlung erfolgen und dies kann nur von Seiten derjenigen geschehen, welche Vermögen besitzen, und so stimme ich ebenfalls dafür, dass er zu den Unkosten beitrage.» Und das geschah.

W. Derichsweiler, «Das Tavetsch», manuscript, pag. 17

### **Anno 1771 igls 18 de Feb. en Tuiesch a Rueras!**

Eis sei sin buna intenziun a meini, vagniu faig in sigdreig a redtlich marcau denter igl Signur Misteral Gion Mattias Sonder a la sia consorta Maria Barbla Catarina de Cortins, ina part sco vendeders; lautra part sco compraders eis ei igl Gion Antoni Gieriet per ina tiarza et jou suittascret per duas parts; resalvon la casa a igl miasses de Mulinatsch quei vai cumprau persuls:

Primo: Datten ei lur praus gras tut quei ca tucca ad els per liber a frý con igls bageitgs a dreitgs vitier sco els an godiu a possediu a artau da lur veigls per R. 150 la tschave-

ra quei ca masira dat con clara conditiun, da tillar giu scha ei fus crapa, ner viadis a clesena sco ei glei igl solit cou denter nus per enconuschienscha da dus umens.

2<sup>do</sup> Datten ei era lur porsiu praus magers, igl quals en, in frust ora Rueras in frust giu gleignei, quei sin plau salte quei sin budas a si nurschei quei frust ella val, a quel vý igls druns quei so planatz a quei mager sur molinatsch tut enzemen per R. 178.

3<sup>to</sup> igl millez schaziau R. 106:40 con igl fein vitier tut enzemen.

4<sup>to</sup> igl maisses da Mullinatsch schaziau R. 230:20 Iten fein R. 13:20 ad aschia la mesa-dat digls miasses en da quintar sco ei glei schaziau.

5<sup>to</sup> vai jou cumprau igl fein lau casa tut enzemen per R. 9 la tschuncheisma quei che mesira dat, giu da quei vai jou dau in s. h. boff entir R. 58.

6<sup>to</sup> ja sei marcadau la casa a jert con igls bageitgs lau speras a quei prau sur casa igls leigs a 4 erkuns per R. 260: a quei per quest onn senza zeins da lau denvia porta ei igl zeins. las pagas en faitgias sco suonda, da sin datun pagar giu R. 600, igl onn suenter R. 400 alura quei ca resta aung da lau devia R. 200 per onn schi gig a schi liung co ei seien pagai a contentai.

Scret da mei, entras gargiament a empreschienscha dellas parts:

Jau Joseph Antoni Ber empreschienscha digl Gion de Florin sco perdetgia  
iau Maria barbla Catrina de cortins confessa sco sisura.

NB. La sura copia ei scretta giu digl original, che sesanfla en possess da signur Gion Pieder Sonder da Salux, Sursaissa romontscha. Sco il cuntegn dalla brev muossa ei quei ina brev da partiziun e marcau. Maria Barla Catrina de Cortins da Rueras ei stada mari-dada cun mistral Gion Mattias Sonder da Salux, frar da sur Stiafen Anton Sonder da Salux † 10 d'uoست 1780. Quella Maria Barla Catrina ei stada probabel ina feglia da mistral Hans Giachen de Curtins, morts en uffeci ils 27 da december 1755. Ina autra feglia da mistral de Curtins, Onna Maria Castgina, ha giu maridau mistral Gion Antoni Gieriet da Rueras e Josef Anton Beer ha carteivel era giu ina feglia da mistral de Curtins per dunna; per quei vegnan quels dus numbs J. A. Beer e G. A. Gieriet ella brev. Il bab da quei mistral Gion Mattias Sonder senumnava Landvogt Geri Sonder. Pervia da quella maridaglia da mistral Gion Mattias Sonder cun ina matta da Tujetsch, han ils Sonders e lur parentella da Salux e contuorn aunc ozildi il surnum ils «Tujetschers». Ei vegn raquintau, che sur Stiafen Anton Sonder che ha studiau da siu temps en claustra da Mustér, hagi procurau quella spusa ord Tujetsch a siu frar Gion Mattias. Auters dian, che quella amicezia seigi daventada sin in viadi a Zitegl.

Copiau e fatg las suras notizias ils 14 da mars 1926.

### Processiun da s. Marc

Il di sissu (ils 22 dad avrel 1808) ei curdada ina neiv da 4 cubics (?) ch'ins vesa darar, entras la quala la usitada processiun dils Medelins e Tuatschins per la fiasta da sogn Marc ei stada impedita. Ils Tuatschins ein denton – malgrad ina fetg schliata via, arri-vai a Mustér.

Acta Capitularia 1799–1813, pag. 105

## **Cuolm d'Ursera**

Ils 12 da settember (1813) essan nus arrivai en nies desiert [=Mustér?] (P. Sigisbert Frisch cun ils dus fras Adalbert ed Anselm returnond da Lucerna), stauchels dalla via, perquei che [nus essan stai] impedi dad aulta neiv sin il Cuolm d'Ursèra. Sigl ault dil pez dil cuolm havein nus entupau dus cadavers, numnadamein dil Landaman d'Arms e d'in autra femna dalla pervenda da Sursaissa, ch'ein vegni sfundrai dad ina lavina el lac ed han smisereivlamein piars la veta.

Acta Capitularia 1799–1813, pag. 171

## **Pauperesser**

...Tujetsch, nua ch'ils paupers pudevan vivon mirar tier co il terment muvel dils beinstonts sbutlava giu las stupentas pastiras ed alps cuminas, ha ussa encuretg da bonificar ils «murdius» cun dar ora ad els tocs pastira per schar semnar truffels e graun. Cun quellas sorts han gia bia vischnauncas segidau, ed aunc biaras savessen far il medem.

Nova Gasetta Romontscha nr. 1 1860

## **Vegliadetgna**

Quels dis ha la nunmisericurdeivla mort separau ina letg da 62 onns, 2 meins e dus dis, probabel la pli veglia letg dall'entira Cadi, sche buca l'entira Surselva. Igl um ch'ei ussa morts, veva 88 onns, e la dunna, che viva aunc, ha cumpleniu ils 93 onns. Sch'enatzatgi duess dumandar, co quels seigien vegni schi vegls, sche san ins rispunder: cun viver en pasch e buna veglia, esser activs, setener vid broda e tschagrun fiers e buca tudi sevilar, esser lischents e slavidrar en caffè.

Nova Gasetta Romontscha nr. 1 1860

## **Uauls**

...Per in'emprova, che nos meinis cheu allegai selaschien tgunschamein exequir alleghein nus, igl exempla dalla vischnaunca da Tujetsch, che ha segiramein in dils meglies uordens forestals, che sedat tier nus, e nua ch'il quitau e l'energia dalla suprastanza spargna tut cumandar e dictar dils bostgers. En quella vischnaunca vegn ei pagau per in lenn tochen 20.– francs, quels onns eis ei leu vegniu baghegiau leu in grond diember da stupents clavaus da crap e vid sias classenas vesan ins spirontamein lenna fendida enstagl lattas; persuenter aber ei la cassa da vischnaunca en bien stan ed ils uauls serefan ch'igl ei in plascher.

Nova Gasetta Romontscha nr. 2 1860

## **Raccolta 1860**

Ina vegetaziun mai sudida! Ins temeva schon ch'il fein, ch'ins ha mess en uonn, pudes-si selavigiar, mo dal sequent cass daventaus en Tujetsch vess negin semiau. Sin tut ils ladretschs dil Dulezi eis ei carschiu ord il fein bulius (parisols) dua-trei detta liungs. Il fein era suren ell'altezia d'ina mesa quarta tut bletschs e marschs.

Nova Gasetta Romontscha nr. 37, 15 da settember 1860

## **Remarcabladad**

Sco remarcabladad ed emprova dalla veta dallas nuorsas, relatein nus ch'ei seigi miez fevrer vegniu anflau ell'alp Curnera a Tujetsch quater nuorsas. Malgrad la gronda nevada e las cuflas, ch'ellas han stuiu star ora quest unviern sesanflan ellas en bien stan, e muort la liunga launa semeglian ellas gest quater uors pigns, vegn ei secret a nus.  
Nova Gasetta Romontscha nr. 9 ils 28 da fevrer 1863

## **Saltè cantunal**

Sco saltè cantunal ei signur Anton Berther da Tujetsch, fegl dil vegl «Bundesweibel» Berther, legius ora; igl ei stau varga 20 aspirants per quella piazza.

Nova Gasetta Romontscha, ils 12 da schaner 1866

## **Tschamut**

Tschamut, quei ei tschema dil mun, entscheiva a secivilisar. Tiella staziun da posta vegn ei leu baghegiau si in hotel e quei vitget duei ussa aunc daventar la residenza d'in schen-darm, per trer en il dazi da consum sin bubrondas spirituosas, che vegnan retratgas dil Grischun sur Ursera. Mo donn che quei niev emploiau cuosta al cantun dabia e vegn a trer en zun pauc.

Nova Gasetta Romontscha 31 da matg 1866

## **Tschamut**

Il Fegl official dils 6 d. q. (fenadur 1866) fa da saver, ch'en consequenza dalla nova via sull'Alpsu, seigi ussa ranschau en ina duana a Tschamut per trer en il dazi cantunal da consum sigl import da raubas spirituosas e surdau l'incassaziun da quel a statalter Gion Paul Riedi da leu.

Nova Gasetta Romontscha 20 da fenadur 1866

## **Scolarescer**

Las novas scolas per la giuventetgna buca obligada pli da frequentar la scola elementara, per las qualas il davos Cussegl grond ha decretau in subsidi cantunal, han il vischinadis da Rueras, Sedrun, Segnas, Mustér e Surrein entschiet a menar en.

Gasetta Romontscha 28 da november 1868

## **Plontaziun**

Quels dis ha la vischnaunca da Tujetsch plantau en in niev uaul silla biala spunda dado Selva, nua che ella veva gia onn semnau in bi toc uaul. Sut atgna direcziun dil signur inspectur forestal Coaz, ha ella mess ora 5000 larischs, 2000 schiembers, 2000 pegns da duas sorts lenn. Quei ei la medema vischnaunca che ha dau 3400.- francs per ranschar en tier classenas petgascrap enstagl petgas da lenn, e che ha quels dis puspei vendiu enzatgei plontas veglias per tochen 30.- francs l'ina. Tujetsch sa preziar e schaniar ses uauls, schegie che ina gasetta svizra ha cun caschun dalla davosa malaura

columniau quella vischnaunca cun vuler pretender, che ella hagi sfraccau giu uauls sin moda devastonta. Cun raschun ei signur inspectur forestal publicamein seschaus si encunter quella totalmein faulsa reproscha, ed ha declarau, ch'ei detti buca ina vischnaunca, che schanegi pli fetg ils uauls e spargni schi fetg lenna sco Tujetsch, quella mereti da vegnir ludada e buca blasmada.

Gasetta Romontscha 30 d'avrel 1869

### Prezi da tiers

A Tujetsch ei quels dis vegniu vendiu ina vacca per 20 marenghins – in schi ault prezi ei leu aunc mai vegniu pagau per ina vacca.

Gasetta Romontscha nr. 1; 5 da schaner 1872

### Emigraziun

Questa jamna han puspei circa 120 emigrants bandunau nies cantun per serender ella tiara dalla cucagna americana. Per nies cantun ei quella sperdita da forzas da lavour e da facultad da donn, e che plirs dils emigrants anflan buca la gronda fortuna, ch'els spetgan da tschei maun dalla mar, ei era ualti probabel. Ei legra nus, cura che vivon emigrati Grischuns vegnan puspei ord l'America sin viseta tier nus, mo ei displai grondamein, che els dattan caschun tier novas emigraziuns. El davos transport era ei 50 dalla Cadi ed en quei 28 da Tujetsch cun in um da 70 onns, che han intrasglauter purtau naven quasi 1000.– francs perin. En 20 onns ha quella vischnaunca, schegie ch'ei flessegia leu latg e mèl en abundanza, furniu 160 emigrants.

Gasetta Romontscha nr. 15; 12 d'avrel 1872

### Cristallas

Ils cavacristallas a Tujetsch, Mustér e Medel han uonn fatg buna fadigia. Els ein stai ventireivels egl anflar ed han era saviu vender bia ed ualti car. Igl ei vegniu discuvretg fuorns che han dau ora cristallas per varga melli francs in, in sulet toc vess ins saviu vender per 250.– francs. Ad Ursera, nua ch'ei dat bials cabinets da mineralias, per part oriundas dalla

Cadi, ei vegniu purschiu 800.– francs per in cristagl, mo il vender vul buca dar quel per meins che 1000.– francs.

Gasetta Romontscha nr. 35; 30 d'uost 1872



Classena

### Classena

En ina vischnaunca dalla Cadi ei vegniu claus 44 tschuncheismas lunghezia culla lenna fendida ord dus lenns; da far cun lattas vessien

ins duvrau 100 da quellas. Speronza ch'ei vegni gleiti dapertut da quella da buca dar ora pli lattas per clauder, sco la vischnaunca da Tujetsch ei schon avon decennis ida ordavon cul bien exempl.

Gasetta Romontscha nr. 32; 7 d'uost 1874

### **Bostger**

Sin giavisch digl inspectorat cantunal han las vischnauncas da Mustér, Tujetsch e Medel seschau en da formar ensemen in revier forestal ed emploiar in bostger cun 1100.– francs paga.

Gasetta Romontscha nr. 14 1877

### **Mèl**

Sur il mèl da Tujetsch

mira Gasetta Romontscha nr. 9–17 da fevrer 1879

### **Catschadur**

Il catschadur Gion Clemens Riedi da Mustér, nativs da Tujetsch-Selva

mira Gasetta Romontscha nr. 22–29 da matg 1879 (supplement)

### **Dieschma**

En ina questiu denter vischins e la vischnaunca da Tujetsch pervia dil modus co cumprar ora la dieschma, fatga pendenta tiel Cussegl pign, ei president districtual Tuor a Rabius eligius sco cumissari guvernativ.

Gasetta Romontscha nr. 36; 2 da settember 1880

### **Uors**

En Tujetsch vulan ins haver fastitgs dad in uors che duei haver scarpau nuorsas en in per loghens. Quella vischnaunca ha vendiu uonn fein a pastg per circa 2000.– francs.

Gasetta Romontscha nr. 37; 15 da settember 1881

### **Glin**

Il glin da Tujetsch ei da vegl enneu renomaus e la raccolta da sem glin ei leu savens admirabla; uonn ha in vischin da Rueras en siu stupent glin anflau plontas glin, che vevan tochen 187 borlas, ditgel tschienotgontasiat borlas per ina.

Gasetta Romontscha nr. 38; 20 da settember 1883

### **Casa da scola Sutcrestas/Selva**

Sur la nova casa da scola a Sutcrestas (Selva) mira corrispondenza ella Gasetta Romontscha nr. 41, ils 9 d'octobre 1919 screta da Th. V. = Thomas Venzin, scolast.

## **Studi antropologic**

Herr Dr. Hägler, Professor unserer Kantonsschule, ist seit längerer Zeit daran, für private Zwecke im hohen Oberland (Tavetsch) anthropologische Untersuchungen vorzunehmen, und findet dabei unter der Bevölkerung grosses Verständnis und bereitwilliges Entgegenkommen. Ist dann einmal das Material beieinander, so wird es sich darum handeln, dasselbe zu verarbeiten und die Schlussfolgerungen zu ziehen. Nach den bisherigen Ergebnissen scheine man annehmen zu dürfen, dass sich im Tavetsch die alpine und die Mittelmerrasse berühren. Auf jeden Fall ist es ein gesunder, kräftiger Menschenschlag, der da droben an den Rheinquellen wohnt.

Neue Bündner Zeitung nr. 252, 26 d'october 1929

## **Tujetsch**

Remarcas sur la lavur «Das Tavetsch» dad inschegnier Walram Derichsweiler ella scartira periodica «Die Alpen» mira Gasetta Romontscha, nr. 43, 24 d'october 1929.

## **Far fein a pastg**

Tarmess en da Tujetsch. Sur igl ir per fein a pastg temps d'unviern (ils 14 da schaner). Gasetta Romontscha nr. 7, 14 da fevrer 1924; supplement.

## **Schlatteinas, che vegnevan avon en Tujetsch**

- 1664 de Mila, Custieri, Tomaschet, Katrin, de Vagliglia; (Monn, Venzin, Berter, Berr, Maculin, Riedi vegnan era schon avon quei onn)
- 1665 Durgiei, de Dieni, Pellanda; (de Curtin, de Gonda, de Florin, de Platz vegnan era avon quei onn) Tieni
- 1666 Lem
- 1667 Maler, de Caviez, (Jagmet)
- 1668 Schuoler, Oliva, de Medell, de Cazviauns, de Claus, de Salins, de Cantieni, Bert
- 1669 Balzaar, de Perdi, (Jossi, Chuinter)
- 1670 Gallis, de Conill
- 1671 (de Peli), Sievi, (Schmidt, Wirt), Puzastg, (Muggli)
- 1691 Genin
- 1696 Caduff, de Foppas, Hendri (da Breil!), Schimun
- 1997 Tomaschun
- 1700 Genelin, Jeriet
- 1698 Jeriet (Disertinensis)
- 1718 Busch

### **Schlattineas ussa idas giu**

- 1664 de Mila, M. Michsel, Custieri, Tomaschet, Jacobus de Valiglia  
1665 Durgiei, de Dieni, Joannis Baptista Pellanda, Jacobus Tieni, Christianus Gallis,  
Maria Lem  
1666 Petrus Quinter, Anna Schuoler  
1667 Gion de Camischeras Disertinensis, Lutius Maler, Nicolaus Caviezel  
1668 Joannes Oliva, Dominus Landammanus Conradin de Medell ei perdetga tier ina  
letg, Jacobus de Cazirauns, Thomas de Claus, Jacobus de Salins, Jaqmet, Wanzin,  
Soliva, Jacobus de Catieni, Maria Giacun Balzaar  
1669 Jacobus de Perdi, Joannes Bert, Jacobus Quinter  
1670 Martin Schrepffer, Maria Galli, Martinus Bert, Julius Bert  
1671 Juliana Sievi, Genin, Puzastg, Genelin, Pauldet, Columbani, Wolleb uraniensis,  
Genin, Maissen, Custieri, de Milla, de Dieni  
1705 in matr. coniunxi Jodocum Hiz obersaxensem et Mariam Riedi aethuatiensem, de  
Cazirauns Jacobum, de Vallilia Maria Magd., de Pardii Maria, Schuoller, Tomaschun  
1707 in matrimonium coniunxi Dominum Str. Udalricum de Florin et Ursulam Bär pre-  
sentibus pro testimonio Dominus Junker Jacobum Adalbertum de Medell  
1709 coniunxi Joannem Petrum Pitschan ex Schlans et Mariam Magdalena de  
Nurtschei, Casparin  
1666 Defuncta est Christina de Nurzei  
1673 fuva R. D. Donatus a Cabalzar Caplon a Medel  
1674 Udalricus Bosch (Busch)  
1691 obiit Jacobus de Condetschiuns  
1696 obiit omnibus sacramentis munita Ursula Conrau uxor Joannis de Gonda ex  
Tscharmut sepulta in coemet. S. Vigilii  
1701 Jacobus Bass  
1702 Jacobus de Nurschei obiit  
1791 Maria Catharina Gavatz uxor Christiani de Florin  
1798 Anna Caschalk uxor, Maria Julianus Francisca Schmid uxor quondam Josephi Niel  
hic acolae

### **Better schibas en Tujetsch**

Ils buobs gronds fagevan si in caset suenter scola. Fagevan beffas grend ils vers e remas  
suenter las schibas: mettevan adina ensemen in bien mat ed ina da pauc. Ils menders  
(buobs da 15–17 onns) pertavan ora si las schibas; ina bun'ura si. Cun els mavan era  
mats pli giuvens. Survegnevan lu persuenter dallas mattauns patlaunas cun péz e groma.  
Da pader Martin tergevan ei buca pli schibas (Riedi Martin 1799–1804 a Rueras). La lenna  
mettevan ei si sut casa da mistral Gieriet. Sch'ei fageva propri schliataura sche mavan ei  
buc. In um vegl cumprava giu dals buobs per enzacons bluzghers (1 bluzgher = 2 ½ raps).  
Better schibas bettevan ei adina l'emprema dumengia da Cureisma; tergevan fetg ad  
ault, siglievan giu ella neiv. – A trer schibas mavan ei suenter rusari ed ei cuzzava tochen

circa las diesch ed en casa tochen mesanotg. – Fagevan la groma en casa da Gion Fidel Berther; il vin cumpravan ils mats en in fessli e mettevan si el en davos pegna. – Giachen Andriu Sievi, ch'era staus bia en Tiaratudestga e fatg bia daners scheva: «Mû, quai co è in bi tscheiver, mo scû quel dil Kaiser s'el aunc ditg bétg!»

Anno 1850 tergevan ei aunc schibas en Tujetsch. A Sedrun tergevan ei era schibas = sur Sedrun si. – Dad in ei ina ga la schiba siglida en santeri. Quel ei morts quei onn; epi han ei calau. – Ei duvravan per trer schibas, lontschas da lenn, liungas, osum in fier. Per las schibas procurava mintgin sez. Ei tergevan eninaga biaras.

Bettevan schiba ora sur Giassa. Ils buobs mavan per las casas per plèders da paun e tergevan ora caset. Suenter rusari mavan ils buobs e mats cun ina latta uliva tier in meister e resgiavan giu 4–5 apistects (?) da buis. Duas, treis schibas e pli biaras era pli nobel. Cura ch'ellas ardevan pauc fagevan ei beffas. – Quei onn (?) negin prer, vegneva en in pader dalla claustra. Quel ha viu ils buobs che fagevan si il caset e detg: «Fuss meglier che vus havesses dau quella buna lenna ad ina paupra femna!» –

Leci Muggli, ius ora si e derschiu la lenna suenter rusari. Calau lu sin quei.

L'emprema sonda da Cureisma

Pigliei quellas bialas schibettas:

en num dil Tscheiver

en num da quei bi pèr (epi greva quel che veva la megliera vusch ils numbs dil mat e dalla matta).

Ei mettevan ensem enqualga per far per far, ni era per far igl asen; ei deva enqual hip!

Ils mats mavan quella sera ell'ustria tier mistral Venzin, ni tier mistral Gieriet. Als buobs gronds schevan ei: Sche vus leis vegnir, sche zatgei dein nus! Lu devan ei ad els (als buobs) «ina miasa vin», ni miez quercil vinars epi stuevan ei ira en in'autra casa e fagevan dar in paun e stevan lu si legher. (Ils buobs mavan buc adina.)

Pli daditg mavan ei vi Plaun Vallatscha, a Sedrun mavan ei si sul vitg ed a Camischolas sin Crest d'Acla.

Leci rudè resgiav'ora las schibas. – Ils davos dis da Tscheiver stermenavan elllas per la neiv enagiu (buca ell'aria) mettevan empau strom giufuns.

Ina al tscheiver, ina al prèr, ina al mistral ed al gerau epi allas mattauns.

Mettevan giu tutts.

Il davos mava la schibetta cul vers:

Pigliei quella schibetta da Gion Balli Ticatac.

E Madleina dil nas plat.

Suenter devan las mattauns groma e patlaunas cun péz.

Notizias ord Biblioteca romontscha dalla claustra da Mustér.

### **Il pegr (usit pil mistral)**

En Tujetsch e forsa era en auters loghens, tschentavan ei si in pegr avon casa dil mistral sin cura che quel turnava da cumin. Ils mats mavan egl uaul per in hazer pegr verd.

## **Vèschdunzas** (far veschdunzas)

Quendisch dis suenter la naschientscha d'in affon envidavan bab e mumma ils parents ed amitgs e fagevan ina marendas: patlaunas, vin, groma ect.; surtut «patlaunas». La glieud envidada pertava cun els da tuttas uisas bunas caussas: ovs, schambun, andutgels, pettas, barbaladas etc...

## **La glimèra** (vegl usit religius)

1909, ils 14 d'octobre ha Tujetsch teniu vischnaunca e sin quella eis ei denter auter era vegniu concludiu da dismetter la glimèra, il taglier ni scadiala da zin plein stialas pieun culau, che vegneva tier baras grondas dada dils da casa e pertada suenter bara en in canaster dad ina femna e tschentada sil scalem sisum dils pass en baselgia sper la bara duront messa. Haveva il caluster schau envidar si las femnas lur candeilas mintga baun enasisum cun sia candeila all'entschatta digl uffeci da morts, sche catschava el sia candeila amiez ella glimèra, la quala candeila ardeva duront uffeci e duront la messa. Ferton ch'ei vegneva satrau prendeva il caluster naven la glimèra e pertava quella suenter messa agl ugau pervenda, che vendeva quei pieun en favur dalla baselgia parochiala da s. Vigeli. Persuenter ei vegniu concludiu, ch'ins sappi dar 5–20.–frs a s. Vigeli, tenor voluntad e beinstanza dalla respectiva famiglia.

## **Notizias historicas**

### **Davart ils dretgs per l'aua de Londadusa, dil dutg grond, che dei flessegiar a Florin-sut.**

Jau Mistral Durig Berchter da quei temps Lantamann della Cadi confessel aviartameing, e fetsch de saver a scadin con questa breff, che sco sin oz, sco il datum de questa breff muossa, en compary avont mei, et in aviarta Dertgira, enten quei che jau seseval a Dreig â Musté enten la stiva gronda della Dertgira, ils Hondreibels Gion Berchter Saltèr de Tujetsch, e Gion Martin Laniashcha per sesez, a per sia vogadia con lur Massedurs Plaisch Bundi concedius ad els con Dreig, ei han plonschiiu enconter Gielli Ortschei, Gion Janin, Gion Heyni, e Gion Salya; Gion Berchter davart Florin Sura, e Florin Sutt, e Gion Martin davart Florin Sutt, qualmeing els hagien manau sin lur funs l'aua, che flesseigi ord la Wall Landadusa, dil qual ne els, ne lur vignir suenter hagien dreigs, ne vegnien mai a survignir dreitgs suenter mussament d'ina bref de sentenzia, la qualla ei stada mess'avont adina Dertgira, e garegiau, ch'ella deigi vignir legida. Sin quei ha garegiau il nomnau Derschader de star si e de metter in auter en siu stailg, pertgei che Gion Berchter fuss siu frà, e plonschess davart quell'aua, dalla qualla el havess era dreitgs; et ha schentau a Dreitg: «cau ei stau sententiau, che schinavont ch'el hagi era dreitgs, nomnadameing davart Florin Sura, deigi el haver stgisa de star si, et ent siu Nom deigi Gion Wenzut da glez tems Saltèr de Musté sèrr ent sco Derschader.

Sin quei garegia il nomnau Gion Berchter puspei, che la bref vegni legida si, la qualla suenter in Umbfrag faitg de mei nomnau Derschader ei con sentenza stada enconoschi-

da de tethlar; Suenter quei han ils nomnaus garegiau tras lur Messadur, ch'in Dreschader les truar ad els, ch'ell'aua podessi flessigiar, e cuorer sco daveilg, e suenter dir della sententia, ner aber responder pertgiei els veglien quei buca schar? Cau ei stau avont Dreitg Gielli Ortschei e Gion Janin con lur Messadur Pedrut Jenett da gliez temps Banner-Meister, manegiont che la bref fuss memia veglia, e che doves portar nagin donn ad'els; pertgiei che ditg suenter quei seigi ju giu ina bova, ch'els haigien patiu ton e pli gron donn, ch'els: l'aua seigi era mai manada, ne dovrada autra visa, pertgiei che davont temps seigi ei stau in frust prau d'in num Florin-Sura, e Chamischolas Sura; parquei manegien ei bein d'haver dreitgs; perquei han ei se offeriu, et era garegiau de schar vignir sin la Uaitgia, e sin quei han ei schau schentar a Dreitg, schei possien haver la Uaitgia, ner tgei che dreitg fussi, et ei stau enconoschiu, ch'ei possien haver la Uaitgia, e deien per quella gada haver respondiu, ressalvont sche la counterpart vignies a ciun-char giu: Sin quei han ils vivont nomnai tras lur Messadur replicau, che la Fonatuna che surveschi a Florin Sura et Sutt, seigi lunsch plin giu, che nua che la bova seigi rott'ora; et con quei han è manegiau de metter giu l'Uaitgia, e de restar tier lur Sententia veglia, il qual ei bucca daventau, sonder cun sententia e schau enconoschiu, e schau tier l'Uaitgia, e schi bauld sco ei seigi commoditat agli nomnau Derschader et Oberkeit et el vegni a vignir avisaus, et era ch'ils nomnai Gion Berchter haiggien faitg kundt e de saver agli counterpart, che domischduas pars possien vegnir con pardetgias e brefs, sco els manegien d'haver e sin quei sche hai jau nomnau Derschader tras lur avüs clamau tut gl'Oberkeit de vignir con els sin l'Uaitgia, e lau sessy a Dreig muort lur domendar, et muort il Dreig, ner Giustia, e pi il Mistral Durig Berchter ha priu stgisa, et ei staus si, e mess en siu stailg, et auctoritat il nomnau Derschader Gion Wenzut; avont il qual, et ina entira Dertgira een company cun lur Messadurs ils vivont nomnai, et han domischduas parts garegiau de muossar las stuschonzas, e nua la bova seigi rutt'ora, e nua l'aua neschi; cau ei stau con sententia enconischiu, ch'il ploing avont mussar, e lau suenter possi era la counterpart mussar, in'e lautra part schi ditg sco ei veglien con tuta lur pleina, e buna satisfactiun; Sin quei sun jau nomnau Derschader con ils giraus jus si tier la fontauna nua ch'ella nescha, et era mirau nua la bova seigi ida giu, e puspei suenter l'aua toccan giu dim, e suenter quei che scadina partida ha giu mussau suenter lur bien-plascher e satisfactiun, lura sun jau nomnau Derschader puspei sesius a Dreig sur la Strada denter Florin Sura e Florin Sutt, nua che domischduas parts en stadas enten contradictorio manegiont scadina d'haver raschun; cau han garegiau ils savens nomnai Gion Berchter, Mistral Durig e Gion Martin de tetlar las pardeggias, il qual la part contraria ha bucca voliu schar tier, aber la Dertgira ha tatlau quellas; Suenter quei han domischduas parts schentau a Dreig: Sin quei ha jau nomnau Derschader emparau entuorn per il Serament, e suenter gl'umbfrag ei stau sententiau einhellig, qualmeing ei sesafli con pardetgias, che cur ch'ei crudi malas auras, sche vomien ils nomnai Gielli, e Gion si et endrizeschan l'aua anèn viarz ent'il dreig dûug, adero enten il duug pli giu dim, che va per la plauncha da maun saniester cur ch'in va ensi, lau si eis ei ils funs de Chamischollas sura, et han nagin dreitg tier l'aua, schi pauc sco ils duugs dadora; e tier quei laien ei

esser etc. E la bref veglia laschein nus esser enten sia vertit e Kraft la quala plaida aschia:

A Tuts quels che vesan ner auden legien questa bref segiein nus cau nomnai, Peter vivens e Gion fargliuns legitims fegls de Gion Padrutt da buna memoria, natifs de Tujetsch e Vischins da Chamischollas Sura, de saver, e confessein aviartameing con questa bref ton per nus, sco per nos Artavels vgnient Suenter qualmeing nus havein giu dispetta con ils hondreibels vischins de Florin sutt e Florin Sura, ils quals han funs ent Florin sura vid il dutg u fluss che cuorra dadora la baselgia giu, davart l'aua che veing giud la vall de Landadusa; cau ei stau enflau con verdat, e con engirau serament, sco era con aviert Dreitg et giustia a Musté, sutt la Glienda, che nus nomnai frars, nos artavels, è nos vignir suenter, sche nus essen morts, haveigien nagins Dreigs tier la vivont nomnada aua davart il funs che nus havein enten Chamischollas sura; tucont tier aber ils Vischins de Florin sutt, e Florin sura ch'en sessents ora dim il vitg han con dreitgia raschun avon tuts auters buns Dreigs, e nagin auter sin tiarra; ei sesafla era con la sezza raschun, a Dreig, ch'ils nomnaus vischins de Florin sutt deigien haver part da quella aua ton sco els han de baseings per lur casas e per lur biestgiam, bucca aber pli che lur baseings a buna fei, senza malard etc.

Nus nomnai frars havein era scrit quei con lubienscha, con saver, e veglia digl venerabel Sgr. Avad Johannes, e dilg Junker Heinrich de Ponteningen da gliez temps vugau della Clastra de Musté; e per ina ferma e perpetna Sigironza de tutas quellas caussas, che staten cau scritas, havein nus con tutta deciartadat rogau nies gratius Segniur Avat Johannes, et era il nomnau vugau, il qual ei era sesius a Dreig sut la Glienda davart las nomnadas caussas, e puings, ch'els domischdus pendessen aviartameing lur sigils vid questa bref; che quei seigi tut daventau con nossa veglia, e saver e tras deciartameing rogau dilgs nomnai treis frars, havein Nus Avad Johannes pendiu Nies agien sigill aviartameing vid questa bref, la qualla ei scritta a Musté sin la Vigielgia de S. Martin, gl'onn suenter la neschienscha de Nies Segnier tredischtschient a sisonta otg. 1368

Da quei eran pardetgias Junker Christophe de Rinkenberg, Junker Ulrich de Pontaningen, Ulrich de Baroldt da gliez temps Mistral de Disentis, Gion Burgli hügli de Chamischollas, Rudolph de Rieffen, Heinrich de Saliangen et auters hondreibels vischins dela Casa da Diu biars et deiggia avonda etc.

Da quella sententia han ils nomnai Gion Berchter, Mistral Durig e Gion Martin domendau ina testimonianza suenter il Dreig, la qualla suenter haver domendau entuorn da mei Derschader ei stada tras sententia enconischida de dar il Sigill dilg Cumin etc. E per vera perdertgia de tut quei ei confirmau e pendiu aviartameing il Sigill de Nies Cumin vid questa bref, la qualla ei dada ent'il Meinz de Zercladur gl'onn suenter la Neschienscha de Christi nies char Segner 1517.

E schinavont che questa bref entras lieherlihedat ei buca stada observada, et ida anavos, sch'an domischduas pars, et Interasas con consentiment e Lubienscha d'in Lud Oberkeit de Disentis garegiau da mei Conradin de Medell, da gliez temps Landschreiber de Disentis, et era Bunds-Schreiber della Lud Ligia Grischa, che jau deigi copiar, e scriver giu deno-

vameing; et aschia confess jau nomnau Landschreiber per miu Serament, che questa bref seigi screta giu, e confrontada de plaid a plaid, con il ver Original, u bref veglia, che haveva eung si perfetgiamein il Sigill dil Cumin e concordava en tut e pertut con quest: Per perdetgia da quei ha il Lud Oberkeit de Disentis tras rogar de domischduas parts schau metter daniefen si il Sigill dil Cumin vid questa bref Gl'onn 1664 gl'emprem de Zercladur. Muster, ils 28 da november 1834. Sin rogar de Sgr. Mistral Venzin, Gion Chrest, da Tujetsch vegr ei per Enconoschescha dil lud. Oberkeit, cun consentiment dils Sgrs. Gieraus Gion Chrest Mon e Gion Andriu Berther de Tujetsch, attestau e certificau che la sura Copia seigi da Plaid en Plaid conforma ad in autra Copia mess avon al lud. Oberkeit. Pet. Anton de Latour, sco buntsstatthalter

Sigil dil Cumin della Cadi (S. Martin)

Remarcas. La scartira davontier «Davart ils dretgs per l'aua de Londadusa» ei vegrnida copiada dil suttascret ils 28 da settember 1908 dad ina copia, che sesanfla en mauns da signur Vigeli Riedi da Zarcuns, actual possessur dall'acla Flurin-sut. La davosa remarca: «Mustér ils 28 de november 1834. Sin rogar...» ei copiada digl original. L'entira scartira sesanfla sin ina boga en format da folio, treis paginas pleinas senza ur, ed ei scretta en schubra e biala scartira. Ord questa scartira seresultan denter auter suandontas notizias:

1. Flurin-sura fuva ei casas ed ina baselgia, la quala era buc lunsch dadens il dutg grond.
2. A Flurin-sut fuv'ei casas: ins encorscha aunc ussa treis suloms in sper l'auter grad sur il baghetg dad uss.
3. Duritg Berchter, ch'ei staus Mistral da 1513–1519, 1522–1525, 1551 e landrehter 1522/23 ei staus da Tujetsch ed habitava carteivlamein a Flurin-sura.
4. Junker Heinrich de Pantanigen era da gliez temps, 1368, ugau (Burgvogt, Thalrichter) a Tujetsch per la claustra. Prof. G. H. Muoth scriva en «Bündn. Monatsblatt Nr. 1, 1898» sur Pontaningen il sequent: «Der Hauptbesitz des Klosters Disentis lag ursprünglich wohl zu hinterst im Thale. Der Grosshof (Haupthof) oder Meierhof scheint zu Rueras gewesen zu sein. In dessen Nähe – an der allten Strasse nach Selva – lag die Burg Bultingen oder Bultringen (in Urkunden auch Pontaningen, rom. Pultengia oder Pultrengia), die ebenfalls dem Kloster Disentis gehörte. Das damit belehnte Dienstmannengeschlecht (der Burgvögte oder Thalrichter) auf Bultingen hiess daher von Bultingen oder Bultringen etc., während das mit dem Meieramt (villicatio) zu Rueras belehnte Geschlecht das Prädikat von Rueras führte.»

«Die von Bultingen (Pontaningen etc.) und von Rueras sind die einzigen Adelsgeschlechter im Tavetscherthal aus der Feudalzeit. Sie allein erscheinen im alten Anniversar von 1456 mit dem Prädikat «Junker». Die von Bultingen kommen urkundlich zuerst 1252 vor (Wilhelmus, miles de Bultininga); eine Urkunde von 1285 bezeugt, dass sie Dienstmannen des Klosters waren (de Tivez ministeriales: dominus Hugo, miles de Pultaningen, Wilhelmus frater suus).»

«Der bedeutenste Mann dieses Rittergeschlechtes war der Abt von Disentis, Peter von Pontaningen (1402–1438), der bekannte Stifter des Grauen Bundes vom 16. März 1424.

Im XVI. Jahrhundert scheint die Familie ausgestorben zu sein. Die von Rueras waren weniger bedeutend. 1399 erscheint ein Martin de Ryfären (unzweifelhaft da Rueras) als Landamman der Landschaft Disentis (minister provincialis totius Desertinensis terrae).» Oberst Rudolph von Hess-Castelberg scriva: «von Pultingen, Pultrengen, Pontaninga, Pultinger. Ihr Stammschloss bei Rueras-Tavetsch. Das alte ritterbürtige Adelsgeschlecht. Peter, Abt zu Disentis 1401–1439; seine Schwester Cilia des Junker Peter von Pontaningen, eheliche Tochter verkauft 1402 das Gut (Schloss) Wurzenstein (Ragisch) bei Disentis mit allen Rechten und Zehnten auch zu Mompe de Medels an Ulrich Barlotta, Ammann zu Disentis. Das Geschlecht (Pontaninga) kommt in vielen Urkunden vor. Archiv von Mompe de Medels, Ilanz, Synopsis in Disentis, Juvalt & a.m.» cf. Archiv von Oberkastels

### **Putnengia**

1404, 1. Mai. Abt Peter von Pontaningen und Convent des Gotteshauses zu Disentis geben den Talleuten zu Medels die Alp Butzollas mit allen Rechten und Zugehör den zu Lehen gegen einen jährlichen Erblehzins von 4 Schilling an Wert Käs auf St. Martin im Hof zu Disentis abzuliefern.

Document egl archiv da Platta-Medel

### **Uoppen Putnengia**

Unterhalb Dieni... (mira Derichsweiler «Das Tavetsch») ...Sein nebensstehendes Siegel von 1438 zeigt die Burg im Wappen. Die teils zerstörte Inschrift des alten Wachssiegels lautete: (S) DNI. PETRI. ABBATIS (Mo) NASL. THISERD (INENSIS), d. h. Siegel des Herren Petrus, Abt des Disentiser Kloster.

W. Derichsweiler, «Das Tavetsch», manuscript



Uoppen Putnengia

### **Emigrazion**

#### **Disfortuna**

Sur la disfortuna dad Anselm Muggli da Sedrun staus ella California  
mira Gasetta Romontscha nr. 3, ils 17 da schaner 1868 (mira era en nr. 12)

#### **America**

In emigrau Tuatschin, che sesanfla gia varga diesch onns ell'America ha dacuort notificau a nus, ch'ei seigi tras la Ligia Grischa da Stillwater, vegniu fundau ina nova colonia cul num Badus el territori da Dakota. Scadin commember dalla uniuon grischuna ha stuiu pagar 15



Ils Loretzs els Stadis Uni

dollars daner d'entrada e lu aunc in dollar per meins pil cuoz da 15 onns. Cun quels mettels han ins acquistau in adattau plaz per secollocar leu tuts ensemen. Quel ei vegnius anflaus ellas prerias da Dakota, 300 miglias el vest da Stillwater. Il mars 1879 ei lu setratg leu ina gronda partida, che ha entschiet a baghegiar casas amiez ils praus entuorn in lag. Igl ei cheu ranschau en ina ustria, ina stizun ed ina posta jamnila. Badus sesanfla denter duas novas viasfier en, ella distanza da treis tochen tschun uras. Las casas ein baghegiadas si cun aissas e biaras mo da tschespets, ch'ein leu fetg qualificai per material da baghegiar. En munconza da lenna vegn ei barschau fein e cotbla da crap. Igl ei vegniu construiu ina casa da scola, che surveasca ad interim era per baselgia inagada il meins. Il liug Badus s'ingrondescha di per di e la Ligia Grischa ei renconuschida sco corporaziun, che ha ils dretgs da vender e cumprar tiara. Ils gronds e bials èrs han leu stupenta parea.

Possi il Badus american crescher e flurir pli e pli!

Gasetta Romontscha nr. 31; 29 da fenadur 1880

### Emigraziun

Riedi Johann Anton von Rueras, Tavetsch, studierte im Kloster Disentis, zog dann nach München, wo er Bayerischer Finanzrat wurde. Als solcher findet er sich viele Jahre im bündnerischen Staatskalender. Er starb um das Jahr 1840.

Die Tavetscher zogen mit Vorliebe nach Bayern, wo sie Vermögen und hohe Stellen erlangten. Eine Familie Hendry zog nach Bayern, wo der Name in Herdry umgewandelt wurde. Der 1927 verstorbene Bischof von Regensburg war Anton Händly. In dieser Familie herrschte noch die Überlieferung, dass sie aus der Schweiz stamme.

Obwohl wir die Bündner im ausländischen Handel nicht berücksichtigen, wollen wir hier doch eines Tavetschers gedenken. Deplaz Josef aus Selva kam um 1820–1830 nach Bayern. Er gründete eine Molkerei in Regensburg. Sein Sohn Johann Josef Deplaz erwarb sich in Regensburg ein Paramentengeschäft mit anderen Artikeln kirchlicher Kunst. Er starb 1925. Sein Geschäft hat jetzt ein Bruder, Anton Deplaz und sein Schwager.

Bündner im Ausland von J. Simonet / Bündner Tagblatt nr. 40 il 16 da fevrer 1929

## Notizias davart la pleiv

### Fondationsbrief der Kaplanei in Sedrun 1749

Von Gottes Gnaden Joseph Benedikt Bischof zu Chur, des heiligen römischen Reichsfürst, Herr zu Fürsten-Burch und Fürstenau u. s. w.

Thuen Kund und fiegen hirmit mäniglichen Wissen, demnach einer ehrsamen Kircherung und Gemeinde zu Davetsch unseres Bistums Chur allforderst zur Befürderung der Ehre Gottes und der Seelen Heil, dann auch in der sonderbaren Absücht damit die Jugend im Lesen und Schreiben, auch anderer guotten Zucht um zu besser unterrichtet würden möge, mit Consenz und Genemhaltung hochgeistlicher Behörde ein Caplaney-Beneficium allda an Ort Davetsch aufzurichten sich entschlossen. Zu dem Ende auch teils aus milde Guttäter und anderweitigen Beyträgen bereits sovil zusammengebracht, dass ein Caplan daraus, obwohl nicht sein vollkommene Congruam gehaben, doch ehrlich erhalten werden kann. Mithin aber muss als des ständigen Ordinarü und Errichtung und Einsetzung dieses so abgesehenen Caplaney-Beneficiums gehorsamst bittlich angegangen: solchem nach haben wir aus abtragende bischöfliche Hirtenamt, welches von uns erfordert alle zu Vermehrung Gottes Ehre und der Seelenheil abzielende gutten Absichten kräftigst zu unterstizen, diese der Kircherung Davetsch hegende löbliche Intention in allweg gebilligt und anbegenehm und demezufolg bewilliget, dass sotanes Caplaney-Beneficium unter nachstehenden Bedingungen errichtet und eingesetzt werde, nembllich zum:

Erstens haben Particular-Guttäter zu diesem Beneficio bis dahin gestiftet und demselben wirklich zugeeignet zu sovil Schuld und Capitalposten zusammen 1576 fl. 56 kr. Die Gemeinde Davetsch selbst ein Capital von 500 fl. Von der Pfarr Pfrund allda werden ebenfalls in Capitali hergelassen und zur Caplaney gewidmet 500 fl., welche ein jeweiliger Pfarrherr dem Caplan jährlich 25 fl. zu verzinsen hat.

Sodann und des witern soll zu Verbesserung dises Beneficiums aus der dortigen Filial-Kirche die nach Befund darübergehaltenen Untersuchung soviel wohl erübrigen können, mit unserer Bewilligung herdangenommen und demselben incorporirt werden als von

St. Luzi Filial Caplen 400 fl.  
von St. Antoni Caplen 100 fl.  
Und ebensovill von St. Anna Caplen, nemlich 100 fl.

Welche Unterschied zusammen eins nachher in Capitali ausmachen 3176 fl. 56 kr.

Über dieses alles soll nun ein ordentliche Verbarium errichtet, die Capitali wohl verbewirtet und dem Caplan sicher und verzinslich an Handen gestellt werden, derselbe davon auch die jährlich abreissenden Zinsen zugewiesen werden.

**Andertens** soll die Gemeinde schuldig und verbunden sein ihrem Caplan eine anständige Behausung sammt Krautgarten beizuschaffen, auch ihm so lange bis das Beneficium in completen Zustand kommet, mit dem notwendigen Brennholz zu versehen und ohne seine Kosten zum Haus zu befördern (führen); Caplan aber die Behausung aussert dem Haubtgebey selbsten in baulichen Ehren zu erhalten schuldig sein. Vas aber

**Drittens** die Beleuchtung und Paramenta zum hl. Messopfer anbelangt, solle ihm so eines als anderes von der Pfarrkirchen subministriret werden, den Opferwein aber er selbst und die Hastien der Messner beyzuschaffen verbunden sein. So viel es und

**Viertens** die einem Caplan obliegenden Schuldigkeit und Vorrichtung anbetrifft, solle derselbe dem Pfarrherrn in Gebühr untergeben und ihm in Subsidio curae Animarum verhülflich anhandengehen. Dann

**Fünftens** zu der Gemeinde mehrer Bequemlichkeit einstmalen und bis das Beneficium in completen Stand gestellet wird, nur an Sonn- und Feyertagen die Frühmess zu halten schuldig sein. Nicht weniger wird ihm

**Sechstens** auch auferkegt für die Gemeinds-Kinder ohne Unterschied sowohl zu Sommer- als Winterszeit Schuol zu halten und selbe im Schreiben und Lesen zu unterrichten. Sonderbar aber auch die Jugend alle Samtage nach Mittag in der Christenlehre zu unterrichten.

**Siebtens** ist er verbunden für die Stifter und Guttäter insgemein allmonatlich ein hl. Messopfer: für drei Guttäter insbesondere aber, welche 300 fl. gestiftet, alljährlich und eines jeden Jahres besonders die hl. Messe zu apliciren.

**Achtens** und letztlich aber solle das Jus Patronatus und Collatur dieses Caplaneys-Beneficiums der gesamten Pfarrgemeinde Davetsch in Conformität, wie zu der Pfarrprund vorbehalten sein. Sollte mittlerweile, wie zu hoffen stehet, dieses Beneficium vermehret und gar in completen Stand gestellet werden, behalten wir uns und unseren Successoren befor, nach Gestalsamen der Sachen dem Caplan auch seine Obligenheiten und Verrichtungen zu vermehren.

Alles getrüblich und ohne Gefärde. Und dessen zu Verkünden haben wir gegenwärtig Stütz- und respektive Erections-Brief eigenhändig unterschrieben und mit unserem bischöflichen Kanzley-Insigil bewaren lassen. So beschehen in unserer Residenz zu Chur den 4. Juni 1749.

Jo. Baptia,

Kanzler.

Copiau ils 25 da december 1907 dad ina copia, che sesanfla egl archiv episcopal a Cuera.

### **Sedrun (baselgia)**

Sedrun (Tavetsch), Voderrheinthal, Bezirk Vorderrhein, Kirche S. Vigilius, Herrn Obersten R. v. Hess-Castelberg verdanken wir folgende Mitteilungen:

Der Ursprung der Kirche ist wahrscheinlich in einer von den Rittern von Pultingen gestiften Kapelle zu suchen. 1205, 26. Juni: dedicatio ecclesiae S. Vigilii (Anniversar von Tavetsch). 1408, Mai: consecratio altaris inferioris in honorem S. Mariae virginis, l. c. fol. Xa. 1491, 4. Dec.: frater Balthasar, Bischof i. p., Generalvikar des Bischofs Heinrich von Chur consecrit die Kirche von Tavetsch mit 3 Altären (Urkunde Nr. 87 im Kirchenarchiv Tavetsch). 1617 hat man den Glockenturm neu gemacht. Kostet 50 fl. Rheinisch (Anniv. von Tavetsch, fol. XIX a). Maler Diog von Tavetsch schmückt ihn mit dem Bilde des hl. Georg (Theobald, «Das Bündner Oberland, p. 112). 1630, Juni: Bischof Joseph v. Mohr consecrit den Mittelaltar zu Ehren der hl. Brigitta (Anniv. fol XIV b). 1658, 4. Sept: Bischof Johannes Flugi von Aspermont weiht den Altar der hl. Anna im Chor (Urkunde Nr. 88, Archiv Tavetsch). 1691: Neubau der Kirche an Stelle einer älteren und kleineren Kirche. Das Datum an der Façade. Der an der NW-Seite des Schiffs befindliche Thurm rom. («Anz.», 1876, S. 717). Daran die Reste eines Christophorusbildes. Spätgotischer Schnitzaltar im S. Kreuzflügel. Der staffelartig überhöhte Schrein mit einer Bekrönung von schönen Laubwerk enthält die Statuetten der Madonna mit dem Kinde zwischen 4 männlichen Heiligen. Die Innenseiten der Flügel sind mit den Reliefgestalten von je 2 weibl. Heiligen, rohen, gedrungenen Figuren, geschmückt, die Aussenseiten bemalt. Auf einem Chorstuhle steht die Predella mit dem halben Relieffiguren Christi und der Apostel.

R. 1873, v. Zur Statistik schweizerischer Kunstdenkmäler, VIII, Graubünden, von J. R. Rahn

Siehe: Anzeiger für schweizerische Alterthums-Kunde, Zürich, XV. 1882, p. 358.

### **Sedrun (clutger)**

Am Kirchthurm der Pfarrkirche (S. Vigilius) gilt ein grässlicher St. Georg als Jugendarbeit des Malers Diog, geboren 1764, welcher mit seinen Eltern in frühesten Jahren aus Urseren nach Tschamut übersiedelte. Das kolossale Bild ist wie ein Tableau eingerahmt, soll übrigens übermalt sein.

(von S. Vögelin)

v. Anzeiger für schweizerische Alterthums-Kunde, Zürich, 1886, Nr. 4, pag. 338.

### **S.Vigeli**

Mit welchem heiligen Bischof Vigilius haben wir es in Tavetsch (Sedrun), das die einzige Vigilius Kirche der Diozese besitzt, zu tun? Das alte Churer Kalendarium zeigt eine von Italien herkommende Spur: in ihm hat einzig der am 26. Juni 405 als Märtyrer gestorbene Bischof Vigilius von Trient Aufnahme gefunden. Ebenso wäre indes denkbar, dass die 1229 erstmalig bezeugte Kirche ursprünglich den am 11. März 684 gestorbene Bischof Vigilius von Auxerre zum Schutzpatron gehabt hatte; steht doch das Vorhandensein von Reliquien dieses heiligen für Pfäfers vom 9. Jahrhundert an fest; wie

leicht konnte dann vom gleichen Heiltum auch ins Bündner Oberland kommen und dort bei der Wahl des Kirchenpatrons das entscheidende Wort sprechen.

Farner Oskar, Die Kirchenpatrozinien des Kt. Graubünden 1924, pag. 121. (Jahresbericht der Histor.- antiq. Gesellschaft von Graubünden 1924)

## **Notizais sur dalla via Alpu**

### **Pass Alpu**

«La via sull'Alpu avon la vischnaunca a Mustér e Tujetsch».

mira Nova Gasetta Romontscha nr. 49 ils 6 da decembre 1861

### **Rueras**

Ils vischins da Rueras – la residenza dils vegls diplomats tuatschins – ein era malcuntents, che la via mondi sul vitg ora. Sin lur instanza ha la vischnaunca da Tujetsch medemamein concludiu da far da quellas varts novs pass tier las autoritads. Ella ha semus-sau denton pli mala e pli carina ch'ils da Mustér. Ella vul, ch'ei vegni midau giu quella direcziun senza che la cumissiun vegni sin ina uatga e caschunassi considerabels cuosts alla vischnaunca. Ch'ei va vess da vegnir ora culla buorsa per da quels fatgs, ei da capir, denton manegein nus tuttina, ch'ils Tuatschins vegnien ad envidar en tier els la cumissiun dil stan, inaga ch'ella ei tochen a Mustér, per schar ver quels signurs lur stupenta vallada e schigiar lur gustus magnuc-caura e lur famus mèl alpin. Ne bétg? Gie, lu pon las bialas da Rueras sefar si e clamar tier a quels signurs sisum il vitg: «Vegnien giu tscho, tscho ei nairas!» Nus agurein denton bien success e ventira als da Rueras, mo ei para bunamein sco sch'ei smanatschass in castitg ad els, perquei ch'els han vertiu da schar metter maun vid il venerabel monument da lur renomau convischin dil fundatur dalla Ligia Grischa, Pieder de Pultengia, e schau menar si nuegls e clavaus cul material da quella respectabla antiquitat!

Nova Gasetta Romontscha nr. 17, 25 d'avrel 1862

### **Via principala**

Finalmein ei la via sul Cuolm d'Ursera scretta ora cun quella sulla Bernina. Quei che vegn baghegiau, ei partiu en duas secziuns, l'emprema dil vitg Mustér tochen sils cunfins da quella vischnaunca, ina lunghezia da 6400 meters ni 21333 peis swizzers. La secunda secziun va dils cunfins da Tujetsch tochen en S. Brida, dador Selva, 6500 meters, ni 21800 peis. Tochen ils 10 da zercladur ston quels, ch'han tschaffen da surprender da baghegiar quella via dar en lur offertas al signur capoinschigner Salis.

Nova Gasetta Romontscha nr. 22, 29 da matg 1862

### **Via Alpu**

...l'emprema secziun dalla via sull'Alpu, naven da Mustér tochen tiels cunfins da Tujetsch, baghegia Frik da Cazas e Ghilmetti dalla Lombardia, la secunda secziun, che

va tochen S. Brida han ils frars Berther da Tujetsch e comp. da baghegiar. Gl'uoost 1863 dueien quellas duas secziuns esser finidas. Las lavurs vegnan ad entscheiver aunc quest meins; per direger e survigilar quellas ei signur inschigner Depuoz destinaus.

Nova Gasetta Romontscha nr. 25,  
18 da zercladur 1862

### Via Alpu

Vid la via nova sull'Alpsu ein ussa circa 300 luvrers occupai, buna mein tut Taliens. Schigleiti sco quels han udiu da quell'interresa, ein els dai neutier sin tuts mauns; ins ves'aschia ch'ei maunca nuota luvrers, mo donn ch'ils romontschs fan pintga concurrenza ed ein ella cumentientscha cullas tschaveras ed ella perseveronza da luvrar fetg anavos als Tessines e Lombards. Ferton che la via en Surselva vegneva ils davos onns baghegiada digl interprendider cun perdès e buca tras sutaccordants, han ils impressaris dalla via sull'Alpsu dau vi quasi tuttas lavurs en accords. Denter ils sutaccordants eis ei mo ina cumpignia romontscha.

Nova Gasetta Romontscha nr. 28, 10 da fenadur 1862

### Via Alpu

Ina correspondenza d'in sempel pur da Tujetsch che selamenta sulla via nova tras Tujetsch


mira: Nova Gasetta Romontscha nr. 37 – ils 12 da settember 1862

Ina buna replica «Tarmess en» sin nr. 37 suonda en

nr. 39 – 26 da settember 1862

«La via sull'Alpsu»

Artechel en nr. 45 – 8 da november 1862; Nova Gasetta Romontscha



Via Alpu da 1862

### Stradun

La davosa secziun dalla via sulla Alpsu, da S. Brida tochen si tiels cunfins uranès ei surdada da baghegiar a signur Plattner da Cuera, che ha construiu la via da Trun tochen Mustér. Finalmein han era ils Uranès dau ina entschatta culla via da lur maun. (8100 meters liunga)

Nova Gasetta Romontscha nr. 25, 1863

## **Via Alpu**

La via sur l'Alpu, da Mustér tochen tier ils cunfins uranès ha custau 362 360.– francs. Subsidi dalla Confederaziun per l'Alpu 200 000.– francs. La via en Surselva da Rehanau a Mustér ha custau 617 503.– francs.

Gasetta Romontscha 21 da matg 1869

## **Manteniment dallas vias**

Discussiun generala el Cussegl grond sur il niev project per manteniment dallas vias. Il paragraf 3 sulla cunfinaziun dils pass alpins dallas vias da communicaziun: Alpu, Lucmagn, Albula, Bernina, Fuorn e Flüela ha dau bia da far e cun 31 vusch encunter 30 ei sin proposizion da Peterelli e Manatschal stabiliu, che per regla duei vegnir considerau, ch'il pass alpin sestendi mo dalla davosa vischnaunca da quest maun dil cuolm tochen tier l'emprema vischnaunca da tschei maun dil cuolm.

Condrau ha garegiau, ch'ei duei vegnir quintau, che ils pass Alpu e Lucmagn entscheivien buca pér a Sedrun e Platta, mobein el vitg da Mustér e quei tenor cunvenziun fatga cul cantun 1861. Il Cantun hagi quasi sfurzau si a Mustér e Tujetsch la strada dall'Alpu e sulettamein garegiau, che quellas duas vischnauncas surprendien l'expropriaziun, il dar il material, menar la gera, mo ussa vegli ins far surprender ellas gl'entir manteniment. Ella cunvenziun dil cantun serrada giu culla Confederaziun hagi il Cussegl grond claramein declarau da surprender il manteniment naven dil vitg da Mustér tochen sils cunfins uranès. Per far la segira hagi la vischnaunca da Tujetsch aunc giu fatg dar il cumissari guvernativ in agen revers, ch'ella seigi mai e pli mai obligada da purtar pli grondas grevezias pil manteniment dalla strada dall'Alpu ed ussa duei tut vegnir fierdad ina vart. 1840 hagi Tujetsch dau en cullas outras vischnauncas sursilvanas sia scar-tira da mantener la via nova e garegiau che quella vegni baghegiada tochen Rueras, mo la cumissiun cantunala hagi 1841 declarau, che la strada sursilvana mondi mo tochen Mustér. Uss denton veglien ins far ir ella tochen Sedrun e quei en contradicziun cun cunvenziuns cul Cussegl grond e culla Confederaziun. Quei seigi in agen dretg statistic, che la dertgira federala vegni ualvess ad approbar pil cass d'in recuors. Dad aunc far mantener Mustér la strada dall'Alpu tochen sils cunfins da Tujetsch e quella dil Lucmagn entochen la punt sper l'uniu dil Reinsu e Reinmiez, vegni ei cargau si a quella vischnaunca il manteniment d'ina tenda vias ella lunghezia dad 11 kilometers! Cheu encunter ei vegniu allegau, ch'ins hagi a siu temps concediu memia bia a quellas duas vischnauncas, ins stoppi tractar ellas sco las otras, da Mustér a Sedrun seigi negin cuolm, mobein ina biala vallada. Il davos ei vegniu, che la strada dil Lucmagn duei il cantun muort siu difficultus terren mantener naven dil vitg Mustér, l'Alpu denton pér naven da Sedrun.

Gasetta Romontscha nr. 24; 11 da zercladur 1880

Il niev project stablescha che tiels pass alpins dallas stradas da communicaziun, hagien las vischnauncas territorialas da prestar l'expropriaziun, schar prender il material, menar

la gera e dar ils necessaris umens per gidar a rumper via ni nua che la communicaziun vegn interrutta en cass extraordinaris. Gl'ulteriur manteniment ha il cantun.

Gasetta Romontscha nr. 24; 11 da zercladur 1880

## Resultat

Tenor ufficiala publicaziun ei il niev project pervia dil manteniment dallas vias vegnius refusaus cun 5810 encunter 5782, aschia cun ina majoritad da mo 28 vuschs.

Gasetta Romontscha nr. 25–23 da zercladur 1881

## Notizias sur da disgrazias en Tujetsch

### Pestilenzas

Ein romanischer Auszug aus der verloren gegangenen Annalen des Klosters Disentis berichtet folgendes: Wiederum unter Abt Nicolaus Tyron, den 60ten Abt, ist in unserer Gemeinde eine giftige Pestilenz (tussegada pestilenzia) ausgebrochen, es war dies im Jahr 1584 oder 1585, welches daher das grosse Sterbejahr (igl onn della muria gronda) genannt wird, indem damals (laut Bericht) in unserer Gemeinde d. h. in drei Pfarreien starben: zu Tavetsch 800, zu Disentis 500, zu Somvix 450 Personen.

Brügger Natur-Chronik pag. 33

### Pestilenza 1637

Nachdem die Pest um Chur herum viele Menschen, und vorzüglich den Churer Bischof Josephus Mohr, hinweggerafft hatte, fing sie auch in Tavetsch zu wüthen an. In kurzer Zeit mussten 70 Personen diesem Übel unterliegen. Die Leute bekamen äusserliche Beulen und dies war ein Zeichen des Todes. Um diesem Übel einigermassen vorzbeugen, schrieb der Abt Augustin nach Oberhalbstein an den Praefect der Patres Capuciner, um von ihm ein Gehilfe zur Seelsorge zu bekommen. Er schickte den P. Amadeum von Montera dahin, der mit vielem Ruhm den Kranken, und Sterbenden vorstund.

Ein gewisser Landammen mit Namen Udalricus de Florin, wurde einer grossen Beule an die Seite gewahr. Er glaubte, wie andere, dieser wegen unfehlbar sterben zu müssen. Er überlegte die Sach, als ein vernünftiger Mann, und dachte bei sich selbst: sterben muss ich dennoch, somit wil ich die Beule selbst mit dem Messer aufschneiden, um zu sehen, welches Gift darin verborgen liegt. Er schnitt sie auf, und es rannte heraus vermodertes Blut, und Wasser, und eine Gattung von Korn, wie Hirsensaamen, und er, und alle, die dieses vornahmen, wurden gesund.

Diese Pest näherte noch im selben Jahre 1637 gen Disentis auf Segnas zu. Der Abt stellte deswegen öffentliche Umgänge, allgemeine Gebete an, und gelobte künftighin nach der Complet die Lütanejen der Muttergottes im Chor abbeten zu lassen, wenn diese Plage aufhören würde und sie hörte auf.

P. Placi a Spescha Kurze Beschreibung der Landschaft Disentis pag. 185 ff.

### **Trest cass**

Gliendisdis eis ei succedi a Selva (Tujetsch) in trest cass. In mat carschiu, ch'ei avon entgins onns vegnius menaus anavos ord la Germania sco in stuorn e semuossa era a casa beinduras sco tal, schegie ch'el saveva leu luvrar dis ora sco in um da giudezi, ha mazzau siu agen frar – in affon en tgina, ch'el veva tschelluisa il pli bugen da tut ils auters fargliuns.

Nova Gasetta Romontscha nr. 19 1862

### **Sventira a Rueras**

En Tujetsch ei sonda vargada, ils 20 da zercladur, succedi ina sventira. In buobet da 9 onns, che mava cun duas vaccas sulla punt da Rueras vi, ha tras ina da quellas survegnui in stausch, ch'el ei daus giu ell'aua. Spert ein curri neutier glieud, mo pér sut Sedrun giu eis ei reussiu da trer igl affon miert ord il Rein. Ei era in affon d'admirabels dunnis, sia spiritusa sorettu dad endisch onns funcziunescha sco telegrafista a Mustér – dus orfans dil defunct secretari guvernativ Mucli.

Nova Gasetta Romontscha nr. 26 1863

### **Disgrazia**

In pastur da Tujetsch ha sur il lag da Tuma sper il Badus anflau l'ossa d'in carstgaun, carteivel d'in mistergner che ha avon onns falliu la via sur l'Alpsu.

Gasetta Romontscha nr. 33; 13-8-1869

### **Disgrazia**

Dacuort ein dus pigns mattatschs da Tujetsch dai ell'aua en dus differents loghens e fus-sen stai ventschi senza spert agid. In da quels ei daus ell'aua si mises ed ei vegnius liberaus da siu resolut e curaschus camerat da 15 onns. Duri Huonder da Sedrun, che ha buca mo liberau la veta, mobein era tgirau il blessau cun tut pusseivel quita entochen che siu bab ei arrivaus la sera.

Gasetta Romontscha nr. 29; 17 da fenadur 1874

### **Difteria a Rueras**

A Rueras/Tujetsch, grassescha la difteria quasi en tuttas casas. Igl ei miert leu dabia affons ed auters ein aunc buca ametsch.

Gasetta Romontscha nr. 3; 18 da schaner 1878

### **Disgrazia a Sedrun**

Ils 19 da fenadur 1926 ei a Sedrun succedi la tresta disgrazia, ch'il buobet Ignaz Cavegn, in buob da 7 onns, fegl da Florentin Cavegn da Sedrun, ei vegnius smaccaus d'in grev automobil brasiliian e morts egl interval dad ina mes'ura.

Igl affon fuva serendius tier la fontauna buca dalunsch dalla casa da scola all'entrada occidentalala dil vitg da Sedrun. Spel stradun fuvi in carr postaus, che impedevi empau

la libra vesta. Igl automobil ei vegnius dall'Alpsu. El mument ch'el varga il carr, vul igl affon tschuncar la via e frunta egl automobil. Cun consternaziun ston ins prender igl affon moribund si da plau.

Il possessur digl automobil, in Tudestg, che habitescha en Brasilia e siu manischunz declaran dad haver observau pér il pli davos mument, che zatgei vivent seigi segliu encunter igl automobil senza saver distinguere tgei. Els hagien immediat tratg ils freins e reteniu il carr. Facticamein fuva quel s'avanzaus mo paucs meters sul plaz da disgrazia ora. Mo ei fuva gia memia tard. Igl auto fuva ius agl affon sur in schui ed ella diagonala sul pèz ora. Per la combrigiada famiglia Cavegn eis ei dublamein grev da piarder il benjamin dalla casa sin aschi tragica moda, suenter ch'ella ha avon paucs onns piars aunc in auter affon entras in accident (smaccaus d'ina pluna lenna). Nossa sincera condolientscha.

Gasetta Romontscha nr. 29; 22 da fenadur 1926

### **Disgrazia**

1928, ils 11 da matg ei il giuven Gion Antoni Venzin da Selva sedisgraziaus els Ruvens da Rein sut Tschamut, dadens Derval cun far nitschuns. El ei mitschaus culla veta. Dapli mira Gasetta Romontscha nr. 20; 16 da matg 1928

### **Notizias davart las alps da Tujetsch**

Adj 15. Jan. 1806

Alla Lud. Vischca de Tujetsch

La propositiun faitgia a Monsgr. Avat il di de Silvester, en num della Lud. Vischca de Tuietsch entras il bien Sabi Sigr. Mistral Gieriet e Sgr Str. Mucli, ei vegnida mess avon ad in Ven. Capitel della Casa de Diu, il qual suenter ver madirameing reflectau sur tala nova Propositiun, en consequenza della quala ei vegnies buca cargau ad Alp en general, ha viu en che tenor exprienza massi quei en prejudizi dellas Olmas, sco in era da quei avisaus bucca mo dad in, u l'auter Spiritual, sunder er'ina gada din entir Ven. Capitel dils Pisturs dellas Olmas staus admonius, cun entardar ne traleschar il survetsch de Diu domengias e firaus, nua che nies stand spiritual laschi bucca tier de concuorrer ne cooperar leutier entras novas Convenziuns, che gidassen tier tal intent.

Sche ha il Capitel concludiu bucca per siu interess, sonder per bucca dar chischun tier talas inconvenienzias, e cautras sefar particeivels dil mal, de reservar il temps, et uras, de consultar sees pli aults Superiurs, e prender giu da maun da quels en tgei e con lunsch in sepossi schar en a siu temps, e denton garegiar dalla Lud Visch<sup>ca</sup> il solet Arvê () en natira suenter Dreg, Diever et Instrument, cun rogar ed augurar, ch'igl Altissim Diu vegli era quest on dar sia gratia e benedictiun sin tuttas Alps e scharmiar igl on vegnien il s. h. muvel de tut mal, e dals thiers nuscheivels, sco El ha preservau gl'on vergau.

Actum Die et Anno ut supra

Isthaec Responsio per R.D.P. P. Basilius veith Cap. Secret.

Martinum missa est ad R. Landa. Gieriet 19. Jan.

Mira: Acta Capitularia 1799–1813 pag. 95 e 96

## **Alp Tschamut**

Annunzia. La vischnaunca da Tujetsch ei intenziunada da schar via da guder l'aschinum-nada alp da Tschamut per in onn ni per sis onns entschavend 1866.

Per quella fin fa ella enconuschent a tuts amaturs da quella alp, che quella vegni a Sedrun ils 15 da mars 1866 dada via da guder a quel, che porscha il pli grond tscheins. Quell'alp porta 140–160 arnauls gronds cun in grond diember da nuorsas vitier. Ei mera-ta da vegnir menziunau, ch'il stradun ad Ursera va sper l'alp ora, aschia ch'igl ei zun cumadeivel d'ir e vegnir. Ulteriur sclariment san ins da tut temps promptamein obtener tras la suprastonza da Tujetsch.

Nova Gasetta Romontscha 9 da mars 1866

## **Notizias sur dall'aura**

### **Nevadas**

1456, den 23. August am Tage vor S. Bartholomaei fiel im Bündner Oberland, namentlich in der Umgebung des Oberalppasses, ein grosser Schnee, der sich über Wiesen und Felder ausbreitete und das Getreide zu Boden legte, so dass es nicht mehr aufrichten konnte; darauf folgten starke Fröste einer auf den andern und richteten das Korn noch vollends zu Grunde, namentlich im Hochthale Tavetsch, wo desshalb grosse Noth entstand. In demselben Jahre war auch ein sehr schlechter Sommer, fast schlechter als der Herbst und herrschte immerdar regnerische Witterung.

1458, den 15. Oktober am Tage vor S. Galli fiel im ganzen Lande – so berichtet eine gleichzeitige Aufzeichnung im alten Jahrzeitbuch von Tavetsch, ein mächtiger Schnee und es kam von da ab bis Neujahr ein leidlich guter Winter.

Um Neujahr 1459 fiel aber wieder ein grosser Schnee und es herrschte ein furchtbar strenges Winterwetter bis auf S. Vincentius-Tag (22. Januar), da es aufheiterte... In Tavetsch blieb jener Schnee lange liegen und am 2. Mai noch war er so hart gefroren, dass man darüber gehen und reiten konnte wie auf einer Strasse; erst Mitte Mai konnte man in Tavetsch allgemein pflügen und anpflanzen; es kamen dann schädliche Reifen und beschädigten das Korn und es wurde theuer.

Brügger Chr. Natur-Chronik pag. 14 e 15

## **Gronda neiv 1566**

Nota zu wissen meniglicher dass im Jahr 1566 so man gezählt hat nach der Geburt J. Christi ist ein Schnee gesin hier in Tavetsch 16 spangen hoch am letzten härt gesin, dass ein paar Ochsen hat mögen darauf stohen, dass der Schnee nicht mehr dann ein spang hoch gesin, ist auch kein lindi ingefallen nye. desselben Jahrs hat man am letzten Tag Mayen gebuen und mit der Hilfe Gottes Allmächtigen ist es zu Korn gewachsen und viel heu worden und gar wenig Emd.

Ord il vegl anniversari dalla Pleiv Tujetsch

### Anno 1751

wahre es ein sehr kalter und spoter früling in der massen, das man alhier in Tawetsch starck umb das kohrns zeitigung in volgendem herbst gefürchtet, zu deme wahre auch besagtes ohrt im gefahr, weilen alle umbligende kircherung von heftigen vich-prest geplagt. Vor soche unheill ist diese libl. kircherung erlediget worden durch virbit ihrer hl. patronen, insonders aber der alleseligsten mutter gottes Mariae lucis, alwo man den 2. Julii processionaliter sich verfiegt. Eodem anno zelte man hier gegen die 6000 sterren kohrn ex gratia.

Anniversari vegl da Sedrun, fol. 25

### Purgina 1628

Folgendes berichtet das Jahrzeitbuch von Tavetsch: Uf diesen 19. Tag Semptembris (1628) ist ein solch grosser dicker und grusamer giftiger Reif gefallen durch das ganze Land – ja durch die ganze weite Welt, so weit als Einer hat können vernehmen – allenthalben auf einem Morgen, dass alles Gewächs: Korn, Ehmd, Win und allerlei Früchte verbrennt, uf den Grund verderbt, und wann schon etwas wenig worden ist, so hat dasselbig nüt sollen, man hat darmit weder bachen noch kochen können. Das halb Theil des Volks hat das ganze Jahr durch ohne Brod gelebt, die Richsten haben kein Brod g'han, die Armen gross Hunger g'liten, viel schier Hunger g'storben... Das viert Theil des Volks hat müssen us Noth Hus und Hof (was sie g'habt haben) um ein kleines schlechtes Geld verkaufen und ihr Vaterland verlassen... Ganze Husvölker mit Wib und Kind, viel Tausend Personen, sind allein in diesem Jahr in Niederland gen Wien oder Venedig gangen, schier zwei Hundert Personen klein und gross allein hie von Tavetsch.

Die Armen haben müssen Flachsballen, Heu und Streu ufdören, zerstossen, malen und das Mehl gessen us grosser Hungersnot. (Der Text ist eine Copie mit unwesentlichen Kürzungen und ortograph. Verbesserungen aus dem Anniversar. Sedrun fol. 36<sup>a</sup>.

Chr. Brügger, Natur-Chronik pag. 22, 23.

### Malaura

Donns caschunai dalla malaura a  
Tujetsch: 1834: 9000 flurins; 1868:  
8265 flurins

### Aura 1860

Il fenadur ei stau in ruh gast, pli  
adataus pigl unviern che pella stad.  
In alp da Tujetsch ei vegnida  
cargada da s. Giachen ed ha ils  
emprems otg dis mintga damaun  
giu la neiv el stavel! Fein vess ei  
dau pli bia che quei ch'ins mania-



Crap dall'ustonza

va, mo gl'ei da temer ch'el fetschi pauc latg igl unviern.

Nova Gasetta Romontscha nr. 31, 4 d'uost 1860

### **Tempiasta**

Ils 19 da fenadur, il medem di ch'igl ei dau tempiasta e dau giu il tun egl Uaul Cavorgia, ein tenor il Tagblatt era ils habitants da Flem tras in temporal stai en gronda tema...

Nova Gasetta Romontscha 27 da fenadur 1866

### **Purgina**

Dad ina schi ferma purgina el settember seregorda negin, denton ei quella tuttina buca stada schi nuscheivla sco quella ch'ei tenor igl urbari da Tujetsch stada in settember el gissiatavel tschentaner ed ha giu ruinau leu tut ils ers, aschia che 80 persunas, babs da famiglia cun dunna ed affons han stuiu emigrar ell'Ungaria per buca murir dalla fom.

Gasetta Romontscha nr. 39; 27 da settember 1872

### **Nevadas**

Odem il november ed all'entschatta da december 1874 ha ei dau duas grondas nevadas. A Selva e Rueras ella Val Tujetsch, eran plirs fugi ord casa per la lavina, mo per ventira ein els mitschai culla tema.

Gasetta Romontscha nr. 51; 18 da december 1874

### **Neiv**

La jamna vargada ha ei en Surselva neviu giu tochen Trun, e las davosas alps han stuiu vegnir descargadas. Sils cuolms era ei nevada, e perquei ha la posta sull'Alpsu calau si avon l'entschatta d'october, ed ins ha giu gronda breigia da rabbitschar neu ils 29 e 30 da settember ils 60–70 caval, ch'ils ustiers dad Ursera vevan priu si a tscheins per la stad en Surselva. A Tujetsch ein 76 nuorsas vegnidas en ina lavina e ventschidas. Ils èrs che eran aunc buca medi dapertut els aults, han leu danovamein pitiu dalla neiv e purgina.

Gasetta Romontscha nr. 40; 3 d'october 1879

## **Notizias davart barschaments**

### **Dau giu il cametg, Uaul Surrein**

Den 6. Juni 1744 war in Tavetsch ein zündender Blitzstrahl (Donnerkeil) in den Wald Surrhein gefallen, welcher Feuer fing, davon mehrere Tannen verzehrt wurden; mit nicht geringer Mühe konnte die Ausbreitung des Waldbrandes verhindert werden.

Anniversari da 1456

### **Camischollas, barschament**

1822, den 11. des Heumonats als die meisten Einwohner bei der Feier in Disentis und die andern in den Alpen waren und im Ort nur 3 Männer, 1 Mann ohne Pfarrer und Kaplan,

brannte das Dorf Camischolas im Tawätscher-Thal ab. Es bestund aus 15 Häusern, und ungefähr ebensoviel 16 Heuscheunen, in allem 31/29 Gebäude, und die mit Heu angefüllt waren. Die schöne Kapelle St. Anna ging zugleich im Rauch auf, und von ihr konnte nur das gerettet werden, was die Anstrengungen des H. Pfarrers Joseph Hiz, und des Hrn. Kaplans in Rueras Vigeli Venzin vermochten. Ein Kind und ein Weibsbild kamen dabei ums Leben. Man bedauert dabei 5 schön von Holz gebauten Häusern, die mit Nageldach versehen waren. – Dieses ist allenthalben ein Feuer und Hageljahr.  
P. Placi a Spescha; Scartira Nr. 178–180, 1821.

### **Colecta Buch**

worin gezeichnet wird, wass denen beschädigten des Dorfes Camischollas gesteurt wird.  
1822: den 15ten Augst.

|   | <b>f   xr.</b> |
|---|----------------|
| Aus der Domkapitelschen Kasse                   | 10             |
| Ein Ungeannter                                  | 5              |
| 1822 d. 19. August Ein Unbenanter               | 3 20           |
| mehr eine solche                                | 1 40           |
| mehr ein solcher                                | 1 40           |
| mehr ein solcher                                | 3 20           |
| Blumenthal                                      | 3 20           |
| Trawerz   | 6 40           |
| Salis   | 30             |
| In particolar de Tersnaus                       | 6 36           |
| In Anonym de Vrin                               | 3 20           |
| Ein particolar von Lags                         | 3 20           |
| Christian von Toggenburg steurht als particolar | 24             |
| Zwei Brüder von Obersaxen                       | 3 20           |
| à Altorf  | 13 20          |
| la Claustra                                     | 33 20          |
| il vitg   | 13 20          |
| las muniessas                                   | 13 20          |
| Die Gemeinde Kazis                              | 8              |
| Von Sawien                                      | 10             |
| Vom Kloster St. Luzi                            | 36             |
| Die Stadt Chur                                  | 150            |
| Die Gemeinde Razins                             | 6 40           |
| Die Gemeinde Stuls                              | 1 40           |
| La vicinantia Latsch contribuirt                | 3 20           |
| da particolers auchia trat                      | 53             |
| Contribuieu adin (sic!) Particular              | 20             |

|   |   |    |
|---|---|----|
| Vicin. Bravuogn                         | 6 | 40 |
| Fellesc. (?)                            | 3 | 20 |
| Tiefenkasten hat gesteirt               | 1 |    |
| Allvaschein tribou                      | 1 | 20 |
| Mons hat gegeben                        |   | 48 |
| Der Pfr. zu Mons J. G. Bossi            | 1 | 40 |
| il Cumen Dariom                         | 1 |    |
| Der Pfarrer von Reams Joh. Jakob Gallin |   | 60 |
| Ein Particular                          |   | 30 |
| Die Gemeinde Tinzen                     | 1 | 40 |
| Ein Particular von Sur                  |   | 30 |
| La Comunità di Bivio contr.             | 2 |    |
| Vicosoprano, particolare                |   | 30 |
| Promontogno particollare                |   | 30 |
| Castasegna à Contribuito                | 3 | 20 |
| un particolare                          | 1 | 40 |
| un altro simile im Logo...              | 3 | 20 |
| un altro simile                         | 1 | 30 |
| La Cumunita di Bondo                    |   | 6  |
| un particoler in Selg...                |   | 30 |
| Selvapiana ho do                        | 5 |    |
| un particolar ivi                       |   | 30 |
| St. Murezan ho contribuia               | 4 |    |
| Cellerina ho dô                         | 4 |    |
| ün particolaer                          |   | 20 |
| Oter hô dô                              |   | 50 |
| Pontresina ho contribojeu               | 6 | 40 |
| Qualche Particularas in Pontresina      | 1 | 12 |
| Poschiavo dato un particoler            |   | 34 |
| un altro simile                         | 1 | 30 |
| Ein Particular in Samada                |   | 1  |
| Bevers ho contribuia                    | 3 | 20 |
| Bevere Cassa Povaers                    |   | 20 |
| Ein Particular daselbst                 | 2 |    |
| Ein dito daselbst                       | 1 |    |
| Ein Zamboni                             |   | 30 |
| Jaques Zamboni                          |   | 30 |
| Scanfs ho contribuieu                   | 6 | 40 |
| Zernetz ho contreibuj                   | 6 | 30 |
| Administrator in Münster                | 2 | 36 |
| al Comun mustair a contribui            | 3 |    |

|  |       |
|--|-------|
| St. Maria contribuesschia                | 4     |
| Valcava contribuj                        | 1 40  |
| Fuldera dat                              | 1     |
| Cierf in Münster Tal contribuescha       | 2 30  |
| Lavin collectescha                       | 2 30  |
| Fettan ha contribuij...                  | 3     |
| Senta ha contribuj...                    | 4     |
| Scoul ha contribuj                       | 4     |
| Tarasp contribuescha...                  | 3     |
| Steinsberg ha contribuij                 | 5 20  |
| Guarda collectescha                      | 1 40  |
| Susch ha contrubui                       | 3 20  |
| Klosters                                 | 6 40  |
| Serneus                                  | 1 30  |
| Saas                                     | 2 30  |
| Conters                                  | 2     |
| Küblis steürt                            | 1     |
| Luzein stürt                             | 1     |
| Fideris Gemeind                          | 2 30  |
| ein Particular                           | 1 40  |
| Die Gmd. Jenatz                          | 3 20  |
| Ein Parcolar                             | 40    |
| Die Gmd. Furna Steurt                    | 2     |
| Die Gmd. Fanas                           | 2     |
| Die Gemeinde Malans                      | 4     |
| Die Gemeinde Jenins                      | 2     |
| Die Gemeinde Jgis steurt                 | 3     |
| Die Gemeonde Zizers steurt               | 4     |
| ein Partikolar daselbst                  | 1 40  |
| ein solcher eben da steurt               | 30    |
| Die Gemeinde Untervaz                    | 2     |
| Die Gemeinde Mastrilserberg              | 40    |
| Die gemeind Haldenstein                  | 1 12  |
| ein Particular daselbst                  | 1 40  |
| ein Particular daselbst                  | 26    |
| ein Particular daselbst                  | 50    |
| Von der Gemeinde Alveneu                 | 6 40  |
| Von der Gemeinde Grüschen                | 12    |
| Von der Gemeonde Samaten in Ober Engadin | 55 40 |
| ein particular                           | 10    |
| die Gemeinde Parpan steuert              | 6 40  |

|   |                              |
|---|------------------------------|
| Den 26 Jenner zalt die gemeind Churwalden                                   | 10                           |
| Malix steürt 1½ Thl.  | 15                           |
| Den 27.Jan: Von der Hülfs=Gesellschaft in St. Gallen                        | 92 34                        |
| Die Gemeinde Felsberg   | 3 20                         |
| Die Gemeinde Embs   | 10                           |
| Della Visch <sup>ca</sup> de Laxs   | 2 sachs graun                |
| Von Obersaxen an Geld, Kleidern und Korn, Käss, Schmalz, an werth           | 220                          |
| Della Visch <sup>ca</sup> de Sagoing  | 10                           |
| della Visch <sup>ca</sup> de Terschnaus                                     | 4                            |
| Della Visch <sup>ca</sup> de Fallera  | circa 12 stera dumieg        |
| Della Visch <sup>ca</sup> de Surcasti                                       | 4 40                         |
| Von District Ursern   | 100                          |
| Von der Hülfs Gesellschaft in Zürich  | 68                           |
| Von der HH. Ehinge und Comp. in Basel                                       | 27 12                        |
| Von der Landschaft Davos  | 6 40                         |
| Von der Gemeinde Zuotz  | 10                           |
| Von der Gemeinde Brienz   | 5                            |
| Von der Landschaft Reinwaldt  | 28                           |
| Von der Gemeinde Sewis  | 6 40                         |
| Von der Gemeinde Schweiningen   | 5 30                         |
| Die Stadt Ilanz   | 15                           |
| Von der Gemeinde Combels  | 32 Cort: gersten             |
| Von der Gemeinde Ladir  | 16 Cort: gersten             |
| Die Stadt Maienfeld   | 20                           |
| Von der Gemeinde Schiers  | 20 50                        |
| Von der Gemeinde Ander  | 23 48                        |
| Von der Landschaft Heizen Berg  | 20                           |
| Von der Gemeinde Vrin   | 2                            |
| della Visch <sup>ca</sup> de Murissen                                       | 12                           |
| de Wallendau  | 30                           |
| de Tschons aung   | 10                           |
| de Siath  | 10                           |
| De Andiast graun 16 curt.   | 9 36                         |
| Trin ha dau fermentun curt. 46 ½, peratosta e tschareschas.                 |                              |
| Dumieg era 34 curt. en daner circa f. 8:20. fa ensemen in<br>stür en tut de | 65 40                        |
| Bonaduz graun ner fermentun u Daners  | 14 22                        |
| Schlans ha dau graun  | 16                           |
| Ruschain  | graun ensemen circa 5 sterra |
| Ruaun raubas: stuppa pumas etc. zirca                                       | 3                            |
| Fin della collecta!   |                              |

Sin la davosa pagina dil carnet e silla cuviarta davosa sesanflan aunc suandontas notizias:

Notta dellas Spesas fatgias per via dil Stürbrief ner viadis p. ils vaschins de Camischollas.

|  | f      | xr. |
|--|--------|-----|
| Agli Mistral regent p sigillar las Breffs senza il viadi a Breill  | 1      | 40  |
| p jra vi Dursera l'emprema gada spesas                             | 2      | 28  |
| p il viadi dils 15 entochen ils 29 d'Uost dus umens Spesas cibares | 20     | 50  |
| dapli aung   | 40     |     |
| la secunda gada vi Dursera   | 3      | 20  |
| p far copiar la bref a Cuera                                       | 20     |     |
| alla pun spendiu   | 20     |     |
| a altorf   | 28     |     |
| a flieno   | 5      |     |
| a Steina   | 17     |     |
| a Nossa Dunaun   | 39     |     |
| dapli  | 13     |     |
| a Brunna   | 15 1/2 |     |

Suenter haver faig la partitiun dils daners Dil Stür, sche ha compar Str. Sep Wenzin aung en buorsa Daners della Cominonza fl. 6, quintau en tuttas Spesas chel ha faig resalvont quellas en il Cantun de Urj e Schwiz. Sadrun ilg 1: Favrer 1823: in feda  
Thomas Beer

Remarcas. La scartira grad davontier: «Colecta Buch» ei veginida copiada digl original dil suttascret ils 17 d'october 1908. Igl original sesanfla els mauns da sgr. Duri B. Berther, Zarcuns, veginend enneu da statalter Tumaisch Beer da Camischolas. Igl original forme-scha in carnet 80 cun 14 feglis buca lingiai cun cuviarta. Sin l'emprema pagina sesanfla il tetel persuls; cun pag. 2 dil carnet entscheiva la gliesta: «Aus der Domkapitelschen Kassa...» – Igl importo ei per ordinari purtaus en mintgamai el carnet dil donatur sez ni dil respectiv ufficial entochen: «Della visch<sup>ca</sup> de Laxs» pag. 25. – Da pag. 26 «Della Visch<sup>ca</sup> de Murissen» naven semeglia ei la scartira da Thomas Beer, che ha era fatg la davosa remarca. – La collecta en nies cantun, ordeifer il cumin dalla Cadi, ei veginida fatga da dus umens dils 15 d'uost entochen ils 29 d'uost 1822. In dils dus collecturs ei stau statalter Sep Venzin da Camischolas, bab da mistral Gion Rest (Cristian) Venzin a Rueras. Statalter Sep Venzin steva a Camischolas en la casa odem il vitg sur via. – In ton dalla collecta dalla gliesta, probabel naven da: «Della Visch<sup>ca</sup> de Laxs...» ei veginiu tarmess tier.

1908, grad per il medem di da s. Placi sco a Camischolas ei rut ora suentermiezdì fiug a Bonaduz ed intschendrau la gronda part dil vitg. (mira Gasetta Romontscha nr 29; 1908) Ferton che nus scrivin questas lingias porta la gasetta «Vaterland» suandonta notizia:

«Die Liebesgabensammlung für die Abgebrannten von Bonaduz ergab ein Total von 410 000.– Fr. in bar und 65 000.– Fr. in Naturalgaben.»  
11 d'october 1908. – Tgei differenza, tgei midada!

### **Barschamnet d'in clavau a Sedrun**

El vitg Sedrun eis ei ussen sonda barschau giu in clavau; gia eran ils tetgs da duas casas pigliai fiug, mo ils umens da leu ed ils numerus luvrers dalla via, ch'ein spert dai neutier, han pudiu far resistenza al serasar dil fiug ed aschia prevegnir ad ina terribla sventira. Per sanadeivla admoniziun da geniturs remarchein nus, ch'il fiug seigi ruts ora entras affons, che fagevan tremagls cun zulprins.

Nova Gasetta Romontscha nr. 40 1862

### **Barschament**

La jamna vargada ei da mesanotg barschau giu en in mises da Tujetsch ina tegia e dus clavaus, ch'eran naturalmein buca segirai.

Gasetta Romontscha 10 da fenadur 1868

### **Fiug a Sedrun**

Tenor ina nossa correspondenza dil Badus ei era il vitg da Sedrun ils 26 da fevrer staus en grond prighel da vegnir intschendraus per ina gronda part. Duront in ferm suffel ha suentermiezdi via ella aschinumnada «Casa alva», in baghetg da quater cussadents, il fiug entschiet a fugar cun vehemenza ord ils quater uni tgamins. Alla curaschusadad d'entgins umens, che han stuppuil tgamins ordado e cun dar in lavatgau sutsi culla sprezza ei reussiu d'allontanar il prighel, che duess esser in niev spieghel per procurar in bien cundrez da fiug.

Gasetta Romontscha nr. 9; 1. da mars 1872

### **Fiug a Bugnei**

Sonda vargada han in per affons a Bugnei/Tujetsch, dau fiug in clavau cun far termagls cun zulprins fosforics; cun spert dar neutier glieud han ins pudiu riscuder ils baghetgs d'entuorn. In niev avis da metter meglier giudamaun quels prigulus zulprins.

Gasetta Romontscha nr. 31; 1. d'uost 1879

### **Barschament**

Barschament d'ina casa e d'in clavau a Sedrun/Gonda.

mira Gasetta Romontscha nr. 36, ils 6 da settember 1888

### **Selva 1850**

1850. 27. schaner/ 2. fevrer – mira era Amitg dil Pievel nr. 5; 1850 ils 30 da schaner. – era nr. 7

## Igl uffeci de Cumin

Alla lud<sup>via</sup> Suprastanza della vischnaunca de Mustér

Tit.

Sut ils 18 dil present fa il Vorstand de Tujetsch de saver, che sut ils 27 Januar vergau, seigi, cun chischun ch'ils Vischins de Selva en fugi ord lur vitg muort la tema della lavin-a, barschau giu dadens Selva ina caseta et clavau al Martin Peder, il qual ha tier quest barschament piars 16 Armauls et 5–6 Tschsmas. fein, aschia ch'il d'on total s'augmentescha tenor schezighiada daventada tras ordinaziun dil sutascret sut ils 25 de febr. sin la summa de fr. 1010.

Martin Peder ein um velg inhabels tier la lavur, ha 7 affons dils quals dus en de negin agit, quels viveven cun prender si praus per tscheins, semudergiaven cun il lur et cun far fein a Paistg, lur facultat ei enviars il don pitiu feitg pintgia, et havent piars sco tut il muvel en ina gada, sch'eis ei ad els era bucca pusseivel de segidar; plinavont fa la sura suprastanza de saver che sut ils 2 febr. hagi la Lavina schmacau ensem en la casa de Vigielli Werth a Selva cun tuttas mobilias etc., il don schezighiau ei 375 fr., quest ei ina familia zun munglusa, dus fargluns, cun bab et Muma che san luvrar nuot et stueven ussa vignir susteni dalla Visch<sup>ca</sup>, aschia ch'els en ussa evertivamein bes ora sin gassa senza teitg e senza tut. Questas duas familias vulen encuir agit tier la cassa d'Agit dil Cantun, per quella fin eis ei aber necessari ch'ei vegni priu si in stir el Cumin tenor §6 dil Regulativ della cassa d'Agit, schiglioc veng ei de leu anora prestau negin agit.

Essend ch'in lud<sup>vel</sup> Obrigkeit veng bucca grad ensem, e sa mo perquei era bucca vignir clomaus ensem, sche ha il sutascret de sia auctoritat enora s'elubiu de termeter ora allas Visch<sup>cas</sup> de prender si in stir per quels, ne de dar in ton ord buorssa de Visch<sup>ca</sup>, ner sco ei plai a scadina Visch<sup>ca</sup> de dar il agid, era cun specificar tgei che mintgin deigi sur-vignir, ner co ilg agit daus deigi vegnir repartius. Sil avignant eis ei necessari ch'ei vegni lubiu en tals cas de termeter ora sin las Vischnauncas per tals stirs, schiglioc savessen nos Vischins de Cumin bucca sefar particeivevils dil agit che veng ord la cassa d'Agit. Recomendont la caussa cauldamein alla ludvla Suprastanza, sco era spitgiont sin ina sperta evomatien et risposta, sinaquei ch'il ulteriur sapi deventar ton pli gleiti, resta cul la duida stema.

Il Mistral en uffeci.

Muster ils 28 de febr. 1850

A. Condrau

Copiau digl original, che sesanfla egl archiv dalla vischnaunca da Mustér, ils 7 da november 1913.

## Notizias davart lavinas

### Lavina 1596

1596 ist der Andres Desax uf ein Berg gegangen gen (um) Schneehuelni zu fachen und ist in ein Leuvelen kommen, die ihn über einen Felsen abtreiben hat und ist umkom-

men. Gott Gnad der Seelen und behüt jedermann vor Unglück.

Ord il vegl anniversari dalla Pleiv Tujetsch


### Rueras – Lavina dils 6 da fevrer 1749

In den Bündner Alpen lag zur selber Winterszeit (1749) nur ein mässiger Schnee; darauf kam ein warmer Regen und gleich hernach ein starker Frost. Als nun zu Anfangs Februar eine ganze Woche lang anhaltendes Schneewetter geherrscht hatte, dem ein heftiger Wind gefolgt war, da ereignete sich am 6. Februar Nachts um halb 10 Uhr die traurige Katastrophe von Rueras (Tavetsch), wobei die gewaltigen zu gleicher Zeit aus den nahen Bergthälern Pulanera und Milar herabstürzenden Lauinen urplötzlich 23 Häuser, 33 Speicher, 39 Ställe mit 237 Stück Vieh, 5 Mühlen sammt 1 Säge verschütteten, und zugleich über 100 Personen jeden Alters und Geschlechtes mitgebrubten, wovon 44 Erwachsene und 20 Kinder das Leben verloren, die Übrigen (über 40 Personen) aber noch gerettet werden konnten, nachdem Mehrere von ihnen 12, 15, 18, 20 Stunden unter dem Schnee zwischen Holz und Steinen und den Leichnamen der Getödteten verschüttet gelegen. Ungefähr eine Stunde später (um halb 11 Uhr) in derselben Schreckensnacht brach eine weitere Lauine aus dem Bergtal Londadusa hervor und stürzte sich auf das Dörflein Zarcuns (Tavetsch), verschüttete 6 Ställe mit einigem Vieh, 2 Speicher und 1 Haus mit 8 Personen (wovon 6 noch gerettet wurden), überfiel und begrub endlich den Pfarrer Jacob Biarth von Tavetsch mit 12 seiner Begleiter, welche eben im Begriffe waren von Sedrun (dem Sitze des Pfarrers) nach der ersten Unglücksstätte, der Kaplanei Rueras, zu Hilfe zu eilen, wo der Kaplan selbst in seinem Hause nächst der Kirche S. Jacob (welche unversehrt blieb) mit zu den Lebendigbegrabenen zählte, die später noch gerettet werden konnten; der würdige Seelsorger Biarth aber, sammt 3 seiner Begleiter, fiel als das letzte Opfer dieser Tavetscher Schreckensnacht und seiner Pflichttreue. Schon am Morgen des 6. Februar hatte die Vallatscha, nicht ohne Schrecken und Schaden, eine Lauine bis zum Dorfe Rueras herab gesandt gehabt.

von Chr. G. Brügger, Beiträge zur Natur-Chronik der Schweiz, insbesondere der Rhätischen Alpen, 1882.

Über die Quellen, aus welchen Chr. G. Brügger geschöpft hat, schreibt er S. 33: «Unsere Darstellung der Tavetscher Schreckensnacht stützt sich auf zwei zeitgenössische handschriftliche Berichte; der erste findet sich im alten Jahrzeitbuch von Sedrun (fol. 24 b. – 35b sub die 30. Juny commemoratio S. Pauli apli) und ist in deutscher Sprache abgefasst, wahrscheinlich vom Pfarrer Jacob Anton De Gonda, dem Nachfolger des unglücklichen Pfarrers Jacob Biarth. Der zweite ausführlichere Bericht ist, in lateinischer Sprache, ohne Zweifel von einem Benediktiner-Mönch des Klosters Disentis verfasst, da er die Ergänzungen über die Disentiser Lauine bringt, welche in dem ersteren fehlen; das Manuskript führt den Titel: «Descriptio brevis cuiusdam tristis casus qui in Superiaris Grisei foederus Communitate Disertinensi nuperrime evenit.», ist vier Quartseiten stark, sauber geschrieben, aber durch vieles Zusammenfalten etc. ziemlich beschädigt; es wurde uns s. Z. von einem Oberländer Freunde C. abgetreten, und dürfte

vielleicht zu den, im Oberlande da und dort zerstreut sich findenden Auszügen oder Copien gewisser Abschnitte aus dem beim Klosterbrande verloren gegangenen Disentiser Annalen zu zählen sein.



## Rapport dalla lavina da 1749

#### Lavina da 1749, ils 6 da fevrer a Rueras

Anno, da man zelte nacht die Geburth Jesu Chtisti 1749, namlich den 6<sup>ten</sup> February, hat  
ess das erschreckliches unglück in der Lobl. kircherung Dawetsch sich zu getragen, alss  
in kurzer Verfassung hiernach gesetz zu lesen ist: In deme zur selbigen winter Zeit ein  
nur gemeine schne wahre, darauff aber ein warmer regen, und gleich nacher ein starck-  
her frost eingefallen, verursachte bilich das, durch ein ganze wochen unauffherliche  
schne-wetter, so nachmahlen gefolgt jedermeniglich ein so grosser schrecken, biss end-  
lich, da die Valatscha, alss ein Vorbott am Morgen dess obigen tags die Lavina zu dem  
Dorff Roeras nicht ohne schrökken und schaden auffgetrieben. abenss an eben dessel-  
bist wurde das unglückseliges Dörfflein von denen lavinen der ganzen Thäller Pulanera,  
und Mila samendlich mit solcher furi und heftigem sturm angefallen, dass gleichsam  
urplezlich 23 Häuser mit 46 Feuestätt, 33 Speicher, 39 städel, und bestallungen mit 237  
klein, und grosses Vich, 5 Mühlen sambt 1 säge hingerissen, und zugedecket worden.  
Dass grösstes übel wahre dass zugleich über 100 Jung oder alte personen beydes  
geschlechts darunder kohmen, deren 44 gewaxene, und 20 kinder elendlich getehdet  
worden. Ein stund ungefehr darauf, (:erat enim hora Decima cum dimidia:) da die umblि-

ligende Nachbarhanten, insonderheit der Pfarrer Jacob Biart seinen grössten eiffer gemis(?) (rusna el pergament), dass geleit und Wehklagen gehert, in aller eill sambt anderen hinzugeloffen, kohnete aber kaum biss zu dem Dorff Carcuns, so wurde selbiges ebenfallss von denen Lavinen der Landadusa über rumplet, alwo der Pfarrer auss liebe seinen schäfflein das end des trauriges Talss mit dem end eigenes lebens machen hat müessen sambt 5 andere personen. Requiscant in pace. Der solches hier geschriben, bittet instendigst den günstigen leser wer(?) ein gnadist ist, ein Vatter Unser und Ave Maria vir deren armen sellen – quorum nomina singula in libro defunctorum Ecclesiae parochialis ad inveniuntur, at facit Deus, ut Libro vitae pariter conscripta sint omnia. J(acobus) A(ntonius) D(e) G(onda) P(arochus) I(bidem).

Urbari vegl a Sedrun folio 24 e 25

### **Unglück von Selva im 13ten Tag des Christmonats 1808**

Selva, das vorletzte Ort im Thale Tawätsch in der Landschaft Disentis, liegt am Ende einer sümpfigten Ebene und nahe an de Quellen des vorderen Rheins.

Es hatte seinen Nammen vom Alt-Rhätischen, welches: ein Wald, bedeutet, entlehnt, und wird noch heutzutage von den verdeutschten Urserer: zum Holz, weil es im Wald, gebauet war, benammsset.

Selva, das sich kaum von einer Feuerbrunst des Jahres 1785 erholt hatte, und jetzt neu aufgebauet war, begriff in sich 13 von Holz gebaute Häuser, und eben so viele Viehställe. Es lag auf dem nordlichen Ufer des Rheins und auf einer Anhöhe; hatte über sich eine dünngesäete Waldg. und war mit einer Benefiziats-Kirche gezieret.

Es war schon von jeher mit zweyen Schneelauinen; von Norden, und von Süden her, das ist: von oben herab und unten herauf bedroht. Diese vom Rheinbeete herauf erschütterte und bestäubte das Ort fast jährlich, erschrack die Einwohner und streckte nicht selten, die ihr zu nahe kamen, zu Boden, lief aber, einige Unordnungen und geringe Zerrüttungen an den Fenstern und Dächern vorbehalten, unschädlich ab. Jene aber vom Thal de Plaun und von oben herab stiess und warf öfters Gebäude ein, deckte Vieh und Leute zu und hatte schon sehr oft, ungeachtet der Schutzwehre, die man hinter den Gebäuden angebracht hatte, beträchtlichen Schaden, wie es vor zwey Jahren der Fall war, angerichtet.

Allein man hoffte auf dem Schutz Gottes, und da nur hier gutes Wasser und gelegene Viehweide an zutreffen und sonst nirgendwo eine bessere Gelegenheit zum Aufenthalt der Menschen und der Thiere darzubieten schien, begnügte man sich indessen in der Gefahr zu wohnen.

Es lag mannstiefer Schnee, es stäubte und wehte unaufhörlich, Dunkelheit und Licht mischten sich und wechselten einander ab, und es ward endlich so wild und unsicher, dass mehrere der Einwohner sich nicht getrauten, um ihr Vieh zu füttern und zu tränken, aus ihren Wohnungen zu gehen.

Es pflegt sonst bisweilen hier, vorzüglich aber in Tschamut so zu winden und zu wehen, dass der übereinander getriebene Schnee Feuerfunken von sich wirft; allein dies Mal war

eine solche Verwirrung der Winde, und stäubte von allen Seiten her so sehr, dass man, um nicht erstickt und blind zu werden, diese Winderscheinung nicht beobachten konnte. Wegen der Schneelauine in Süden jenseits des Rheins, welche vom Thalgelände Ruenatsch in das Rheinbeete mit Erschütterung und Krachen fast jährlich herabzustürzen pflegte, waren die Einwohner von Selva ietzmalen unbesorgt und flohen in jene Häuser zu unterst in Dorfe, die am nächsten dieser, aber der andern Lauine von obenherab aus Norden am entferntesten waren, hin.

Aus Liebe und Vorsorge für den Herrn Benefiziaten des Orts: Petrus Weller, luden die Einwohner ihn ein, er möchte, da er wisse, dass vor zwei Jahren sein Haus und die Kirche von der Schneelauine angedeckt, ein Haus eingeschmettert und ein anders vom Schnee, und s. w. sey zugedeckt worden, sich in ein sicheres Ort begeben, er lehnte diesen sonst gutgemeinten Vortrag von sich bescheidentlich ab, und deütete dahin: die Vorsehung habe diese seine Wohnung für ihn bestimmt, er müsse die Gefahr mit seinen Mitbürgern theilen, u.s.w. und wich dem Unglücke aus.

Die Nacht war finster, unruhig und schaudervoll; die Winde sausten und stiessen an die Häuser, und der Schnee drang in allen Oeffnungen der Gebäude ein. Die Glocke hatte schon 12 Uhr geschlagen, ein Uhr begann und da die Einwohner theils zur Ruhe gelegt und theils betheten und wachten, war das Unglück da.

Die sehr ausgedehnte, tiefe und abschüssige Thalseite des Ruenatsch brach los, jene von den sogenannten Benaus mit, beyde Lauinen stürzten sich mit donnerdem Gebrülle in die Tiefe des Rheinbeetes, erhoben sich, wegen gewaltthätiger Zerschmetterung, neuerdings über das bey 100 Klafter erhöhte Ufer des Rheins, die letzte Lauine gab der erstern eine unnatürliche Wendung gegen Nordosten, beyde gewannen die obengedachten Ebene und überfuhren sie, ergriffen gemeinschaftlich das Dorf von Sudwesten an, zertrümmerten und begruben alles, was ihnen im Weg stand, nahmen den Thurm-Knopf von der Kirche samt dem Kreuz und den Dachschindeln von den Gebäuden mit, stäubten und schleuderten sich, und alles bis zur Waldung ob dem Dorfe hin.

6 Häuser wurden zertrümert, eins stark beschädigt und ein anders vom Dache beraubt. 5 Ställe sind zernichtet und müssen neu gebauet werden, und nur 2 blieben unbeschädigt. 42 Personen, folglich die Helfte der Einwohner und ein Kind im Mutterleibe, 37 Stück Rindvieh, und ungefähr 200 Schmahlthiere lagen unter den Trümern der Gebäude. Der Benefiziat des Orts elte gleich zu Kirche hin und zog die Glöckchen stürmend an. Er übte sonst Wunder der Tugend und Tapferkeit, um seine Mitburger zu retten, aus.

Die Tschamoter, welche das Krachen und die Sturmlöckchen gehört hatten, drangen mit grösster Gefahr und Mühe den Schnee durch, und waren die ersten Retter. Sie fanden aber 3 Männer ihrer Mitbürger samt ihr Haab Vieh verschüttet und Tod.

Mehrere Männer fütterten ihr Haab Vieh auf den Bergmatten Crispause, welches nordlich ob Selva, eine halbe Stund entfernt, liegt, wurden aber des Unglücks nicht gewahr. Man konnte ihnen erst am andern Tag ein Zeichen davon geben, und sie eilten über die abschüssigen Seitenwände von Selva durch den Schnee, als wens keine Gefahr und Mühe vor Handen wären.

Am nemlichen Tage, und dieser war der Mittwoche, kam der Thalpfarrer, Laurentius Schmed, mit mehrern Männern aus Tawätsch, weil die Landstrasse verspeert und wegen andern Lauinen sehr unsicher war, um Vorsorge für seine verunglücketen Schaafen zu treffen, auch dahin, und gieng über die nemlichen Abschüssigkeiten, obschon er ein 60. jähriger und schwerer Herr war, ohne Scheu und Forcht, und brannte vor Seeleneifer mitten im Schnee, wie er in den heissten Sommertägen zu brennen pflegte.

Drey Männer und ein halberwachsener Knab retteten sich selbst aus dem Abgrund, 13 Personen wurden lebendig und wenig beschädigt, und die übrigen tod herausgegraben. Christ Joseph Riedi, ein Mann von mittlerm Alter und seine Familie brachten unter dem Schutte 15 Stunden ohne Nahrung zu. Er war nur im Hemdte eingehüllt. Sie betheten, trösteten sich, schrien und horchten, obschon sie voneinander abgesondert waren. Man vernahm endlich ihre Stimmen, die sie samtlich und gewaltthätig von sich gaben, und sie vernahmen auch der Graber ihre. Man grub ihnen zu, wurde aber genöthiget dem Hausvater durch eine kleine Oeffnung einen Strick hinabzulassen, damit er darmit eine Holzsäge ziehen helfend, sich öffnen und sich und die seinigen retten könnte.

Johann de Plaz, ein 60. jähriger Greis, nur mit der gewöhnlichen Leinwand angethan, arbeitete mehrere Stunden im Schnee und musste dennoch sein Weib, da er keine Hilfsmittel bey sich hatte, im Stiche und verfrieren lassen. Erstarrt und stimmlos, gleich einem ausgehauchten, trug man ihn in eine Stube, man brachte gewärmté Steinplaten an seine Fussohlen, er kam zu sich und lebt noch.

Von Dinstag Morgens, wo das Unglück geschah, bis Freitag Abends hatte man ihrer 19 schon hervorgegraben, allein wie sollten so viele Leichnamhme, da man gen Crispausa sie weder tragen, noch führen konnte, und die Strasse zur Pfarrkirche gesperrt und gefährlich war, beerdiget werden? Allein der Weg ward mit Gefahr und Mühe durchgebrochen, die Leichname: theils in Brettern, theils in Leinwand verwahrt, wurden auf Handschlitten gelegt, und so zum geweihten Erdreich gezogen.

Am Samstag wurden 19 und am Sonntag die übrigen 6 Personen der Erde beygelegt. Es herrschte dabey eine grimmige Kälte. Man kann das Betrübniss, mit welchen die Herzen und Gemüther der Anwesenden ietzt durchdrang, nicht beschreiben. Berge und Thäler ertönten von Klagliedern, und die Thränen froren an den Wangen.

Gott aber, der Vater der Güte und Barmherzigkeit, flösse den Mitmenschen Mitleiden, und den Einwohnern des Orts Vorsicht ein, damit jene diesen hilfreiche Hand leisten und diese ihre aufzuführenden Wohnungen ans ein sicheres Ort verlegen mögen.

«Von einem Benedictiner des Klosters Disentis den 29. des Christmonats 1808.»

Copiau digl original, ch'ei screts digl autur pader Placi a Spescha e che sesanfla egl archiv dalla claustra. 1907, ils 21 da december.

### Rueras Lavina da 1817, 6 da mars

Den 6. d. M. (März 1817) entlöste sich die Lauine von Ruäras ab um 8 Uhr. Sie hatte ihren Anfang in Piz Ner, und dann riss sich der Schnee vom ganzen Thal Milà los, ergriff das Dorf, die Menschen, das Vieh etc. darmit. Unter 47 Personen, die ergriffen waren, kamen

27 um das Leben. Eine einzige grub man lebend aus dem mehreren Klafter tiefen Grube hervor. Ehe man sie los machen konnte, beichtete diese Jungfrau dem Priester, und starb gleich darauf. Neben ihr war ein 12 jähr. Knab, welcher während 20 stundigen Begräbniss mit ihr betete, und abgesondert schlief. Dieser war von den Offensteinen sehr verbrannt, und stark beschädigt. Er lebte noch. Der eine Arm ward so verklemmt, das er erstarrte, und aufgeschwollen war; erst nach mehreren Tagen zeigte sich der Puls darin. Die Mutter und zwei Schwester der Jungfrau lagen ohnweit dabei tod. Sie hatte nur wenig Schluckzer davon gehört. In die andere Helfte des nemlichen Hauses hatte sich die Mutter des gedachten Knabens mit einem Knäblein von der einen zur andern ihrer Stube geflüchtet. Dort waren 2 andere Knäblein, die ihr zugehörten, das eine im Bethe, und das andere in der Wiege. Beide wurden vom Schnee überschüttet, und die Mutter zwischen Balken verklemmt. Der dritte Lauinenstoss machte sie los, und alle drei befanden sich unter dem Dache, da die Kammer dazwischen hinweg gestossen worden war, und leben noch. Die Familie Caduf wurde von der Lauine umgeben, undrettete sich nächst dem Kamine hinauf. Das halbe Haus wurde zerschmettert. Man schmiss, die Lauine bemerkend, die Kinder aus den Fenstern hinaus, die sich, mit andern, davon im Hemdte liefern; andere aber flohen gekleidet. Dabei gingen 5 Mühlen, und 1 Holzsage, 9 Häuser, und wohl so viel Ställe zu grunde. Von 29 Stück Viehs wurden 16 oder 17 samt ein Pferdt lebendig ausgegraben. Von den Schmahltieren hat man noch keine Rechnung aufgenommen. Die Lauine fuhr bis ans Rheinbeete, und von dort ein Stück Rhein wärts hinein. Aus Allem schliesst man, dass nur 4 Häuser in Ruäras von der Gefahr der Schneelauine sicher sind.

«Die Schneelauine in Tawätsch hat ein grosses Stück vom Gletscher im Thal Milà weggerissen.»

P. Placi Spescha, 1817

### Lavina da Rueras 1817

Aus dem Oberland, vom 8. März Abends. «Wir leben hier in Angst und peinvollster Unruhe! Seit 16 Tagen, innert welchen der blaue Himmel sich uns beinahe niemals zeigte, schneit es unaufhörlich. Unsere Häuser sind im Schnee so tief vergraben, dass man von den mehresten nur die Giebel sieht. Manche davon, die ihrer ungeheuren Schneedecke nachgeben mussten, stürzten unter ihrer Last ein. Das höchste Mannesalter hat kein Beispiel einer so entsetzlichen Menge Schnee aufzuweisen. Die Wege, welche vorzuhin gebahnt und vertreten wurden und wenigstens 6 Schuh über den Grund hingehen, liegen dem ungeachtet so tief im Schnee, dass kein Mann die einem Gemäuer ähnlichen Seitenborde derselben zu übersehen im Fall ist. Die Verbindung zwischen dem Hauptdörfern ist, wie es sich vermuten lässt, zwar gehemmt, jedoch nicht gänzlich unterbrochen. Mittelst ausserordentlicher Anstrengung hielt man die Hauptstrassen für starke, keine Gefahr scheuende Fussreisende noch offen. Dadurch erhalten wir so eben die höchst betrübende, aber leider zuverlässige Nachricht von Tawetsch, dass vorgestern Abends 8 Uhr das stark bevölkerte, seiner Lage wegen äusserst angenehme und ziemlich

wohlhabende Dörfchen St. Jakob (nach einem andern Bericht Rueras) von einer alles zerschmetternden Staublawine bedeckt oder fortgerissen worden sey. Ein grosser Teil des Dörfchens, das schreckliche Unglück nicht ahnend, vielmehr wie gewöhnlich die Abendstunden in ihren Familienkreisen traulich, sorgen- und furchtlos verplaudernd, fand, wahrscheinlich im gleichzeitigen Augenblick unter den aufgetürmten Schneemassen, deren Höhe mit der Helmspitze des dortigen Kirchthurms glich stehen soll, den schreckenvollen Tod. Fünfundzwanzig Personen, worunter der Kapellan, sollen von den zu Hilfe geeilten nachbarlichen Dörfern aus dem Schutte, mehr oder weniger beschädigt, jedoch noch lebend, ausgegraben worden seyn. Indessen fand man auch viele Leichen. Was das Maass des Unglücks derjenigen Verschütteten, welche vielleicht noch Leben und Gefühl für ihre grausenvolle Lage in ihren wahrhaft kalten Gräbern haben mögen, überfüllt, ist das fortwährende heftige Schneien, welches die Herbeilegenden, bei allem guten Willen, die Unglücklichen zu retten, nötigt, den Ort des Schreckens zu verlassen, und die mit dem Tode ringenden Mitbrüder ihrem Schicksal dahin zu geben, um sich selbst und ihre Familien, die im gleichen Augenblick in der nemlichen Lebensgefahr schweben, zu retten. Mit vollem Recht gilt hier die verzweifelte Loosung: «Rette sich, wer sich retten kann!». Wircklich ist aus den Hauptdörfern von Tawetsch Alles ausgezogen, und sie stehen menschenleer da. Das Nämliche geschah auch in andern Dörfern des Oberlands. Von Selva, einem kleinen, südlich von St. Jakob gegen den St. Gotthard gelegenen Dörfchen, das vor wenigen Jahren auf gleiche Art zerstört wurde, hat man zwar wegen gehemmter Kommunikation noch keine Berichte; man kann aber die schreckliche Vermuthung eines ähnlichen Unglücks kaum unterdrücken.» «Wir fügen obigen Berichte Nachstehendes aus einem Schreiben von Dissentis von 9<sup>ten</sup> d. M. hinzu: «Die Lawine, welche letztern Donnerstag Abends 8 Uhr das Dörfchen Rueras im Tawetsch überfallen hat, wälzte sich von den höchsten Bergen durch das Tobel bis jenseits des Rheins, und bedeckte oder riss mit sich fort 11 Häuser und Mühlen samt ihren Bewohnern und mehrere Ställe mit der darin befindlichen Haabe. Viele Ausgegrabene fand man noch beim Leben. Gestern Abends vermisste man noch 28 Personen.»

Churer Zeitung, Nr. 21, 14. März 1817

### Lavina da Rueras 1817

Aus dem Oberland, 10. März. «Die Schreckens-Berichte, welche ich Ihnen vorgestern gab, (s. Nr. 21 dieser Zeitung) sind, zur Beruhigung jeder Mitleid fühlenden Seele, etwas übertrieben. St. Jakob, das kleine Dörfchen in Tawetsch, ist nur zum Teil verschüttet, und davon ist ein grosser Teil der Einwohner gerettet; 38 Personen fanden dabei ihren Tod, wovon man aber noch nicht alle gefunden hat. Obwohl diese Berichte einigermassen beruhigend sind, so ist sich unsere Lage nichts desto weniger schrecklich. Denken Sie sich eine ganz bergichte Gegend, und dabei einen ungeheuren, von keinem Menschenalter bisher so tief gesehenen Schnee, und nebst diesem das immer fortwährende Schneien und fürchterliche Toben der Winde – denken Sie sich den Umstand des-

sen, was ich Ihnen letzhin berichtete, was ich oben sagte, und was ich Ihnen so eben anzeigen werde, und Sie werden sich eine kleine Idee unserer Lage machen können. Letzte Nacht, um 1 Uhr beiläufig, stürzte eine Lawien durch das Thal Sinzera bei Truns, riss einen Stammreichen Wald mit sich, alle im Laufe gefundene Fruchtbäume und Ställe, tödtete in einem einzigen Stalle 17 Stück Horn- und vieles Schmalvieh, und ging, ein kleines Dörfchen, Arvela, ohne Schaden anstreifend, bis in den Rhein. Die Hauptlawine ob Truns, welche jährlich in mehr oder minderer Stärke zu stürzen pflegt, immer aber Angst und Schrecken verbreitend, bleibt noch zu gewärtigen. Alle Einwohner haben sich daher geflüchtet, und sehen in banger, ja ich darf sagen in fürchterlicher Erwartung dem Augenblick ihres Ausbruchs entgegen.»

Churer Zeitung, Nr. 23, 21. März 1817

### Lavina da Rueras

«Die Lawine zu Rueras (St. Jakob ist nur der Kirchenpatron des Orts) zerstörte, laut uns eingegangenen umständlichen Berichten, 9 Häuser, 11 Ställe und 5 Mühlen. Von 47 ergriffenen Personen fanden 27 ihren Tod; die übrigen waren so glücklich, sich selbst herauszuarbeiten oder lebend hervorgegraben zu werden. Eine Jungfrau wurde erst nach 20 Stunden noch lebend aus dem Schutte gegraben; sie war aber sehr beschädigt, und starb gleich darauf. Auch ein kleiner Knabe wurde stark beschädigt gefunden, und eine Frau ward beim ersten Lawinezug ganz zwischen Thür und Angel geklemmt; ein zweiter riss die Thüre auf, und rettete sie vom Ersticken. Eine aus 7 Personen bestandene Familie hat noch nicht gefunden werden können. Von 43 Stücken Vieh sind 16, worunter ein Pferd, lebend hervorgegraben worden; von dem todten Schmalvieh hat man noch kein Verzeichnis. Rueras sieht nun von noch 30 Häusern nur 4 vor den Lawinen ganz gesichtet. Würde sich gleichzeitig die Pullanära, ein grosser kahler Erdstrich unter dem Berggipfel Culmatsch, von der ungeheuern Schneedecke entblösst haben, so wäre das ganze Rueras bis auf wenige Häuser ein Raub der Lawine geworden.»

Churer Zeitung, Nr. 25, 28. März 1817

### Rueras, lavina de 1817, ils 6 de Mars

Rueras ils 12 de Marz 1817.

Dilectissim Signur Confrar!

Manus Domini tetigit il Vig Roeras. Giefia vargada ils 6 de Martz mesa las nof della Sera ha Diaus entras et cun la Lavina de cauld chei vegnida ord della Vall Milla, ruta ensassum il glatscher de nosa Dunaun, mess sut e schmacau 27 personas. 17 grondas comunicadas, e 10 affons bucca pervergiai. las quallas en: Paul Giusep de Salins cun sia Duna e 3 affons in era pervegiaus, Duna dil Domeni cun 3 affons, in er pervegiaus, Brida della Nescha cun siu Feigl cheran i vi tier il Paul de Salins cun rucha per mirar ora ina vacca che veva de far vadi, Duna dil Rest Caveng cun 2 affons, las 4 Michelas tuttas, la Rosa han ei gliauter di cavau ora chella fuva aung viva, aber en valsen de 2 uras ha era stovi morir, muort las stremlidas chei han stoviu far de cavar ora cun tagliar entocs la

lena, ch'era sur ella en, per puder tier, in affon dil Str. Plazi, in auter affon dil Str. Plazi miu figliogl era sut sper la Rosa ei vegnius cavaus ora vifs et ei aung ussa vifs aber mal enpai tuta frusta, Dapli en Schmacai Baba Cavorgia cun 3 affons, Giachen Antoni Durschei cun Sia Duna, et Baba Peder.

Ils Cadufs en mitschei si dil Camin ora, quels dil Paul dell pon cun Brida della Nescha et siu Feilg et quels dil Dumeni cun sia sora Librata han ei nuota enflau aung ni speronza de saver anflar aung ussa, ils auters vein nus satterau Domengia, et oz dus affons. La casa dil Schimun ei schmacada en, aber la gliaut en mitschai, quella dils Cavorgias ei era schmacada et la gliaut mitschai, quella dil Biscuolm ei schmacada en in cantun el la gliaut mitschai, quella dil Str. Duri ha survegniu in stausch, e quella dil Str. Gion Rest curclada en entuorn cun lavina. la mia ei stada inviolada per ventira. ei era schmanatschau de dira tut, quei chera dadens la casa dil Scarvon Luccas. Fetschien las Messas per ils Dischgratiai e fetschien dir pater noss ils dadens che Diaus fetschi gratia als Mazai e pertgiri e schurmegi ils mitschai, ton tschau ora sco lau en, nus essan aung tras ora el prigel et essen tuts fugi el vig dadora, Jau sun ora si chil Scarvon Luccas a quartier en bi e bien quartier.

Il venderdis Quareisma ei sei aung ussa vegniu faig Priedi. Sin venderdis spetgiel jau sin Els.

Scret en prescha Sur Confrar Vigeli Wenzin.

Igl original dalla sura brev copiada sesanfla en mauns da signur Gion Antoni Peder a Selva ed ei adressada: «Agli Signur Sur Pierer a Selva.»

Mustér, ils 10 da fenadur 1923.

### Brev sur la lavina da Rueras 1817

Tuietsch, ils 14 de marz 1817

jau sto a vus far de saver trestas novas la qualas en daventadas con igl vig de Rueras igl qual ei corcollaus in ton la lavina, 9 casas en tot a frostta la dona digl domeni a la liberata a 3 afons igl paul a sia dona a ses 3 afons a la brida ber(?) a siu mat eran tuts en casa et en era morts la vossa dona maria Urschala a vos dus afons en era morts ela lavina entaleg, la lavina ei vignida igls 6 de marz a las 8 uras de noig igl Cadufs a la Lavina tschinthalai en la casa aber tuts podiu ora e la mihelas en tutas 4 mortas str plazi en stai en la dona a 5 afons in ei morts a tschels en mitschai gion Ludivig era buca en casa la dona a 3 afons en mortzs la casa digl Carest ei era ida a giachen antoni a la dona a la baba en era morts, igl tschimun a sia dona a ses afons a igl martin grisch a siu fejgl a la brid a podiu fugier en camischa, igl assisten Schamet a sia dona an era podiu fugir a ses 5 afons en stai ella lavina aber tuts 5 mitschai giachen andriu a sia dona a era podiu fugir, la lavina ei vegnida orda la val milar a la polaner ei aung lau si a ei neif aschi aul sco la baselgia ei va buca ora tutta stat, vus vaca ei era mazada ella lavina, mei han ei comendau vugau sin vies faig, igl callavau a la casa ei tut en togs per vida stad vai jau schon callavau de meter en igl vies fareg. jau sai paug co cossigliar de far ada vus glei mal digl far, igl vigieli a deg che el cossigliassi de buca vegnir sin

pertgei che glei ina talla miseria a glei strusch de puder viver, tonoton jau sai nuotta tgei jau deigi dir figei grad sco vus leis sco jau sai vi jau far ei stat tut en vossa libertad, ella vein nus anflau ualit gleit als afons era quells digl paul a digl domeni an ei buca anflau a san buca anflar forza tochen vid maig, igl mulin digl domeni a igl nies falun a quells 2 callavaus a la casa digl paul igl mulin digl giachen Schamet a igl mulin digl bisckolm a igl calava dillg lela san ins anfalar niang in sulparin, las messas per vossa dona an ei schon faig igl miu cordial salit a vus a vossa feglia igl meglier eis ei de gir paternos, a metter ell maun de diu vossa dona veva ni da beiber ni damagliar ella veva zun nuot ella stitgiava ves sin daners chela ves de viver ella veva faig anpristar str Plazi ina curtauna graun a faig anprista daners et veva comprau 3 curtaunas graun, et veva si tier igl domeni et ei iu a piarder jau vai buca de tornar a ei stegian ves

Lucas Caveng

Remarcas: La brev ei scretta sin pupi ordinari format quart sin duas paginas; il secund fegl ei vits e porta ordado pagina 4 sper l'adressa aunc suandontas notizias screttas dad in auter maun: «Questa bref vai au survaniu ils 3 de Abril sin giefgia sontgia.» «La lavina ei ida ils 6 de Martz sin ina gieffgia la serra las 8 uras.»

L'adressa secloma: An Heren Christian de Kurtins, schweizer Nebsternau(?) in schweiganga(?).

Igl original dalla brev appartegn a frars Riedi-Giger a Rueras. – Copiau la sura brev digl original ils 5 da settember 1913.

### **Lavina da Rueras da 1817**

Scarvon Lucas Cavegn ha cavau ora nossa onda Barla C. Schmed ord la lavina. «Dai adatg!», «Morta s'ella tuttina!» In era sedestadaus per giu Plaun da pors; ed ha aunc stuiu setrer en. Ils buobs dil tat assistent han giu priu si ils pigns sin cobra.

### **Lavina**

La lavina da Giuv digl onn 1836, ils 25 da december. Vegniu per la veta dus giuvens umens, era circa 30 armauls smaccau suten cun ils baghetgs.

Cronica da Vigeli Giusep Beer, scrinari Sedrun

### **Selva**

Era a Selva eis ei vegniu giu la lavina ed ha priu dus clavaus; en in, nua ch'eis era en animals, ha ella per ventira mo splanau surora il clavaus e schanegiau il nuegl. Essend serrau giu tutta communicaziun han ils da Selva stuiu salvar si plirs dis ina bara en baselgia. Nova Gasetta Romontscha nr. 3 1863

### **Lavina**

Malgrad la nevada dils 2 e 3 d'avrel ei ussa puspei terrenau schi lunsch sco vivon; dad ina nevada luada ora aschi spert seregoran ins buca grad, perquei eis ei era tscheu e leu rut ora bovas. Era en Tujetsch ei iu sillia spunda meridiunala grondas lavinas la notg

dils 2 sils 3 d'avrel, che han empleniu en la Val da s. Brida tscheu a Selva sin ina stermentusa moda ed otg dis reteniu il Rein. Fuss ei stau ina lavina da freid enstagl da cauld, sche fuss ei stau finiu cul vitg da Selva...

Nova Gasetta Romontscha 13 d'avrel 1866

### **Lavina**

Notizias sur las lavinas en sur Selva, che han caschunau donns, ei vegniu tier a nus las sequentas: A Selva ha la lavina priu dus mulins e treis clavaus cun da bia pavel...

Nova Gasetta Romontscha 25 da schaner 1867

### **Lavina en Curnera**

Lavina da Curnera, nua che dus umens da Tschamut han piars la veta ils 10 da schaner 1876.

Gasetta Romontscha nr. 2 /1876

### **Lavina a Rueras**

Dumengia sera, ils 23 da december 1923 ei la lavina dalla Pulanera vegnida da freid ed ha tschaffau a Candentschuns il perveseder Gion Antoni Hetz da Rueras, che vegneva da Dieni e menau in toc dils praus giu. Cun siu agid e cun agid dad auters da Dieni, ch'ein cun inagada dai neutier, han ins pudiu deliberar el e menar el a casa.

Gasetta Romontscha nr. 1 – ils 3 da schaner 1924

La sura lavina ha tschaffau Gion Antoni Hetz gest dadens Candentschuns, nua che las vias vegnan ensemes ed ha bess el tochen giudem Curtin e cuvretg en el, mo el ha saviu far liber cun in maun la neiv entuorn la bucca, aschia ch'el ha pudiu trer flad e dar empau is e cun quei che Giachen Antoni Cavegn vegneva ual suenter, ha el spert viu el ed anflau el e pudiu liberar el mo culs mauns. Veggend Baseli ed auters da Dieni ein els i spert cun el a casa, aschi ch'el ha sez pudiu ir si en casa ed era pudiu resdar co ei seigi iu, aschia ch'igl ei aunc iu bein per quella gada, mo ins ei en tema cun quella neiv, sch'ei vegn trasora giu.

Rapport da Sep da Dieni 1923

### **Lavinas**

Laura ei quels dis empau da variabla, neiva, cufla e mintgaton plova ei, propri aura da tscheiver. Ier entuorn las tschun dalla sera, ils 13 da fevrer 1928, sei vegniu la lavina da maun sut. Gl'emprem ha ei entschiet en la Val Ruinatsch e tras anora tochen la Val Vallatscha e vegniu tochen Rein. Enta Selva eisi ders dus chischners ed ina suschna. Las casas erien aunc oz tut alvas dil buf. Il Vigeli Venzin hagi manegiau, che nus massien tuts ell'America, sche nus vessien viu quei. La notg targada ei lu puspei la lavina dalla Val Milà vegnida giu tochen ora sisura ils clavaus da Candentschuns; per cletg eisi iu puspei en bein.

Ord ina brev da Duri Battesta Berther, Rueras, scretta ils 14 da fevrer 1928

## **Notizias davart l'ustonza a Rueras**

### **Notizias sur l'ustonza a Rueras**

Suenter la lavina dils 6 de mars 1817, nua che 19 persunas ein vegnidas cavadas ora vivas e nua che 27 persunas han anflau la freida fossa, han ils vischins de Rueras concludiu de manar si l'ustonza, che ha custau ad els immens sacrificis. Las lavurs han cuzzau da 1818 entochen 1826. Denter auter han per exempl il vischins fatg 1818 600 dis lavour cumina; 1820 300 dis; 1822 560 dis; 1824 e 1825 lavour cumina, ch'in havess saviu quin tar entgins mellis renschs. Ins ha stuiu cumprar giu dus tocs praus per saver far l'ustonza tenor plan. Grondas expensas han ils vischins giu per puorla de schluppentar, ferradira, uaffens e per manuals. All'entschatta han ins giu dus miradurs, che han dirigu la lavour ed als quals ins ha naturalmein stuiu dar logis, cuost e paga. Plaun e plaun han ins viu en, che ils sacrificis mavan sur las forzas dil vischinadi e perquei ha Hans Giachen Gieriet de Rueras, deputau sil Cussegl grond, mess avon a quel silla radunanza dils 22 de zercladur 1822 ils gronds prighels de lavina per Rueras, sco era las grondas difficultads ed unfrendas per construir in'ustonza e supplicau il cantun de vuler sustener quella interpresa. Il Cussegl grond ei staus cuntents de quei ed ha dau la cumpetenza al Cussegl pign de corrispunder a quei giavisch. Il Cussegl pign ha tarmess inschignier Lanicca sco expert a Rueras, il qual ha dau rapport alla regenza sur la lavour schon fatga ed era enqual bien cussegl per menar la lavour tier in bien success.

1824 ha Peter Antoni Latour inspectau en num della regenza las lavurs ed ei staus surstaus sil pli ault grad sur las grondiusas prestaziuns dil vischinadi ed ha recumandau de sustener la interpresa e de corrispunder als giavischs de gerau Tumaisch Giusep Schmed de Rueras, ch'ei vegnius tarmess en quels fatgs dils vischins a Cuera.

Gerau Tumaisch Giusep Schmed, pli tard assistent e deputau sil Cussegl grond, ha giu zun gronds merets per l'ustonza, havend el survigilau las lavurs, menau tut ils quens e dau rapport alla regenza e cun tarmetter en il quen final dellas expensas directas, che han purtau total 2878 renschs e 75 Xr. Quei ei daventau ils 31 d'october 1826.

Il cantun ha schau vegnir tier al vischinadi in subsidi de 800 renschs.

### **Ustonza da Rueras, protocol dil Cussegl grond, 1822, 22 da zercladur**

Von dem Herrn Deputierten des Hochgerichtes Disentis Geschworne Geriet war Namens seiner Nachbarschaft Rueras in Tavetsch eine Einlage an den Grossen Rath unter heutigem Datum gerichtet worden, worin er, unter der Vorstellung, das die Ortschaft in 60 Jahren schon zwei Mal durch Schneelawinen verschüttet und grössentheils zerstört worden, wobey jedes Mal eine beträchtliche Anzahl Menschen das Leben verloren hätten, dass die Nachbarschaft einen sehr weitläufigen und starken Steindamm, um sich gegen ähnliche Unglücksfälle zu sichern, zu erbauen angefangen habe, den die aber ohne Unterstützung zu vollenden nicht hoffen können und in dieser Hinsicht die gleiche Begünstigung wie Sils und Küblis von dem Hochlöblichen Grossen Rath erwarten zu können glaube.

Nach Ablesung dieser Einlage, und nachdem der ermeldete Herr Deputierte einen Ausstand genommen hatte wurde beschlossen, dass in Hinsicht einer solchen Unterstützung dem Hochlöblichen Kleinen Rath die Vollmacht ertheilt werde, auf gleicher Weise wie bey der von Küblis angesprochenen Unterstützung zu verfahren.

#### **Ustonza da Rueras, protocol dil Cussegli grond, 1823, 9 da fenadur**

Die den Amtsbericht des Kleinen Rethes erörrende Commision legte zwei Gutachten des an Ort und Stelle abgeordnet gewesenen Hauptmann Lanicca über den befundenen Zustand der mit steter Lawinengefahr bedrohten Gemeinde Rueras, und der durch die Verheerungen der Landquart in Gefahr der Vernichtung stehenden Gemeinde Küblis, über die zu ihrer Sicherstellung erforderlichen Anstalten und über die dazu erforderlichen Unkosten vor.

Es wurde das, über die von Seiten des Standes zu treffende Verfügungen, abgefasste Gutachten der Kommission abgelesen.

In der darauf eröffneten Diskussion wurden verschiedene Vorschläge gemacht, und da besonders die von der Kommission vorgeschlagenen Unterstützung von f. 600 in drey jährlichen Raten, für jede der beyden Gemeinden nicht hinlänglich befunden wurde, nachstehender Antrag durch Mehren genehmigt: Es soll der Hochlöbliche Kleine Rath ersucht werden, durch den H. Hauptmann Lanicca nach nochmaliger Untersuchung der Umstände mit Zuziehung anderer Sachverständiger, einen Plan zur Abhülfe der Gefahr beyder Gemeinden und möglichst genauer Kostenanschlag entwerfen lassen; eine allgemeine Steuer für diese bedrängten Gemeinden im Kanton ausschreiben, und wann diese nebst der von den Gemeinden zu verlangenden eignen Anstrengungen zur Ausführung der Sicherungsanstalten nicht auslange, jeder dieser Gemeinden einen Zuschuss aus der Kantonskasse bis auf f. 2000.– bestimmen können. Die zu Ausführung des entworfenen Plans nötigen Arbeiten, sollen unter Aufsicht eines sachverständigen Beauftragten der Regierung angeordnet und vollzogen werden.

#### **Ustonza da Rueras, protocol dil Cussegli pign, 1823, 20 da december**

An die Herren Vorsteher der Gemeinde Rueras.

Auf das bittliche Ansuchen Eures Herrn Deputierten, Assistent Schmid, hat der Kleine Rath in Berücksichtigung des grossräthlichen Beschlusses von 9. Juli und in gehöriger Würdigung der von Eurem Deputierten angeführten Umstände angemessen gefunden Euch f. 164 einstweilen aus der Kantonskasse zu gewähren, wodurch Ihr in den Fall gesetzt werdet gleich Steine sprengen, und dann diese an Ort und Stelle führen zu lassen.

Wir behalten uns vor seiner Zeit die diesfalls gemachten Arbeiten gehörig zu untersuchen, und je nach dem Verhältnis Eurer eigenen Anstrengung bey Erbauung des Steindamms wird die beschlossene Unterstützung aus der Kantonskasse fliessen. Übrigens werdet Ihr an den Bau selbst erst dann Hand anlegen, wenn der grossräthlichen Bestimmung zuvor gehörig entsprochen worden seyn. Anbey etc...

## **Ustonza da Rueras**

Hochwohlgebohrner, hoch und Wohlweiser Herr Bunds Präsident!

Nach wiederholtem dringendem Gesuch der Nachbarschaft Rueras habe ich endlich den Steindamm besichtigt, den Sie im folge der Anordnung des vom Kleinen Rath beauftragten Herrn Ingenieurs Lanicca, aufgebaut hat.

Ich kann Eurer Weisheit versichern, dass das Werk, wenn man die geringe Kraft dieser kleinen Gemeinde in Erwägung zieht, alle Begriffe, die man von ihren geringen Kräften hat, übersteigt. Dieser Steindamm hat schon jetzt eine Länge von 65: a 67 Klafter, zu 6: fr: Schuhe. In der Sohle ist er durchaus 2: und in der Krone besser als 1: Klafter breit; und endlich ist die Höhe davon zwischen 20 bis 26 Schuhe.

Dass ein solches Werk ungemein viell Arbeit und viell Arbeitslöhne erfordert habe, ist ausser allen Zweifel, und verdient auch, dass die Regierung nun wenigstens zum Theil, die Unterstützung ertheile, die der Grosse Rath bereits erkannt hat, indem die Nachbarschaft Rueras sonst ausser Fall wäre, die Fortsetzung dieses Dammes zu erzielen.

Der Herr Geschworener Schmid begiebt sich demnach persönlich zum Kleinen Rath, und ich ermangle nicht sein Anliegen aufs nachdrücklichst empfehlend zu unterstützen. Übrigens glaube ich dass es wohl angemessen wäre, dem H. Ingenieur Lanicca den Auftrag zu ertheilen sich an Orth und Stelle zu verfügen, um die gemachten Arbeiten zu untersuchen, ihre Zweckmässigkeit zu beurtheilen, und die allfällige weitere Anleitungen zu erteilen, ehe man den ganzen Betrag der erkannten Subsidiegelder ausfolgen lässt.

Genehmigen Euere Weisheit die Versicherung der ausgezeichneten Hochachtung, womit ich zu sein die Ehre habe.

Brigels den 27. August, 1824, Dr. Peter Anton de Latour

## **Ustonza da Rueras**

Hochlöblichen Kleine Rath.

Indem ich mich auf meinem dem hochlöblichen Kleinen Rath am 5. Juni vorigen Jahres, über die dem Dorfe Rueras drohende Lawinengefahr und über die zu derer Abwendung eingeleiteten Vorkehrungen, eingegebenen Bericht beziehe, habe ich nun die Ehre Euren Weisheiten zu melden, dass die in diesem Jahre ausgeführte Arbeit hauptsächlich die Erhöhung des im vorigen Jahr begonnenen Steindamms bezweckte, so dass derselbe nun 5,60 Meter bis 6,60 Meter hoch, im Fusse 3,70 Meter bis 4 Meter, in der Krone 2,50 Meter dick und im Ganzen 130 Meter lang ist. Die zur Verstärkung dieses Dammes angeordneten Strebepfeiler sollen, wenigstens zum Theil, noch diesen Herbst angebracht werden, so wie die Schwellverbindung in der Krone. Die Auspflasterungen derselben, die noch erforderliche Verlängerung des Dammes und die Ergänzung der Strebepfeiler bliebe also bis kommendes Jahr verschoben. Für eine so kleine Gemeinde wie Rueras, ist dies allerdings ein bedeutendes Werk, welches ohne die ihr bewilligte Unterstützung wohl nicht so weit hätte gedeihen können. Nur ist zu bedauern, der Mangel an einer gehörigen Regelmässigkeit, sowohl in Richtung und Böschung, als in Verbindung der Steine, wodurch die Festigkeit leidet. Hierüber sind nicht sowohl die an der Direktion theilneh-

menden Einwohner, als die Arbeiter zu beschuldigen, an welche der grösste Theil dieser Arbeit veraccordirt war. Jene sind vom besten Willen beseelt, besitzen aber nicht genug Sachkenntniss, um eine Arbeit auf die ihnen angegebene Art auszuführen. Der nämliche fall findet auch in andern Gemeinden statt, und es wäre daher unter solchen Umständen nothwendig, ihnen nicht nur die Art der Ausführung einer Arbeit anzugeben, sondern ihnen diesselbe auch anzuordnen und so lange zu leiten, bis sie den nöthigen Begriff davon sich eigen gemacht haben. So liesse sich dann sowohl von ihrer eigenen Anstrengungen als von den ihnen ertheilten Hülfsgeldern eine möglichst nützliche und zweckmässige Verwendung erwarten.

Ich habe die Ehre mit ausgezeichneter Hochachtung und Ergebenheit zu verharren.  
Ihro Weissheiten

Chur, 10 .September, 1824, R. La Nicca

### **Ustonza de Rueras, protocol dil Cussegli pign, 1824, 20 da settember**

An die Herren Vorsteher der Gemeinde Rueras.

Aus dem Berichte des Herrn Ingenieurs Lanicca, welchen wir in Gemässheit der Eurem Deputierten Herrn Geschworenen Schmidt erteilten Erklärung, mit der Untersuchung der von Eurer Gemeinde zur Abwendung der Schneelawinen errichteten Schutzmauer beauftragt hatten, entnehmen wir mit Wohlgefallen, dass Euere Gemeindegliedern zur Erreichung dieses Zwecks es weder an gutem Willen, noch an Kraftanstrengungen haben fehlen lassen, und dass der grössere Teil des Dammes bereits aufgeführt sei; da indess die Arbeit, ohne Schuld der Gemeinde von den Übernehmern nicht so gut und fest gemacht worden als man es hätte erwarten können sollen, so ist es unablässig notwendig, dass das Werk unter Aufsicht eines Sachkundigen vollendet werde, damit der dabei beabsichtigte Zweck der Sicherstellung Eurer Gemeinde nicht unerreicht bleibe. Zum Behuf dieser Arbeiten wird der Herr Kantonskassier noch im laufenden Jahre dem diesfälligen, grossräthlichen Beschluss gemäss dem Vorsteher Eurer Gemeinde f. 800 zukommen lassen, nämlich im nächsten Monat November f. 400 und im darauffolgenden Dezember die anderen 400. Anbey etc...

### **Ustonza de Rueras**

Der Amts Landamen des Hochgerichts Disentis an den Hochlöblichen Kleinen Rath des Kantons Graubünden!

In schuldiger Erwiederung Eüeres Angenehmigen vom 4. Augst, nehme ich mir die Freiheit Eüeren Weisheiten zu bemerken, dass die dermalen so kostbare Erndte Zeit, es den betrefenden, welche über die Rueras Schutzmauer rechnung abzulegen haben, fast unmöglich macht solches thun zu können, und soll folglich Ew. Weisheiten bitten diese suspension zu bewilligen. Sollte jedoch die Sache von so Wichtigkeit sein, so erwarte ich von Euer Weisheiten die ferneren berichte, womit ich Hochtungsvoll verharre  
Euer Weisheiten gehoramster Dr.

Thavetsch den 10. Sept. 1826 der Amts Landamen J. J. Gieriet

### **Ustonza da Rueras**

Der Amts Landammen des Hochgerichts Disentis an Hoch Löbl. Kleinen Rath des Kantons Graubünden

Thawetsch den 4. November 1826

Hochgeachte Hoch und Wohlweisende

Herrn, getreue Liebe Bundsgenossen !

In Gemässheit des in Ihrer verehrlichen Zuschrift vom 19. September diessgestellten Verlangens, habe ich nicht gesäumt dem H. Thomas Schmid mitzutheilen, wie Sie Hochw. und Wohlweisende Herrn aus beiliegenden Abschrift seiner schon früher geführten Rechnungs zu entnehmen belieben wollen.

Zudem findet der Unterzeichnet sich dadurch auch veranlasst Ihnen Hochgeacht und Wohlweisende Herrn anzuseigen, dass über die verwendung des beitrages aus der Kantons Kasse an die Schutzmaur von Rueras weiters gahr keine Speifizierte rechnung abgelegt worden seii als dem hier beiliegenden Abschrift gleich lautend, und noch dies ist mir Nuhr zugeschickt worden.

Ob die Abgelegte Rechnung richtig und lobenswürdig sey, wirds ohne Zweifel an die Hoch und Wohlweisende herrn Urtheilen zu sein.

Indem ich Sie mit freundbundsgenössischer Begrüssung und besonderer Hochachtung geharret

Der Amts Landaman des Hochgerichts Disentis

J.J. Gieriet

### **Ustonza da Rueras**

Rechnung der Unkosten welche der Steindamm, oder Schuzmaur zu St. Jacob verursacht hat.

|      |   |                          |
|------|---|--------------------------|
| 1818 | Bey 600 Taglöhner, die von der Gemeinde als Gemeindewerker geliefert wurden zwei Mauren bezahlt   | 13:40                    |
| 1820 | An Steinsprenger, Schmid und Maurer, so wie für ein Stück Gut, worauf die Mauer gebaut wurde<br>Nebst dem an die Maurer Speis und Trank gegeben 140 Tag, welche von der gemeinde bestritten wurden. In diesem Jahr hat die Gemeinde noch besondere Handlanger bezahlt, für 300 tag.   | 375:00                   |
| 1822 | Dem Maurer Meister Pulti, für gemachte Arbeiten bezahlt<br>Für Pulver zum Sprengen<br>Die Gemeinde hat noch über dies an Speis oder Trunk dem gleichen bezahlt beyläufig fl. 20: die hier nicht in Rechnung kommen, weil sie von der Gemeindsgenossen geliefert wurden. In diesem Jahr hat die Gemeinde Handlanger geliefert 560 Tag.<br>Für Quartier und Handwerkzeug für Mauern | 335:00<br>45:00<br>13:00 |

|      |   |         |
|------|---|---------|
| 1824 | Dem Thomas Stadelwiser in zwey Acorden überhaupt für geleistete und Arbeit bezahlt. Darin sind begriffen Quartier Geld für den übernehmer   | 1350:30 |
| 1825 | der Arbeit, für Löhne für hergeföhrtes Handwerkzeug und Entschädnisse für ein Stuck Gut wo der Maur zu stehen kommt.<br>Ferner an Handlager baar ausgelegt  | 479:48  |
|      | Noch sind bei dieser Arbeit von der Gemeinde die vielen Gemeindewerke nicht in Berechnung gekommen, welche auf einige Tausend belaufen.   |         |
|      | Für Spreng Pulver bey dieser Arbeit.  | 87:20   |
|      | Dem Schmid für Arbeit an Handwerkszeug.   | 57:30   |
|      | Für die Wiederaufbauung eines Stucks der eingestürzten Maur...  | 28:35   |
|      | Für Schlussstangen in der Maur.   | 19:00   |
|      | Für ein Habeisen, Schlegel u. Bundhacken u. Anderse Zeüg...   | 13.40   |
|      | Für eine Zeichnung oder Plan dem Meister Stiefenhofer.  | 1:57    |
|      | Für früher versuchsarbeiten zur Anlegung eines Schutzdamms.   | 12:13   |
|      | Für Reise Spesen an die Aufseher und Bauauftragten, welche nach Chur in dieser Angelegenheiten gingen, so wie au Spesen eines erbetteten Auswärtigen zur Schlichtung eines mit dem übernehmer miskommenen Streits und Beaugenscheinigung der geleisteten Arbeit | 35:16   |
|      | Für zu verschiedenen malen an die Arbeiter sowohl Handwerksleute als Handlanger gegebenen Trinke  | 13:00   |
|      | Total   | 2878:75 |

St. Jacob den 31. October 1826

Mit der Unterschrift: Thomas Schmid

### **Ustonza da Rueras**

Mustér, 2-1-1923

Preziau Duri Vigeli!

Engraziel grondamein per Vos cordials salids ed auguris sin Daniev. Era jeu augureschel da tut cor a Ti cun Tia prezida famiglia, sco era alla mumma ed agl aug in ventireivel bien niev onn cun la benedicziun dil Segner, che nus tuts pudeien far adina sin sontga veglia ed aschia sefar vengonz inagada dil s. parvis. Seregordel mintga di de tuts nos parents ella s. messa ed en mias oraziuns, sco jeu serecamondel era memez.

De vossa catastrofa leu ils 8 de December ei vegniu dau part a mi cun ina ga ed hai era legiu la correspondenza ella gasetta, che havess saviu esser scretta in bien ton meglier, in tec pli serius. Ina caussa, che metta en tema ed anguoscha in entir vischinadi, che dat tals donns ed alarmescha la finala in'entira vischnaunca, ei tonaton buca mo traplas. Scadin cass ha in jester, e buca in nativ de Tujetsch saviu scriver quell'uisa.

Che Vus haveis concludiu de tschenttar si ina crusch benedida sur il vitg, ei mo de benvantar. Dis ed onns steva pli baul ora giu sut l'ustonza – si «Parvechel» – ina crusch,

ch'ins ha schau ira sut cul temps. La mumma po aunc seregurdar. Sch'jeu fuss staus sin Vossa radunanza, sche havess jeu sco vischin de Rueras, proponiu aunc enzatgei auter, numnadamein de turnar a far silmeins miezfirau ils 6 de fevrer, sco nos vegls fagevan en memoria della lavina dils 6 de fevrer 1749, nua che buca meins che 70 persunas han piars la veta. Ins duess far sin quei di uffeci de morts, ei duess vegnir legiu giu ils numbs de quels, ch'ein vegni ella lavina, fatg in messa per ils defuncts e vegnir priu si ina unfrenda per far bien pellas olmas dil vischinadi. Pli daditg mava sin quei di tut en ner, ed ins schava arder candeila, e quella empermischun vegneva renovada mintga 10 onns. Enzatgei semegliont havessess Vus era peda de far ed ei fuss ina biala meriteivla ovra e manteness en memoria la historia de nies vitg. Era tut laud, che Vus haveis concludiu de reparar la ustonzia; sche Vus fageis quei duei tut segidar, sco nos vegls han fatg. Dil rest duess quei buca custar aschia snueivel, cunzun cura ch'il cantun dat per talas lavurs 80%, ton sco jeu sai. Era la vischnaunca sco tala sa sustener quella caussa. Sur l'ustonzia laschel suandar tenor giavisch in pèr notizias sin in fegl admess separat. Hail adina l'intenziun de scriver ina broschura sur Rueras e lu vegnel a tractar la causa pli alla liunga; denton maunca il temps ad interim. Ussa stai cun Diu!

A tuts cordials salids da Vies pader Basel

# Bibliografia

1. Pren mira, Tiu retg vegn tier Tei ! Mustér 1887. Cudischet per la preparaziun sin la sontga communiu.
2. Collecziun d'oraziunettas cun perdun d'emprender ordado e da recitar savens. Dedicau als cars affons da scola. Mustér 1888, G. Condrau.
3. Il rusari dallas siat dolurs da Nossadunna. Mustér 1888, G. Condrau.
4. Remarcas sur la schinumnada «Corda paternos» digl uorden dalla sontga crusch. Mustér 1888, G. Condrau.
5. Il tschundubel scapulier. Nossadunnaun 1890.
6. Sas era nua Giuv ei? (I. tom Crestomazia) 1896
7. Il Spazzatgamin (Annalas) 1896
8. Empermischuns, che nies divin Salvador ha fatg alla B. Margreta M. Alacoque en favur dils vers veneraturs da siu sontgissim cor, sco era a tuts quels che promovan quella biala devoziun. (Cun maletg colurau) M. Gladbach 1898.
9. Act da consecraziun al sontgissim cor da Jesus. (Cun maletg colurau) M. Gladbach 1898.
10. S. Alois da Gonzaga. Litania da s. Alois ed oraziuns. (Cun maletgs) M. Gladbach 1900.
11. Litania dil sontgissim cor da Jesus cun igl act da consecraziun prescrets da sia sontgadad il papa. Cun in maletg, en duas variaziuns, cun sempla rama co-tschna. M. Gladbach 1900.
12. Responsori en honur da s. Antoni da Padua. (Cun treis divers maletgs) M. Gladbach 1901.
13. Remarcas sur la schinumnada «Corda paternos» digl uorden dalla s. crusch, Muster 1901, Condrau, 2. ediziun.
14. Oraziun tier s. Benedetg per urbir ora ina ventireivla mort. Cun maletg da pader Rudolf Blättler. (Schau far il clisché e stampar a M. Gladbach, B. Kühlen) 1902.
15. Oraziun tier s. Giusep, la quala sia sontgadad Papa Leo XIII ha recumandau pella devoziun digl october. (Cun maletg colurau) M. Gladbach 1902.
16. Cudisch da messa per pietus affons. Nossadunnaun 1903; 2. ediziun 1922.
17. Confraternitad dil sontgissim ed immaculau cor da Maria. (Cun maletg da Nossadunna dallas victorias a Paris) M. Gladbach 1903.
18. Sin Cadruvi, Solothurn 1904
19. Uniun da s. Gion en favur dil hospezi per spirituals, numnaus asil da s. Gion a Zezras sper Cuera, 1904. (Cul maletg dil hospezi) Translaziun sin giavisch da revendissim dr. Job. M. Ruoss.
20. Suspirs tier il sontgissim cor da Jesus, 1907. (Cun maletg) M. Gladbach.
21. Zercladur. Act da consecraziun al sontgissim cor da Jesus (ed entginas oraziuns, cun maletg colurau) M. Gladbach 1907.
22. Selva avon 100 onns, Mustér 1909

23. Litania da sogn Giusep, cun maletg. M. Gladbach 1910.
24. S. Vigeli, uestg e marter, patrun dalla diocesa da Trient e dalla pleiv da Tujetsch. (Cuorta legenda ed oraziun, cun dus differents maletgs) Stampau a Mustér, G. Condrau, 1910. Ils maletgs ein vegni retratgs da Trient.
25. Il Cumin della Cadi da 1656 e mistral Giachen Berchter, Mustér 1911
26. Oraziun tier Nossadunna per urbir ora ina beada mort. («Lichtdruckbildchen» en 28 diversas representaziuns da Nossadunna) M. Gladbach 1913.
27. Litania dil sontgissim cor da Jesus, 1913. (Cun in maletg dil cor da Jesus en autotipia).
28. Statutas dall'uniun da mummas a Platta, 1914. (Cun maletg da Nossadunna dallas dolurs) – Procurau per sur Tumaisch Berther. B. Kühlen, M. Gladbach.
29. Uniun expiatorica per spindrar las paupras olmas dil purgatieri. – La Chapelle-Monthigen, Orne, Frontscha. 1914 (Cun maletg dalla caplutta da Nossadunna.)
30. Apostolat dils umens. (Cun maletg dil cor da Jesus) – Procurau per sur Tumaisch Berther, M. Gladbach 1914.
31. Oraziun en temps d'uiara, 1914, G. Condrau, Mustér.
32. Act da consecraziun al Sontgissim cor da Jesus. M. Gladbach 1914.
33. Oraziun tier sogn Giusep, la quala sia sontgadad Papa Leo XIII ha recumandau per la devoziun digl october. Mustér, G. Condrau 1914.
34. Notizias sur ils zenns da S. Gion a Mustér, Mustér 1916
35. Adoraziun perpetna dil sontgissim sacrament digl altar per confiert dallas olmas dil purgatieri, eredita ella claustra da muniessas, numnada «Leiden Christi» sper Gonten, Appenzell, 1917. (Cun maletg) Friburg, Stampa Canisius
36. A Camischolas, Ingenbohl 1917
37. Sontga Catrina a Mustér, Mustér 1919
38. Ils Bannerherrs della Cadi, Ingenbohl 1920
39. Baselgias, capluttas e spiritualess, 1924
40. Avon onns, 1928
41. Reminiscenzas d'in vegl curant a Mustér. Cumpariu 1929
42. La sera da pustretsch
43. Suenter viaspas
44. A sogn Giachen, en Tschespet 23/1943

#### **Register da manuscrets ella Biblioteca romontscha dalla claustra da Mustér**

- M 26 2. Notizias historicas sur Th. de Castelberg
- M 145 La Villa spel stradun. Cumedia en 2 acts; Boschius dr. u il miedi e siu survitut
- M 146 Il Paterlun, ni co il calger empren de dir la verdad. Cumedia en 2 acts
- M 200 Canzuns de Nossadunna, rimmadas e per part carteivel translatadas
- M 201 Il fabricant dell'aura. Der Wetterfabrikant, ina cumedia en 2 acts
- M 203 1. La patrona tschocca. Die blinde Patronne, cumedia

2. Dus amitgs e mo in caput
- M 350 Rimnada da plaids
- M 501 Register dalla litteratura romontscha da Böhmer cun remarcas. All'entschatta sura da professer Böhmer, alla fin bia remarcas davart promoturs dil lungatg romontsch ord la Gasetta Romontscha
- M 508 Excerpt ord ils cudischs da morts, da Tujetsch (muniessas, rodel, spirituals etc.)
- M 547 Teater: La mustra dils recruits da Flamm Theodor ed Il prenci spazzatgamin
- M 578 Brev da scolast B. Weinzapf a pader Baseli
- M 580 Derscher chischner en Tujetsch
- M 598 Documents originals da Tujetsch
- M 599 Material biografic sur da
1. Jos. Maria Camenisch
  2. Famiglia Fing da Breil
  3. Landrehter N. Maissen cun ina copia da siu manifest digl onn 1676 e differentas brevs da G. B. Capaul da Lumbrein sur da N. Maissen
  4. Landrehter Theodor de Castelberg cun remarcas davat l'invasiun dils Franzos
- M 600 Differentas brevs pertucont la Biblioteca romontscha dalla claustra; denter auter da bibliotecar cantunal Candreia; dr. Pieth, dr. Decurtins C.; dr. A. Pfister; dr. Hans in der Gand; J. Battaglia, dr. G. Gadola, departement digl intern Pilet-Golaz; professer Hörimann, professer Böhmer; sco era sia correspondenza cun la «Schweizerische Gesellschaft für Volkskunde» pertucont la publicaziun d'in concept sur dallas «Stialas da latg». Catalog dils cudischs da Thomas Berther e dil carnet d'emprest da 1893–1932
- M 601 Manuscret da «Baselgias, capluttas e spiritualessa de Tujetsch», sper in exemplar cun remarcas e rescenssiuns.
1. Fegls singuls cun remarcas davart ils singuls spirituals
  2. Correspondenza pertucont la sura ovrà cugl entir capitel
  3. Clerus claustral da Tujetsch cun outras notizias
- M 602
1. Sontga Catrina Mustér, manuscret cun remarcas e correspondenza
  2. Avon onns, manuscret
  3. Reminiscenzas d'in vegl currant de Mustér, manuscret e singulas remarcas
- M 603
1. Remarcas sur dils bannerherrs dalla Cadi cun la pertucconta correspondenza cun singulas notizias sur dil cumin
  2. Bandieras da cumin e correspondenza sur da quellas
- M 605 Disgrazias en Tujetsch
1. Rapports e correspondenza sur dallas disgrazias da lavinas 1817 e 1892
  2. Pestas ed onns da fomaz
  3. Onn dalla fom 1817
  4. Differenti rapporti sur da disgrazias
- M 606 Emigrants tuatschins, oravontut ell'America
- M 607 Notizias sur dallas scolas da Tujetsch

- M 608 Mistral e deputai da Tujetsch  
Dispetas per tiarms, posta e conducts d'aua
- M 609 Rueras, ustonzia da 1824
- M 610 Rueras, habitants, pot, ed ina scartira sur da Rueras e Tujetsch
- M 611 Camischolas, correspondenza pertuccint la renovaziun dilg altar, incendi etc.
- M 612 Remarcas sur da Selva, Cavorgia e Surrein
- M 613 Decripziun dalla Val Tujetsch
  1. La sera da pustretsch
  2. Suenter viaspas
  3. A. S. Giachen
  4. Differentas descripziuns
- M 614 Nov carnets cun da tuttas notizias sur da Tujetsch. Bia ord differents archivs, auter ord artechels dalla pressa e bia dalla tradiziun populara.
- M 615 Fragment dalla genealogia della schlatta Berther; 1 carnet 33 paginas. Rimnau ord bia documents.
- M 616 Bia fegls sgulonts davart differentas schlatteinas; oravontut sura dallas famiglias Berther, Condrau, Palli, Huonder, Schmed ect., tut da Tujetsch.
- M 617 Da l'istoria da Mustér, extract dalla historia da pader Clemente da Brescia e differentas notizias sur da singulas casas dil vitg. Remarcas sur da castials da Mustér da Franzestg Bundi.
- M 618 Notizias ord la Val Medel. Interessantas ein las notizias sur dalla via nova sul Pass Lucmagn. Notizias sur da S. Maria.
- M 619 Dalla historia sursilvana
  1. Rapports sur dad uors
  2. Viafier sul Lucmagn
  3. L'invasiun dils Franzos
  4. Extract ord ils cudischs dalla Pleiv da Sumvitg
- M 620 Notizias ord la Cadi dil temps dil Sonderbund. Dus carnets cun indicaziuns dils officials dalla Valtelina, Cleffen ect. Biars artechels ord gazzettas.
- M 621 Protocolum Ordinandorum, dus carnets da plevons dalla Surselva.
- M 622 Quater carnets: Spirituals dalla vischnaunca da Sumvitg, mo in fegl sgulont. Spirituals ord la vischnaunca da Trun; era in fegl sgulont. Register dils plevons e beneficiats da Sursaissa. Ils plevons da Breil. Notizias sur dalla baselgia parochiala da Mustér. Notizias sur dils plevons, baselgias ect. Dallas vischnauncas: Mustér, Schlans, Sumvitg, Cavardiras e Zignau.
- M 623 Cumin dalla Cadi: Notizias surlunder, sur dil pot da cumin, sur schetgas, uffecis dalla Valtelina, landrehter Jakob Balliel, salters, casa cumin, mistral.
- M 624 Dus registers dils mistral ed auters uffecis dil cumin dalla Cadi.
- M 625 Notizias sur dalla litteratura romontscha
  1. Cudischs dalla stampa dalla claustra
  2. Notizias sur dalla stampa «Vollmar-Manetsch» a Glion e sur dalla gasetta

- «Ligia Grischa» da G. Gieri Cavelti-Hangartner.
3. Differentas notizias sur dalla litteratura romontscha; leutier in register dal-las ovras en surmiran e dil dialect dalla Val Müstair
  4. Teater en claustra da Mustér ed auters cun entginas canzuns.
  5. Fuormas romontschas da salidar e proverbis.
- M 626 Remarcas lexicalas e grammaticalas
- M 627 Grammatica per emprender tudestg.
- M 628 Historia dalla claustra:
  1. P. Baseli Carigiet e differentas notizias sur dalla scola claustrala.
  2. Register alfabetic dils paders benedictins.
  3. Notizias generalas sur dalla claustra da Mustér
  4. Priedis, teni en baselgia da Nossadunna ni en claustra da 1885–1888 cun indicaziuns cuortas dil cuntegn
  5. Bia feglis libers cun notizias sur da differents paders e dus catalogs stampai per ils onns 1840/41
- M 629 Scola claustrala
  1. Entginas remarcas generalas sur dalla scola claustrala
  2. Attestats dil scolast Placi Bisquolm da Sumvitg
- M 630 Historia dalla claustra
  1. Reliquias dalla claustra, notizias sur dalla baselgia da Sogn Pieder, baselgia da Nossadunna e beins dalla claustra
  2. Stampa claustrala
- M 631 Avat Pieder da Putnengia
- M 632 Waltensburg
- M 633 Plaids, poesias e brevs
- M 634 Differentas scartiras religiusas ed educativas ed extracts
- M 635 Ils priedis
- M 636 Pliras scartiras persunalas ord siu relasch
  1. Reglas per far bialas lavurs en scret
  2. Reglas praticas ect. descripziun d'in viadi ad Innsbruck.
  3. Schenghetg per paupers students da dunna M. Berther Regensburg.
  4. Uniu svizra da students e ligia dils veterans
  5. Rendaquen da sias ediziuns
  6. Brevs da Cr. Caminada, sur Paulin Giger, ect. sur da siu cudisch d'oraziuns.
  7. Fotografias persunalas
  8. Correspondenza cun Maggi, Glion pert. ediziun dil cudisch d'oraziuns.
  9. Memoranda: Rgister da correspondenza digl 1. da schaner 1929–20. december 1931
- M 647 Brev da caplon G. A. Venzin a sur Brugger Alois  
Quater differentas brevs da pader Baseli Berther a Brugger Alois, can.
- M 658 Treis brevs da W. Derichsweiler a pader Baseli Berther
- M 672 Brevs da siu temps da studi (kopias)

**Ovras da**  
**Pader Baselí Berther**  
**1858–1931**

**Tom II**  
Scartiras culturhistoricas  
dalla Vischnaunca da Mustér  
e dil Cumin dalla Cadi  
Biografia e poesias

# Cuntegn

|   |     |
|---|-----|
| Al lectur/ra . . . . .  | 5   |
| In plaid sin via . . . . .  | 6   |
| Il pader, cronist e historiograf . . . . .  | 9   |
| Il cumin dalla Cadi da 1656 e mistral<br>Giachen Berchter . . . . . cumpariu 1911 | 11  |
| Notizias sur ils zenns da S. Gions . . . . . cumpariu 1916                        | 38  |
| Sontga Catrina a Mustér . . . . . cumpariu 1919                                   | 48  |
| Ils Bannerherrs dalla Cadi . . . . . cumpariu 1920                                | 60  |
| Avon onns . . . . . cumpariu 1928   | 86  |
| Breil . . . . .   | 87  |
| Trun . . . . .  | 87  |
| Zignau . . . . .  | 88  |
| Sumvitg . . . . .   | 88  |
| Surrein-Sumvitg . . . . .   | 90  |
| Medel . . . . .   | 91  |
| Tujetsch . . . . .  | 91  |
| Mustér . . . . .  | 92  |
| Reminiscenzas d'in vegl curant a Mustér . . . cumpariu 1929                       | 101 |
| Pader Baseli Berther, 1858–1931   |     |
| Sia veta e sias ovras . . . . . cumpariu en Tschespet 23/1943                     | 111 |
| biografia da dr. Guglielm Gadola, Mustér  |     |
| Poesias da pader Baseli Berther . . . . . cumpariu 1943                           | 160 |
| Bibliografia . . . . .  | 173 |

# In plaid sin via

Sco pader benedictin dalla claustra da Mustér ei pader Baseli Berther staus enconuscents all'entira populaziun dalla Cadi. Entras siu agid en differents loghens ella pasto-raziun, mo era entras ses viadis sco rinnader da scartiras per sia biblioteca, ha el fatg enconuschientscha cul pievel e lez ha apprezziau sia lavur en baselgia, per la biblioteca romontscha e sco editur da lavurs culturhistoricas.

Il present cudisch, ni secund tom da sias ovras, presenta lavurs historicas dalla Cadi, mo oravontut dalla vischnunca da Mustér. Plinavon cuntegn el ina vasta biografia da pader Baseli sco era entginas poesias dad el.

## Il cumin dalla Cadi da 1656

Il Cumin dalla Cadi da 1656 e mistral Giachen Berchter, ei in'ovra ch'ei cumparida 1911 ella stampa G. Condrau a Mustér. Ei setracta d'in tschancun historia dil cumin dalla Cadi ch'ha pretendiu dad el lavur miniziusa e studi extendiu. Ei vegneva pretendiu che mistral Giachen Berchter (Berther) hagi scarpau sil cumin digl onn 1656 ina bulla papala che reglavi dretgs dalla claustra e digl uestgiu da Cuera. Pader Baseli ha, cun documents ed autras scartiras, saviu mussar ora che quei seigi buca stau il cass. Tschentaners suenter anflein nus la rectificaziun publica e gesta e pader Baseli scriva alla fin da questa lavur: «Ti has schau contonscher dretg e giustia il Giachen.»

## Notizias sur ils zenns da S. Gions a Mustér

Igl onn 1916 cumparan, a caschun ch'il zenn grond da Mustér era sefess, las: «Notizias sur ils zenns da S. Gions a Mustér», che han contribuiu alla erecziun d'in bi zenn grond niev. Quella lavur da 16 paginas, ei cumparida ella Gasetta Romontscha en fuorma dad artechels. Ei setracta d'ina lavur davart la historia dils zenns da S. Gions da 1338 tochen 1916. Ella plaida e relata da lur dis da legria e tristezia. Cun quei studi ha pader Baseli svegliau igl interess dils vischins da Mustér. Il success da quella lavur ha animau el da porscher treis ulteriurs maletgs culturals ord la historia da Mustér.

## Sontga Catrina a Mustér

Igl onn 1919 cumpara quella lavur. Igl ei la historia d'ina dallas pli singularas capluttas dalla secunda mesedad dil 17avel tschentaner sigl intsches da Mustér. La historia da quella caplutta privata ha pader Baseli Berther presentau a moda zun varionta e cun risguardar tuttas fontaunas pusseivlas. Dasperas ha el capiu dad era risguardar e notificiar la historia dallas famiglias Huonder, Durgiai ed autras. Ton che la lavur ha era ord quella vesta ina tut speciala valeta. All'entschatta ei la lavur cumparida ella Gasetta Romontscha e plitard en fuorma d'ina broschura.

## Ils Bannerherrs dalla Cadi

Cun notizias ord la historia dil cumin dalla Cadi. La laver ei cumparida igl onn 1920 ella stamparia «Paradies», Ingenbohl. Ei setracta d'ina sparta tut speciala dalla historia dil cumin dalla Cadi, numnadamein quella dils Bannerherrs, ils bandierels dil cumin. Quels vegnevan mintgamai tscherni a caschun da cumins ordinaris ed extraordinaris e tschen-tai en quella funcziun per mintgamai 6 – 7 onns. La laver relata davart il pensum dil bandierel ed enumerescha ils Bannerherrs dalla Cadi, aschilunsch sco gl'ei stau d'eruir. La laver cuntegn in capetel da tempra polemica en favur dalla veglias bandieras dalla Cadi. Cheu ha pader Baseli stridau beinenqualin. Il meret ei denton staus quel, ch'el ha entras sia scrutaziun carmelau neunavon duas dallas quater bandieras veglias dil cumin dalla Cadi. Sin quei ein quellas vegnidas restauradas e vegnidas duvradas a caschun dalla fia-sta cetenara dalla Ligia Grischa 1924 a Trun.

## Avon onns

La laver ei cumparida 1928 ella stampa da G. Condrau a Mustér. Quella laver rauenta da dis commemoratifs ord la historia dalla Cadi. Mintga vitg, mintga val e mintga vischnaunca han, sper lur fiastas ecclesiasticas e religiusas, aunc dis specials commemorative, che regordan ad eveniments trests sco barschaments, bovas, lavinas ni auas grondas. Pader Baseli ha rimnau ella Cadi, visitond vischnaunca per vischnaunca e descret co quels dis commemoratifs vegnevan festivai en mintga liug.

## Reminiscenzas d'in vegl curant da Mustér

Siu davos studi culturhistoric ha el dedicau alla historia dil vitg da Mustér, oravontut alla historia dallas pli veglias casas dil vitg; las duas casas cumin sco ad enzacontas outras casas marcantas dil vitg. Pader Baseli relata cun carezia da siu vitg, il vitg da sia patria religiusa, e rauenta da sias enconuschientschas localas a moda detagliada e minuziosa. Cumpariu ella Gasetta Romontscha igl onn 1929; e sco separat da 15 paginas.

## Pader Baseli Berther OSB 1858 – 1931

### Sia veta sias ovras

El Tschespet 23 digl onn 1943 ei cumpariu ina extendida e vasta biografia da pader Baseli Berther, scretta da dr. Guglielm Gadola, Mustér / Cuera. Guglielm Gadola ei staus scolar da pader Baseli e lez ha promoviu el e svegliau igl interess da scriver, oravontut sur dalla cultura indigena. Perquei ha dr. Gadola era scret la biografia da siu anteriusc scolast. Ella liunga biografia descriva el la veta da pader Baseli da sia affonza tochen sia mort. Gronda peisa dat el sin sia derivonza e sils antenats da pader Baseli. La biografia cum-peglia era ina extendida survesta dalla historia e svilup dalla Biblioteca romontscha en claustra da Mustér. Gadola terminescha la biografia culs plaids: «Tgi che ha legiu atten-tamein questa biografia sa, che pader Baseli Berther ha luvrau e barhau per tutt bials e stabels ideals da nossa tiara e nies lungatg, entochen ch'il sulegl da sia veta ei ius da rendiu.»

## **Poesias da pader Baseli**

Guglielm Gadola scriva en sia biografia: «Che pader Baseli fussi era «poet» ils pli paucs che san. La raccolta, che jeu hai fatg denter siu relasch litterar, dat denton perdetga, ch'el ha era empruau da mesirar il ritmus e da schar ruclar la rema. El era buca poet da professiun e sequintava era buca denter lezs; dil reminent ha el nuotatonmeins dau beinenqual empruada; e denter sias tipicas poesias d'occasiun sesanfla enqualina ch'ei aunc gartegiada buca mal; cunzun quellas cun cuntegn satiric.

Era sias poesias da cuntegn religius ein buca senza valeta, schebein che la tempra lirica era buca sia forza. Las autras – schubramein poesias d'occasiun – ston ins prender per talas ed audan perquei buca sut ils dents dalla critica. Las biaras han insumma pli-tost valeta cronicala-historica.»

• • •

Pader Baseli ha perscrutau e conservau. Sias lavurs ein da minizusa preparaziun. Da quei plaidan tut sias notizias ch'el ha fatg e rimnau ellas vischnaunca dalla Cadi, tier la populaziun ed en archivs. Cun sias lavurs davart il cumin e la vischnaunca da Mustér ha el conservau in temps ch'ei oz als pli biars nunenconuscents. Siu lungatg ei populars e capeivels. Sin quella moda ha el contonschiu in e scadin, ed aschia contonschiu sia finamira da sensibilisar la populaziun pil vargau e far attents sin la preziosa historia, las atgnadads ed ils beins culturals. El ha aviert ils eglis e svegliau il sentiment pil vargau. Possi quei patratg canticuar e prosperar vinavon!

# Il cumin dalla Cadi da 1656 e mistral Giachen Berchter

In niev document per la historia dalla Cadi cun notizias

*Laudatur ab his, culpatur ab illis.*

*Da biars vegn el ludaus, dad auters scurvanaus.*

*Hor. sat. 1,2,11*

Strusch ei il pievel dalla Cadi staus enzacuras sin cumin aschi agitaus e turbelaus sco igl onn 1656. Ei ha buca settractau cheu ton per persunalitads politicas, che dattan per ordinari il pli bia da far a nossas tschentadas, ed era buca pervia da caussas purmein politicas: anzi quei cumin ha giu in caracter per aschia da dir totalmein religius-politic. Igl ei stau in cumin, che ha menau e dau il davos stausch tiella decisiun, tgi che duei haver alla finala la giurisdicziun sur schotg pleivs dalla Surselva ed Ursera, igl uestg da Cuera ni igl avat da Mustér.

Per saver s'orientar en quella caussa e per saver capir il decuors e la muntada da quei cumin, lein nus sespruar da dar ina cuorta survesta dallas relaziuns antecedentes e dallas raschuns, che han leventau e menau neutier plaun e plaun quella remarcable burasca. Nus suandein en nossa dilucidaziun las notizias dalla «Synopsis»<sup>1</sup> e «Cuorta Memoria»<sup>2</sup> dalla claustra da Mustér, las sulettas fontaunas entochen ussa da quellas varts ord quei temps, e vegnin a publicar alla finala in niev document, entochen dacheu totalmein nunenconuschents, ord il qual ei seresultescha, che la historia ha entochen ussa buca giu en tuts risguards la vera e dretga idea dil decuors dil cumin da 1656, cunzun buc arisguard la bulla da papa Urban VIII e la persunalidad da mistral Giachen Berchter.

• •

La claustra da Mustér era da quei temps, concernent la confirmaziun e benedicziun digl avat, dependenta digl uestg da Cuera. Igl uestgiu da Cuera fuva el decuors dils onns antecedents sembrugliaus en gronds deivets, tal'uisa ch'ils beins e las renditas digl uestgiu vegnevan impègnadas als crediturs, perfin a protestants. Veginde quei ad ureglia a Ruma, han papa Urban VIII (1623–1644) ed Innocens X (1644–1655) relaschau differentas bullas (brevis), entras las qualas els han garegiau digl uestg da Cuera, che las pleivs en igl entir uestgiu da Cuera, ch'eran sut ni incorporadas vidavon allas claustras da Nossadunnaun, Favera, Marienberg (Tirol)<sup>3</sup> e Mustér, daventien exemptas e dueigien esser dacheudenvi sulettamein e totalmein dependentas dils avats dallas respectivas claustras e buca pli digl uestg da Cuera. Cheu encunter havessen lu las numnadas claustras giu l'obligaziun da contribuir tons e tons mellis per saver pagar giu ils deivets digl uestgiu da Cuera.

1655, ils 30 da fenadur ei Adalbert de Medell, oriunds da Tujetsch,<sup>4</sup> vegnius eligius sco avat da Mustér. El haveva fatg ses studis plirs onns a Ruma el collegi da Propaganda fide ed, ornaus cul tetel da doctor ella filosofia e teologia fuv'el avon cuort temps returnaus



Mustér cun la claustra

ella patria e steva en ses 27 onns. Aunc avon ch'el vegni benedius sco avat ei il nunzi da Lucerna, Frideric Borromeus, sevulvius tier Adalbert II ed ha perschuadiu el dall'idea da papa Urban VIII e ses dus successors Innocens X ed Alexander VII (1655–1667) da numnadamein surprender entginas pleivs sut sia giurisdicziun e pagar persuenter 2000 flurins agl uestgiu da Cuera, ina idea, alla quala avat Adalbert II ha dau mo vesamein siu cumentiment.

1655 ils 28 da settember ei vegni fatg a Cuera en preschientscha e cun consentiment da Gion VI Flugi, uestg da Cuera ed Adalbert II de Medell, avat da Mustér, ina corrispudenta scartira, ch'ei vegnida confirmada ed approbada da nunzi Frideric Borromeus. L'auter di, ils 29 da settember ei Adalbert II vegnius confirmaus e benedius ella catedrala dil nunzi sco avat da Mustér e quei gratis.<sup>5</sup>

1655, ils 30 da settember ha nunzi Frideric Borromeus relaschau ina scartira,<sup>6</sup> en vertit dalla quala suandontas pleivs e filialas dueien vegnir totalmein orasut digl uestgiu da Cuera e messas per adina sut la giurisdicziun quasi episcopala digl avat da Mustér: La pleiv da s. Pieder e s. Paul ad Ursera cun las filialas da Hospital e Realp, la pleiv da s. Vigeli a Tujetsch, da s. Gion Battesta a Mustér, da s. Martin a Medel, da s. Gion Battesta a Sumvitg, da s. Martin a Trun, da Nossadunna a Breil cun las filialas da s. Martin e s. Sievi, da s. Gieri a Schlans, da s. Leodegar ad Uors, da s. Gieri a Ruschein, da s. Zein a Ladir, da s. Flurin a Siat, da s. Andriu a Rueun, da s. Giulitta ad Andiast, da s. Rumetg a Falera, da s. Plasch a Valendau e da s. Gion Battesta a Domat. – La numnada scartira dil

nunzi ei vegnida tarmessa tier a tuts spirituals dallas sura pleivs ed igl ei vegniu cu-mandau en vertit dalla sontga obedientsha da corrispunder a quella ordinaziun fatga en num dil papa Alexander VII.<sup>7</sup>

1655, ils 13 d'october ha Adalbert II avat da Mustér, en considerazion che sia claustra seigi ussa totalmein exenta e che las allegadas pleivs stettien sut la giurisdicziun dalla claustra da Mustér, pagau agl uestgiu da Cuera ils stipulai 2000 flurins.<sup>8</sup> Ina respectiva quittanza en num digl uestg da Cuera ei suttascretta da domdecan Bernardin Gaudenz, auditor Barclamiu Sorinus e dad auters plirs.

• •

Buca ditg suenter ch'igl uestg ed ils canonis da Cuera han giu retschiert quella summa tut en aur, ein els stai fetg enriclai dad haver fatg in tal pass e contract, il qual els havessen ussa bugen revocau ed annullau, sch'ei havess saviu esser. Muort respect e reverenza duida alla sontga sedia han els buc ughegiau da luvrar encunter aviartamein, denton ei quei vegniu fatg sin vias e sendas indirectas. La «Cuorta Memoria» (p. 250) raquenta sco suonda: «Igl uestg ha clamaeu e laschau vegnir tier el ils spirituals dallas numnadas pleivs, cumandond a quels, ch'els duessien instigar e surplidar il pievel da lur pleivs, che quels cun tut lur puder e cun tutta forza semettessen e fagessen encunter a quella midada e fatg accord, e ch'els mai duessen secuntentar dad esser ni star sut agl avat u alla claustra. Quei ei era daventau; pertgei ch'ils spirituals e seculars, part per far plascher a lur uestg, part per il schliet cor che schiglioc portan ina part encunter ils religius, han fatg ed execuiu il camond cun tutta diligenza e quitau, cun tal effect, che bunamein tut era encunter, e negin secuntentava da vegnir sut alla claustra, enstagl agl uestg.»

Enderschend il nunzi quell'opposizion, ha el relaschau ils 13 da november 1655 in rigurus decret als plevons e caplons dils capetels da Mustér, Uors, Foppa ed Ursera ed admoniu els danovamein sut peina da suspensiun ed inhabilitad tier dignitaris da corrispunder a siu exprimiu camond enteifer siat dis.<sup>9</sup>

Stermentai entras tal decret, han enzacons paucs spirituals dallas numnadas pleivs ren-conuschiu igl avat da Mustér per lur superiur ed engirau fideivladad. Denter quels ei stau in dils principals Nicolaus Genelin, plevon a Sumvity.<sup>10</sup>

1656, ils 4 da schaner, tut surura, han ils spirituals dalla Cadi teniu capetel a Trun per secussegiar e sedeliberar sur quella impurtonta caussa. Era avat Adalbert II, accumpagnaus da pader Maurus Cathrin,<sup>11</sup> ei cumparius sin quei capetel. El ha mess avon leu als spirituals cun tutta ruasseivladad las respectivas scartiras da papa Urban VIII e dad Innocens X, sco era la cunvenziun fatga denter igl uestg da Cuera e la claustra da Mustér cun intervenziun ed approbaziun dil nunzi. Denton tut ei stau adumbatten. Ils spirituals ein perseverai en lur opiniun ed han refusau scadina sutmissiun ed obedientsha alla claustra, nunditgond ils camonds e las smanatschas dil nunzi. E sez plevon Nicolaus Genelin ed ils auters, ch'eran stai sesuttamess vivon agl avat, ein puspei curdai giu da lur empermischun ed ein s'uni cun lur confrars.

Ella part sut eran sis plevons stai seradunai ils 16 da schaner 1656 a Rueun ed han giu cumponiu ina recenta scartira, cun la quala els han appellau a Ruma e dumandau in agen cumissari en quella fatschenta, supplicond da far quescher il nunzi ad interim. La medema protesta ei era vegnida surdada agl avat Adalbert II a Trun ils 17 da schaner 1656. Suttascret han: Lorenz Curschellas, plevon a Siat, Duri Gandtner, plevon ad Andiast, Melchior Caprez, plevon a Rueun, Pieder Caduff, plevon a Schlans, Christian Callucius, plevon a Falera e Gion Caderas, plevon a Ruschein.<sup>12</sup>

La caussa ei adina vegnida pli acuta e pli enconuschenta al pievel. Ei ha era buca muncau da quels, che han luvrau denter il pievel en favur dils spirituals, respectiv pigl uestg ed encunter la claustra, aschia ch'il pievel fuva alla finala seprius en generalmein per las ideas dils spirituals seculars.

• •

Cheu arriva ussa il di da cumin 1656, Gliendisdis Tschuncheismas.<sup>13</sup> Las stgiras neblas setratgas neutier gia daditg sur la Cadi han purtau quei di, ils 5 da zercladur, in vehe-ment stemprau sin la tschentada da cumin a Mustér. La «Synopsis» rauenta il suandont: Sin cumin fuva era presents il custos dalla catedrala da Cuera,<sup>14</sup> tarmess digl uestg Gion VI Flugi d'Aspermont, in um rufinau e principal instigatur dil pievel, autur e promatur da zun gronda violenza. Quel ha plidau e perorau avon igl entir pievel stigond si quel. Biars auters plevons e spirituals han suandau quei oratur – sco era ils missiunaris caputschins<sup>15</sup> – buca seregurdond dils benefecis, ch'els havevan retschiert da nos avats Augustin, Josef ed Adalbert I, e finalmein ord ils seculars Nicolaus Maissen, intim amitg dil domcustos, ch'era avon cuort temps vegnius alzaus buca senza rampins, ord bassa cundiziun tier la pli aulta dignitat dil cumin.<sup>16</sup>

«Instigaus aschia, ha il pievel entschiet a garegiar digl avat cun gronda canera e smannatschas, ch'el extradeschi la bulla dils papas Urban VIII ed Innocens X al mistral ed al cumin. Quei ha era stuiu daventar. Havend il pievel quellas scartiras en ses mauns, han ins fatg mo beffas e gomias cun quellas ed era sur igl avat, ed alla finala surdau quellas al nievelegiu mistral Giachen Berchter, il qual ha senza ni tema ni respect avon il vicari da Cristus priu ora siu cunti e tagliau e scarpau en tocs quellas avon igl entir pievel. Tut ei selegrau lundergiu, segloriond e triumfond sco quels, che selegran giud la raccolta e victoria, partend la preda. (Is. 9, 3.) Denton buca senza castitg.»

La «Synopsis» rauenta lu detagliadamein e cun veseivla satisfacziun vinavon e di, co ils principals instigaturs, il domcustos<sup>17</sup> e Nicolaus Maissen<sup>18</sup>, seigien vegni castigai persuenter dalla divina providentscha.

Concernent il nievelegiu mistral remarka la «Cuorta Memoria» (pag. 253) il suandont: «Mistral Jacob Berchter, il qual haveva scarpau e tagliau en tocs sin cumin la bulla papala ei vegnius enten extrema miseria e pupira, ch'el ei staus sfurzaus da vegnir e rugar per vivonda avon la porta dalla claustra, sco il pli miserabel, pauper rugadur; ed alla fin, sco in miez desperau vagabund ha en tiaras e loghens jasters stuiu encurir il siu da viver, nua ch'el ha finiu miserablamein il temps da sia veta.»

Cun nossa survesta, dada entochen dacheu, secartein nus dad haver dau ina clara idea dallas relaziuns denter igl uestgiu da Cuera e la claustra ord quei temps, sco era da haver motivau sufficientamein las raschuns, che han menau neutier il turbulent cumin dalla Cadi da 1656. Tenor la «Synopsis» e la «Cuorta Memoria» fuss pia mistral Giachen Berchter staus in dils pli gronds adversaris dalla claustra, da tutta-  
via schliet exempl sin cumin e dasperas in um, che la torta da Diu havess tuccau grevamein silsuerter. Suandont quellas duas fontau-  
nas han historiografs e litterats dil novissim temps adina turnau a

raquintar il medem e per part era engrondiu sin nunfundada moda il secuntener da mistral Giachen Berchter sil cumin da 1656.<sup>19</sup>

Denton secund in vegl document, anflaus la stad 1909, ed il qual nus schein suandar silsuerter exactamein talis e qualis, ei quei tut buca ver, anzi ei semuossa ord quei document, che mistral Giachen Berchter ei adina staus in bien amitg e fautur dalla claustra, e che las bullas da Urban VIII ed Innocens X seigien gnanc stadas sin cumin. Ei sa pia esser negin raschieni, che mistral Giachen Berchter hagi tagliau en tocs quellas. Era vegn ei mussau si, che mistral Giachen Berchter seigi buca vegnius en miseria e pupira e dishonur, anzi, ch'el seigi vivius ses davos onns en bunas, ni silmeins buca schliatas relaziuns finanzialas e ch'el seigi morts sco officier e bien cristifideivel a Valencia, honoraus e respectaus da tuts.

Il document, che nus publichein, havein nus ord in cudisch da quart fomat, screts en lungatg tudestg, che sesanfla egl archiv claustral a Mustér, bein ligiaus e conservaus. Il cudisch ha 475 paginas,<sup>20</sup> ch'ei denton buca emplenius ora diltut. El cuntegn differen-  
tas notizias, era sur musica, denton las pli biaras serefereschan sin la famiglia Berchter, dalla quala mistral Giachen deriva. Il cudisch udeva all'entschatta a mistral Giachen Berchter sez ed ei lu seartaus a pliras generaziuns da sia descendenza, perquei porta era l'emprema cuviarta sil maun dadens suandonta inscripziun:

«Disess buoch gehört Mir Jacobo Berchter. Zum anderen Bienni gewestem LAmman zuo Disentis.»

«Hernacher mir Joanni Berchter gewestem Poda. zuo Wurmst auch 10: Jahr Lschreiber lobl. Gemeind Disentis, und 4: Jahr dess lobl. Ob: gr: Pundtess Lschreiber.»

«Hernach mir Jacobo Berchter verlassen 1703 den 13 July.»



Il di da cumin

Il cudisch ei secrets sil pli pauc da quater differents mauns. Las pli veglias notizias statthan sin pag. 424 – 445 sut il datum dils 13 da fevrer 1623, differentas caussas sur musica: «Underricht und Documenta auf die Zitharen, wie man dieselb der Tabulatur nach schlagen soll... Grundlicher Bericht wie man ein Zitharen stimmen solle»... Lu suondan notas en bustabs tier diversas canzuns: «Cantiones quaedam sacrae... Hernach volgen allerhandt deutsche gesängli, däntz, Gassenhauer und sonst kurzweilige stikhli.»<sup>21</sup> Sin pag. 446, cul datum 1635, ils 6 da fevrer entscheiva mistral Giachen Berchter a purtar en ils datums dil batten e dalla creisma da sia famiglia, che porschan muort lur originalitat agen interess e dils quals nus schein suandar cheu in exempl.

«Ao 1640 den 28ten Jully auf Samstag war der Tag 15 Stundt lang, wass im Zeichen dess gschützes, zwüschenzt zwey, und drey Uhren nach mitag, ist mir ein sohn geboren, und an dem tag durch Ihr Ehrw. Hrn. Augustinum Prelaten dess Ehrwürdigen Gottshauss Disentiss alss Baptizando, und promitendo Götz, in bey sin deren Ehrwürdigen Hoch, und Wolgeleren geistlichen hrn. alss hrn. Jacob Callenberg<sup>22</sup> Pfarhr: alhir, und Camerer dess lobwürdigen Capitelss ob dem Wallt. Hr: P. Marti Stöcklin, und hr: P. Joseph gewestener Decan dess obnermeltens Capitelss, Johan Thiraun schaffner, und Khemerling Menitsch, Gota war die Ehren, und tugendriche Frau Ammanin Anna Brancazi, dess hrn. alten Landrichters und Banerhrn Jacob de Balliel Eheliche Haussfrau.

Ist sin Tauff Nammen Johanness<sup>23</sup>

Dass Got, wass für sin Seell dienstlich geben woll alless.

Ao 1643 den 24ten Augsten ist mein obgemelter sohn von Ihr Ehr. Gn. Johannes Flugiuss Bischoffen zu Chur gefürmet worden, war sin assistant der Hoch. und Wolgelert Hr. Cristophorus Mor, der Zite Tumpropst zu Chur.»<sup>24</sup>

Da 1663 – 1690 ha podestat Gion Berchter, fegl dil sura mistral, secret en quei cudisch il datum dil batten e dalla creisma da ses figliols e figliolas. Da 1703 naven ha scarvon Giachen Berchter, fegl dil podestat purtau en sis battens, nua ch'el ei staus padrin.

Las pli biaras e las pli interessantas notizias derivan denton da pader Justus Josef Berchter, subpriur dalla claustra da Mustér. A sias numerusas notizias, ch'el para dad haver rimnau cun grondissima stenta biars onns ora, dat pader Justus il tetel sin pagina 34: «Berchterianische und andere Jahr Geschichten.» Cun sia lavur po el haver entschiet 1723. Propriamein suttascrets ei pader Justus negliu, mo ord fetg biaras notizias sur sia atgna personalitat e sur specialas, internas caussas dalla claustra, sco era numnond mistral Giachen Berchter siu tat, san ins concluder cun tutta segirezia, ch'el, pader Justus, seigi igl autur da nies document – notizias biograficas ed apologia sur mistral Giachen Berchter. P. Justus Josef Berchter, conventional dalla claustra da Mustér da 1697 – 1736, fuva frar da scarvon Giachen Berchter ed aschia in dretg beadi da mistral Giachen Berchter. El era perquei tuttavia bein enconuschents cun la historia e las relaziuns dalla famiglia Berchter. Che sias notizias merettien cumpleina renconuslientscha e cardientscha, quei damonda gia sia sempla, sincera moda e maniera el scriver; ch'el hagi priu exact e cunscienzius cun sias notizias, quei muossan oravontut las numerusas, differentas fontauñas, ord las qualas el ha fatg ses liungs e serius studis. Mal, snueivel mal fa ei a nus, da

stuer numnar tontas ed aschi interessantas e per part voluminusas scartiras, las qualas ein ussa per grondissim donn dalla historia grischuna totalmein svanidas. Senza dubi ein ellas daventadas in'unfrenda dil barschament da 1799. Sin pag. 33 scriva pader Justus: Die nahmen auss deren schrifften ich volgende Notata aussgenomen.

1. Ihr hoch Fürstliche Gnaden Augustin Stöcklin Apt. († 1641)<sup>25</sup>
2. Ihr Fürstliche Gnaden Adalbertus de Medell Apt. († 1696)
3. Ihr Fürstliche Gnaden Adalbert de Funs Apt. († 1716)
4. R. R. P. Maurus Catharin Decanus zu Disentis. († 1696)
5. R. P. Fintanus Wimer (Widmer) geistlich im kloster Disentiss.  
(fuva frater 1662; morts suenter 1687.)
6. Auss denen alten tauff und totten büochern der Pfarey Disentiss.
7. Auss denen alten tauff und totten büochern zu Thawetsch.<sup>26</sup>
8. Auss vilen schrifften H. Landt Amans Jacob Berchter von Disentiss. († 1676)
9. Auss vilen schrifften H. Podestat Joan Berchter von Disentiss. († 1703)
10. Auss vilen schrifften H. Landrichterss Jacobi Balliel. († 1645)
11. Auss schrifften Landt Aman Joan Soliva von Thawetsch.  
(Ei staus podestat a Morbegno 1611/12, mistral 1632/33.)
12. Auss vilen anderen alten schrifften, so R. P. Adalbert Bevelaqua in seinem grossen buoch geschrieben. († 1723)
13. Auss dem buoch Benefactorum zu Disentiss in kloster.
14. Auss dem schwarzen buoch von Waltenspurg.
15. Auss vilen alten warhaftigen leütien mündlich gehört.<sup>27</sup>

• •

Sper la biografia e l'apologia sur mistral Giachen Berchter, che expliceschan e completeschan ina l'autra, dat pader Justus aunc outras interessantas notizias sur la derivonza da mistral Giachen Berchter.

Il bab da mistral Giachen Berchter ei staus salter da cumin (Grossweibel) Gion Berchter.<sup>28</sup> Salter Gion Berchter ei naschius a Tujetsch 1578. El ha sil pli pauc aunc giu in frar cul num Duri, che steva a Camischolas e forsa in auter cul num Gion Martin. Suenter la muria gronda da 1585, che ha raffau navea ella vischnaunca da Tujetsch buca meins che 800 persunas,<sup>29</sup> ei salter Gion Berchter vegnius sco buob da 7 tonns a Mustér, probablamein tier parents. El ei staus maridaus duas gadas, cun Anna Capaul dad Acletta e Gretta de Medell. Sper il fegl Giachen ha salter Gion silmeins aunc giu ina feglia cul num Gretta, che ha giu maridau statalter Martin Fontana, da gliez temps ina dallas pli rehas famiglias da Mustér. Omisdus affons paran da derivar dalla secunda dunna.

Salter Gion Berchter habitava el vitg Mustér, en casa presentamein da vieua Sus. Agosti. Quella casa udeva dad in temps alla claustra e probablamein ha avat Christian de Castelberg giu baghegiau ella 1582. La numnada casa ei stada dis ed onns la casa cumin ed ei senza dubi la pli veglia e la pli interessanta casa el vitg Mustér. Tier il barscha-

ment dils Franzos da 1799 ein ils mirs ed arviuls dalla casa restai intacts. Ins ha turnau a baghiar ora ella silsuenter e duvrau vinavon sco casa da cumin.<sup>30</sup> Tschalers cun arviul, per part senza finiastra, formavan la perschun. Ordado sil mir dadens dalla casa fuva nudau en il bratsch cumin, nua che tut saveva s'orientar sur l'ufficiala, gesta mesira. Gion Berchter ei staus varga 40 onns salter da cumin e sco tal era ustier da cumin. «Dis hauss ist vil iahren dass Raadhauss gewesen, er aber gar vil iahren der Gemeindt Wirt gewesen, dess wegen alss der Landtman Hans de Florin 1629 hat lassen sein haab, und guoth in die scussion einethuohn, hat er für seine unköstungen gehabt, durch die H. dess Raadss 12 silberne vergulte underschidliche geschir überkomen.»<sup>31</sup>

Era sur igl exterior da salter Gion vegn ei raquintau e con devozios el fovi en ses vegls dis e co era cruschs seigi stau sia sort. «Er... war gross, hatte graue Haar, rothess ange-sicht, flegte alle morgen bey dem brunen zu waschen, obschon Winter ware, er war andechtig gegen die armen seelen in fegfeür, darum als er alt ware hatte er stetss den rosenkranz bey der Offen in der handt.»

«Er hat gesagt dass sein Grossvatter seye 101 iahr alt gewesst. Er aber ist 93 iahr alt worden, und starbe 1671 den 22 Juny ums 6 und 7 uhr vormitag». <sup>32</sup> «Diser hat müessen auch vil leiden da LandAman Florin Jagmet, und Nicolaus Landrichter Mayssen überhand-letten.<sup>33</sup>

• •

Suenter haver dau ina survesta generala sur las relaziuns religius-politicas dalla Cadi immediat avon il cumin da 1656, sco era sur il decuors da quel; suenter haver fatg enco-nuschennt il lectur cun las principa-las persunalitads da quei moviment e cun la derivonza da mistral Giachen Berchter, schein nus suan-dar igl exact verbal da nies docu-ment - notizias biograficas ed apo-logia sur mistral Giachen Berchter.

- Per far clar la caussa, schi lunsch sco pusseivel, essan nus sespruia da dar parallelmein ina libra, den-ton fideivla translaziun dil docu-ment en romontsch e da glossar quel tscheu e leu cun notizias. Pader Justus Berchter, igl autur dil document, enquera da refutar entrais quel las faulsas ingiurias e columnias sur siu tat e muossa si, che quel seigi adina staus in amitg e fautur dalla venerabla claustra.



Cumin

## **Herr Landaman Jacob Berchter<sup>34</sup>**

Diser ware einer anständiger gemeiner grösse, ein Man, Hochgelehr, und gar beredsam gewesen hat französisch, italienisch, theüss, romaniss reden können und gar wohl geschrieben.

1633. alss dess schwedischen Königss Gustavi, der General Horinus ein unkatolischer, und geheimer Fründ dess Duca de Roana die stat Constanz belagert hatte, und grosse gefahr wahre, er würden durch den steheg under Chur Pünten auch belagern, haben alle 3 Pünten ein ausschuz Soldaten abgefertiget, alss dan hat diser Landaman Jacob Berchter alss hauptman der Gemeindt<sup>35</sup> Disentiss Companei von 63 man commandiert, und hinabgefüret. ein schöner rother man. Und dess H. gross Weibelss Joan Berchter Sohn.

1639. den 14 augsten alss H. Conradin von Castelberg, und H. Landrichter Jacob Balliel gen Meilandt giengten dass Capitulat zu machen, ist diser Jacob Berchter von H. Apt Augustino stöcklin gen Meiland umb ein gewisse jährliche pension geltss von 200  $\triangle^{36}$  geschikht worden, welcher mit obigen von dem Duca hochehrlich bewilkhomet worden. in seiner Credenzschreiben wird er von H. Apt Augustin genambset ein Wohlbedachter, Fürsichtiger, und hochsinniger Man dess Klostersschreiber, geschworner und Landschreiber.

[57] 1639. 24. Octobris vor und nach da die iezige neue Kirchen zu st Joannes wurde gebauet, wahre Kirchen Vogt H. Landanlan Jacob Berchter, welcher alss Vogt den titl. H. Apt Augustin gebettet hat, dass er sich bewürdiget den ersten gewiehen stein zur selben Kirchen gelegt hat 1639. 22 aprilis.<sup>37</sup> 1643 von titl. H. Bischoff Flugio den 23 augsten eingewichen worden.

1641 ist er alss dess Gottsshauss Lan[d]schreiber mit titl. H. Jacob Balliel gen Muri gangen mit dem neu erwöltten H. Apt Joseph<sup>38</sup> welcher aldorten gewichen worden.

1648. den 12. Juny wurde Alt Landaman Jacob Berchter mit H. Landrichter Conradin von Castelberg gen Muri geschikht eine Composition die noch iezt gehalten wird zu machen<sup>39</sup> in ihren Credenzschrift wurden beyde von der Gemeindt od. Obrikheit der titel gegeben Unseren Hochweisen, Wohledlen, Gastrengen, schr[eiber] ware Florinus Jagmet. Diss Credenzschrift ist noch vorhanden.

1645, 1646 item 1656, 1657 ist diser Jacob Berchter der Gemeindt Disentis Landaman gewesen. item der Gemeindt Lanschreiber<sup>40</sup> laut viler schriften. item geschworner laut dess H. Apt Augustin

## **Signur mistral Giachen Berchter**

Quel ei staus in um dad undreivla, cumina grondizia, fetg perderts e da tuttavia buna faviala, saveva plidar franzos, talian, latin, tudestg, romontsch e saveva era scriver bein.

1633, cura che Horn, general da Gustav, retg dalla Suezia, buca da religiun catolica e secret amitg dil duca de Rohan, ha giu occupau il marcau da Constanz e nua ch'ei fuva grond prighel, ch'el vegni sul Steg, sut Cuera era ad occupar il Grischun, han tuttas treis ligias tarmess ina partida schuldada; cheu ha quei mistral Giachen Berchter sco capitani dil cumin da Mustér cuman dau e menau la cumpignia da 63 umens. El fuva in bi um tgietschen ed ei staus fegl dil salter da cumin Gion Berchter.

1639, ils 14 d'uost, cura che Conradin de Castelberg e landrechter Giachen Balliel ein serendi a Milaun per cumponer il capitulat, cheu ei quei Giachen Berchter vegnius tarmess dad avat Augustin Stöcklin a Milaun pervia d'ina pensiun annuala en daners da 200 crunas, il qual ei vegnius beneventaus cun ils sura dil duca cun gronda honur. En sia scartira credenziala vegn el numnaus dad avat Augustin in beindtgau, precaut e niebel um, scarvon dalla claustra, gerau e scarvon da cumin.

1639, ils 24 d'october, avon e suenter, nua che la nova presenta baselgia da s. Gions ei vegnida baagliada, fuva mistral Giachen Berchter ugau-baselgia ed ha sco tal supplicau igl avat Augustin, ch'el ei sedignaus da benedir e tschentar il crap fundamental da lezza baselgia ils 22 d'avrel 1639. – 1643, ils 23 d'uost ei quella baselgia vegnida be - nedida dad uestg Flugi.

1641 eis el sco scarvon dalla claustra serendius ensemblamein cun Giachen Balliel a Muri cun il niev eligiu avat Josef, il qual ei vegnius benedius leu.

1648, ils 12 da zercladur ei vegl mistral Giachen Berchter, ensemens cun landrechter Conradin de Castelberg, vegnius tarmess a Muri, per far giu ina cumposiziun, che vegn aunc ussa observada. En lur brev credenziala ei vegniu dau dil cumin u suprastanza ad omisdus il tetel: sabis, nobels, beindtgai; scarvon fuva Florin Jagmet. Quella scartira credenziala exista aunc ussa.

1645, 1646 sco era 1656 e 1657 ei quei Giachen Berchter staus mistral dil cumin dalla Cadi. Item scarvon da cumin tenor biaras scartiras. Item gerau tenor attestat dad avat Augustin.

zeugnuss.

1653 hat er dem H. Apt Adalberto primo ein schöness grossess käss praezentiert.

1661 in der stritikheit wegen Alpegnia und Plaun - defalles<sup>41</sup> wird er gebraucht mit Landaman Balliel Bartli.<sup>42</sup>

[58] 1653 hat Adalbertus Primus den H. Landaman Jacob Berchter zum mitag mahl eingeladen in Convent hinein, welcher alss dan dem Convent 2 mass Ehrentrunkh praezentiert hat, dan ess zur selben Zeit gar wenig Religiosen wahren.

1668. 21 Septembris ist H. Landaman Jacob Berchter von Jhro Fürstlichen Gnaden Adalberto 2 do zum mitag mahl mit ihm eingeladen worden.

1670. 9 Hornung ist H. Landaman Jacob Berchter in Fassnacht in Convent zum mitag eingeladen worden und sein Sohn Joannes.

1658 den... hat H. Landaman Jacob Berchter die Petition in Convent gethon gar schön für den Paulo Reütiman welcher nach der profession P. Placidus Reütiman genent worden.<sup>43</sup>

1669. 16 Juny hat er wider die Petition gethon in Convent vor dass Capitel für den Melcher, od Joachim Coray gethon, welcher nach seiner Profession P. Ursicinus Coray genent worden.

1656. 21 may ist von Adalberto 2 do gen Thawetsch geschikht worden den Pfahrer aldorten zu erwehlen.<sup>44</sup>

NB Dese seind zwar kleine pagatellen, auss welchen doch zu erkennen ist, dass diser Landaman Jacob Berchter dess Klosterss guother fründt gewesen seye.

1650. den 8 Wintermonath ist H. Landaman Jacob Berchter alss beysizer mit anderen 2 von Disentis gen Waltenspurg gangen alss aldorten Criminal ware.<sup>45</sup> auss dem schwarzen buoch von Waltens - purg fol. 287.

[59] 1635 ware sein erste Frau die Ehlige Dochter Anna dess H. Podestatss, und Landamanss Bartholome de Turre von Dardin.<sup>46</sup>

1649 nach dem tod der ersteren ware sein Ehlige Frau Maria die Dochter dess H. Landrichter Conradin von Castelberg, welche nach absterben seiness Ehemanss Landaman Jacob Berchter dem Kloster Disentis 60 R vermacht hat mit diser Condition, dass 30 privilegierte hl Messen gelesen sollen werden.

item hat dese 10 R der Kirchen zu st Joannes und s Agatha<sup>47</sup> vermacht.

1671 den 1. Novembbris hatte H. Landaman Jacob Berchter der Kirchen zu st Joannes Baptista in Campo R 700 vermacht, welche Ihr Fürstl Gnaden Bischof Udalricus de Monte 1683. 16 Juny bis 70 R dispensiert.<sup>48</sup>

1653 ha el presentau in grond e bi magnuc (magnucca?) agl avat Adalbert I.

1661 ella dispeta pervia dalla Alp Lumpeagna e Plaun de Fallas vegn el trats neutier cun mistral Barclamiu Balliel.

1653 ha Adalbert I envidau en mistral Giachen Berchter a gentar el convent, che ha lura presen-tau duas mesiras vin d'honur al convent, schina-von ch'ei fuva da gliez temps mo paucs religius. 1668, ils 21 da settember, ei mistral Berchter vegnius envidaus en da sia grazia Adalbert II a gentar cun el.

1670, ils 9 da fevrer, il tscheiver ei mistral Giachen Berchter vegnius envidaus en cun siu fegl Gion a gentar el convent.

1658, ils... ha mistral Giachen Berchter fatg zun bein la petizion el convent per Paul Rüttimann, ch'ei vegnius numnaus suenter il profess pader Placi Rüttimann.

1669, ils 16 da zercladur, ha el puspei fatg la peti-zion el convent avon il capetel per Melchior ni Giohen Coray, ch'ei vegnius numnaus suenter siu profess pader Ursicin Coray.

1656, ils 21 da matg eis el vegnius tarmess dad Adalbert II a Tujetsch per leger ora leu il plevon. NB. Quei ein bein mo pintgas bagatellas, ord las qualas ins sa denton tonaton enconuscher, che quei mistral Giachen Berchter seigi staus in bien amitg dalla claustra.

1650, ils 8 da november, ei mistral Giachen Berchter serendius sco assessur cun dus auters da Mustér ad Uors la Foppa, essend leu dertgira cri-minala. Ord il «Cudisch Ner» dad Uors, folio 287.

1635 eis el maridaus per la emprema ga cun Anna, feglia legitima da podestat e mistral Barclamiu de Turre da Dardin.

1649, suenter la mort da sia emprema dunna, eis el maridaus cun Maria, feglia legitima da landrehter Conradin de Castelberg, la quala ha fatg si suenter la mort da siu mariu mistral Giachen Berchter alla claustra de Mustér 60 renschs cun la cundizion, ch'ei deigi vegnir legiu 30 sontgas messas privilegiadas.

Item ha quella fatg si 10 renschs alla baselgia da s. Gions e da s. Gada.

1671, igl emprem da november, haveva mistral Giachen Berchter giu fatg si alla baselgia da s. Gion Battesta a S. Gions 700 renschs dils quals sia grazia preciuestg Duri de Mont ha dispensau ils 16 da zercladur 1683 entochen sin 70 renschs.

1676. den 25 Septembris ist H. Landaman Jacob Berchter in 60 iahr seiness Alterss zu Walenza in Welschland in beysein seiness Sohness Joannis Baptistae Berchter<sup>49</sup> durch krankheit in dem betth nach deme Gottlob mit allen heyligen sacramenten versechen gewesen, von diser Welt geschiden, und mit grossen Ehren, und nach kriegss brauch zur erden bestattet worden.

Allhier zu Diseiltis hat man den 3. od 30 gehalten 1676 den 26 8bris alwo bey st Joannes 24 Messen gelesen worden under welche gewesen seindt D. Decanus Joannes de Turre, sein Nepot Ludovicus Jagmet, D. Mathias Cavaza et D. Mathias Camenisch, D. Balthasar, die andern od Capuciner od Benedictiner, und andere Weldliche Geistliche. item 2 fratres zur music dan man hat dass gross Ampt figuriert mit der music. 1 sackh salz von 16 qna. [60] Dem Loblichen Convent hat her Podestat Joan Berchter sein H. Sohn 4 Mass Wein praesentiert etc. wegen der Music.

item hat den 23 8bris R. P. Maurus Catharin ein Mess für Landaman Jacob Berchter gelesen in Kloster.

item den 26 8bris hat P. Maurus Catharin ein privilegierte Mess gesungen an einem Montag für H. Landaman.

1677. den 7 7bris hat man dass Jahrzeit gehalten für obigen H. Landaman Jacob Berchter, bey sanct Joannes 23 Messen allwo 9 Priester auss dem Kloster, 2 Capuciner, item H. Decan Joan de Turrea, H. Canonic Schyerb, H. Joan Buschc, H. Petrus Caduffd, H. Mathias Cavaza, H. Mathias Camenische, H. Balthasar de Antonyf, H. Ludovicus Jagmetg, H. Petrus Cadurischh, H. Petrus Calenbergeri, H. Gion Genelinj, H. Paulus de Rungs.<sup>50</sup> Die music wie in vorigen iahr. item 1 sag salz ausgeben. item in vorigen iahr hat sein Sohn H. Podestat 30 Messen nach altem brauch lassen lesen! vide P. Maurum Catharin.

Gott seye seiner, und aller Christglaubigen Seelen Barmherzig. Er auch erfahren müssen dass wir durch vilen trübsaalen müssen in dass himmelreich hinein gehen. Noli vinci a malo, sed vince in bono malum.

Weilen H. Landaman Jacob Berchter seinen hl Patronen in hohen Ehren hatte, hat er in seinem nahmen den Hans la Bologna auss Sumvixerthal gen St. Jacob in Galitia gewahlfahrten geschikht, er selber der bilgram hat gesagt

[61] Sein Andacht hat sich sechen lassen, dass er der kirkhen zu St Joannes R 700 ver macht hatte wie oben. sonder in dem selbigen brieff, welche er dem R. P. Hypolito<sup>51</sup> zugeschikt hatte, meldet er wan er nacher hauss kommen werde, wolle er unser lieben Frau von Rosenkranz R 100 der kirk-

1676, ils 25 da settember, ei mistral Giachen Berchter spartius da questa veta en ina vegliadetgna da 60 onns a Valencia en Spagna en preschientscha da siu fegl Gion Battesta Berchter en consequenza d'ina malsogna en letg, suenter esser staus provedius, Dieus seigi ludaus, cun tut sogns sacraments (dils moribunds), ed ei vegnius satraus cun gronda honur e tenor usit d'uiara.

Cheu a Mustér han ins fatg messas dil tierz 1676, ils 26 d'october, nua ch'igl ei vegniu legiu 24 messas a S. Gions; denter ils spirituals presents sesanflavan: decan Gion de Turre, siu nevs Ludivic Jagmet, Mathias Cavaza, Mathias Camenisch, Balthasar (de Anthonyms), ils auters fuvan u caputschiners ni benedictiners ed auters spirituals seculars. Item dus fraters pervia dalla musica, schinavon che la messa gronda ei vegnida celebrada cun musica figurala. In sac sal da 16 curtaunas (ei vegnius partius ora almosna).

Al ludeivel convent ha podestat Gion Berchter, siu fegl, presentau 4 mesiras vin etc. pervia dalla musica.

Item ha reverendissim pader Maurus Cathrin legiu ils 23 d'october ina messa en claustra per mistral Giachen Berchter.

Item ha P. Maurus Cathrin cantau ils 26 d'october ina messa privilegiada sin in gliendisdis per il mistral.

1677, ils 7 da settember, han ins teniu il caudonn per il sura numnau mistral Giachen Berchter, nua ch'igl ei vegniu legiu 23 messas a S. Gions, ed ei fuva present: 9 paders dalla claustra, 2 caputschiners; item decan Gion de Turre, canoni Schyber, Gion Busch, Pieder Caduff, Mathias Cavaza, Mathias Camenisch, Balthasar de Antonyms, Ludivic Jagmet, Pieder Cadurisch, Pieder Calenberger, Gion Genelin, Paul de Rungs. La musica (ei stada) sco igl onn vargau. Item eis ei vegniu dau ora in sac sal. Item ha siu fegl podestat schau leger tenor vegl usit 30 messas igl onn vargau. Mira pader Maurus Cathrin.

Dieus seigi misericurdeivels cun el e cun las olmas da tut cristifideivels! El ha era stuiu experimentar, che nus stueien intrar el reginavel da Diu tras bia ras tribulaziuns. – Lai buca surventscher tras il mal, anzi surventscha il mal tras il bien. Rom. 12, 21.

Cunquei che mistral Giachen Berchter teneva zun ault siu sogn patrun, ha el tarmess il Hans la Bologna dalla Val Sumvitg en siu num a sogns a S. Giachen en Galizia. Il pelegrin sez ha detg.

Sia devoziun ei buca mo semussada cheutras, ch'el ha giu fatg si 700 renschs alla baselgia da s. Gions, sco detg sura, mobein era en quella brev, ch'el ha tarmess al pader Hipolit, fa el da saver, cura ch'el vegni a casa, vegli el far si a Nossa-

hen zu St Placi R 200, dem lieben Gottshauss Disentis R 300 vermachen, weilen er und seine Vorfahrer vil guottss empfangen. diese briefen seindt vorhanden.

Ess ist auch ein rodel vorhanden welchen er geschriben da die kirch gebauet wurde dess aussgebenss da er Vogt war. 1646 hat er ein guothe rechnung diser Vogtey vor denen Raadtss H gegeben, wie diss geschriben ist.

1671. in Julio hat er, und sein Frau schwester Greta, H. Str. Martin Fontana Frau R. 24 000<sup>52</sup> geerbt gehabt.

dunna dil s. rusari 100 renschs, alla baselgia da s. Placi 200 renschs, alla cara claustra da Mustér 300 renschs havend el e ses per davons retschiert bia bien. Quella brev exista aunc ussa.

Ei exista era in rodel sur las expensas, ch'el ha scret cura che la baselgia ei veginida baghegiada essend el ugau. 1646 ha el dau giu in bien quen sur quell'ugadia als signurs cussegliers, sco ei stat scret.

1671, il fenadur, han el e sia sora Margreta, dunna da statalter Martin Fontana, giu artau 24 000 renschs.

## **Apologia, oder Schuzschrift für H. Landaman Jacob Berchter<sup>53</sup>**

Ess hat mich seher verwunderet, dass H. Apt Adalbertus 3 de funs dess Klosterss Disentiss hat dorfen in seiner Synopsi, od. kurzer erzehlung der ganzen Histori dess Kloster Disentiss an den 1656. iahr schreiben dass Landaman Jacob Berchter habe mit einem messer die Bullam Urbani 8. auff der Gemeindt an Pfingsten montag durchstohen in welcher begriffen waren dass 18 Pfareyen under den Apt solten sein, wie sie under dem H. Bischoff alss ihren Visitator waren. Welchess mihr wunderlich vorkommen indeme ich vilmohlen gelesen dass dieser ein gar guotor frundt dess Klosterss gewesen underm Apt Augustino stöcklin, Apt Josepho, Adalberto 1 und 2 do.<sup>54</sup> hab also mit gedult diss übersechen, und übertragen müessen, biss dass ich die Ephemerides R. P. Mauri Cantrin Decani dess Fürstlichen Klosterss Disentiss, welcher Notarius Apostolicus, und Caesareus gewesen ist, und andern schriften, und rationes, od. Ursachen gefunden, auss welchen abzunemen dass ess nit also seye.

[143] Under dem Bischoff zu Chur H. Joan Flugio von Aspermondt<sup>55</sup>, hatte dass Bistum so vil schulden dass der Bischoff von denen selbigen sich loss zu machen und dieselbige zu bezahlen von Iroheylikheit Urbano 8 umb erlaubnuss angehalten etliche Pfareyen zu verkauffen, hat also 1637. den 2 may ware dise erlaubnus durch einen Bullam Generalem von Urbano 8 Barberino dem Bischoff gegeben.<sup>56</sup>

1643. 5 augsten ware obige Bulla durch anhaltung dess Päpstlichen Nunti Farnesy wieder confirmiert von Urbano 8.

1644. den 17 8bris hat der neue Pabst Innocentius 10 Panphilus ein Remer, widerumb gebotten dass die Bulla Urbani 8tavi solle gehalten werden.

## **Apologia ni scartira en defensiun da signur mistral Giachen Berchter**

Igl ei curdau si a mi zun fets, che Adalbert III de Funs, avat dalla claustra da Mustér, ha astgau scriver en sia Synopsis, u Cuorta Memoria dalla historia dalla claustra da Mustér, concernent igl onn 1656, che mistral Giachen Berchter hagi Gliendisdis Tschuncheismas sin cumin tagliau en tocs cun in cundi la bulla da papa Urban VIII, enten la quala ei era cunteniu, che 18 pleivs dei gien esser puttame ssas agl avat, sco ellas fuvan vivon puttame ssas agl uestg, lur visitatur. Quei ha pariu curios a mi, havend giu legiu bia ga, che quel seigi staus in tuttavia bien amitg dalla claustra sut ils avats Augustin Stöcklin, Josef, Adalbert I. e II. Jeu hai pia stuiu suffier e sur purtar quei cun pazientzia, entochen ch'jeu hai anflau il diari da pader Maurus Cathrin, decan dalla principala claustra da Mustér, ch'ei staus notar apostolic ed imperial, ed outras scartiras e raschuns, ord las qualas ins sa concluder, ch'ei seigi buca stau aschia.

Sut igl uestg da Cuera, Gion Flugi d'Aspermont, haveva igl uestgiu aschi bia deivets, ch'igl uestg ha per veginir libers da quels e saver pagar quels, supplicau sia sontgadad papa Urban VIII da puder vender entginas pleivs.

1637, ils 2 da matg, ei pia quella lubientscha veginida dada agl uestg da Urban VIII Barbarino entrais ina bulla generala.

1643, ils 5 d'uost, ei la sura bulla puspei veginida confirmada da Urban VIII sin supplicar dil nunzi apostolic Farnesi.

1644, ils 17 d'october, ha il niev papa Innocens X Pamili, in Roman, puspei cumandau, che la bulla d'Urban VIII deigi veginir exequida.

1655. hat Alexander 7mus Chisius widerumb dise Bullam confirmiert, und dem Päbstlichen Nuntio Friderico Borromeo befohlen inss werk zu stelen. vide 1mam part: arch fol 803.<sup>57</sup>

1660. 11 January nach allen verloffenen streitikheiten hat Alexander 7 ein ander Bullam für dem Kloster Disentiss gegeben welche iezt beobachtet wird, wegen volliger Exemption von dem Bistumb Chur. [144]

1655 in herbst hat der Pabstliche Nuntius Fridericus Borromeus deni Apt von Einsideln p R 6000 verkauft, dem Apt von Pfaffers auch etliche, welcher solte R 4000 geben, aber hat die Pfareyen nit wollen annemen, item dem Apt von Mariae Berg<sup>58</sup> in Engadin, diser solte R 6000 geben. Diser hat die Pfareyen auch nit annemen wollen.<sup>59</sup>

Also hat Fridericus Borromeus gezwungen dass der neue Apt Adalbertus de Medell hat müessen 18 Pfareyen annemen, und für solchen R 2000 geben. Er hat auch die Bullam empfangen, und den 4 8bris 1655. wider nacher Disentiss kommen dan er zu Chur von Ihme gewichen worden 29 7ber nach 2, od. 3 wochen hat Adalbertus 2dus alle Priester obiger Pfareyen zusaamen berouffen und die Bullam gezeigt, krafft dessen sie hin füro müosssten under dem Apt von Disentiss sein, als wie sie gewesen undern Bischoff. also haben die Priester gesagt sie wollen beratschlagen, was sie wollen thuon. [145] Nach deme sie berartschlagen haben sie noch Ja, noch Ney gesagt, und seindt nacher haus gangen. Underdessen hat den tit. H. Bischoff seher gereuet, dass die Pfareyen solten den Apten von Disentiss verkauft werden, und deswegen ist er vorkhomem dass dass gelt nit solte gelichen werden dem Kloster, aber der Legat, hat doch zu gesprochen dass der H. Landrichter Conradin Castelberg, und H. Landaman Florin Jagmet die R 2000 solten lichen dem Apt Adalbert 2do diese Pfarey zu kaufen. haben also gelichen R 2000.

1655 in disem iahr in 13 november ist Adalbertus 2dus gen Lucern gangen zum H. Legat, zubeklagen, dass die H. Priester nit wolten der Bulla nachkhomen<sup>60</sup>, Underdessen ware deme zu wider, das die Pfareyen nit solten dem Kloster verkauft werden der Bischoff, der Thum Probst Christophorus Mor, Vicari General Mattias Schier<sup>61</sup>, und weilen H. Joannes de Turre von Thrums sich daffer darwider gesetzt hat, ist er von Bischoff und anderen gelobt worden und Vicari forani gesetzt worden, und hernach auch Canonicus worden.<sup>62</sup>

[146] Also haben die Widersachere Priester dass volg alless falschlich informiert, diese Bulla seye wider der Gemeindt freyheit, dass sie widerumb werden. underthanig sein wie vor zeiten, dass sie

1655 ha Alexander VII Chigi puspei confirmau quella bulla e cumandau al nunzi apostolic Frideric Borromeus, che ei dueigi vegnir exequiu. (Mira I. part digl archiv fol. 803.)

1660, ils 11 da schaner, stau finiu tuttas dispetas, ha Alexander VII dau in'autra bulla alla claustra concerten la totala exempliu digl uestg, che vegn observada ussa.

1655, igl atun, ha il nunzi apostolic, Frideric Borromeus, vendiu agl avat da Nossadunnaun per 6000 renschs, agl avat da Faveras era entginas, che dueva pagar 4000 renschs, il qual ha denton buca vuliu surprender las pleivs; medemamein agl avat da Marienberg en Engiadina (el Tirol); quel havess duiu pagar 6000 renschs, mo ha era buca vuliu surprender las pleivs.

Pia ha Frideric Borromeus sfurzau il nieveligu avat Adalbert de Medell, ch'el ha stiui acceptar 18 pleivs e dar persuenter 2000 renschs. Era ha el retschert la bulla ed ei returnaus ils 4 d'october 1655 (da Cuera) puspei a Mustér, suenter esser staus benedius dil nunzi sco avat ils 29 da settember. Suenter duas ni treis jannas ha Adalbert II clamau ensemens tuts spirituals dallas pleivs sura numnadas ed ha mussau la bulla, en vertid dalla quala els hagien dacheunaven da star sut agl avat da Mustér, sco els seigien stai sut agl uestg. Cheu han ils spirituals detg, ch'els veglien prender plaid e cussegl, tgei ch'els veglien far. Suenter haver giu priu plaid e cussegl, han els detg ni gie ni na ed ein serendi a casa. Denton ei igl uestg staus zun enriclaus, che las pleivs duessien vegnir vendidas agl avat da Mustér ed ei perquei prevennius, ch'ils daners deigien buca vegnir empristai alla claustra, mo il legat (nunzi) ha tonaton animau, che landrehter Conradin de Castelberg e mistral Florin Jagmet dueigien empristar ils 2000 renschs agl avat Adalbert II per saver cumprar quellas pleivs. Els han pia empristau 2000 renschs.

1655. Quei onn, ils 13 da november, ei Adalbert II serendius a Lucerna tier il legat per selamentar, ch'ils signurs spirituals veglien buca corrispunder alla bulla. Daferton fuv'igl uestg encounter, che las pleivs dueigien vegnir vendidas alla claustra, ed era «Domprobst» Cristoffel Mohr, vicar general Mathias Sgier, e cunquei che Gion de Turre da Trun ei semess ferm encounter quei, eis el vegnius ludaus digl uestg e dad auters e vegnius numnaus vicari episcopal e pli tard era canoni.

Cheu han ussa ils spirituals, ch'eran encounter, informau il pievel totalmein fauls e detg, che la bulla seigi encounter la libertad dil cumin, ch'els daventien puspei subdis sco avon temps, ch'els

müessten nit allein die Zehende geben, sonder auch den Zehenden und Zinss etc. von allen sachen.

Deswegen ein grossess wesen, vil murmlenss, hass, misgunst, zwittrachtungen etc. in der Gemeindt entstanden.

1656. hat der Bischoff deswegen ein brieff an den regierenden H. Landaman Jacob Berchter<sup>63</sup> geschriben disess zu verhindern.

An Pfingsten Montag aber da die ganze Gemeindt versamblet ware, ist H. Vicar General<sup>64</sup> Mattias Schier von H. Bischoff desentwegen geschikht worden, disess zu verhinderen, indeme nun die Pauren falschlich underichtet worden, haben selbige mit denen H. mit allem gewalt wollen, dass die Bulla ihnen solte eingehändigt werden, oder sie wollen die selbige bullam selber mit gewalt auss dem Kloster abholen, und haben vil übelss getrohet.

[147] durch solches schreyen, und throungen ist Adalbertus Apt gezwungen zu versprechen die Bullam ihnen einzuhändigen, iedoch mit diser condition dass dieselbe Bulla in einem papir eingewiklet dem H. Joanni de Turre, und Christian Jagmet<sup>65</sup> solle eingehändigt werden, und dieselbe sollen sie nit aufthuon biss noch etlichen tagen, da die Gemeindt von ineanderen seye. und nach annemung solcher conditionen, hat der Apt Adalbertus 2dus den P. Benedictum Gässler<sup>66</sup> von der Gemeindt in Kloster hinaufgeschigt um die Bulla, welcher unversehenss ein brief in einem papir eingewiklet gefunden, hat vermeint dise Bulla seye hiereingewiklet, also hat er auf die gemeind hinab getragen, welche Adalbertus obigen 2 Priestern eingehändigt mit oben widerholten conditionen, und also ist dass Volg gestillett worden, und von einanderen gangen. Nach 2..3 tägen haben die Priester dass papir auf gethon, und gesehen dass nit die ware Bulla seye, sonder ein andere brieff von pergament dess Doctoratus, so H. Adalbertus 2dus zu Rom wegen seine volbrachte studia überkhomen habe, und diser fehler ware onversechenss geschehen, sie aber haben vermeint man habe sie mit fliess betrogen, [148] berichten dessen also bald die herren, welche sich höchst betrogen vermeinten, haben von newen angefangen zu toben, und zu trhoen, der Apt solle die ware bullam einhändigen, od. sie wollen die selbe mit gewalt abholen, also hat der H. Apt mit obigen conditionen die ware eingehändigt. In disem iahr 1656 in Summer ist der H. Legat Fridericus Borromeus wider gen Chur kommen, alss dan hat der Apt Adalbert von dem H. Joanne de Turre die Bullam zuruk begert, und hat überkhomen, welche der

stoppien buca mo dar la dieschma (ordinaria), mobein era la dieschma ed il tscheins per tuttas caussas etc.

Ord tal motiv eis ei naschiu el cumin in grond secunfar, bia murmignem, hass, scuidonza malperinadads etc.

1656 ha ord tala raschun igl uestg tarmess ina brev al mistral regent Giachen Berchter per impedir quei.

Glenidisdis Tschancheismas denton, nua ch'igl entrir cumin fuva seradunaus, ei vicari general Mathias Sgier vegnius tarmess digl uestg per impedir quei; cunquei ch'ils purs eran vegni informai faulsamein, han quels ensemblemein cun ils signurs garegiau cun tutta forza, che la bulla deigi vegnir extradida ad els, ni ch'els mondien sez cun forza per ella sin claustra ed han smantschau bia mal.

Entras tal grir e smanatschar ei avat Adalbert staus sfurzaus d'empermetter da consignar la bulla a lur mauns, denton culla cundiziun, che quella bulla vegni consignada, zugliada en in pupi, a Gion de Turre (plevon a Trun) e Christian Jagmet (plevon a Medel) e ch'els astgien arver si quella pér suenter enzacons dis, nua ch'il cumin seigi in ord l'auter. Ed havend acceptau quellas cundiziuns, ha avat AdalbertII tarmess pader Benedetg Gessler dil plac cumín sin claustra per la bulla, il qual ha senza fraud anflau ina brev zugliada en in pupi e manegiond che quei seigi la bulla zugliada en, ha purtau pia quella giu sin cumin, la quala Adalbert ha surdaus als dus sura numnai spirituals cun renovar las sura cundiziuns ed aschia ei il pievel vegnius calmaus ed ei ius in ord l'auter. Suenter dus ni treis dis han ils spirituals aviert si quei pupi e viu, ch'ei era buca la vera bulla, anzi ina autra brev da pergamant, dil doctorat, che AdalbertII haveva giu retschiert a Ruma havend giu absolviu leu ses studis. Quei sbagl era daventaus senza fraud, ferton ch'els han cartiu, ch'ei seigi daventau a posta. Cuninaga han els relatau quei als signurs, ch'ein secarti dad esser vegni enganai sil pli ault grad, han entschiet danovamein a sesfar e smanatschar, ch'igl avat dei dar ora la dretga bulla, ni ch'els vegnien per ella cun la forza. Cheu ha igl avat extradiu la vera bulla sut las sura cundiziuns. Quei medem onn 1656, la stad, ei legat Frideric Borromeus puspei vegnius a Cuera e cheu ha avat Adalbert dumandau anavos la bulla da Gion de Turre ed el ha era retschiert quella ed ha remess ella al legat a Cuera, sco el haveva giu retschiert ella dad el. Ils plaids, sco pader Maurus Cathrin scriva, ein: El ha turnau anavos ella gest sco el haveva giu retschiert. El haveva denton giu retschiert ella enti-

H. Apt dem H. Legat zu Chur inegehändiget, wie Er sie von Ihme empfangen hat.

Formalia P. Mauri Cathrin Bullam reddidit sicut acoperat aber er hatte ganz, und unverletzt empfangen, so hat er auch ganz unverletzt, und nit durchstochen widergeben. Von denen R 2000 seindt nur R 800 zurukh dem Kloster gegeben worden, und der Legat hat ein besondere Bullam von Alexandro 7 erlangt dass dass Kloster völlig von dem Bistumb Chur eximiert seye, welche iezt observiert wird.

1660. 11 Jenner<sup>67</sup> ist dise bulla gegeben worden von Alexander 7.

• •

[149] Ess folgen nun die Ursachen warum ess nit zu glauben dass Landaman Jacob Berchter die Bullam Urbani 8 mit einem Messer durchtohen habe.

1. Ess flegen alle, so die Jahrgeschichten schreiben die Junge wie Alte zu verbesseren, und zu corigieren indem sie auss mehreren büocheren bessere berichtung der sache überkhomem also hat der Cardinal Baronius vil Auctores corrigiert, doch hat auch disen der P. Joannes Mabillon corrigiert. Also ist nit zu sagen dass P. Adalbertus de funs Apt habe gelogen, od. etwass wüssendtlich falschlich geschriben, sonder mit aller ehrenbietkeit nit genugsame Wissenschaft der sach habe gehabt, und die Ephemerides R. P. Mauri Catharin nit gelesen habe sonsten wurde er solchess nit geschriben haben.

2. Was R. P. Maurus Cathrin<sup>68</sup> geschriben ist war, weilern er zur selbigen Zeit schon 4 iahr, und mehr Profess in Kloster Disentiss ware, und da die gemeindt versamblet ware hat persöndtlich könen hören und sechen wie ess auf der gemeindt ginge.

3. War aber auch R. P. Maurus ein Apostolischer, und kaysrlicher Notarius, also ihme desto mehr zu glauben, dise seine iahr geschichten in ein kleinen buoch de anno 1655. et 1656. item ine ein grosses rothess buoch. fol 262.

4. [150] 4. hergegen da disess auf der Gemeindt geschehen ware der Apt Adalbertus de funs noch ein Junger knab von 10, od. 12, iahren.<sup>69</sup> und also nit auf der gemeindt gewesen, dass er habe sechen, od. verstehen wass ess geschache.

5. Die Synopsis, od. kurze beschreibung dess Gotthauss beschreibung hat er erst 1696. geschriben. nemblich erst nach 40 iahren.

6. Weiss er nit in seiner Synopsis zu nambsen wass für ein Thumherr von Chur in nahmen dess Bischoffs auf der gemeindt erschienen seye, da

ra ed intacta, ed aschia ha el era returnau ella perfetgamein intacta e buca tagliada en tocs. Da quels 2000 renschs ein mo 800 renschs vegni tournai anavos alla claustra ed il legat ha obtenu ia specialia bulla dad Alexander VII, che la claustra seigi totalmein exenta digl uestgiu da Cuera, sco ei vegn ussa observau.

1660, ils 11 da schaner, ei quella bulla vegnida dada dad Alexander VII.

• •

Ei suonda ussa las raschuns, pertgei igl ei buca da crer, che mistral Giachen Berchter hagi tagliau en tocs cun in cunti la bulla da Urban VIII.

1. Tuts, ton giuvens sco vegls, ils quals scrivan la historia, han per moda da remediar e da curreger survegnend els megliera notizias dalla causa ord divers cudischs. Aschia ha cardinal Baronius curregiu biars auturs, denton ei era el vegnius curregius da pader Gion Mabillon. Perquei san ins aunc buca dir, che pader Adalbert de Funs hagi detg manzegnas, mobein cun tut respect, ch'el hagi buca giu sufficienta enconuschientscha dalla caussa e ch'el hagi buca legiu il diari da pader Maurus Cathrin, aschiglioc havess el buca scret semegliont.

2. Quei che pader Maurus Cathrin ha scret ei ver, essend che el era da gliez temps gia quater ni da pli onns profess ella claustra da Mustér, e ferton ch'il cumin era seradunaus, ha el saviu udir e veser persunalmein, co igl ei iu tier sin cumin.

3. Ultra da quei fuva pader Maurus era in notar apostolic ed imperial, pia ston ins era crer ton pli ad el. Sia cronica da 1655 e 1656 sesanfla en in cudisch pign; medemamein en in cudisch grond tgjetschen fol. 262.

4. Encuntercomi fuva avat Adalbert de Funs, ferton che quei ei daventau sin cumin, aunc mo in buob da diesch ni dudisch onns, ed ei pia buca staus sin cumin, ch'el havess viu ni capiu, tgei ch'igl ei daventau.

5. La Synopsis, ni Cuorta Descripzion dalla claustra ha el scret pér 1696, numnadamein pér 40 onns suenter.

6. En sia Synopsis sa el buca numnar tgei canoni da Cuera seigi cumparius sin cumin en num digl uestg, ferton che pader Maurus Cathrin, decan,

doch P. Maurus Catharin Decan, austrukhelich schreibt dass der Vicari Generall Mathias Schier gewesen sey.<sup>70</sup>

7. Meldet er auch nit von dem Vicario foraneo Joan de Turre da doch diser auf der gemeindt zum Meisten darwider gewest ist.

8. Wan Landaman Jacob Berchter solchess unverschambt zu thuon, hetten ia disess könen weren die andere herren, wan sie so guthe fründt des Klosterss waren gewesen, alss Castelberg, Turriani, Jagmeti, etc. NB. Wan Landaman Jacob Berchter nit guother fründt dess Klosterss were gewesen, so hatte er nit die 2 grosse büöcher dess archiffs abgeschriben noch ihmé hätte der Apt Augustin die originalia anvertrauet.

9. [151] Wan er disess gethon hätte wurde er gewüslich bei dem H. Legaten anklagt sein worden, und darumben gestraft, aber solchess ist nit geschehen also muoss ess auch nit gewesen sein.

10. Da Alexander 7 die andere Bullam gegeben meldet er nich in sonderheit, dass einer od. anderer darwider sich gesezt habe, sonder allein, dass grosse Misverständnuss wegen voriger Bulla Urbani 8 etzwüschen H. Bischoff, Kloster Disentiss, und Gemeindt, gewesen seye.

11. Wan ess anderst gewesen wäre, wurde er sich in diser Bulla in sonderheit beklagt haben.

12. Wan dise Bulla mit einem Messer durch stochen were, hätte P. Maurus Cathrin wol gesehen und gehört, und solchess geschriften, und hätte nit können schreiben dass Adalbertus 2dus dem H. Legat die Bullam habe eingehändiget, wie er sie empfangen hatte, reddidit qualem acceperat.

13. ess ist ia wie oben erzelt auf der gemeindt nit die rechte Bulla denen Priesteren gegeben worden, sonder nur ein pergamentd brieff des Doctoratus Adalberti 2di gewesen, so were doch nur diser, und nit die Päbstlich Bulla mit dem Messer durch stochen worden.

14. [152] Obschon alss regierender Landaman in namen der Gemeindt solche Bullam anzunemen darwider sich sezen müesste, und weilen er auch von H. Bischoff mit einem brieff darzu angemahnet worden, hat man doch nit gehört, oder gelezen dass einige guothe fründt in nahmen dess Klosterss sich darwider gesezt haben.

15. Wan die Bulla durchstochen worden, wird ess geschehen sein wie die Juden hatten gethon, da sie mit ihren schreyen, und wüeten den Pilatum gezwungen haben unsern H. zu creüzigen, also werden die Priester, Raadsherren, und die ganze gemeindt mit ihren schreyen, und wüeten ihren regierenden Landaman gezwungen haben die bullam zu brechen, od. er wurde gegen ihnen nit treü gewesen sein, und sei ness lebenss nit sicher gewesen sein.<sup>71</sup>

scriva expressivamein, ch'ei seigi stau il vicari general Mathias Sgier.

7. Fa el era buca menzun dil vicari episcopal Gion de Turre, ferton che grad quel ei staus il pli fetg encunter sin cumin.

8. Sche mistral Giachen Berchter havess pro priamein vuliu far enzatgei aschi impertinent, sche havessen gie ils auters signurs saviu impedir quei, sche els fussen stai aschi buns amitgs dalla claustra, sco ils Castelbergs, Turrianis, Jacomets etc. NB. Sche mistral Giachen Berchter fuss buca staus in bien amitg dalla claustra, sche havess el buca scret giu ils dus gronds cudischs digl archiv ed auc meins havess avat Augustin confidau ad el las scartiras originalas.

9. Sch'el havess fatg quei, sche fuss el franc vegnius tgisaus tier il legat e fuss vegnius censuraus persuenter, mo enzatgei semegliont ei buca daventau, pia sto ei era buc esser stau.

10. Cura che Alexander VII ha dau l'autra bulla, di el buca sin speciala moda, che in ni l'auter seigi semess encunter, mobein sulettamein, ch'ei seigi stau ina gronda malentelgientscha denter igl uestg, la claustra ed il cumin pervia dalla bulla da vidavon da Urban VIII.

11. Sch'ei fuss stau autruisa, sche fuss el sedolius en quella bulla sin speciala moda.

12. Sche quella bulla fuss vegniida tagliada en tocs, sche havess pader Maurus Cathrin bein viu ed udiu e scret quei e havess buca saviu scriver, che Adalbert II hagi surdau la bulla al legat, sco el hagi giu retschiert ella, «el ha returnau ella, sco el ha giu retschiert.»

13. Sco igl ei gie vegniu raquintau sisura, sch'eis ei sin cumin buca vegniu surdau la dretga bulla als spirituals, anzi igl ei stau mo il diplom da pergament dil doctorat da Adalbert II, ed aschia fuss ensesez mo quel e buca la bulla papala vegnius tagliaus en tocs cul cunti.

14. Schegie ch'el havess sco mistral regent en num dil cumin stuiu seriscuder d'acceptar (renconuscher) tala bulla e quei era schinavon ch'el fuva vegnius animaus leutier digl uestg entras ina brev, sche han ins tonaton buc udiu ni legiu, ch'auters buns amitgs hagien fatg encunter en num dil cumin.

15. Sche la bulla ei vegniida tagliada en tocs, lu sei daventau sco ils gedius han fatg, cura ch'els han entras lur grir e smanatschar sfurzau Pilatus da crucifigar Niessegner; ils spirituals, cussegliers ed igl entir cumin han sin quella moda cun lur grir e smanatschar sfurzau lur mistral regent da tagliar en tocs la bulla, ni ch'el seigi buca fideivels ad els e buca segirs da sia veta.

16. Weilen die Bulla Urbani 8 schon 1637 gegeben worden, warum hat sie inss Werkh in so vilen iahren mit megen gestellt werden under anderen H. Apten, und Landamanen. nemblich in 20 iahren?
17. [153] Weilen die Bulla hat nit in vorigen iahren inss Werg gestellt können werden, noch die Pfareyen zu mantenieren wie ess dass Kloster bis dato praevidet hat, hat dass Kloster selbst 1643 in der Composition die Pfareyen freiwillich cediert , dass die gemeindt Disentiss wegen was-füreinen Pfahrherrn den sie wöllen annemen und auslesen, und dem Kloster haben sie allein das Jus praesentandi behalten.<sup>72</sup>
18. Also ist ess nichts dardurch wider dass Kloster geschen, obschon man darwider gethon, und verderet hat, dass die Bulla zu nichten worden.
19. Wan 1656. die Bulla were von denen Priesteren, und Gemeindt angenomen worden, were ess nit lang, od. vil iahren darbey gestanden, in massen mit der Zeit der H. Bischoff nit wurde geduldet haben, noch dass Kloster Disentiss vermecht haben die Pfareij zu mantenieren, noch dass Consistorium gegen allen begebenden streitikheiten mit gnuogsaamen gelehrten Leüthen zu versechen, und allen Casibus zu beantworten.<sup>73</sup>
20. [154] ist ess auch nit glaublich dass er die bullam gebrochen habe, und dessentwegen dem Kloster darwider sein, dan er allzeit ein guother fründ dess Klosterss gewesen ist indeme er allzeit beflissen hat sich brauchen zu lassen, wie ess geschehen under dem Apt Augustin Stoklin, welcher sein herr GVatter ware<sup>74</sup>, und von ihm gen Meilandt geschikt worden, under Apt Joseph mit welchem er gen Muri gereisst, under Adalbert Bridler welchem er seher angenem gewesen. underen Apt Adalbert de Medell, welcher ihn erst den 21 may disess 1656 iahrss vor Pfingsten in seinem nahmen gen thawetsch geschikht hat den Pfahrherren altorten zu erwollen, sonsten vilmohlen alss ein guother freündt zum gastmahlen eingeladen, da er in Frankhenreich, und zu Valenz ware hat er offt dem Apten Adalbert Medell mit brieffen begrüssset, und sonsten in anderen begebenheiten dem Kloster gedient, wie oben in sein leben mehrress zu finden ist.
21. [155] Alss er zu Valenza hat er denen Söhnen geschrieben, er habe vil guotss den Gottshauss empfangen, deswegen wan er nacher hauss kome, wolle er von dem Erbguoth seiner Frau Mutter von Dardin R 100 dem heyligen Martin und R 100 dem heyligen Placido vermachen, darauss zu vemeinen, dass er ein guother freündt dess Klosterss Disentiss gewesen.
16. Sche la bulla d'Urban VIII ei vegnida dada gia 1637, pertgei eis ella buca vegnida exequida en aschi biars onns sut auters avats e mistrals, numnadamein en 20 onns?
17. Perquei che la bulla ha buca saviu vegnir messa en ovra ils onns avon, e perquei che las pleivs han buca saviu vegnir mantenidas, sco la claustra haveva giu pretendiu entochen ussa, ha la claustra sezza cedi libramein las pleivs ella cumposizion da 1643, aschia ch'il cumin dalla Cadi (resp. las vischnauncas) sa leger ora e prender si tgei plevon, ch'el vul, ed alla claustra han ins mo resalvau il dretg da representazion.
18. Aschia fuss ei (atgnamein) daventau nuot encunter la claustra, schegie ch'ins ha luvrau e trubistgau, che la bulla vegni annullada.
19. Sche la bulla fuss vegnida acceptada dils spirituals e dil cumin 1656, sche fuss ei tonaton buca restau ditg ni biars onns tier quei, essend ch'igl uestg havess cul temps buca tolerau pli e la claustra era buca pudiu mantener las pleivs ni giu in consistori da glieud perderta avunda per tuttas dispetas occurrentas e per corrispunder en tutt cass.
20. Eis ei era buca da crer, ch'el hagi tagliau en tocs la bulla e seigi per tal motiv staus encunter la claustra, schinavon ch'el ei adina staus in bien amitg dalla claustra sedond breigia da tut temps da seschar duvrar, sco igl ei daventau sut avat Augustin Stöcklin, che fuva siu cumpar, e ch'ei vegnius tarmess a Milaun dad el, sut avat Josef, cun il qual el ei serendius a Muri, sut Adalbert Bridler, al qual el ei staus fetg per cor, sut avat Adalbert de Medell, che ha aunc giu tarmess el per ils 21 da matg avon Tschuncheismas da quei onn 1656 en siu num a Tujetsch per leger ora leu il plevon, e schiglioc bia gadas vegnius envidaus sco bien amitg a gentar, ferton ch'el fuva en Frontscha ed a Valencia ha el tarmess savens brevs agl avat de Medell ed ha schiglioc surviu alla claustra en outras fatschentas, sco igl ei d'an-flar pli bia sisura en sia veta.
21. Sesanflond a Valencia ha el scret a ses feglis, ch'el hagi retschiert bia bien dalla claustra, perquei vegli el, turnond a casa, far si dalla ierta da sia dunna da Dardin 100 renschs a s. Martin e 100 renschs a s. Placi, ord il qual in sa concluder, ch'el seigi staus in bien amitg dalla claustra.

22. Wan er nit ein guother freündt dess Klosterss were gewesen, so hätten die Geistlichen in Kloster nit ein Sehelen Amt in Kloster für ihm gesungen, noch so vil Priester gen St.Joannes bey den dritten, und iahrzeit, geschikht worden, wie oben zusechen.

23. Die Bulla ware nur denen Geistlichen Priestern zugeschrieben, und denen Weldlichen giengte ess nit an, die Priester müessten dem Apt gehorsam sein, also hätte ein weldliche obrikheit in solchen sachen nit inen mischen sollen lassen, noch auff der gemeindt solchess pponieren lassen.

24. Wan ess ernst dem H.Nuntio were gewesen, dass die Bulla gehalten sollte werden, hatte er die Priester ungehorsame sollen mit der Excomunica-  
tion wie er in der Bulla getroet hatte, straffen.

• •

[156] Ess ist auch nit der Warheit gemess, wass her Apt Adalbertus de funs schreibt, dass H. Landaman Jacob Berchter hernach in eüserster Armuoth gerathen seye, dan er nür von seinem Vatter seiligen für sein theil 1671. R 14000 geerbet hatte, ohne die R 440, welche er empfangen hatte da er sich verheürathet hatte, und ohne dass erbguothe seiner Frau Mutter.

Und diss wird er nit in 5 iahren verthon haben biss 1676. nach seinem tod hat man die 70 R, so er zu St.Joannes ver macht hatte, bezalt.

er hatte selber sein Frau Maria Castelberg aussgestüret, und R 600 und mer bezalt, schaue die brieffen welche noch vorhanden.

für H. P. Adalgot Berchter<sup>75</sup> geistlichen zu Einsidlen hat man wider 600 R, ohne schuolern kostgelt bezalt, her hauptman Gilli Schorno von schwiz bekent mit seiner eignen handtschift, dass er R 1000 wegen seiner Frau Margarita Berchterin<sup>76</sup> obigen Dochter empfangen habe, item die Acla de falscharidas, so R 2000 geschezt worden, item si fontauna, si funs, si latis. etc.

[157] Man hat zwar gesagt dass sein Vatter ihn nit fast geliebt, und gern gesechen, dessentwegen er selber gern anderwo hin gangen, dazu auch seine Missgüter gerathen haben, ist er doch alss ein kriegss officierer zu Walenza gewesen und in Frankreich, alwo nebent sein ordinari besoldung hat erlaubnuss gehabt von dem hauptman von Schauenstein, und hauptman Cleric von Chur gelt zu entlehen, so vil alss er vonöthen gehabt, welches gelt seine Erben nach seinen tod obigen H. erwendet haben wie die quitanzen auffweisen.

Wan ein brawer Man nit ein guothe haussliche Frau<sup>77</sup> hat, wird sein hauss bald zu grundt gehen wie Salomon sagt, und wan ein Ehrlicher Man vil

22. Sch'el fuss buca staus in bien amitg dalla claustra, sche havessen ils paders dalla claustra buca cantau ina messa da requiem per el en claustra ed era buca tarmess aschi biars paders ora s. Gion il di dil tierz e tier il caudonn, sco igl ei da veser sura.

23. La bulla era destinada mo per ils spirituals ed als seculars mava quei nuota tier; ils spirituals havevan d'obedir agl avat, pia ha ina suprastanza secularia nuota giu da semischedar en talas caussas ed era buca giu da proponer enzatgei semegliont sin cumin.

24. Sch'eい fuss stau da retschiert al nunzi, che la bulla vegni observada, sche havess el duiu censurar ils malobedeivels spirituals culla excommuni-  
caziun, sco el haveva smanatschau.

• •

Igl ei era buca tenor la verdad quei che avat Adalbert de Funs scriva, che mistral Giachen Berchter seigi vegnius silsuenter en extrema pupira, schinavon ch'el ha mo da siu bab p.m. artau 1671 per sia part 14 000 renschs senza ils 440 renschs, che el ha giu retschiert, cura ch'el ei maridaus e senza la ierta da sia mumma.

E quei vegn el buc ad haver dersentau en tschun onns entochen 1676. Suenter sia mort han ins pagau ils 70 renschs ch'el haveva giu fatg si a s. Gions.

El haveva sez giu dotau sia dunna Maria de Castelberg e pagau 600 renschs e dapli. Mira las brevs, ch'existan aunc.

Per pader Adalgott Berchter, pader a Nossadunnaun, han ins puspei giu pagau 600 renschs senza ils cuosts pella scola; capitani Geli Schorno da Sviz attesta cun sia atgna suftascripziun, che el hagi retschiert 1000 renschs pervia da sia dunna Marghetta Berchter, feglia dil sura (mistral Giachen Berchter), medemamein l'acla da Faltscharidas, ch'ei vegnida valetada 2000 renschs, item si Fontauna, si Funs, si Latis etc.

Igl ei vegniu detg, che siu bab hagi buca giu ton bugen el e hagi viu bugen, ch'el mondi enzanauer e leutier han era ses adversaris giu cussegliu, mo ei tonaton staus sco officier a Valencia ed en Frontscha, nua ch'el ha, sper siu salari ordinari, giu la lubientscha da far far empristar daners dil capitani de Schauenstein e dil capitani Cleric da Cuera ton sco el ha giu da basegn e quels daners han ses artavels turnau anavos suenter sia mort als sura signurs, sco las quittanzas muossan.

Cura ch'in brav um ha buc ina buna caserina, vegn sia casa, sco Salomon di, gleiti ad ir sutsura, e cura ch'in brav um ha biars adversaris, ils quals

Missgüner hat die zu seinem undergang helffen, und verbieten dass niemandt umb die bezahlung etwass geben solle, so muoss derselbe wohltrachten ob er etwass, Ehrweiss, od. um liebe Christi willen seine nahrung überkhome.

Wie er gestorben, nach kriegss manier Ehrlich begraben findest oben in sein leben.

[158] Ich hab mit grossen freüden von etlichen ehrlichen menern, alss Gion de schlans in Mompe de Medell, Gion durial de selva, Schimun de Curtins si Buretsch welche in Frankreich, und Walenza auch gewesen dass er viler sprachen wohl erfahren, seher anstendig, lieb, und wert allen seye gewesen, nach aussag Alberti 2 di beredsam, vil seiner schrifften seind bey vilen verhanden, und wohl componiert, und schön geschriben, und diss wenig zu seiner einiger verthätigung, auss grossermeklicher tragender liebe gegen meinen geliebtesten H. Gross Vatter hab ich einfeltiklich geschriben mihr nichs auff besess aussdeüten wird, weilen es keinem wird schaden.

Desswegen solchess H. Apt Adalbertus dis nit hätte sollen schreiben in betrachtung dass die alte familia Berchterianorum dem Kloster Disentiss von altenhero seher zugethan ware, und under die Benefactores gezehlet worden, auch er selber als P. Adalbert de funs hiesse vil schankhungen von gelt, büöchem, anderer sachen empfangen, und grosse Ehr, und lieb ihme von H. Podestat Berchter erwisen. immemor beneficiorum.

gidan a ruinar el e che scamondan, ch'ins detti enzatgei per pagar, sche sto in tal bein mirar, schebein el survegn sia vivonda cun honur ni per amur da Cristus.

Co el ei morts e satraus cun honur tenor moda militara, anflas ti sura en sia veta.

Cun grond legerment hai jeu enderschiu da differents bravs umens, sco da Gion da Schlans a Mumpé-Medel, Gion Durial da Selva, Schimun de Curtins da Buretsch, ch'ein era stai en Frontscha ed a Valencia, ch'el fuvi bein versaus en bia lungatgs, ch'el seigi staus fetg honorifics, plascheivels e preziaus a tutis; tenor dir da Adalbert II fuvel da buna eloquenza, biaras da sias scartiras seigien en bia mauns, bein cumponidas e cun biala scartira. E quei pauc hai jeu scret semplamein per sia atgna defensiun, ord grondissima carezia encuter miu pli carezau tat, che negin vegli metter ora en mal a mi, cunquei ch'ei dat a negin donn.

Ord tal motiv havess pia avat Adalbert (III de Funs) buca duiu scriver da quei en consideraziun, che la veglia famiglia dils Berchters ei stada da vegl enneu fetg attaschada alla claustra da Mustér e vegn quintada denter ils benefacturs; era el sez ha, cura ch'el senumnava aunc pader Adalbert de Funs, survegniu bia regals en daners, cudischs ed outras caussas ed era ton pli, che podestat Berchter ha demussau ad el (Adalbert III) gronda honur e carezia. Seregordas buca pli dils benefecis.

Dein nus aunc ina gada ina cuorta egliada sin nies document, sche vesein nus, che quel ei elaboraus cun gronda stenta e, schi lunsch sco nus savein giudicar, cun tutta pusseivla objectivadad. Igl autur sefundescha sin veglias, senza dubi verdeivlas fontaunas, cunzun las scartiras da pader Maurus Cathrin, ch'ein, sco ei vul parer a nus, buca stadas enconuschentas agl autur dalla «*Synopsis*».

Ei seresultescha ord quei document – cuntrari alla historia entochen dacheu, – che la bulla da papa Urban VIII seigi, entras in sbagl cun il diplom dil doctorat dad avat Adalbert II, gnanc stada sin cumin, nundir vegnida tagliada en tocs cun in cunti. Ultra da quei secapev'ei da sesez per in um sco Adalbert II ei staus, ch'el vegnessi a prevegnir a scadina profanaziun dalla bulla cun far adattadas cundiziuns, avon che surdar quella, las qualas ein era vegnidas fatgas ed observadas, malgrad tutta alteraziun davart dil pievel e da ses menaders.

Ord las numerusas notizias sur mistral Giachen Berchter semuoss'ei plinavon claramein, ch'el seigi staus da tut temps in sincer e beinvesiu amitg dalla claustra e ch'el seigi gia ord tala raschun buca staus el cass da far in tal affrunt alla claustra. Ils differents arguments cun las notizias accumpignontas muossan evidentamein, che mistral Giachen Berchter hagi buca tagliau en tocs la bulla, che siu secuntener sin cumin hagi fatg en negin grau dishonur a siu num e che sias relaziuns finanzialas seigien tuttavia buca stadas ord moda, sco era ch'el seigi silsuenter vivius e morts en honur.

Las bunas relaziuns, che regevan denter la claustra e la famiglia Berchter avon il cumin da 1656, ein era semantenidas suenter, sco nus vesein quei principalmein tier sia mort 1676, ed ein era seartadas vi sils affons da mistral Giachen Berchter. Perdetga da quei dattan pliras notizias, che nus havein anflau sur ses dus fegl, pader Adalgott, conventional da Nossadunnaun e podestat Gion Berchter, che ha prestau biars survetschs alla claustra, fatg si ina gronda facultad ad ella e ch'ei perfin daventaus commensal da quella 1692.

En quei document legin nus plinavon per l'emprema ga positivamein, che avat Adalbert III de Funs seigi igl autur dalla «*Synopsis*» e ch'el hagi concepiu quella 1696. – En nies allegau manuscret ei vegniu purtau en diversas notizias entochen 1736, igl onn, che pader Justus ei morts – denton havein nus anflau negliu remarcas sur la «*Cuorta Memoria*». Ins astga forsa concluder ord quei, che quella seigi vegnida translatada e cumpligliada pér suenter 1736.

Ferton ch'ins enconuscheva entochen dacheu mo paucas scartiras cul num digl autur, las qualas ein daventadas in'unfrenda dils differents barschaments dalla claustra (1387, 1514, cunzun 1799), vegnin nus fatg attents sin auters novs numis, ils quals havevan schau anavos notizias sur fatgs da nossa patria. Denter quels sesanflan era mistral Giachen Berchter e siu fegl podestat Gion Berchter.

La schlattineira Berchter ei ina dallas pli veglias ella Cadi. El decuors dil temps ha ella dau biars e meriteivels umens pella patria e pella baselgia. Colonel Rudolf de Hess scriva en siu «*Fragment Genealogicum des Geschlechtes Berther*»:

«Ils Berthers ein senza dubi ina dallas pli veglias e distinguidas schlattineinas dil cumin dalla Cadi. Gia el 14avel tschentaner vegnan els avon en documents da Tujetsch sut il

num «de Cha Berchte». <sup>78</sup> Dil 15avel tschentaner naven, scret «Berchter», a Tujetsch, Mustér e Sumvitg. Dapi il 19avel tschentaner, scret «Berther», els medems loghens. Gi el 15avel tschentaner han ils Berchters dau mistrals al cumin dalla Cadi; ell'emprema mesada dil 16avel tschentaner alla Ligia Grischa: landrehters, quei vul dir caus dalla repubica dalla Ligia Grischa; el 16, 17 e 18avel tschentaner al cumin dalla Cadi in diember da mistrals, bandierels, scarvons; allura cumissaris, podestats, scarvons dalla Ligia, delegai d'honur silla dieta ed a. v. Nus anflein ils Berchters fetg savens en scartiras stam-padas da cuntegn historic, sco era en in grond diember da documents originals». Ella gliesta dils mistrals dalla Cadi anflein nus suandonts numbs ord la schlatteina Berther:

Martin (Jenin) Berchter da Tschamut 1425/26,

Giachen Berchter 1461/64.

Duri Berchter da Tujetsch 1467; 1471/72; 1477/81; 1484; 1490/95.

Gion Duri Berchter 1497/98; 1503/04. – Landrehter 1511/12.

Martin Berchter 1499–1502.<sup>79</sup>

Giachen Berchter 1509/10.

Duri Berchter da Tujetsch 1513/19; 1522/26.<sup>80</sup> – 1519 ha papa Julius II regalau ina bandiera al cumin dalla Cadi. Landrehter 1522/23; 1528/29; 1531/32.

Pieder Berchter da Tujetsch 1546/49. – Landrehter 1549/50;

1561/62. – Cumissari a Clavenna 1555/57 cun in salari da 1200 renschs

Duri Berchter 1551/52

Giachen Berchter da Tujetsch 1587/89; 1594/95

Martin Berchter 1599–1600.

Gion Berchter 1605/07; 1617/18; 1620/21; 1636/38.

Giachen Berchter da Mustér 1645/47; 1656/58.

Josef Nicolaus Berchter da Trun (Darvella) 1770/72. Podestat a Trahona 1753/55.

Benedetg Berchter da Sumvitg 1772/74.

• •

Sper quels meriteivels umens per il stadi cattein nus era in grond diember da spirituals ord la schlatteina Berther, dils quals nus numnein ils suandonts:

pader Adalgott Berchter da Mustér, OSB a Nossadunnaun, †1692,

sur Pieder Berchter da Cuoz-Mustér, †1714.

pader Justus Joseph Berchter da Mustér, OSB a Mustér, †1736.

pader Celestin Berchter da Mustér, OSB a Mustér, †174..

sur Giachen Antoni Berchter da Camischolas, †1765.

sur Gion Antoni Berchter da Mustér, notar apostolic †1781<sup>81</sup>

sur Nicolaus Berchter da Segnas, †1798.

sur Tumaisch Dionis Berther da Mustér, †1809.

sur Gion Battesta Berther da Mustér, †1816.

sur Gion Ludivic Berther da Mustér, †18...

pader Adalgott Berther da Segnas, OSB a Mustér, †1875

sur Paul Benedetg Berther da Rabius, canonic e decan dil Capetel Grond, †1878 etc.

• •

Suenter haver giu anflau il sura document, havein nus considerau per in act da dueivladad da publicar quel e rectificar cheutras in'errur da nossa historia, che ha cuzzau varga 250 onns. Nus anflein quella rectificazion per dueivla e gesta gia visavi nies cumin, sin il qual ei schischeva entochen ussa la zanur dad esser staus secuntenius sin moda nuncorrecta encunter acts ufficials da sia sontgadad papa.

Nus anflein quella publica rectificazion per dueivla e gesta era visavi la veglia schlattenteina Berchter, oravontut visavi la respectabla personalitad da mistral Giachen Berchter, che ha stuiu spitgar sin quella ditg avunda, mo nua che nus savein denton dir oz cun il psalmist: «Judicum et iustitiam in Jacob tu fecisti (98,4) Ti has schau contonscher dretg e giustia il Giachen».

FINIS.



Mustér, staziun dalla viafier e claustra

## Remarcas

- <sup>1</sup> «Synopsis» senumna in manuscret, che cuntegn ils principals datums ed eveniments ord la historia dalla claustra da Mustér entochen alla fin dil 17avel tschentaner. Quels ein vegni excerptai ord ils siat volums dallas annalas dalla claustra, ils quals ein i a piarder tier il barschament da 1799. La Synopsis exista en plirs exemplars ed ei scretta en lungatg latin.
- <sup>2</sup> Cuorta Memoria dalla successiun u diember dils avats, sco era dallas caussas, las pli remarcablas, ch'ein succedidas da temps en temps cun la claustra da Mustér, ni fatg midadas en nossa tiara.» Edida 1881 da C. Decurtins egl Archivo glottologico italiano VII. T.p. 197 – 254. – La «Cuorta Memoria» ei per la pli gronda part la translazion verbala dalla «Synopsis» cun remarcas subjectiv-moralas ed aschia da secundara valeta per la historia.
- <sup>3</sup> Ina gronda part dil Tirol e dil Vorarlberg udeva entochen 1805 tiegl uestgiu da Cuera.
- <sup>4</sup> Siu frar Conradin ei staus mistral 1668, 1669 e 1682, 1683. Landrehter 1678 e 1684. Ei morts igl 1 da zercladur 1691. – La davosa persuna da quella nobla schlattelina a Tujetsch ei stada dunschala Onna Maria de Medell, morta, ils 28 da fevrer 1756, ferton ch'il davos um ei stau Josef de Medell, ch'ei vegnius ella lavina a Zarcuns, ils 6 da fevrer 1749, mond en agid als sventirai da Rueras.
- <sup>5</sup> Tenor ina cunvenziun provisoria fatga 1637, ils 27 da zercladur a Faveras denter igl uestg da Cuera ed ils avats da Faveras e Mustér, havess mintga niev avat da Mustér, priu ora il cass, ch'ei muress plirs avats en in onn, giu da pagar 200 flurins agl uestg per la confirmazinn e benedicziun ed aunc schar il cavagl, sin il qual igl avat era cavalcaus, al «Mareschiallo» digl uestg. Quei fuva denton era stau usitau avon. – La scartira originala sesanfla egl archiv episcopal a Cuera. – Mira era Mohr Th., Regesten Nr. 324.
- <sup>6</sup> Ina copia da quella scartira sesanfia ella «Synopsis».
- <sup>7</sup> Alexandar VII ei vegnius eligius sco papa ils 7 d'avrel 1655.
- <sup>8</sup> In renseh en aur representava entuorn igl onn 1650, tenor ils daners dad ozildi, ina valeta da circa 10 – 11.– frs. – Pia fuss quei stau ina summa da 20 – 22 000.– frs. – Mira: Planta, P. C. Geld und Geldeswerte. Jahresbericht der historisch – antiquarischen Gesellschaft von Graubünden 1886.
- <sup>9</sup> La «Synopsis» e «Cuorta Memoria» portan il cumplein verbal da questa scartira.
- <sup>10</sup> Nicolaus Genelin (Jenelino de Casura) ei staus plevon a Breil 1625 – 1634; a Schlans 1634 – 1646; a Sumvitg 1652 – 1658; † emprem da matg.
- <sup>11</sup> In pader Maurus Cathieni, sco la «Cuorta Memoria» porta pag. 251 e che auters scribents han copiau, ha la claustra da Mustér buca giu. Ei senza dubi in sbagl cun Cathrin.
- <sup>12</sup> Il respectiv document ha C. Decurtins publicau en siu opus «Landrichter Nikolaus Maissen» pag. 56, senza dar en denton pli datier, danunder ch'il document seigi.
- <sup>13</sup> L'ordinaziun da tener cumin mintg'auter onn l'emprema dumengia da matg datescha da 1851. – Sut avat Gion Schöneneg e ferton che Duri Berchter da Tujetsch fuva mistral, eran ins stai secunvegni 1472 da metter mintg'onn mistral gliendisdis Tschuncheismas. Br. pag. 215.
- <sup>14</sup> La «Synopsis» di buca co il domcustos haveva num.
- <sup>15</sup> Maniai ein ils caputschins a Mustér, che han pastorau leu da 1648 – 1818.
- <sup>16</sup> Mira C. Decurtins, «Landrichter Nicolaus Maissen. Ein Beitrag zur Geschichte des Bündner Oberlandes.» Stans 1877, 64 pag.
- <sup>17</sup> Co domcustos dr. Mathias Sgier, pli tard domdecan, ei vegnius persequitaus, denton puspei rehabilitaus en tutta honor da Ruma anora, mira Tuor Chr. M: Reihenfolge der residierenden Domherren in Chur. p. 38. – La cunvegnentscha finala denter igl uestg e la claustra pervia dallas pleivs ei vegnida fatga ils 16 d'october 1656 e buca ils 26 sco Tuor citescha. (Vide copia egl archiv claustral da Mustér.)
- <sup>18</sup> Che las relaziuns denter claustra e landrehter Nicolaus Maissen seigien stadas cuntuadamein schi «sgarscheivlas», sco certi scribents vulan dar da crer senza argumentar sufficientamein, savein nus strusch capir. Tenor il cudisch da batten a Sumvitg ha Nicolaus Maissen giu silmeins nov affons e buca mo tschun sco Decurtins scriva (1. c.p.3.) – Gl'emprem da zercladur 1653 ha Nicolaus Maissen survegnii in pop, al qual el ha mess num suenter igl avat Adalbert e nua che pader Roman Streber da Muri, da lezzas uras decan a Mustér, ha funcziunau sco padrin. Giuncher Adalbert Maissen ei maridaus 1675 cun dunschala Barbla Coray da Laax ed ei staus 1692, 1693 e 1714, 1715 mistral dalla Cadi; 1714 deputau sill'a dieta a Glion «an St. Andreas märg», nua che la repartiziun dils ufficials per la Valtelina ei vegnida fatga per la perioda 1719 – 1767; † 21 da matg 1741. – 1663, ils 25 da zercladur ei perfin avat Adalbert II sez staus padrin da batten dil fegl Nicolaus da landrehter Nicolaus Maissen. – El cudisch da batten a

Sumvitg anflein nus plinavon, ch'ei fuva leu strusch ina casa, enten la quala landrehter Maissen ei buca staus ina gada ni l'autra padrin. – Ina differenza denter avat de Medell e landrehter Maissen datescha digl onn 1676. Landrehter Maissen ha giu tgisau tier nunzi Cybo a Lucerna, che avat de Medell perse-quiteschi e laschi persequitar el sin veta e mort. Nunzi Cybo ha susteniu Maissen. La differenza ei vegnida tractada e lugada (?) dils avats dalla congregraziu Svizra. (v.Q. Acta Congregationis ab Anno 1639–1682, Engelberg.) – Cun quella caschun remarchein nus era, che landrehter N. Maissen seigi, tenor il cudsich da morts a Sumvitg, vegnius mazzaus ni sittaus giu denter Cuera e Domat ils 26 da matg 1678 e buca «in demselben Winter» 1677, sco Decurtins scriva (1.c. p. 30), ferton che misterlessa Cathrina Maissen-Valler ei morta ils 17 da december 1698 e satrada a Sumvitg.

<sup>19</sup> Mira: C. Decurtins, *Landrichter Nicolaus Maissen*, Stans 1877; G. Cahannes, *Adalbert II de Medell-Castellberg*, avat de Mustér e prenci digl imperi 1655–1696, Ischi 1897; M. Carnot, *Schlchte Geschichten: Der Landrichter. Eine Geschichte aus dem Bündneroberlande*. Chur 1908.

<sup>20</sup> La paginaziun ei vegnida fatga 1909. Nus citein il manuscret mintgamai: Br.

<sup>21</sup> Schebein quellas notizias derivan era da mistral Giachen Berchter, savein nus buca decider.

<sup>22</sup> Giachen Callenberg (Kallenberger), camerari dil capetel ei staus plevon a Mustér dils 3 da zercladur 1638 entochen 1648, ils 5 da fevrer, sin il qual di el ei morts.

<sup>23</sup> Staus 1661–1663 podestat da Bormio.

<sup>24</sup> Br. pag. 449.

<sup>25</sup> Las remarcas ed ils millesis en parentesa havein nus mess vitier.

<sup>26</sup> Ils presents cudsichs da batten e mortoris digl archiv da Tujetsch van anavos mo tochen 1664. Ei sa tgunsch esser daventau, ch'ils pli vegls sesanflavan 1799 en claustra ed ein barschai leu.

<sup>27</sup> Ultra da quei vegn ei citau savens en nies allegau manuscret las Annalas dalla claustra, sco era in opus cul num Archiv, consistent ord treis voluminus foliants, ch'éin medemamein daventai in'unfrenda dallas flommas 1799.

<sup>28</sup> L'idea da R. de Hess en siu «Fragment Genealogicum des Geschlechtes Berther» (1883 Msc.), che podestat Gion Berchter seigi staus il bab dil vertent mistral Giachen Berchter, ei totalmein faulsa; il cuntrari: podestat Gion Berchter ei staus in fegl dall'emprema dunna (Anna de Thurre) da mistral Berchter. Medemamein fauls eis ei, che podestat Gion Berchter seigi staus mistral dalla Cadi.

<sup>29</sup> Tiella pestilenzia da 1637 ein 70 personas mortas a Tujetsch en cuort temps. Sin supplica dad avat Augustin ha il prefect dils paders caputschiners giu tarmess pader Amadeus de Mortara quei temps a Tujetsch per plirs meins, il sulet pader caputschiner, che ha, da nossa savida, pastorau a Tujetsch.

<sup>30</sup> Tgei onn ins ha retratg il present «Hotel Bellevue» sco casa de cumin savein nus buca dir. – Aunc ozildi eis ei usitau, ch'il «stab da cumin» va il di da cumin treis ga entuorn la veglia casa cumin, avon ch'il pievel setila sin cumin.

<sup>31</sup> Br. pag. 53.

<sup>32</sup> Br. pag. 53.

<sup>33</sup> Br. pag. 55.

<sup>34</sup> Br. pag. 56–62.

<sup>35</sup> «Gemeindt» vul dir en nies document ton sco cumin, «Kirkhörung» = vischnaunca.

<sup>36</sup> r = cruna, che haveva la valeta da circa 11–12.– francs dils daners dad ozildi. Quella summa ei vegnida pagada alla claustra entochen 1796.

<sup>37</sup> La «Cuorta Memoria» numna 1640, ils 22 d'avrel pagina 245. Quella baselgia ei barschada giu sin ils mirs 1799, ils 6 da matg ed ils caputschins han turnau a baghegiar si ella.

<sup>38</sup> Avat Josef Desax da Mustér senumnava avon Gion Bernard. Naschius 1600, spiritual 15 d'avrel 1623. Dr. della teologia; decan dil capetel grond dalla Surselva e canonic extraresidenzial. 1623–1639 plevon a Sumvitg, nua ch'el ha baghegiu la baselgia parochiala, sco era quella da Cumpadials. – Ei entraus en claustra a Mustér e fatg profess ils 11 da fenadur 1640. Eligius sco avat ils 10 d'october 1641 e benedius a Muri ils 17 da november. Mond cun avat Beda a Favera a S. Gagl tier la radunanza dils avats, eis el vegnius tuccaus dalla daguota buca lunsch da Ragaz ed ei morts ils 12 da matg 1642 e satraus a Favera en baselgia gronda.

<sup>39</sup> Quella cunvegnientscha denter la claustra ed il cumin ei vegnida fatga e suttascreta a Muri ils 15 da zercladur 1648.

<sup>40</sup> Tenor la cunvenzun da 1648 haveva il scarvon da cumin da survir schibein al cumin, sco era alla (claustra... «è perquei dei in scrivont schi ditg sco el ei ent il offici, star à casar à Mustér ent'il vitg,

sco toccan sin quest temps ei adina stau l'isonza.» Da cheu deriv'ei, che plirs scarvons ein lu restai per adina a Mustér.

<sup>41</sup> Lumpagna e Plaun da Fallas, in'alp ed in mises sur Faltscharidas si, che auda presentamein alla famiglia Gion Berther a Mustér.

<sup>42</sup> Barclamu Balliel da Mustér, fegl da landrehter Giachen Balliel, ei staus mistral 1654 e 1655; † 1686. – «H. Landrichter Jacob de Balliel und seine Vor Eltern waren gebürtigt von Thawetsch.» Br. pag. 104.

<sup>43</sup> Sco ei semuossa ord pliras notizias da nies manuscret, er'ei usitau pli da vegl, ch'in giuven, che leva entrar en claustra, vegneva recumandaus mintgamai al venerabel capetel entras in commensurau plaid dad inaulta persuna laica.

<sup>44</sup> vegniu eligiu dr. Andriu Decurtins=im Hoff, ch'ei staus plevon a Sedrun 1656–1672. Siu antecessur ei stau, sco enconuschen, dr. Mattias Sgier. La pervenda entscheiva a Tujetsch cun s. Gieri.

<sup>45</sup> 1734, ils 28 d'avrel (Mohr, Regesten 20 da matg) ha la claustra, suenter differentas dispetas, desistiu da sia giurisdicziun en fatgs civils e criminals a Waltensburg, denton buc ad Andiast, Rueun e Siat; ella ha cediua sia casa, nuegl e curtin, privilegis als da Waltensburg per la summa da 5500 flurins, cun inaga, ni per 6000 flurins en ratas. Resalvau fu'vei denton per adina agl avat il tetel: signur de Jörgenberg v. Md. archiv claustral.

<sup>46</sup> Mistral 1615 e 1616; podestat a Trahona 1619 e 1639. † 15 da december 1666.

<sup>47</sup> La baselgia da s. Gada ei baghegiada dad avat Pieder de Putnengia 1420.

<sup>48</sup> ... weilen aber die kirkhe nit mangelte, hat der Bischoff nur R 70 lassen gelten.» – Br. pag. 369.

<sup>49</sup> Gion Battesta, fegl da mistral Giachen Berchter, ei staus en survetsch venezian ed ha battiu sill'a Mar Nera encunter ils Tercs. Ei morts dad ina malsogna 1689.

<sup>50</sup> a) plevon a Trun b) Gion Sgier, plevon a Sedrun, nevs da Mattias Sgier. c) plevon a Breil d) plevon a Schlangs e) caplon a Trun f) caplon a Sumvitg g) caplon a Rueras h) plevon a Medel i) caplon a Selva j) caplon a Sumvitg.

<sup>51</sup> Pader Hipolit O. Cap. era da quei temps plevon a Mustér. Ils reverendissims paders caputschiners, ord la provinzia da Brescia, han pastorau a Muster dalla fin da december 1648–1818 entschatta da matg. Enteifer quels onns han els baghiau sin territori da Mustér otg sche buca nov baselgias ni capluttas. Igl emprem plevon caputschin ei stau pader Adeodat, il davos pader Domeni. Immediat avon ils reverendissims paders caputschiners han spirituals seculars pastorau a Mustér.

<sup>52</sup> Egl original stev'ei all'entschatta R. 8000. Silsuenter ei vegniu curregiu e secret R. 18 000 e lu tratg atras e secret sutvia 24 000. Ell'apologia stat ei secret R. 14 000. – Sin pag. 447 stat ei secret: «Dise zwey gebrüder (Jacob e Greta) hat von ihrem Vater seiligen H. Grossweibel Joan Berchter R. 24000, dico vier und zwanzig tausend geerbet.»

<sup>53</sup> Br. pag. 142–159.

<sup>54</sup> Augustin Stöcklin ei staus avat 1634–1641; Josef de Sax 1641–1642 strusch siat meins; Adalbert I. Bridler 1642–1655; Adalbert II. de Medell 1655–1696. –

<sup>55</sup> Gion VI Flugi d'Aspermont, uestg de Cuera 1636–1661.

<sup>56</sup> «Ipso anno (1637) facta fuit Conventio quaedam multis Conditionibus inter Johannem Episcopum Curiensem, et Abbes Bedam Fabariensem et Augustinum nostrum Disertinensem, ratione diversarum Parochiarum. Actum Fabariae die 27. Junii, Anno 1637.» Synopsis.

<sup>57</sup> «Actum Curiae in Arce Palatii Episcopatus Curiensis, Anno à Nativitate Domini 1655 die 28 Septembri.» Synopsis.

<sup>58</sup> Buca «Münster» sco ei stat secret ella Cuorta Memoria pag. 248.

<sup>59</sup> Ina remarca Br. pag. 148 di: «1641 hat Auditor Joan baptista Bozeta die pfareyen anerboten p R. 16000 denen Klöstern.»

<sup>60</sup> Remarca digl original: «Vide den ersten theil dess archivs ein geistliche betroung an die Priester 1655 13 november von Nuntio gegeben. fol. 809.»

<sup>61</sup> Dr. Mattias Sgier da Ruschein, naschius 1622, ha studiau a Milaun e Ruma. Spiritual ils 3 da fevrer 1642. Ei staus da 1642 entochen 1656 plevon a Sedrun. 1656–1664 domcustos; 1664–1687 † domdecan. Cfr. Tuor Chr., Reihenfolge der residierenden Domherren in Chur 1905. – Ei maunc'aucn adina ina biografla sur dr. Mattias Sgier, quella marcanta persunalität grischna!

<sup>62</sup> Joannes de Turre da Trun, naschius 1614, plevon a Trun 1637–1687; ha resignau; canonic, vicari e decan dil capetel. † 14 d'avrel 1691 a Trun e satraus leu en baselgia sper igl altar da s. Gion.

<sup>63</sup> Jacob Berchter ei vegnius eligius sco mistral pér ils 5 da zercladur 1656. Avon fuva Barclamu Balliel da Mustér mistral e buca Deflorin, sco Carnot pretendta, «Schlichte Geschichten» pag. 236.

<sup>64</sup> Il num vicari general, che vegn avon differentas gadas el vertent manuscret, vul senza dubi dir ton sco delegau official en quella fatschenta. Sco anteriu ed erudit plevon da Tujetsch enconuscheva dr. Mattias Sgier fetg bein las relaziuns dalla Cadi. Propri vicari general dalla diocesa ei dr. Mattias Sgier buca staus.

<sup>65</sup> Christian Jagmet (Jacomet) plevon da Medel 1649–1657.

<sup>66</sup> P. Benedetg Gessler (Bislinger), ordinatus sacerdot ils 23 da fevrer 1641, ha pia giu cumpignau monsignur avat sin cumin e buca pader Romanus, sco Carnot pretendta 1. c. pag. 237. Pader Roman Balliel ei daventaus spiritual pér 1659.

La presenta isonza dil magistrat dalla Cadi da serender avon cumin en baselgia claustral, nua ch'ei vegn clamau sura il s. Spért e dau la benedieziun digl avat, ei vegnida si pér cun 1881, nua che la claustra ha desistiu da prender part ufficialmein dil cumin. – Vivon fu'vei usitau aschia: Ferton ch'il mistral regent legeva giu il quen da cumin da siu bienni, vegne'vei tarmess ina deputazion dil magistrat cun il «stab» ordavon sin claustra per cumpignar giu «sia grazia reverendissima». Cumpignaus per ordinari dil pader decan cumpareva monsignur avat, dend la benedicziun, enamiez il rin, fageva attents il pievel cun in commensurau plaid sin l'impurtonza dil present act ed admoneva el tier pasch e rauas. Finidas las elecziuns vegneva igl avat cumpignaus dil magistrat ell'abbazia, nua ch'ei vegneva purschiu in refrestg. Lura serendeva il magistrat en casa cumin tier il communabel gentar. – Ils avats da Mustér, vivon ils signurs dalla Cadi ed ils promaturs dallas ligias e dalla libertad, legevan ora pli da vegl il landrehter cul barun de Razen e cau de Sax; els concedevan al nieveligiу mistral igl Jus gladii, quei vul dir: pussonza da giudicar en caussas criminalas; els presidiavan el «bundstag» a Trun. Dallas deliberaziuns dil magistrat dalla Cadi han ils avats priu part tochen 1847.

<sup>67</sup> Quei datum sereferescha senza dubi mo sin la bulla sezza da Alexander VII. – Sco la «Synopsis» scriva ei gia ils 26 (recte 16!) d'october da quei medem onn 1656 vegniu fatg ina nova convenziun da quellas varts denter igl uestg e la claustra. La «Cuorta Memoria», che dat buc en il datum, scriva sur la fin da quella turbulenta episoda pag. 253 il suandont:

«Vesend allura igl illustrissim nunzi Boromeus, che suenter aschia esser instigaus e passiunadamein informaus il cumin pievel, füssi quel buca pli ni cun bein ni cun mal da lumiar, ch'el vegnessi suenter e stessi sut alla claustra enstagl igl uestg, sche ha quel sfurzadamein anflau per necessari e bien da dar suenter. Aschia ei cun sia intervezinn ed approbabziun da niev ensi vegnida fatga denter igl uestg da Cuera et il «Dum-Capitel» dad ina, ed igl avat e la claustra da Mustér da l'autra part ina nova cunvenziun u cunvegnentscha, la quala ei stada sco cheu suonda:

1. Oravon dueigi esser confirmada puspei la totala exemptiun digl avat, da ses religius e dalla claustra, ed agl uestg dueigi il Jus ni dretgs enten las pleivs, alla claustra incorporadas, esser restituius.

2. Sch'ils religius dalla claustra vegnessien exponi e mess ora sin las pleivs, per quellas administrar, sche dueigi dad ina part e da l'autra vegnir stau dalla cunvenziun, derschida si igl onn vargau denter igl Ordinari da Cuera ed igl avat da Weingarten.

3. Igl uestg dueigi alla claustra ed agl avat, per haver cediu ils dretgs e la giurisdicziun da quellas parochialas, esser obligaus, da senza retardar render 800 fl.

4. Entras questa cunvenziun dueigi dil rest esser pregiuridau ni danovamein dau dretgs ni ad ina part ni a l'autra, ni era buca ad enqualin auter, che havess enqual interess lundergiu.

Questa cunvenziun ei silsuenter entras supplicar dallas parts da papa Alexander VII vegnida approbada e confirmada.»

<sup>68</sup> Pader Maurus Cathrin dad Ursera, econom e circa 20 onns decan. † 22 da decembre 1696.

<sup>69</sup> Avat Adalbert de Funs, da Mustér-Acletta, ei naschius 1646, profess 1662, spiritual 1670, eligius avat ils 23 da mars 1696, † 27 da november 1716.

<sup>70</sup> Mira pag. 24 e 25.

<sup>71</sup> Che la bulla da papa Urban VIII seigi buca vegnida tagliada en tocs sin cumin, seresultescha era ord ina remarca fatga ein nies vertent manuscret pag. 103: «1656 nach Pfingsten schreipt der Gemeind Disentis Landschr. alter Joan Bercher, dass er habe ausgeschrieben, dass alle H. sollen zusammen kommen, wegen der Bulla, und wegen der gruob, der Crystallen, aber indeme wenig erschinen, haben die gegenwertige abgelassen (fatg giu) der nette Landaman solle mit H. Vicari de turre rede, welcher visse

mit wass für conditionen die Bulla seye ihme eingehändiget, also ist die Bulla nit durch gestochen worden auff der gemeind, weil der H. Vicari de turre in seinen händen gehabt».

<sup>72</sup> Il passus dalla cumposizun da 1643 secloma: «Per il tierz, deian ils Parochians dacheudenvia poder prender si è nomnar ils Prers a Plavauns, suenter lur bein plaschèr; ils quals lura in Sgr. Praelat dei esser obligaus da praesentar a Monsigr. Uvesch ad Institutionem animarum senz'auter (:ton a ton senza don à quost dalla claustra:) è dei la Casa da Diu dacaudenvia buca haver de se grevar davard las Prevendas, Baselgias, et hiertas digls Plevauns ne autres caussas.» – Mira copia da questa cumposizun ella Biblioteca romontscha claustralra.

<sup>73</sup> 1674 haveva la claustra 10 paders, 4 fraters pr., 3 fraters conv, e 2 novizs cler. –

<sup>74</sup> Mira p. 10.

<sup>75</sup> P. Adalgott (avon Condradin) ei staus il secund affon da sia secunda dunna, Maria de Castelberg. Ei naschius 6 d'october 1654, studiau a Nossadunnaun, nua ch'el ei entraus e fatg profess ils 21 da november 1672. Spiritual 1677. †1692 avrel. – «1673, 20. November ohne den tischgelt in der schuol, und in novitiat hat er (pader Ad.) 600 R. mit sich in Kloster getragen, für welchen sein H. bruder (Podestat Gion Berchter) so vil Veldliner Wein auf sein Kosten hin auss hat lassen auss führen.» Br. pag. 66.

<sup>76</sup> Margheta ei stada «gl'emprem affon da mistral Giachen Berchter; naschida ils 4 da fevrer 1636, mariada cun Capitani Julius Schorno da Sviz, che haveva forsa priu si minieras ella Cadi, ni ch'era vegnius enconuschens cun mistral Giachen Berchter en survetsch militaric. Marghetta ei morta a Sviz (Sattel?) ils 16 d'avrel 1685.

<sup>77</sup> Sco ei para ha sia secunda dunna, Maria de Castelberg, † ils 19 da fevrer 1686, buca saviu tener dil meglier casa:... «welche übel hat hausen können, darum ihme nit alles wohl gelungen.» Br. pag. 198.

<sup>78</sup> A Tujetsch anflein nus la schlatteina Berchter per l'emprema ga en ina scartira da 1300, ils 26 da fendar. – Mira: Mohr, Regesten nr. 75.

<sup>79</sup> «1499 Alss Martinus Berchter des Klosters und der Gemeindt Disentiss regierender Landtaman ware, hat er alss haubt Man die Companei der Soldaten von Disentiss gen Münsterthal wider keiser Maximilian gefür, und in demselben Etschlender krieg sich überall wolverhalten, und in grossess lob darvongetragen wie Adalb. 3. Apt schreibt. die graüe Pündtner haben obgesiget.» – Br. p. 161.

<sup>80</sup> «1525 Alss Udalricus Berchter regierender Landtaman ware, und die staad kleffen, und dass schloss Müss von Joanne Medico eingenomen worden, seind die Pündtner dort hin gezogen widerum zu erobern, alsdan hat Udalricus Berchter die Companei soldaten der Gemeindt Disentiss alss haubt Man dort-hin gefüort. haben überkommen.» – Br. p. 161.

<sup>81</sup> Co ils spirituals vegnevan pri si dad in temps dallas vischnauncas, vesein nus vid quei excellent spiritual sur Gion Antoni. Suenter esser staus siat onns caplon a Curaglia eis el vegnius eligius 1734 sco plevon a Schlans per dus onns. 1736 eis el vegnius confirmaus per 4 onns; 1740 confirmaus per 7 onns; 1747 confirmaus per 4 onns; 1751 medemamein per 4 onns; 1755 confirmaus per 6 onns; 1761 medemamein per 6 onns. – 1767 ha el resignau voluntariamein silla pleiv da Schlans ed ei serendius sco caplon a Cavardiras, la quala pervenda el ha fatg si. Persuenter havevan ils vischins da Cavardiras da clamar la famiglia Berchter a vigt Mustér, cura ch'ei era da prender si in niev caplon. Era haveva in spiritual ord la parentella Berther la preferenza sin la pervenda da Cavardiras. – Sur Gion Antoni Berchter ei morts a Cavardiras ils 8 da zercladur 1781 e satraus leu en baselgia avon igl altar grond. La platta cun l'arma dils Berthers ed inscripziun, che cuvreva sia fossa tochen 1899, survescha ussa per sulada ordeifer la baselgia, sper il clutger.



Davontier la baselgia S. Gions

## Notizias sur ils zenns da S. Gions a Mustér

«Gl'entir Mustér stat mal per siu zenn grond ella pleiv, ch'ei nunspetgadamein fess. Ei era in zenn d'in tun veramein maiestus, che legrava tut tgi che udeva a tuccord quel.» – Aschia ha la Gasetta Romontscha giu scret ils 17 da matg 1877 ed il medem sa ella turnar a scriver oz, pertgei la pleiv da Mustér porta la medema malencurada dapi ils 25 da mars 1916, nua che siu zenn grond ei puspei sefess. Il zenn grond ei malsaus ed igl ei sco sch'ei fuss buca fiastas pli, e sez baras e sepulturas fan aunc pli grev senza nies zenn grond.» Aschia audan ins savens a raschunond ils vischins ed ina pietusa, cordiala condolenza semuossa tier pign e grond.

E buca senza raschun pertgei il zenn grond da mintga pleiv pren viva part dalla veta d'ina vischnaunca sco negin auter, da dis da legherment e da tristezia, da fiastas e disgrazias. Igl ei perquei era nuot auter, ch'in act da pietad, sche nus dedichein ad el, al zenn grond e cun quella caschun era a ses confrars a S. Gions, in per notizias per memoria als convischins da Mustér ed a lur vegnentsuenter.

• •

Gia 1338 raquenta la cronica dad ina baselgia da S. Gions a Mustér en honur da s. Gion Battesta. Nus anflein era differents plevons seculars a S. Gions avon che la presenta baselgia ei vegnida baghegiada, aschia per exempl in cert sur Gion de Pontaninga, sut

il qual la filiala Medel ei separada da S. Gions 1456. Pér igl onn 1491, ils 22 da settember ei la pleiv da S. Gions vegnida incorporada alla claustra definitivamein. Ei savess esser, ch'igl altar gotic a S. Gada da 1489, derivass aunc da quella baselgia parochiala. Sur ils zenns da quella veglia baselgia a S. Gions savein nus dar neginas notizias.

• •

La presenta baselgia da S.Gions ei vegnida baghiada da 1639–1643. Uestg Gion Flugi VI ha consecrau quella ils 23 d'uost 1643, nua ch'era dus zenns pigns sin tetg sur il chor ein vegni benedi (die kleine glocklin auf dem klein Thürlin ob dem Chor). Quels dus zenns ein i alla malura tier il barschament dils Franzos e buca vegni remplazzai pli suenter. Ils auters zenns sin clutger grond han giu dau pli gronds fastedis e cuosts e perquei era stuiu spetgar pli ditg. 1673, ils 27 da zercladur, pia dil temps ch'ils reverendissims paders caputschins pastoravan a Mustér e nua che reverendissim pader Hypolit fuva plevon, vegn ei fatg menziun, ch'ei seigi vegniu culau treis zenns a S. Gions en santeri dil maun encunter Cons, e tier quella caschun seigi la vanaun gronda da giutta da 41 fund, senza dubi dalla claustra, vegnida culada ora. – Sco ei para ha il zenn grond buca teniu ditg. Gia ils 15 da zercladur 1686 han ins stuiu turnar a cular il zenn grond per S. Gions e cun quella caschun era in zenn grond per la baselgia da s. Placi. Podestat Gion Berchter (†1703), da quei temps ugau dils zenns, ha giu speciala premura e gronds merets en quella caussa. «Unter ihme ist in Summer 1686 der Markt zwischen ihm und dem Mr. Gieri schelenmacher von ihm geschrieben.» Pia fussen quels dus zenns vegni culai dad in cert «schelenmacher» Mr. Gieri.



S. Gions

Podestat Gion Berchter ha fatg vegnir il metal da Cuera ed ei staus buns en num dalla vischnaunca per il pagament als dus furniturs Stadtschreiber Otto Schwarz e Georg Storer. La summa, ch'el ha pagau en num dalla vischnaunea, ei stada 295 renschs per biebein 656 funs, ch'ins ha mess tier il material dil zenn vegl. Tier quei ha el aunc giu procura per 204 funs zinn à 24=renschs 81 «zu Leventine under Luorscha in Weltschlandt» e lu aunc fatg vegnir in zenn si da Cuera. Per tuttas quellas stentas e breigias, che podestat Gion Berchter ha giu da quellas varts, ha la vischnaunca da Mustér giu mussau creanza cun regalar ad el 1688 ina brel bien Veltliner. Enzatgei per enzatgei! Quels sis zenns ella baselgia da s. Gions han teniu e surviu entochen il horribel barschament dils 6 da matg 1799 entras ils Franzos, nua che la baselgia ensemblamein cun ses zenns ein daventai in'unfrenda dallas flommas. Il cronist rauenta: «Ils zenns dalla faria a S. Gions eran da peisa: il grond 50 tscheners; il mesaun 35 tscheners, il zenn da rusa-ri 20 tscheners, il pign 5 tscheners; dapli er'ei en clutger pign dus zenns pigns, buns e da fetg bien metal e da buna materia, cun buna ferradira e bein luvrai... en clutger (grond) quels quater zenns d'ina concertura, la quala fuva ni da lunsch ni datier in seme-gliont tuccar, cun l'ura che deva e repeteva.»

• •

La catastrofa dils 6 da matg 1799, cun sia tristezia e donns caschunai sin tutt mauns, ha naturalmein buca schau patertgar schi spert vid novs zenns. Duront quei temps han bein ils zenns da S. Placi ni da S. Gada stuiu gidar ora la pleiv. Tonaton han ins luvrau e giu quitau, che novs zenns resunien ton pli spert ella restaurada, quasi danovamein ba - gheliada baselgia parochiala. Ed il di ei finalmein arrivaus, nua che quater zenns novs ein puspei vegni culai en il santeri da maun stiva encunter Cons, sco il cronist di, «cun gronds cuosts, denton cun immens legherment dil pievel.» Igl ei stau 1821, in serein e bi di d'october. Ils reverendissims paders dalla claustra, il titular magistrat da Mustér cul reverendissim plevon dalla pleiv, pader Beat Ludescher, eran presents en santeri, fer-ton ch'in numerus pievel steva entuorn ordado en pietad e tgeuadad. Il culazenns era in cert Gion Battesta Monzini da Bergamo, in excellent meister en quels fatgs (vir in sua arte peritissimus).

Suenter esser stada preparada la massa buglienta ein il zenn pign ed il grond vegni culai igl emprem. Sco ei para ei vegniu derschiu memia pauc el model dil zenn grond ed ei vegnius ora mo cun treis onzas. Nuotatonmeins han ins saviu duvrar el ed ei staus buontad zenn en fuorma e tun. Silsuenter ein ils dus auters vegni culai e stau finiu cun il cul dils zenns per S. Gions, ha il medem meister culau sil medem plaz ils treis zenns gronds per Sedrun, il tun dils quals regorda ualtri ferm vid il tun dil secund e tierz zenn da S. Gions. Il zenn grond pesava 52 tscheners ed haveva il tun C ed era dedicaus a s. Gion Battesta; il secund cun il tun D, (tenor auters Cis) dedicaus a s. Carli e s. Michel il tierz cul tun E, (Es) dedicaus a s. Placi e s. Sigisbert; il pign cul tun G, dedicaus a Nossadunna dallas dolurs, pesond 17 tscheners.



Baselgia a S. Gions

Senza dubi ein ils zenns da S. Gions da 1821 ils emprems, che portan inscripziuns romontschas, e quei aschi edificont bialas, che nus savein buca far cunmeins, che schar suan-dar quellas.

*Il zenn grond:*

Ils vivs clomel jeu,  
Ils morts cumpognel jeu,  
Tiel fiug dedestel jeu,  
Da stempradas auras visel jeu.

*Sancte Joannes Baptista, ora pro nobis*

*Il secund zenn:*

Schurmegia nus dall'aua,  
Tempiasta, neiv e fiug,  
Camonda che malaura  
Sabsenti da quest liug

*S. Carli e s. Mihel, rughei per nus.*

*Il tierz zenn:*

Igl onn melli e pli siattschien navontanov  
La rabia dil schuldau franzos  
Ils sis da matg ha dau il fiug;  
Ah, strof Mustér, havend battiu culs nos.

*S. Placi e s. Sigisbert, rughei per nus.*

*Il zenn pign:*

Maria, nossa cara dunna,  
Sco biars han viu cun grond temer.  
Ha bargiu per la sfortuna  
Da ver en fiug tut il Mustér.

*Nossadunna dallas dolurs, roga per nus*

Sche nus havein capiu endretg ina scartira veglia, sche han quels quater zenns custau alla vischnaunca circa 1685 flurins 7 rizzers, forsa suenter haver tratg giu las unfrendas privatas. Tenor lubientscha digl ordinariat episcopal dils 2 da fevrer 1820 ha la pleiv saviu prender 1140 flurins ord il fondo dallas capluttas per pagar in ton da quels cuosts.

• •

Entochen che tut ei stau semtgau e rugalau vid zenns e clutger e tscherniu ora ils adat-tai padrins e las ventireivlas madretschas, aschia ch'ins ha saviu far fiasta, ein aunc entgins meins spirai. Ina gasetta da Cuera scriva: «Mustér ha udui per l'emprema ga siu niev bi tuchiez ils 25 da fevrer 1822; ils zenns secrodan oreifer bein.» – Scadin cass ei quei stau in legreivel di per igl entir Mustér, sco gia la biala canzun en laud dils zenns novs da Mustér, fatga digl avat Anselm Huonder e cantada dil pievel, lai percorscher ord mintga cuors.

Igl ei in toc historia da Mustér en paterna, cordiala viarva. Nus schein suandar ella.

1. Tei legri, o Mustér!  
E laudi Diu da cor;  
Ti gaudas il plascher,  
Con bein ch'il sun dat or.
2. Dils zenns, ch'ein uss culai,  
Cun cuost ed er'quitau,  
E schi bein gartegiai,  
Ch'ins vess gie mai maniau.
3. En quels ventgadus onns  
Dil barschament enneu,  
Sto ver gie pign e grond  
Co Dieus ha nus gidau.
4. O cars zenns legreivels!  
Vus essas la perdetga,  
Che a tuts vers fideivels  
Dieus seigi ferma petga.
5. Sche clamei pi'ensem  
Tuts ils parochians,  
Per dar a quels l'enzenna  
D'er'els esser unials.
6. Cun schenià ils pucaus,  
Tener car Diu da cor,  
Cu il proxim sco sesez,  
Mai emblidar vi il strof.
7. Mustér seigi Mustér  
En tut sco vid'avon,  
Il liug da residenza,  
Mo buca dils pucaus.
8. Quei seigi nies quitau,  
Schar scandels dad in maun,  
Che schendran mo pucaus,  
Sc'ins sa da vegl enneu.
9. Exempels vein nus aunc  
Bein biars avon ils egls,  
Ch'ins tucca gie cun maun  
Il strof da nos pucaus.
10. In spieghel eis ei quei,  
Da mai schar ord il tgau,  
Tgei peina greva sei,  
La torta dil pucau.
11. Da claustra, vitg e hofs,  
En tschendra tut midaus,  
Entras ils crius Franzos  
Totalmein ruinaus.
12. O, sis da matg sgarscheivel!  
Digl onn navontanov,  
O, fiug zun bein snueivel!  
Ti rumpas aunc il cor.

13. Schein dad in maun il trest  
 Maletg da tala sort;  
 Dieus dat a nus confiert  
 Consola uss nies cor.
14. Tedlei empau nos zenns,  
 Co ei tuccan uss d'ensem;  
 Mein pia el sogn tempel,  
 E tuts ludeien Diu.
15. Rugheien er'da cor  
 Perdun per nos puccaus;  
 Dieus ei gie sigl altar  
 Sco bab dils combrigiai.
16. Sche seigien engrazieivels  
 Cun buc stridar Diu pli;  
 Vivin sco vers fideivels,  
 Affons dalla Cadi.
17. O zenns bein gartegiai!  
 La flur dil liug Mustér!  
 Sco trost dils combrigiai,  
 Dieus vegli mantener.
18. Il grond a nies s. Gion,  
 Igl auter a s. Carli,  
 Il tierz al bien s. Placi,  
 Il quart a Nossadunna.
19. Quei ein ils ss.patrun  
 Da nossa pleiv entira;  
 Tras lur intercessiun,  
 Pon dar a nus ventira.
20. Il tun teni naven,  
 Stempradas aura era;  
 Dei bein dabot sinzur  
 Cu 'l fiug less rumper ora.
21. Ils morts vus cumpignei  
 En quest liug benediu;  
 La notg nus destadei  
 En cass da mal pariu.
22. O cars nus da Mustér!  
 Tgei lein pomai dapli?  
 Dieus fa a nus oz ver,  
 Ch'el tegni nus aunc car.

• •

Denton ha quella legreivla ed emperneivla harmonia a S. Gions buca cuzzau ton ditg. Tuttenina ei il zenn grond sefess. Il culazenns Monzini haveva giu garantiu ils zenns per in onn e dau lubientscha da tuccar els mintga di in'ura. Sco ei para ha la vischnaunca – per nies grond smarvegl – era giu fatg stediamein diever da quella lubientscha. Pertgei tenor il protocol da vischnaunca dils 3 da mars 1822 eis ei stau radunonza en baselgia parochiala, nua ch'ils dus calusters veders Gion Francestg Deflorin e Gion Battesta Venzin ein vegni confirmai cun la cundiziun, che uonn stoppien ei tuccar ina ura per di e per quella breigia da tuccar eis ei fatg ad els in minal graun da quater per fiug. Il zenn grond ei sefess enteifer quei onn. Tgei di savein nus buca dir. Sco ei vegn raschunau fuva quei zenn grond pli liungs, ch'il present ed haveva in tec breigia da puder sper la finiastra si. Meister Monzini ha stuui cular il zenn danovamein sin siu quen. Duvrond el denton mo il metal dil zenn veder, ei il zenn grond da 1822 vegnius per in bien ton pli pigns cun la peisa da 4710 funs ed il tun denter Ce H, denton per ventira puspei buontad zenn.



Il zenn grond da 1918

Stai vargai tut quels quitaus, faste-  
dis e dis solemnis, eis ei iu tut ruas-  
seivel entochen miez matg 1877.  
Cheu sefenda il zenn grond danova-  
mein e metta la vischnaunca en  
cuosts e fatalitads. Ils 15 da fena-  
dur ei vegniu teniu vischnaunca  
pervia dil zenn grond. Igl ei stau  
dus meinis:

1. schar tagliar ora quei, ch'ei fess  
e duvrar vinavon;
2. schar cular danovamein e quei  
a) u cheu a Mustér ni b) tarmet-  
ter naven el. Tratg ora ina  
cumissiun, che ha procurau igl  
ulteriur, suenter esser stau deci-  
diu da schar cular danovamein e  
tarmetter naven el.

Il respectiv cuntract ei vegnius  
fatgs cun frars Grassmayer a Feld-  
kirch (S. Pieder) e suttascrets ils 20  
d'uost 1877. Il zenn fess ei vegnius  
tarmess a S. Pieder e pesava «laut  
hiesigstädtischen (da Feldkirch)

Waagschein 4714 fund» ed igl ei vegniu quintau à frs. 1.25 = 5892.50 frs.

Numnasontga dil medem onn steva il niev zenn grond per S. Gions exponius amiez il vitg Mustér, gia benedius ed ornaus si gustusamein. Uestg Amberg da S. Pieder haveva giu la buontad sin supplica dalla vischnaunca da benedir el avon ch'entscheiver siu viadi en la Cadi. Las soras da sur Gion Battesta Deflorin e da sur canoni Giachen Antoni Carigiet, oriundas da Mustér e da lezzas uras a Schaan e Vaduz havevan giu fittau si oreifer il zenn, avon che schar entscheiver il viadi ella patria. – Sco ils frars Wellinger da Schluuin havevan giu menau il zenn veder da Mustér a Cuera, aschia han els turnau a menar il niev da Cuera a Mustér sin in ferm carr cun tschun cavals. Arrivond tier la Punt Russein han els giu empau tema, schebein la punt tegni carga e cavals e giu schau passar quels persuls igl emprem, stend els anavos, pesava gie il zenn tenor: «Waagschein von Chur 6010 funs». Denton han els saviu cuorer cun lev cor immediat suenter.

Il di dallas olmas suenter las funcziuns d'avonmiezdì ei il zenn vegnius tratgs sin clutger. Ils buobs han priu pil cantun dalla suga, mond tras la purteglia dil santeri, ferton ch'ils umens, giuvens e vegls, ein dai suenter cargond per la medema suga. Stend il zenn odembora, han ins emprau in tec siu tun. «Ei tuna bein!» – Veggend ils buobs cun il cantun dalla suga encunter il stradun dall'Alpsu, steva il zenn avon finiastra dil clutger.

Quei tut ei stau daventau enteifer in quart ura. Las femnas han giu il grond plascher da saver mirar tier. Salvias da murtès ramplunavan dalla via lada. Tut ch'era cunctents e plein legria. Il cronist selamenta mo, ch'ei seigi buca vegniu cantau ferton ch'il zenn ei vegnius tratgs si. Denton lein nus schar raquintar la Gasetta Romontscha ord siu numer 45 dils 9 da november. Professer Placi Condrau, il padrin dil zenn, sa raschunar a nus quei meglier. Persuenter ha el era giu la speciala honur, ch'igl ei era vegniu tuccau cun il zenn grond sin las messas dil tierz per el. El scriva:

«Il niev zenn grond da Mustér ei gartiaus e fa stulir la melanconia per quel da vivon, ch'era staus fess. La pleiv ha giu concludiu d'adual prezi schar cular el tier Theus a Favugn, mo fagend frars Grassmayer da S. Pieder pli favoreivlas offertas, ei quella lavur d'entgins mellis francs vegnidia surdada ad els. Ins supposeva, ch'il zenn fess pesassi circa 54 tschens, mo ei ha semussau, ch'el fageva mo 47 tschens, ferton ch'il niev ha ina peisa da 6038 glivras, el ei aschia il pli grond ell'entira Surselva. (Il zenn grond da Sumvitg da 1913 peisa 6140 funs.) Sco igl ei vegniu detg a S. Pieder ei quel in dils pli bials zenns, ch'ein enzacu vegni ord la culeria dils frars Grassmayer e tut tgi che ha viu quel sin siu viadi, ha admirau il bi e schuber cul. A Mustér eis el staus exponius ils dus dis dallas olmas e tut scheva: Bials eis el, sche mo el ei era buns. Ins era aultamein spaniaus sin siu tun, e cura ch'ins ha lura tuccau el persuls e culs auters er'ei mo ina vusch, ch'el remplazzeschi vengonzamein siu prezau antecessur. Conclusivamein lessan nus aunc metter giu in public engraziament als premurai e bials mauns a Schaan e Vaduz, che han per affecziun encunter lur vischnaunca nativa, decorau gustusamein il niev zenn grond enten passar leu atras.»

E puspei resuna ina biala canzun per memoria dad in poet nativs da Mustér.

## **Al zenn grond da Mustér fess nunspetgadamein, culaus a S. Pieder** da pader Baseli Carigiet

Vivos voco, mortuos plango, fulgura frango. (Schiller)

Vivs jeu clomel, morts deploreschel, cametgs spatitscheschel.

Zenn, ti grond, jeu tei salidel,  
Beinvegnius tier nus da cor!  
Dad arver tia bucc'envidel,  
Lai udir tiu tien sonor;  
Clom'ad in clamar,  
Tei lein festivar.

Novamein el fuorn ti siuas  
Cul secund da niev sufrend  
Schubers, bials el model liuas,  
Heros valerus lischend  
Ord la tgin'alzaus,  
Tuornas schon battiaus.

Grond Diu, ti dias gie tez: «cun vus  
Deleteg jeu hai dad esser.»  
Clamei, lein pia premurus  
Vegnir neutier e quescher.

0, tgei mal mintgin senteva  
Tiu plunschem d'udir leusi;  
Cu l'ureglia strusch udeva  
Tiu schemer sut grev marti!  
Grond secontristar  
Fess da tei anflar.

Remess, cu eis puspei sil tron,  
Sco mentur nus avisa;  
Tiu clom a tuts sco vidavon  
Surveschi per devisa:

Nies cor, noss'olma, tuts nos senns  
Tier tei, o Diu sesaulzien!  
Sin tes camonds, scamonds attents,  
Vid ti'amur sescauldien.

• •

L'inscripziun romontscha dil zenn grond da 1877 havein uns menziunau sisura cun las otras da 1821, secartend ch'ins hagi duvrau la medema tuttas treis gadas; probabel fuva l'invocaziun latina «Sancte Joannes Baptista, ora pro nobis» pli baul era romontscha.

Cun caschun, ch'ins ha schau cular il zenn grond 1877 eis ei era stau il raschieni da schar cular danovamein il zenn pign e midar siu tun Gen Fe lu fuss ei stau harmonia cun tschels treis ed ins havess giu eventual duas melodias, numnadamein cun schar naven il grond ni il pign. La calculaziun da midar entuorn il zenn pign havess custau, suenter haver tratg giu il metal dil zenn pign veder, circa 1260.–frs. Quei ei denton buca daventau.

Tgei ha ussa il zenn grond da 1877 custau? Tratg giu la valeta dil material dil zenn veder ha el custau alla fin en tut 4499 frs. 19 rps. – Il metal dil zenn veder era vegnius valetaus 1frs. 25 per fund, quel dil zenn niev ha custau 1frs. 60 il fund. Per cuvierer quei deivet ei vegniu lubiu da prender 1000.–frs. ord il fondo dallas capluttas dalla pleiv, sil-suenter tratg si ina collecta voluntaria, il rest ei vegnius repartius sin ils habitants ed ei ha tuccau aunc ca. 2.–frs. per olma. – Frars Grassmayer han giu garantiu il zenn per

in onn. «Donns caschunai entras accidents elementars ni cun tuccar malreguladamein ein sclaus dalla garanzia.»

Ed ussa entra il zenn grond en funcziun. L'emprema ga, ch'ins ha tuccau el en uffeci ei stau ils 5 da november 1877, da bara per Fidel Monn da Cavardiras. E la davosa ga – ils 25 da mars 1916, quei di, sin il qual ins celebrava pli baul a S. Gions la fiasta titulara dalla «Cumpignia dalla miraculusa Nossadunna dallas siat tristezias», stada tschentada si dils reverendissims caputschins ils

3 da fenadur 1707 e sin la quala ei vegneva teniu ina interessanta biala processiun cun la crusch nera gronda, quater gedi-us, che pertavan ils instruments da crucifigar, las statuas: Niessegner en bara, Ecce Homo, Nossadunna dallas dolurs e nua che las siat Marias, la spada el pèz, suandavan cun s. Gions en agen costum da malencurada. Bia pievel jester vegneva neutier. Donn, ch'ins ha dismess els 1880 per gronda part quella interessanta solemnidad. Contas ga ha il zenn grond giu gidau a festivar quella fiasta?



S. Gions

• •

«Il retg ei morts, viva il retg!» – aschia clamavan ils Franzos pli daditg, cura che lur retg mureva. Il zenn grond ei forsa buca mo malsaus, el ha survegniu podà ina frida mortala, aschia ch'ins vegn a stuer cular in niev, e perquei clamein era nus per conclusiun: Viva il niev zenn grond da S. Gions! – Il temps ei buca favoreivels per schar cular zenns, aschinavon ch'il metal ei vegnius aschi scarts e cars en consequenza dall'uiara, ed essend sin tuts mauns novas expensas. – Cun vender il zenn vegness ins ad acquistar momentan in grond capital, ord il qual ins savess schar cular pli tard in zenn tenor plascher. Denton la pietad per il zenn vegl vegn strusch a dar tier quei, e dasperas vegn igl ault prezi per metal senza dubi aunc a semantener ditg era suenter l'uiara. – Sco per preparaziun sin quella biala, custeivla, necessaria ovra savess ins forsa fundar ad interim in'uniun, ils commembers dalla quala sacrificassen mintga meins, lein metter 10 rps. Negin s'encurschess da quell'unfrenda e tonaton: l'uniun dat forza, mantegn il tschaffen e porta era – daners!

Denton giavischein nus da tut cor, che s. Gions stoppi buca spetgar memia ditg sin in niev zenn grond e che quel fetschi cumpleina honur a siu venerabel e maiestus anteces-sur.

## Sontga Catrina a Mustér

In tschancun enasisu igl uclaun da Funs, sper Mustér, stat ina pintga caplutta dedicaa a s. Catrina d'Alexandria. Tut persula stat ella cheu sin pastira al pei dil Muntatsch. Ina bufatga via, avon che baghegiar il stradun dall'Alpsu, via da bara per ils vischins d'Acletta, uneva ed unescha aunc ussa ils vitgets Acletta e Funs cun S. Gions, Mustér. Leusi cuchegia giu curteseivlamein Acletta cun sia biala baselgia dalla Immaculata, ba- ghegiada dils caputschins 1670, consecrada ils 12 da fenadur 1672 da uestg Duri de Mont. Ina caplutta pli veglia sto esser stada leu pli ensi, sut casa da Battesta Jacomet, sil plaz, ch'ins numna aunc ussa «baselgia vedra», nua ch'ils vischins seraduneschan mintgamai per rugalar fatschentas dil vischinadi.

Il cronist raquenta plinavon, che uestg Gion VI Flugi hagi ils 24 d'uost 1643 «die Capell unser Frauen zu Acletta und die Capell St. Jacob zu Cuotz auf ein Tag gewichen.» Forsa che quei datum sereferescha sin quella veglia caplutta, ni ch'igl ei vegniu consecrau 1670 mo igl altar grond dalla presenta caplutta. Tgi sa?

Senza dubi ei il present altar grond vegnius eregius pli tard, sco las restonzas digl anteriuur altar grond, che sesanflan aunc uss si pil mir davos il present altar, laian presumar. Igl anteriuur altar grond ei staus construius en stucco, semegliants als dus auters altars laterals. – Cura ei il present altar grond vegnius fatgs?

Danunder vegn il magnific maletg da Nossadunna Immaculata? Tgi ei siu autur?... Quei ein tut damondas, sin las qualas aunc negin ha dau entochen ussa ina sufficienta, positiva risposta. Plirs han emprau, mo adumbatten. Nuot auter che calculaziuns e hipotesas! Il meglieer ed il principal ei denton, che Mustér ha la ventira da posseder quell'excellenta biala ovra da gronda valeta artistica. Ils perderts san encuirir e studiar vinavon.

Vieifer la caplutta, da s. Catrina, silla «Soliva», steva pli daditg ina tuor dalla nobla famiglia de Sax «turris antiquissima Nobilium de Sacco seu Sax» – sco pader Maurus



Caplutta da s. Catrina

Venzin (†1746) raquenta. Senza dubi deriva il num «Sax», ch'il contuorn da leu port' aunc ussa, da quella famiglia, da quella tuor. Sias ruinas formeschan ussa ina «muschna da vischins.»

Pli ad ault, dil maun da S. Catrina, sisum il Muntatsch, steva dad in temps era ina tuor, «arx Montacii» (Hochberg), ussa in mantun crappa manedla, ferton che ins ha duvrau la biala da far si in nuegl. – Sic transit gloria mundi, – aschia svanescha la gloria dil mund!

Igl ual d'Acletta ramurescha sper S. Catrina giu. El sa far temps da malauras gronda cane-ra e vegin magari empau garmadis e rabiaus, perquei dat in ur grad sut d'entellir co el hagi da secuntener en tals muments ed ir per siu ordinari vau. Empau mir ed ina buc-cada geina grad sut la caplutta sparta il prau dalla pastira, ferton ch'ina leva punt da lenn meina vi sin tschei maun digl ual, nua ch'ina via da menadiras per Acletta meina tiel stradun dapi 1863.

• •

Tut isolada e bandunada stat la pintga caplutta da s. Catrina mirond sco tuttas baselgias da pli da vegl encunter la damaun. Ina portetta, ina suletta finiastra da maun sut cun in garter, in tetg da slondas cun in pign clutger, che porta era buc in zenn grond, quei ei igl entir ornament exterior da s. Catrina. Zenn e clutger ein tier quei da niev datum, forsa strusch 50 onns vegls. – Avon la davosa restauraziun dalla caplutta steva aunc maliau sulla porta: «Dieus il sogn Bab.» Tut che salidava s. Catrina mond speras vi ed era Dieus il sogn Bab, silmeins ils pli pietus cun la biala oraziun: «Sogn Bab da tschiempristei a mi vossa sontga divina grazia, tras la quala quei che jeu fetschi oz daventi tut en vies sogn laud ed enten laud da nies car Segner Jesus Cristus. Amen.» Aschia han ins raquintau a nus.

Denter las quendisch baselgias ni capluttas sin territori da Mustér ei s. Catrina senza dubi la pli pintga. Tuts vitgs ed uclauns han lur baselgia ni caplutta, priu ora Clavaniev e Caprau. Ils da Faltscharidas dian: «Nus havein nies bien s. Placi», ed ils da Buretsch tegnan cun s. Giachen. Perfin Peisel duei haver giu pli baul sia caplutta, che la lavina hagi menau naven ina gada. La statua da Nossadunna, che sesanfla sillla curnisch ella baselgia da Segnas, derivi aunc da quella caplutta. Aschia raquenta la tradizion. Avon enzacons onns han ins anflau tier il cavar sulom dad in baghetg a Peisel in parlet d'aua benedida da crap, che ha schau sminar, ch'el pudessi derivar da tala caplutta.

S. Catrina ei la pli pintga caplutta da Mustér, mo enzatgei tut aparti ha ella tonaton. Ferton che tuttas outras baselgias e capluttas da Mustér ein incorporadas u alla pleiv ni alla claustra, auda S. Catrina ad ina famiglia privata. Scriva gie ina agenda dils caputschins, che han pastorau a Mustér da 1648–1818: «25 di Novembre – S. Catarina. La chiesa di s. Catarina é di gius privato. Se invitano si va con Messa e predica, e la Messa vien pagata da chi la commanda.»

Signur e patrun da S. Catrina ei presentamein signur Pieder Durgiai da Mustér, sesents a Turitg, fegl da Pieder Anton Durgiai e Josefina Condrau. Gia biars dis ed onns auda quel-

la caplutta alla famiglia Durgiai. Ei ha dau in temps, nua ch'ins ha negligiu empau S. Catrina e schau ir ella en decadenza. Negin leva propriamein seprender en per ella. La porta steva aviarta; ei era liber e lartg per tgi che leva. Femnas che vevan da manipular leu entuorn cun borlas, – ei dat ton cauld si cheu sper S. Catrina! – mettevan nun-schenadamein lur products leu sut tetg e confidavan bugen dratgs e vonn tut a s. Catrina temps da notg e cura ch'ei plueva. Liung temps ha in'entira ala tetg cupidau sper il mir si entochen che Alois Simonet d'Aclella ha priu puccau e fatg si ella. Enstagl bauns in pèr palauncs sil tratsch, blut ils mirs cun il vut da s. Catrina.

Denton quei ei tut semidau. Denter ils anno 1880 e 1890 ei Josefina Condrau, maridada cun Pierer Anton Durgiai, seprid'en cun tut cor e premura per S. Catrina. Ella ha schau renovar la caplutta internamein ed externamein; cementau en il plantschiu, procurau per novs bauns, mess neu nova paramenta e tut quei, ch'auda per celebrar decentamein la sontga messa. Tut quellas caussas vegnan salvadas si en ina casa privata a Funs e stattan en disposiziun a spirituels, che vulan celebrar a S. Catrina.

Il di da s. Catrina, ils 25 da november, vegneva ei per ordinari adina fatg fiasta a S. Catrina e lu perdananza a Funs. Il bia serendeva il plevon da Mustér cun la sontga messa el liug, ni ch'era il caplon da Segnas ni in pader dalla claustra vegneva envidaus en leutier. Ei vegneva fatg aschi solemn sco pusseivel. Il pader caputschin sco plevon a S. Gions clamava mintgamai giud scantschala la dumengia avon ils 25 da november: «...croma s. Catrina. Messa e priedi a sia baselgia». E suenter alzar si cantavan las mat-tauns da Funs la veglia canzun da s. Catrina:

*Sontga Catarina sabi spért,  
Ti petga da fermezia,  
Da duns, vertids fluriu iert  
E spieghel da bellezia,  
Ti defensiun da religiun,  
Da cumpurtonza exempl  
Da castiadad e sontgadad  
Dubel custeivel tempel.*

Denton buc adina schi solemn; biars onns schavan ins era stgisar mo ina messa bassa, senza priedi, senza canzun. – 1902, ils 2 da settember ei dunschala Lucrezia, feglia da Pierer Anton e Josefina Durgiai-Condrau, morta e satrada a Mustér. Cun quella caschun ha Josefina Condrau fatg si ina messa perpetna en sia caplutta da s. Catrina per la cara defuncta, che vegn mintgamai legida dil plevon da Mustér la fiasta da s. Catrina leu ils 25 da november. Da quei temps naven vegn il di da s. Catrina celebraus a Funs cun nova premura, nova devoziun. E la caplutta vegn tenida puspei en honur e s. Catrina venerada cun nova fidonza. Ha ei gie dau in temps, ch'ils vischins da Funs seradunavan temps da stad firaus e dumengias a S. Catrina e recitavan vi tier sera ensemes il s. rusari.

• •

Isolada, tut bandunada stat s. Catrina sper la punt al pei dil Muntatsch. Con ditg? Da cura enneu? Bugen havessen nus enderschiu tgei onn la caplutta da s. Catrina ei vegnida baghegiada. Denton nua encurir? Vid la caplutta anflan ins negin onn. Ils cudischs vegls dalla pleiv da Mustér, enten ils quals ei pudess forsa esser stau entginas notizias da quellas varts, ein i alla malura tier il barschament dils Franzos. La famiglia Durgiai, alla quala la caplutta auda gia da liung temps enneu, scadin cass in pèr generaziuns, posseda negins documents. Nua sevolver? Forsa dat la tradiziun sclariment? Glieud veglia san raquintar savens sco in cudisch, ch'igl ei in plascher da tedlar. Ed els raquentan bugen, cunzun cura ch'els sentan, ch'ins teidla cun interess. E grad per caussas daditg varadas han els tut auter sentiment, tut autra pietad, che per caussas dil temps niev. Dasperas han els savens ina memoria aparti per quei da vegl.

Nus havein enconuschiu in um, che saveva numnar igl onn da naschientscha da mintga persuna da siu ualti grond vitg e tier biars aunc dar en il di. E tscheu e leu havein nus entupau frestgas matronas, che savevan dar exact sclariment dalla parentella da pliras generaziuns. Biaga essan nus stai mal, che nus havein buca dau meglier adatg pli baul en discurridas da personas veglias, che raquintavan aschi bugen ed aschi bein da tuttas uisas ord il temps vegl, personas ch'eran dasperas strusch stadas a scola e che savevan beinduras gnanc scriver, denton raquintar oreifer, ch'ei era in smarvegl. Quei patratg ha stimulau nus da serender inaga a Funs per dumandar glieud veglia da leu notizias sur S. Catrina. La speranza sin in bien resultat vegn franc a remunerar la stenta. Detg e fatg!

Odem igl atun fuv'ei, in suentermiezdi, ch'ei smuschignav'empau. Mond tras Funs cattein nus cuninaga ina marcanta veglia fatscha, culla cuorta pipa sin bucca, che cuchavia ord ina stretga finiastra. «Tgei studieis l'aura?» havein nus dumandau. «Havess aunc da far ton sco in tumpli risdiv ed in pèr stublas, mo oz ei da far nuot.» – En aquella vegnia dunna ord casa en mondura da cavar truffels ed ei tut sesnuida vesend nus sut casa e fuss bugen turnada anavos, sch'ei fuss buca stau memia tard. Mo sfurzadamein e tut schenada eis ella ida speras via. Remarcond nus denton, ch'ins sappi tonaton buc ir a cavar truffels cun resti da firaus, ei la massera stada cuntenta, pli che cuntenta.

Nus dus havein cuntuau cull'aura. Vegnend lu plaun a plaun cun nos patratgs pli ella bassa, havein nus encuretg da vegnir tier nies intent ed havein fatg la damonda: «Saveis era cura la caplutta da s. Catrina enasi tscheu ei baghegiada?» – Spert survegnin nus la risposta anavos: «Quella ei adina stada!» – «Mo, mo!» E nus stuein sco haver tratg la schuiala sin quella prompta e franca risposta, e dabot vegn ei confirmau: «Gie gliez, quella ei adina stada!» – «Buca mal», havein nus tertgau e dumandein vinavon: «Haveis nuota scartiras cheu a Funs sur quella caplutta?» «Da miu saver buca.» – «Tgi ei la pli veglia persona cheu a Funs?» – «Il Battesta vi leu, aber quel sa nuot; quel vegn gie si da Disla!» – Prest havein nus encurschiu ch'ei era da far nuot cun s. Catrina. Per ventira mava grad ina marcanzia stiarls speras ora e nus havein schau grad a gradgiu ils «stu-

dis ecclesiastics» ed havein entschiet a raschunar cun special interess dallas fieras da Sebiastg e Ligiaun, nua ch'il cumpogn sin finiastra era stupent da casa. El fuva gie staus pliras stads versau starler da Maighels, enconuscheva bein ils marcadonts dalla Surselva ed haveva cumpignau in u l'auter pliras gadas en «tiara taliana.» Malgrad nies fatal schliet resultat havein nus tonaton bandunau nies bien veteran cun engraziament. El haveva gie leventau buca mal il bien humor cun sia franca risposta: «Quella ei adina stada!» – «Quel sa nuot, quel vegn gie si da Disla!» – Adia!

• •

S. Catrina, ch'ei «adina stada» havein nus mantenu ad interim en buna memoria. Il curios resultat sur sia entschatta ha stimulau nus aunc pli fetg per sia historia. Plaun a plaun eis ei era reussiu d'anflar en ina veglia cronica entginas notizias sur la caplutta da s. Catrina. Nus schein suandar cheu igl essenzial.

Avon la famiglia Durgiai fuva ina famiglia Huonder en possess dalla caplutta da s. Catrina. La numnada cronica rauenta, ch'ei fui stau gia da vegl enneu si Sarz (Sax) ina pintga caplutta en honour da s. Catrina, mo che seigi ida sutsura cul temps. Cheu ha lu 1704 in cert statalter Nicolaus Huonder, che habitava probablamein a Funs, e ch'era fetg rehs ed era staus gerau «des kleinen und grossen Raads» a Mustér, schau baghegiar sin particular giavisch da ses treis fegls Nicolaus, Martin e Josef sin siu quen quella caplutta per particulara devoziun tier s. Catrina d'Alexandria. Mir, tettg etc. han cu-stau 124 renschs: quei ch'auda tier igl altar, sco calisch, resti da far messa, candelors etc. han custau 53 renschs. La statua da s. Catrina ha il sculptur Joannes Riz fatg, al qual statalter Nicolaus Huonder ha giu pagau per tagliar ora e sulerar, tier aunc ina tabla votiva a S. Gions, 31 rensch 3 bazs. L'entira summa per la caplutta da s. Catrina seigi pia stada 208 renschs e 3 bazs.

1708, ils 30 d'avrel han ins arranschau ina gronda processiun e cumpignau cun tutta devoziun la nova statua, «die verguldete Bildnuss der hl. Catharinae», ord la baselgia parochiala da s. Gions si a S. Catrina, nua che pader caputschin Fioriano, da lezzas uras plevon a Mustér, ha scadin cass teniu in edificont priedi sur s. Catrina. Cheutras seigi la devoziun tier s. Catrina, patruna dils students, vegnida renovada ed augmentada.

Monsignur uestg da Cuera, Duri VII Federspiel, ha giu dau lubientscha da celebrar la sontga messa a S. Catrina, naturalmein suenter ch'igl altar ei staus consecraus. La cronica metta aunc vitier, ch'il tit. legat Jacobus Caraciolus hagi lubiu danovamein 1712, ils 7 da november, ferton ch'el era a Mustér per benedir e consecrar la nova baselgia claustral da s. Martin, da leger messa a S. Catrina.

Plinavon vegn ei raquintau, ch'in cert Giachen Adalgott Gieriet hagi urbiu ora da Ruma in perdun cumplein per siat onns. Pli clar vegn ei buca detg. Probabel ei quei manegiau in perdun cumplein sil di da s. Catrina, ni forsa aschi savens sco ins viseta la caplutta? Quei perdun seigi puspei vegnius renovaus silsuenter.

Il sura numnau Giachen Adalgott Gieriet sto esser staus in um da pietad e da gronda influenza. El steva a Buretsch ed ha fatg 1687 in pelegrinadi a S. Giachen da Compostella en Spagna e 1700 in tal a Ruma. El ha giu regalaу treis sontgas reliquias alla claustra e duas alla baselgia da S. Gions, las qualas el ha giu obteniu da sia eminencia cardinal Maria Bernardo Conti. Sia dunna senumnava Maria Castgina Baselgia. El ei morts ils 21 dad avrel 1728.

Mintg'onn vegnevei legiu a Funs il di da s. Catrina, ils 25 da november, treis entochen quater sontgas messas e duront igl onn ora pliras outras e beinduras perfin cantau solemnamein la sontga messa dils reverendissims paders – «ein gesungenes ampt figuraliter gehalten.» La «messsa solemna» a S. Catrina meina nus sil patratg, – raschuns havein nus denton neginas – che la caplutta pudessi esser stada vidavon empau pli gronda e quei tonpli, ch'ei vegn aunc raquintau ella cronica, ch'ei fuvi maliau ella caplutta 27 sogns ni sontgas, che vegnan numnai si tuts cul num sut il tetel: «Die nahmen der heyligen und heyliginen deren Bildnuss in der Capellen zu St. Catharina gemahlet worden». Denter quels buca meins che tredisch maletgs, che representan differentas s. Catrinas.

Statalter Nicolaus Huonder ei pia staus in grond benefactur da s. Catrina. Denton era aunc per otras baselgias ha el giu in bien cor. Alla baselgia parochiala da S. Gions ha el fatg si dus dretgs dad alp en Cristallina (80 renschs); a Nossadunna dallas dolurs in auter dretg en Cristallina; persuenter duei vegnir legiu ina messa perpetna. Plinavon ha el regalaу ina cruna d'argien a Nossadunna dallas dolurs. – El ei era quel, che ha schau maliar 1707 a S. Gada sil mir dil maun dallas femnas dus maletgs entras il pictur Giachen (Rieg) da Sumvitg, che hagi custau 32 renschs ed 11 bazs.

Statalter Nicolaus Huonder ha mussau aunc tscheu e leu siu bien cor per baselgias e paupers, denton el haveva era enta maun enzatgei. La cronica fa la remarca: «Herr Str. Nicolaus ist gar ein reicher Man gewesen, hat über die hundert tausend R. gehabt.»

• •

Era ils fegls da statalter Nicolaus Huonder han giu artau quei spért da beneficenza dil bab e nus schein aunc suandar entginas notizias da quellas varts, aschinavon che quei illustrescha empau il contuorn e perquei ch'els seregordan denter en era generusamein da S. Catrina.

item hat H. Joseph vermacht' der kirkhen zu St. Joannes für deme Organist R. 80.

item unser lieben Frau von rosen kranz aldorten ein alprecht zu Russein R. 40.

Herr Martin Huonder und H. Joseph Huonder haben vermacht

dem hl. Nicolao (Mumpé Tujetsch) 5 philip.

dem hl. Joseph zu Bugnei R. 30.

dem hl. Lucio zu Disla R. 30.

unser lb. Frau in Sumvixerbad R. 40.

item der Pfrund zu St. Joannes iährlich 15 quartanen salz R. 150.

dem Kloster zu Disentis ein ewige mess R. 40.

item vor Zeiten 40 R. gelt für 2 rothe, damastinen Chormantel.

Item haben H. Martin Huonider und H. Joseph Huonder der Capellen zu St. Catharina si Sarz ver macht 25 bazu lehen zins si Accleta. Capital R. 150.

item si Sarz haben sie ver macht der hl. Capell 4 stüklein guot, so dess Gilli Maissen gewesen, so 110 R. facit. – summa facit gegen R. 1270.

In fegl da statalter Nicolaus Huonder cul num Christian ei staus maridaus a Trun cun Margaretha Christ dil Risch. Era quel ha schau vegnir tier bein enqual regal a Nossadunna d'Acladiria ed alla baselgia parochiala da leu. Niessegner haveva era benediu el cun beins temporals. «1729 als ein gemeine schniz od. taglia zu Thruns gemacht, hat man ihn geschnidet per R. 40,000». Christian Huonder ha giu quater fegls e treis feglias ed ei morts, sche nus sbagliein buca 1733.

Dils auters fegls da statalter Nicolaus Huonder senumnava in, sco gia detg Nicolaus, naschius 1669. Quel ei daventaus pader en claustra a Mustér cul num Martin. Sia messa nuviala ha el celebrau ils 21 da mars 1697 e quei el liber avon la porta claustral, nua che decan Gion de Castelberg, plevon a Trun, ha teniu il priedi festiv. Pader Martin capeva bein l'architectura ed ha survigilau la construcziun dalla presenta baselgia claustral. El ei morts ils 9 da zercladur 1713 ed ei satraus en baselgia claustral avon igl altar da s. Giusep, in di, nua ch'ils da Sumvitg eran grad vegni cun processiun a Mustér. In secund fegl da statalter Nicolaus Huonder haveva num Martin ed ei staus maridaus cun Onna Maria de Castelberg ed ha giu in fegl cun num Conradin. Suenter la mort da sia dunna ha Martin Huonder studiau teologia ed ei daventaus spiritual. Sia messa nuviala ha el celebrau Mardis Pastgas ils 28 da mars 1701, en baselgia da S. Gions, nua che siu fegl Conradin ha survi messa e decan Gion de Castelberg fatg il priedi. Sur Martin Huonder steva sursesetz ed ha giu, ton sco nus savein, negina pastoraziun. – Siu fegl Conradin ei maridaus cun Maria Eva de Castelberg ed ei staus mistral 1730 / 1731. – Nus savein dir tier quella caschun, che buc ina schlatteina da Mustér hagi dau alla baselgia tons spirituals, sco la schlatteina Huonder. Nus possedein notizias da buca meins, che da dudisch «sur Huonders.»

Josef, il quart fegl da statalter Nicolaus Huonder, ei buca staus maridaus ed ei morts ils 20 da schaner 1734.

• •

Ils geniturs da statalter Nicolaus Huonder ein stai: Christ Conrad Huonder e Barla Baselgia, ferton ch'el sez ei staus maridaus cun ina certa Anna de Fontana. Nicolaus ha aunc giu treis frars: statalter Gion Huonder, che ha giu treis fegls, statalter Christ Huonder «zu» Acletta cun quater fegls ed ina feglia e Cunrad Huonder «im Dorf».

Sco ei vul parer ei il patronat dalla caplutta da S. Catrina ius cul temps vi sin differen-tas famiglias dalla parentella Huonder, che havevan quitau per il resti dalla caplutta e ch'envidavan en in spiritual ni pader da far fiasta a Funs il di da s. Catrina. Entras ina maridaglia ei lu il patronat ius vi sin la famiglia Durgiai. La tatta da Pieder Antoni Durgiai, um da Josefina Condrau ei stada ina Cristiana Huonder. –

«Adina» ei s.Catrina buca stada, denton sia historia ei veglia ed interessanta. Quei muossan gia las cuortas notizias, che nus havein saviu dar sur la carina caplutta, che stat leusi isolada, tut persula sper la punt al pei dil Muntatsch.

Nus concludin nossas notizias sur s.Catrina, ses benefacturs e protecturs cun ils bials plaids dalla cronica: Retribuere dignare, Domine, omnibus bona facientibus vitam aeternam. Veglies dar o Segner, a tuts quels che fan dil bien la veta perpetna!

## Il di da s. Catrina

Il di da s.Catrina haveva avon temps aunc in'autra muntada per

Mustér. Quei di era mintgamai in avis tier niev progress ella sabientscha e tier nova pietad. Il di suenter s.Catrina vegnev'e numnadamein dau l'entschatta alla scola, che cuzzava entochen la jamna sontga. S.Catrina ei gie la patruna dils filosofs, e denter quels pigns ha ei adina dau filosofs, ch'ein daventai silsuenter gronds filosofs. Ins leva entscheiver la scola cun ina buna intenziun, sut la protecziun d'ina perderta sontga.

Sin quella nova veta scientifica vegneva il pievel era fatgs attents. Il calender dils reve - rendissims paders caputschins, che pastoravan da gliez temps a Mustér, - igl ei ussa uonn 1918, il december, gest 100 onns, ch'els han bandunau Mustér suenter ina activa e benedida pastoraziun da bunamein 200 onns, - quei calender cunteneva la interessanta notizia ch'era da publicar la dumengia avon s.Catrina: «Il giorno dopo s.Catharina principia la scuola, ma senza obligazione.» Il di suenter s.Catrina entscheiva la scola, denton senza obligaziun. Ei steva pia liber dad ir a scola! Ah, tgei consolazion vegn quei ad esser stau da lezzas uras per la pli part dils buobs e tgei consolazion fuss quei aunc ozildi per biars, la remarca: «ma senza obligazione!»

Ins sa dir tgei ch'ins vul, ir a scola, stuer seser ed esser serraus en quasi igl entir di ora, e lu aunc aschi liung temps, quei ei per affons, cunzun ora silla tiara, in grond sacrificei, in'unfrenda greva pli che greva. E l'experienza muossa fetg savens, ch'il resultat corrispondi tuttavia buc adina alla gronda unfrenda, anzi ch'ils affons vegnien savens stuflentai, che biars daventan indifferents, gnervus, uaps da spért e da tgierp. Nus essan



Altar ella caplutta da s. Catrina

tuttavia buc encounter la scola en general e nus giavischein era buc anavos las relaziuns dil temps vegl, denton che la scola dad ozildi cun siu sistem, cun ses plans, roms, trop-pa cudischs, tut tenor il medem fatguir, sappi scaffir ina generaziun sauna, pratica, ventireivla, quei sa crer tgi che vul. Saziar quels che han fom ei in'ovra da misericordia, denton stuffientar enzatgi ei fatg entiert. Non multa, sed multum! Buca bia, denton bein clar, fundamental fuss senza dubi da preferir. Item... principia la scuola, ma senza obligazione... e tonaton han nos perdavons saviu lur fatgs grad aschi bein sco nus, sche buca meglier; els ein stai grad aschi cuntents e ventireivels sco nus, probablamein aunc meglier che nus. Basta!

• •

Cun il di da s. Catrina entschaveva avon onns era mintgamai nova veta spirituala a Mustér. Ils da Mustér vegenvan aunc pli pietus! Il directori dils reverendissims paders caputschins cunteneva perquei sin quei di la remarca: «Si da principio pure a dir la sera il Rosario sino a Pasqua.» Ins vegn ad entscheiver a dir il rusari la sera entochen Pastgas. Ed ei vegn dau en exactamein co quei haveva da daventar.

Gliendisdis, mardis, mesjamna rusari sigl altar da Nossadunna dil rusari. Gievgia la cruna dil Segner sigl altar da s. Carli. Quella devoziun vegneva fatga sin suandonta moda: Deus in adiutorium... Adoremus te Christe et benedicimus tibi etc., allura ina salidada enstagl dil Gloria Patri... Silsuenter treis decadas babnos... Alla fin treis babnos e salidadas. Sit nomen Domini benedictum. Oremus (come nel Cartello!). – Il venderdis vegneva ei recitau il rusari da Nossadunna dalla dolurs sin siu altar. – Sonda la litania sigl altar da Nossadunna dil rusari.

Alla fin vegneva ei aunc detg mintga sera igl aunghel dil Segner cun De profundis e lu privatum da bass tschun babnos (las sontgas tschun plagas) cun bratscha aviarta. Suenter suandava la benedicziun. ferton ch'il spiritual serendeva en teschamber cantava il pievel, la gievgia: Tantum ergo... ni Laudato sempre sia...; il venderdis: Virgo Virginum paeclara...; la sonda: Salve Regina...; il gliendisdis: De profundis...; ils auters dis in himni da Nossadunna. Ei fuva pia ina biala variazion e surtut il pievel cantava mintga sera enzatgei, che aulza il cor.

Dil temps dils reverendissims paders caputschins existeva aunc bein enqual autra isonza a S. Gions, che nus havein emblidau via totalmein. Ei auda denton buca tier s. Catrina, denton s. Catrina vegn franc a perdunar, sche nus raquintein aunc dabot mo in per caus-sas.

Dumengia Septuagesima, la sera, entschaveva il «Perdun a Baselgia», che cuzzava entochen dumengia Quinquagesima inclusiv. Mintga sera vegneva ei cantau la litania Lauretana, allura: Deus in adiutorium..., silsuenter in misteri e quendisch babnos e salidadas cun Gloria Patri... alla fin. Ora pro nobis..., Oremus: Concede... Aunghel dil Segner... De profundis.

La fiasta da Sontgilcrest vegnev'eи exponiu e cantau messa ella pleiv allas otg; suenter messa dau la benedicziun e reponiu. Immediat suenter, havend scumiau paramenta, ve-

gnev'ei intonau «Pange lingua» e l'entira vischnaunca serendeva cun processiun en claustra ed assisteva leu allas funcziuns. Finiu la processiun en claustra turnava la vischnaunca cun processiun a S. Gions cantond il «Te deum».

Da S. Martin visitavan ils da Tujetsch igl emprem la baselgia da s. Gions, nua che l'entira vischnaunca da Mustér era seradunada. Il plevon da S. Gions entschaveva la litania da tut ils sogns ed ins mava ensemen cun ils Tuatschins en claustra e turnava puspei en processiun anavos ella baselgia parochiala cantond la litania da Nossadunnna. A S. Gions vegnev'ei proclamau perquei giud scantschala la dumengia avon: «...croma s. Martin, nus vegnin ad ir cun processiun en claustra.» Denton avunda!

Nos perdavons havevan e prendevan bia megliera peda da far dil bien, che nus. – Nus vivin per ordinari en preschas e fuolas e vegnin perquei tonaton buca fetg ferm vina-von. Bein enqual devoziun e pietusa isonza da pli daditg ei messa en emblidonza ni scursanida. E quei ch'ei semantenu para beinduras aunc memia liung. Il vegl imperatur Lothar ha giu raschun da dir: «Ils temps semidan e nus semidein cun els.»

• •

Aunc ina muntada haveva il di da s. Catrina per Mustér. Sin quei di ni leu entuorn serim-nava il Cussegl grond, il parlament dalla Cadi a Mustér, el liug da sia residenza. «Roda dertgira s. Catrina» fuva ina usitada expressiun dil temps vegl. Il cumin e ses organs havevan pli baul tut autra impurtonza, che ozildi. Quasi tuttas fatschentas generalas e publicas vegnevan fatgas giu a Mustér. Perfin ils «mess», quei vul dir ils deputai sil Cussegl grond a Cuera, da 1803 entochen 1816 mo dus per nies cumin, survegnevan lur instrucziuns dils ufficials dil cumin serimnai a Mustér. Il parlament dalla Cadi seraduna-va perquei era pli savens, diesch entochen dudisch ga regularmein per onn, tier ils auters «extra cussegls», che vegnevan clamai ensemen, denton mintgaga mo in ni sil pli dus dis. Dasperas fuva quei Cussegl grond dil cumin pli numerus, ch'ozildi.

Cun salter, scarvon ed assistent dumbrava il parlament ni Cussegl grond dalla Cadi 20 personas, ils megliers, ils pli perderts e sabis magistrats, che las sis vischnauncas ni las quater cuorts savevan mo tarmetter. E scadin cass deva lur preschientscha e lur radunonzas en casa cumin, nua che sia grazia monsignur avat assisteva mintgaga ufficialmein, in agen colorit e sentiment alla capitala.

Tut quei, che quels sabis signurs tractavan en lur radunonzas sut il presidi dil mistral per il beinstar dalla tiara, vegneva mess a protocol. Igl ei da star zun mal ed igl ei in donnun per la historia e la cultura da nies cumin, che quels protocols avon 1799 ein daventai ina unfrenda dil barschament dils Franzos.

Ina caussa, che vegneva per ordinari tractada e finida sillla radunanza «Roda dertgira s. Catrina», fuva da fixar la «Clamada d'in ludeivel cumin dalla Cadi.» Il bia vegneva ei tratg ora ina cumissiun gia sin la radunanza «fiera da Mustér», che vegneva tenida da lezzas uras igl emprem d'october.

Aschia er'ei vegniu ordinau per exemplu sin la dertgira da s. Catrina 1804:

«Ei era d'in ludeivel oberkeit fatg la elecziun d'in signur per cuort per tschentar si ina clamada sura dallas victualias a proporziun dil temps, havend in ludeivel oberkeit schon la fiera da Mustér l'obligaziun giu, da tschentar si e publicar quella, essend aber per certi motivi quella refretga entochen questa dertgira.

Signurs ils quals ein stai per far la clamada sin approbabziun d'in ludeivel Oberkeit:  
per Mustér: signur statalter Giachen Martin Genelin,  
per Tujetsch: signur statalter Duri Venzin,  
per Sumvitg e Trun: signur landama Nay,  
per Breil e Medel: signur statalter Josef Duri Giossi e scarvon.»

La «clamada» ch'ins veseva pli baul en mintga stiva fermada vid igl esch ni la preit, fuva norma legala per vender e comprar.

Avon nus sin meisa stat la «clamada» fatga il novembre 1832 e suttascretta ufficialmein da Gion Rest Caduff da Breil, assistent regent. Sch'ins va atras ils prezis da lezzas uras per «purment, garnezi, pumas, carns, latgiras, ovras e launa», sco la clamada vegneva mintgamai partida en e metta quels prezis en cumparegliaziun cun ils prezis dad ozildi, che la terribla uiara ha menau neutier, sche vegn ei tut tuorbel avon ils eglis. Ins sefi-da strusch d'allegar mo in per exempels:

|                                      |                     |
|--------------------------------------|---------------------|
| 10 crenas pieun da alp ni in stèr    | 5 flurins           |
| 1 crena caschiel magher dad alp      | 12 crizzers         |
| 1 curtauna segal                     | 56 crizzers         |
| 1 curtauna tschereschas nerás tostas | 1 flurin 6 crizzers |
| 1 crena carn d'armaul                | 11 crizzers         |
| 1 mesira latg entrì                  | 6 crizzers          |
| 1 crena launa lavada                 | 56 crizzers         |
| etc. etc.                            |                     |

Ins saveva ver da tuttas uisas, niev e veder, sco ins leva per bass prezis; perfin tschagrun fieri, che negin leva ussa magliar pli avon l'uiara, savevan ins cumprar per 8 crizzers la crena!

Ils capitalists, che mavan a trer en lur tscheins da S. Martin eran bi leds, sch'els survegnevan la mesedad en daner blut. Tschei vegneva pagau cun rauba, che la glieud haveva en abundonza. Igl ei gest il contrari dad ozildi, nua ch'ins ha pli u meins daners, mo nua ch'ei maunca la rauba. Tgi stat ni steva meglier? Igl imperatur Lothar schess puspei: «Ils temps semidan e nus semidein cun els.»

• •

Sco ei fuva usitau pli da vegl en bia loghens, aschia han bein era muliners da Mustér fatg serasontga il di da s. Catrina. Cun quei che s. Catrina ei vegnida marterisada cun ina roda, che haveva en tschien taglioms, duess ins buca muenter ina roda per siu di, ni roda da filar ni roda da mulin. Aschia raquintavan nos vegls ed ei vegneva observau. Pli

da vegl mulavan ils muliners buca per quei di. Ad in muliner, che haveva mulau per s. Catrina, era ei siglientau la roda per castitg, ch'el haveva buca teniu il di da s. Catrina.

Arisguard la roda da filar vegn quella tenida eri ozildi en bia casas ualти exact, buca mo il di da s. Catrina, mobein era auters dis emblidond il vegl proverbi:

*Sez filau e sez tessiu*

*Dat il meglier vestgiu!*

Suenter haver celebrau s. Catrina avonmiezdi en baselgia ein ils muliners da Mustér forsa vegni ensem suentermiezdi ella veglia ustria dalla punt on Gonda tiella «Balugna», sper in scart troccas ed in bien glas vin. E tgi less far curvien? Dil rest formava l'ustria dalla punt dil temps dalla via vedra, mintgamai la «davosa staziun» per ils da Medel e da Tujetsch e per ils da «sura».

• •

Nus essan alla fin cun nossa discurrida. – Ei exista dapresent circa 300 differentas cartas illustradas da Mustér e siu territori, denteren oreifer bialas. Ina dallas pli bialas ed artifcialmein pli finas ha signur Mischol da Schiers dau ora 1913 (nr. 1322) cun la caplutta da s. Catrina, che fa ina zun plascheivla impressiun. Bugen purschessen nus ussa quella per conclusiun a scadin lectur e lectura per memoria e salid da s. Catrina, isolada e persula al pei dil Muntatsch sper Mustér.

\* \* 1919 \* \*

# Ils bannerherrs dalla Cadi

Cun notizias ord la historia dil cumin dalla Cadi

Dapi il november 1917 stat all'entrada dil corridor, che meina ord la baselgia claustralva vi en baselgia da Nossadunna, in bufatg monument da lenn si pil mir, che porta la suandonta inscripziun: «Hiebei ruhen die Gebeine des weilan Hochgeachten Herrn Bundes - statthalters Landammans und Pannen Herrn Johann Christian Modest Pally, welcher den XXIX May MDCCCXII seines Alters XXXXIII Jahre, im Herrn entschlafen ist. Gott habe ihn selig!»

Ual sur l'inscripziun ei l'arma dalla schlattaina Pally tagliada en e colurada. Treis bandieras decoreschan l'arma.

Negin ei satraus cheu en quei liug. Quei monument steva avon onns ella baselgia veglia da Nossadunna oragiudem dil maun dils umens si pil mir, damaneivel dil parlet d'aua benedida, nua che bannerherr Pally era vegnius satraus ils 30 da matg 1812. Vagnend baghegiau 1899 la nova baselgia da Nossadunna han ins per evitar la humiditat alzau la nav dalla baselgia, ferton ch'il chor ei per pietad vegnius schaus en l'anteriura altezia e formescha ussa la cripta. Tier quella caschun ha il sura monument stiu vegnir allontanaus ed ei da lu enneu staus conservaus egl archiv claustral entochen il sura datum, nua ch'ins ha giavischau, ch'el vegni exponius puspei enzanua.<sup>1</sup>

Beinenqual pelegrin seferma ussa avon quei monument e legia cun attenzion l'inscripziun. Quei che croda si e para empau jester ad enqualin, ei il plaid «bannerherr» e lu las treis differentas bandieras. Tgei vul quei dir?

Sco auters vegls tetels: landrehter, sechelmeister, scarvon, assistent ed aunc pli baul: guvernatur, cumissari, vicari, podestat, sindicatur, cavalier etc., aschia ei era il tetel «bannerherr» stulius e quasi emblidaus en nies cumin. Gia daditg rauassan ils umens, ils quals ein stai decorai per la davosa gada cun tala dignitat, en santeri sut la crusch. Ed ils monuments da tals signurs en santeri ein malamein sblihi e sgurdinai dall'aura, aschia ch'ins vegn strusch ora pli cun numis, tetels e datums. Sulettamein audan ins aunc da temps en temps in u l'auter num, cura ch'il reverendissim plevon legia giu la jamna la dumengia: messa perpetna per signur sechelmeister N. N... per signur assistent N. N... etc. E tonaton fuvan biars da quels uffecis da gronda muntada, tschercai ed aulta-mein honorai e respectai e denter quels cunzun igl uffeci da bannerherr.

Sche nus schein suandar cheu entginas notizias sur ils bannerherrs dalla Cadi, sche daventa quei per regurdar nossa generaziun vid l'autta e distinguida honur, ch'ils bannerherrs gudevan en temps da pasch ed en temps d'uiara, per leventar la pietad ed engrazieivladad per umens, che han battiu ed operaui per la libertad ed independenza, ils fretgs dalla quala nus gudin aunc adina e dalla quala nus segloriein aschi bugen. Nossas notizias ein dil reminent magras e muncheivlas, havend muncau tscheu e leu il desiderau material, cunzun ord il temps vegl. Ina nova forza vegli denton cul temps cumpletar las notizias e renconuscher silmeins nossa buna voluntad.

Nus havessen atgnamein era in plaid romontsch per «bannerherr», ch'ins anfla beinduras en scartiras, numnadamein bandierel. Denton, nus duvrein il plaid tudestg bannerherr, essend quel staus il pli usitau al pievel. Dasperas retract'ei d'in uffeci ussa totalmein stulius.

Il bannerherr haveva per igl emprem da purtar e pertgirar la bandiera, cura ch'ils umens dil cumin stuevan ir ell'uiara. Ferton ch'il mistral regent cumandava la truppa, silmeins da temps vegl, haveva il bannerherr quitau per la bandiera. All'entschatta ein probabla-mein omisdus uffecis stai uni mo en ina persuna. Il mistral cumandava e dirigeva la truppa purtond la bandiera.<sup>2</sup>

Era il bannerherr morts, sche vegneva ton pli spert in auter eligius cun clamar ensemes per ordinari in cumin extraordinari. Il bia, silmeins el temps pli tard, vegnev'el eligius per veta duronta. Bugen surdav'il pievel la dignitat da bannerherr al fegl dil defunct ni ad in tierparent. Aschia deriv'ei, che nus dumbrein plirs bannerherrs in suenter l'auter ord la vischnaunca da Trun e Sumvitg.

Il bannerherr fuva el medem temps permanent gerau da cumin e haveva ella dertgira e tier radunonzas dil magistrat in dils emprems pareris e quei deva ad el gronda peisa ed honur.<sup>3</sup> Il magistrat dil cumin haveva avon la nova constituziun, ch'ei entrada en vigur cun 1851, tut autra muntada, ch'ozildi. Il cumin fuva partius en da lezzas uras en quater cuorts:

- I. Mustér cun 4 geraus el magistrat da cumin;
- II. Tujetsch cun 3 geraus;
- III. Sumvitg e Trun, mintga vischnaunca cun 2 geraus e
- IV. Breil e Medel era cun 2 geraus per vischnaunca.

Schlans ei vegnius unius cun la Cadi per cun 1851. Il dicasteri dil Cumin dalla Cadi, ni Cussegl grond, sco el vegnev'era numnaus, consisteva pia ord 17 commembers, nua ch'il scarvon, assistent e salter vegnevan aunc vitier. En caussas da zun gronda impurtonza vegnev'aunc il «Zusatz» clamaus en, quei vul dir, aunc in gerau per vischnaunca. En fatgs da pli pintga muntada seradunava mo igl «Ausschuss», in gerau per vischnaunca. Denton tier las ordinarias rodas dertgira e tier ils cusseglis gronds vegneva igl entir magistrat clamaus ensemes. Ils geraus da cumin fuvan per ordinari ils medems, che las singulas vischnauncas elegevan per sesezzas. Alla testa seseva mintgamai il mistral, ni en sia absenza igl «Amtsstatthalter».<sup>4</sup>

All'entschatta vegneva nies territori administraus dad ufficials e derschaders eligi directamein digl avat sez. Las radunonzas e dertgiras pil pievel vegnevan tenidas mintgamai sut ina glienda dador la veglia baselgia da s. Martin, pia sil plaz, nua che la presenta baselgia gronda dalla claustra sesanfla ussa. Entuorn quella glienda seradunavan ils umens en preschientscha digl avat e tedlavan sias ordinaziuns e sentenzias, che vegnevan exequidas da ses ufficials.<sup>5</sup> Quei usit ei semantenius, cun certas midadas, ch'il temps

dumandava, entochen 1472, nua ch'il pievel ha entschiet ad eleger sez il magistrat e quei mintg'onn per Gliendisdis Tschuncheismas.<sup>6</sup>

Encunter la fin dil 17avel tschentaner han ins baghegiau la presenta claustra cun sia baselgia gronda (1683–1712), e cun quella caschun ha il vegl plaz cumin cun sia glienda stuiu ceder ed ei vegnius transferius el present curtgin cumin, nua che la tschentada vegneva e vegn aunc ozildi dirigida dad ina buora anora, circumdada dad ina seiv (il rin), immediat entuorn la quala pli da vegl mo ils pli ferms umens ughiavan da seestar.<sup>7</sup>

Igl onn 1751 ei vegniu concludiu da tener ordinariamein mo mintg'auter onn cumin, e quei medemamein Gliendisdis Tschuncheismas e ch'ils uffecis hagien da cuzzar dus onns. Encunter quei conclus ha gerau Antoni Vic Berther protestau, en num dalla vischnaunca da Mustér, cun gronda vehemenza.

1752 fuss pia stau, tenor conclus dil pievel, negin cumin. Seradunond denton il magistrat tenor il solit la gievgia suenter Tschuncheismas per retscheiver publicamein avon casa cumin il sarament dils salters dallas vischnauncas e far silsuenter la usitada marendà, ch'ils salters havevan da pagar, cheu han ils da Mustér fatg difficultads e caneras. Els han pretendiu, ch'il mistral e scarvon seigien mess mo per in onn e stoppien era vegnir saramentai danovamein, carteivlamein perquei ch'il conclus da tener mo mintg'auter onn cumin era vegnius fatgs pér suenter l'elecziun ed il sarament dils dus ufficials. Per spargnar disuordens e dispetas (so hierdurch causieren möchte...) ha in ludeivel magistrat anflau per bien e concludiu alla finala, che mistral Adalbert Nay sco «Amtsstatthalter» sepresenti en num dil mistral regent, colonellitinent Caspar Adalbert de Caprez, ch'era absents, avon scadina vischnaunca e metti giu leu il sarament da mistral e retscheivi era tal dalla vischnaunca. Concernend il scarvon ei vegniu ordinau, ch'el deigi vegnir saramentaus dil ludeivel magistrat cun ils salters.<sup>8</sup>

• •

Sin cumin vegnev'ei legiu ora mintgaga: mistral, sechelmeister, scarvon ed assistent e naturalmein il «stab», che vegneva per ordinari confirmaus. Igl uffeci d'assistent, che fuva il gidonter ni substitut dil scarvon, anflein nus per circa 1800.<sup>9</sup> – Mintga tons onns, sco la roda tuccava, haveva il cumin era da tarmetter in u l'auter ufficial tiels subdits en Valtlina, che ha cuzzau da 1512–1799 cun ina interrupziun da ca. 20 onns (1621–1639).

Ils deputai (ils mess) sil Cussegl grond a Cuera, ch'il cumin haveva medemamein d'eleger, han entschiet lur missiun 1803 e quei dus per nies cumin entochen 1816, nua ch'ins ha tarmess quater deputai, in per cuort. La representanza sil Cussegl grond ha giu caschunau differentas difficultads a nies cumin, entochen che quella ei vegnida fixada 1837 tenor populaziun, nua che nies cumin ha survegniu da leu naven tschun represen-tants.

Ils uffecis da mistral, bannerherr, sechelmeister, scarvon ed assistent, sco era quels pella Valtlina, vegnevan pagai e beinduras cun aultas summas, per ordinari in ton per vusch, ni ina certa summa alla cassa dil cumin.

La moda da pagar ils uffecis da cumin ha, sco la «Synopsis» dalla claustra da Mustér raquenta, entschiet danovamein 1666, nua che Giachen de Latour da Trun ei vegnius mistral.<sup>10</sup> – Igl onn 1690 legin nus, che giuncher Giachen Adalbert de Castelberg hagi retschiert il tetel da scarvon «mit obligation jedem man bz. 2 zu geben. Sechelmeister Jacob Theiggel mit obligation jedem man bz. 2 zu spendieren.»<sup>11</sup>

Il di da cumin era perquei beinduras in di, nua ch'ei vegneva fatg, sco usitau era en auters cumins, pauc auter, ch'ingantau ils differents uffecis. Beinenqualga sefageva la norma valer: Tgi che paga il pli bia, survegn igl uffeci, enstagl ch'ei fuss iu tenor il ver principi: Igl uffeci enquera igl um. Natural, quei haveva era sias atgnas consequenzas. Pader Placi a Spescha scriva 1810 en ina da sias scartiras ulti, recent, sco ei era sia moda: „...alles riechte von Metal, und so wurde auch ein metalener Landammen erwählt, der wenig Kenntniss und Erfahrungheit hatte. Derjenige, der mehr verspricht, wird in Ämtern vorgezogen.» – Denton, beinduras vegnev'eil pilver mo «empermess» e silsuenter buca pagau ni rugau da schar suenter.

Sez per metter neu ina nova livrea pil cumin ei vegniu proponiu 1803 dad in ludeivel magistrat ed approbau dallas vischnauncas, ch'aschibein il manti dil salter, sco era quel dil mistral, scarvon e sechelmeister, che han da cumparer sin publica radunanza da cumin, dueigien vegnir pagai dils ufficials, che vegnan tschentai sil proxim cumin. E lu duei il mistral pagar a bien quen 100 flurins –, il scarvon semegliontamein, ferton ch'il sechelmeister paga 50 flurins –. Carschend ni calond il prezi per quels vestgius, dueigi vegnir quintau a proporziun dil sura bess ora. Per la spada, che vegn duvrada per tener dertgira, duei igl assistent far la spesa.<sup>12</sup>

Ord quella ordinaziun selai ei dasperas era concluder, che l'entira livrea dil cumin, sco era la spada, ei stada ida alla malura tier l'invasiun dils Franzos 1799, e ch'aschibein il scarvon, sco era il sechelmeister dil cumin havevien da sias uras in agen manti.

Ina lescha cantunala, per l'emprema ga ils 26 da zercladur 1822<sup>13</sup>, ha scumandau per adina da pagar ni schenghegiar per uffecis publics da scadina qualitat. Nuotatonmeins ha ei duvrau in liung temps per dismetter quei abus totalmein. Ils davos temps sepurschevan parents ni amitgs dils ufficials da pagar ina summa, ni da far in regal al cumin, ni che in ni plirs dils ufficials ensemens prendevan giu mintgamai il respectiv deivet dil cumin, – ina caussa, ch'ins savess alla finala tolerar ulti tgunsch aunc ozildi, magari era tier ils ufficials da mintga vischnauna!

Dil rest purscheva la radunanza dil cumin adina in serius muentond aspect. Il di da cumin regurdava gie mintga burgheis vid la biala libertad ed ils biars dretgs, ch'eran vegni acquistai, e che scadin gudeva, denton era vid l'obligaziun, ch'ins haveva da defender e mantener quels. Perquei stueva dad in temps, per mussar quei spert, mintga um liber cumparer bein armaus sin cumin sut peina da buc astgar passar sin plac cumin e votar senz'arma, in'ordinaziun, ch'ei vegnida decretada danovamein aunc 1670 ils 25

da schaner. Quella medema arma (ina spada) haveva mintga um era da purtar las quater principalas sontgas fiastas, cura ch'el serendeva en baselgia.<sup>14</sup> Purtar ina spada era dasperas ina enzenna da libertad.

• •

Igl uffeci da bannerherr ha senza dubi priu sia entschatta, silmeins sin moda rugalada ed organisada, cun la fundaziun dalla Ligia Grischa 1424, nua che las otg dertgiras aultas ed ils differents cumins ein vegni organisai, era concernent l'obligaziun da prestar survetsch temps d'uiara. Aschia dev'ei tenor la partiziun dalla Ligia sur igl uaul da Flem (Surselva) quater dertgiras aultas, dallas qualas mintgina haveva sia bandiera: «So sindt vier Landamanschaften, deren jede ihr Panner hat», sco in manuscret da 1680 raquenta.<sup>15</sup>

Il cumin dalla Cadi fuva il sulet, che formava el medem temps persuls era ina dertgira aulta, ferton che Uors, Sursaissa tudestga ed ils Libers da Laax formavan la secunda, Foppa, Schluein e Tena la tiarza, Lumnezia e Val s. Pieder la quarta.

Sco la historia grischuna raquenta, ha la Ligia Grischa priu viva part dalla battaglia sil Brutg da Mals 1499 e gidau a reportar la gloriusa victoria encunter igl imperatur tudestg Maximilian. Menader dalla truppa dalla Cadi ei mistral Martin Berchter da Tujetsch staus, ed el medem temps era bannerherr, sco veglias notizias laian concluder.<sup>16</sup>

Silsuenter anflein nus, che la truppa dil cumin hagi stuui alzar la bandiera aunc differentas gadas per defender la patria ed ils interess dalla ligia ni dil cumin e bein savens vegn ei fatg speciala menziun dil bannerherr. – Aschia raquenta la historia, che Plaisch Genal da Sumvitg fuvi bannerherr 1621 «da die Engadiner gegen Disentis kamen.»<sup>17</sup> Igl onn 1633, stuend ils Grischuns serender sil Steg, ha mistral Giachen Berchter menau sco capitani la truppa dil cumin dalla Cadi. Bannerherr fuva landrehter Giachen de Balliel da Mustér.<sup>18</sup> – Ed aunc avon, 1620 e 1632 «als die Veldliner rebellisch worden» ei Giachen de Balliel da Mustér serendius sco capitani dils 246 umens dalla Cadi «bis gegen Cleffen undertänig zu machen.»<sup>19</sup>

• •

Sper purtar la bandiera ell'uiara e defender quella sin veta e mort, fuv'ei plinavon obligaziun dil bannerherr da tener la bandiera, sco era «fendli e standarta», adina a casa sia en bien e segir guverni, da pertgirar, dustar e schurmegiar quellas avon tuttas autras caussas, perfin avon sia atgna dunna, affons ni fargliuns, sco il sarament dil bannerherr prescriva.<sup>20</sup>

Curdav'ei tier, ch'il bannerherr stueva muentar las bandieras ord ina u l'autra raschun, sche stuev'el schar saver quei ordavon il ludeivel magistrat dil cumin, sinaquei che quel sappi tarmetter ina deputaziun ed ordinari, che quei daventi cun dueivel respect e duida honur.

Aschia legin nus, che Barclamiu de Balliel da Mustér, dil temps ch'el fuva bannerherr, seigi setratgs da Salaplauna neu en sia casa el vitg ils 28 da matg 1665,<sup>21</sup> la gievgia

sunter Tschuncheismas, e ch'ins hagi cumpignau neu las bandieras cun tutta pumpa. «Als dann umb Vesper seindt etliche Herren gen Sylvaplana hingangen die Panner und Fendli der Gemeindt aus selbigen hauss wider in sein hauss in dem dorff Disentis mit gebüren der Ehre zu begleiten. 1 trumenschlager, 2 hellenbärterträger, 3 raths herren.»<sup>22</sup> 1722, ils 25 da fenadur, ha bannerherr Ludivic de Caprez da Trun retratg sia casa sura, ch'el haveva giu cumprau da scarvon Giachen Montalta. Tier quella midada ha in ludeivel magistrat dil cumin giu deputau: mistral regent Duri de Florin, landrehter Gion Ludivic de Castelberg, Landvogt de Latour, scarvon Giachen Berchter, salter Barclaimu Jagmet «und haben aus dem fenster empfangen die Panner und mit allen ehren, und mit schiessen derten oben begleitet, nach deme ihnen das nachessen geben worden, und wohl tractieret worden seindt.»<sup>23</sup>

Sin la radunanza dil magistrat da cumin dils 4 da zercladur 1813 fa bannerherr Duitg Balletta da Breil da saver, ch'el seigi sfurzaus da forsa stuer midar casa ed aschia damondi el, co el hagi da secuntener en quei cass.

«Ordenau din ludeivel Oberkeit, ch'il Mistral, Scarvon e Salter dueien esser presents cu el mass naven cun las fanas, sco era envidar ils Signurs Geraus de Breil leutier e schar sura als mats de Breil de far las duidas honurs.»<sup>24</sup>

Denton aunc pli solemn mav'ei tier mintgaga cura ch'ei era da metter in niev bannerherr e quei ton pli, che quella festivitat vegneva ualts darar avon e tenida bingleiti suenter la mort dil bannerherr. Fetg darar curdava quella solemnitad ensemen cul di da cumin e sche quei fuva ina gada ni l'autra il cass, sche vegneva beinduras il bannerherr eligius e saramentaus avon ch'il mistral.

• •

1799, ils 15 da schaner, ei bannerherr Antieni Maria de Contrin da Surrein-Bubretschi morts. Igl «ausschuss» dil ludeivel magistrat fuva ual seradunaus ella residenza a Mustér, cura che quella tresta nova ei arrivada. Ladinamein han ins schau ir ora sin las ludeivlas vischnauncas la suandonta proclama:

«Aschinavon sco ei ha cumplaschiu agl altissim Tutpuscent Diu da clamar da questa veta mortala tier l'autra il nies signur bannerherr da nies ludeivel cumin Antieni Maria Contrin: Dieus concedi ad el la gloria celestia: sche ha in ludeivel oberkeit anflau per siu duer da dumandar las ludeivlas vischnauncas vesend sura las circumstanze presentas las qualas nies ludeivel cumin sesanfla, sch'ellas vulan dar cumin e tenor stilisau uorden tschentar in bannerherr, ed en cass ch'ellas lessen, sche havess in ludeivel «ausschuss» anflau per bien da fixar il cumin sin ils 7 da fevrer.»<sup>25</sup>

Sin quella publicaziun ufficiala ha mistral Gion Rest Modest de Pally, schiender da signur bannerherr per miert, giu dau en ina brev ad in ludeivel magistrat, nua ch'el supplicescha instantamein per ina prolongaziun da quella tschentada per buca stuer renovar aschi prest las zun trestas anguoschas da quei cass. Sin quella supplica han las vischnauncas giu refretg e fixau l'elecziun sin Gliendisdis Pastgas, che fuss stau quei onn ils 25 da mars.



Gion Rest de Pally, Surrein-Sumvitg, bannerher 1799–1812

Denton ha ei dau denter en il trest embrugl culs Franzos ed ins ha buca saviu tener cumin il di fixau. Ultra da quei era il mistral regent, Gion Antoni Cagenard da Rabius, essend adherent dalla partida franzosa, vegnius pigliaus, e transportaus cun auters ad Innsbruck. Il cumin haveva pia ussa ni mistral ni bannerherr.

1799, igl 1. d'uost, ha Nicolaus Lombriser da Trun radunau sco Amtsstatalter il Cussegl dil cumin. La vischnaunca da Breil haveva giu garegiau extra cumin, essend che quel seigi privaus da dus ufficials. Las vischnauncas ein stadas cuntas da quei ed ins ha concluiu da dar cumin ils 11 d'uost, e quei era per saver satisfar al gavisch dalla regenza interimala a

Cuera, che leva saver ils numis dils ufficials d'in ludeivel cumin.

La davos'elecziun da bannerherr era stada 1768, pia avon biabein 30 onns. Biars savevan nuot co quei mass tier, auters havevan emblidau. Entras il barschament da Mustér, dalla casa cumin, dalla claustra, dils archivs, eran tontas scartiras e documents i a piarder, e denter quei era il reglament co ins tschenta in bannerherr. Il Cussegl dil cumin ha perquei anflau per bien da trer en informaziuns dad umens, ils quals havevan aunc memoria dalla davosa tschentada da bannerherr e da tschentar si quell'uisa danovamein il vegl reglament, co il bannerherr duei vegnir eligius per «puder pli bein honorificar nossas veglias victoriusas bandieras e quellas cumpignar ord lur dui logs e puspei en lur ruaus turnentar.»<sup>26</sup> Nus schein suandar cheu il reglament fixau, sco il scarvon dil cumin, Gion Antoni Frisch da Zignau, ha da lezzas uras mess per protocol.

1. Eis ei vegniu tratg ora otg pèra umens per cuort per cumpignar las bandieras, cheutier vegn pia 32 pèra ni 64 umens; ei sto aber era esser e vegnir numnau in Wachtmeister sco cumandant, che diregi quella truppa, il qual vegn schau sura a scadin mistral regent, ch'ei da quei temps; quella truppa duei esser ton sco pusseivel glieud giuvna, biala, gronda, frestga per puder dar pli gronda honur allas bandieras.
2. La truppa da Sursassiala dueigi vegnir encounter per retscheiver las bandieras moetochen la baselgia da s. Placi, sche ellas ein a Sutsassiala, ed aschia era per cumpignar naven ellas.

Vegness ei aber in bannerherr da Sursassiala sco Tujetsch ni Medel, sche duei la truppa da Sutsassiala cumpignar las bandieras mo entochen il mulin dalla claustra ed aschia era da retscheiver ellas.

3. Per purtar las bandieras vegn ei schau l'emprema agli pli datier dil defunct bannerherr da purtar. Las autres treis aber ina per cuort ed ils «fehndrichs» da purtar quelles stat sura a mintga cuort da leger ora. En quella cuort che ei il bannerherr, duei ella schar purtar sco sura ei scret e buca leger ora in auter. Per la cuort da Breil e Medel ha quella gada tuccau a Medel il «Fehndrich».
4. Il salari ni paga da quella truppa ei a scadin cumin schuldau 1flurin per in; ils «Fehndrichs» ed il «Wachmeister» dalla truppa aber 2 flurins per in, ils quals il bannerherr ei obligaus da purtar giu.
5. Duei il signur mistral regent prender ord il liug las bandieras e dar ord da finiastra als «fehndrichs» enten maun e cumpignar ellas entochen el liug dalla residenza ed il «vaibel» cun la colur.

NB. Dapi ch'igl ei vegniu rapportau da signur mistral Pally, ch'ils Franzos hagien priu naven ni fatg a frusta ina dallas bandieras, sche ha in ludeivel oberkeit ordinau sin approbaziun dallas ludeivlas vischnauncas, ed ei approbau da prender per quella gada in «fengli» e considerar quel sco las bandieras, ed il signur mistral duei quel consignar ad ina dallas cuorts mintgamai sco ei vegn suenter rang.

6. Quella cheutier destinada truppa duei ver enten cumpigniar las bandieras strentga cunzina, entochen ch'ellas ein buca puspei turnadas el dueivel liug.

El liug dalla residenza aber duei la truppa star sut casa cumin entochen ch'in ludeivel oberkeit secusseglia. Las bandieras aber en stiva gronda dalla dertgira.

7. Cura ch'igl ei da trer sin cumin duei quella (truppa) trer cun uorden, e las bandieras dueigien vegnir messas ina per cantun e la truppa semegliontamein ina per bandiera, sentelli ina cumpagnia. –

Sin quei rapport'il protocol l'elecziun dil niev mistral Duitg Derungs da Breil «per tochen Tschuncheismas che vegn, il qual ha secententau da retscheiver senza negin interess», ed ei vegn dau ad el il sarament. Allura cuntinuescha il protocol:

«Era ha il signur mistral Gion Chrest Modest Pally, schiender dil defunct signur bannerherr Antieni Maria Contrin, fatg igl engraziamenti enten num da siu signur sir per miert dalla agli defunct prestada cunfidonza etc. e recamonda ad in ludeivel cumin da favorir ad el quella scharscha, sche el anfli, ch'el seigi en stan, cun offerir agli ludeivel cumin flurins 600. Suenter in «Umfrog» eis ei fatg ina tscharna «einhellige» da tschentear il signur mistral Gion Chrest Pally bannerherr per sia veta, nua ch'in ludeivel cumin ha era ad el dau il sarament.»

8. «Abzug» dil cumin e dallas bandieras, il qual ei daventau en questa visa: Cura ch'in ludeivel cumin ed Oberkeit ei ius giud il solit liug, sch'e la truppa sco las bandieras idas en lur duiu rang entochen Casti ni Caschliun,<sup>27</sup> leu ha in ludeivel Oberkeit fatg la sia ordinaria marendia, e denton mess las bandieras en stiva gronda dallas dertgiras cun dus «schildwachts» sin esch, ils auters schuldaus en stai sut finiastras sco vivon.

9. Cura ch'ein ira a casa cullas bandieras, sche ha la truppa da Sursassiala cumpignau ellas entochen S. Placi e buca pli lunsch, quella da Sutsassiala aber entochen a casa el duiu liug.
  10. Cura ch'ein vegni avon casa dil niev tschentau signur bannerherr, sche ei il signur mistral regent ius en stiva e retschiert las bandieras da finiastra en ina avon l'autra, suenter il solit.<sup>28</sup>
- •

Bannerherr Gion Rest Modest de Pally ei morts a Mustér ils 29 da matg 1812 e vegnius satraus, sco gia detg, en baselgia da Nossadunna. Ils 6 da zercladur ha mistral regent, Gion Antoni Frisch de Zignau, clamau ensemen il cussegl dil cumin tier ina radunanza extraordinaria. Alla bial'entschatta dat el part, che bannerherr de Pally seigi clamaus da questa veta mortala tier la perpetna ed ei seigi da basegns da proveder il cumin cun in niev bannerherr. El medem temps rapport'el, che mistral Gion Antoni Schmid da Sumvitg, seigi sepurschius entras ina brev, che vegn legida avon, da funcziunar sco bannerherr quels dus onns entochen il proxim cumin 1814 e quei per motiv da buca stuer dar discumet allas vischnauncas cun clamar extraordinari cumin, natural cun cumentiment dallas vischnauncas.

Il magistrat dil cumin ha concludiu da schar ir ora allas vischnauncas e dumandar quelles, schebein elllas seigien cuntentas da schar funcziunar quels dus onns mistral Schmid sco bannerherr, ni sch'ei plaiji da clamar in extra cumin. Duess ei vegnir en ils plis da dar cumin, sche vegn ei schau sura a mistral regent, a sia sabientscha landrehter Theodor de Castelberg per Sursassiala ed ad Amtsstalter Nicolaus Lombriser per Sutsassiala, cura dar cumin e che quei di vegni solemnisaus tenor protocol. – Per cass, che la carica da bannerherr vegn tras ils plis dallas vischnauncas confidada a mistral Schmid, sche dueien quels treis designai signurs esser autorisai da puder numnar in signur per cuort per purtar las bandieras naven da Surrein entochen en casa dil niev tschentau bannerherr e d'envidar en leutier ils mats da Sumvitg, pregiudicond negins dretgs da tschellas cuorts.

Dallas vischnauncas ei vegniu en ils plis da dar cumin e quel ei vegnius fixaus sils 29 da zercladur, s. Pieder e s. Paul. Tenor conclus dils 16 da zercladur er'ei vegniu ordinau d'observer il reglement fixaus igl 1. d'uost 1799 tier l'elecziun da bannerherr. Ultra da quei vegn ei garegiau ed ordinau, che la designada truppa dueigi «ton sco pusseivel esser exercitada;» plinavon: «Che tut dueigi cumparer per far la tschentada, per ch'ei cheutras vegni legiu ora in subject ton pli nizeivel agli ludeivel cumin e quei cun quella peina, ch'il niev bannerherr paga batz agli cumin, sche dueigien puder trer mo ils presents sin cumin, e quels che vegnien buc dueigien esser sclaus. Veggend aber da quella, ch'il signur niev eligiu ora bannerherr paga in ton summa agli cumin, sche ton sco quei pudess tuc-car per vusch, dueigien era quels, che stattan a casa stuer metter ton dil lur en bien dil cumin. Exceptai da quei ton en in cass sco l'auter ein quels, ch'ein vargai 60 onns, sco era tuts quels, ch'ein en survetsch public, ni outras stgisas sufficientas.

«Oravon dueigi esser imponiu agli che vegn niev elegiu ora bannerherr, damai che tras quella elecziun far, ei dau caschun da spesas agli ludeivel Oberkeit, sco era per quels da quella deputaziun sura menziunada ordinau il cumin, ed era per la truppa, che vegn cheutier per cumpignar las bandieras ed era las spesas dil ludeivel Oberkeit da quei di e tut cuost dueigi quel prender giu oravon sinaquei ch'il ludeivel cumin hagi buca cuost da quellas varts.»<sup>29</sup>

Sco portabandieras per quei di ein vegni fixai per la ludeivel cuort da:

|          |   |
|----------|---|
| Mustér   | Signur litinent Berther, al qual ei ha tuccau tenor roda en munconza d'ina bandiera da prender in «fengli». |
| Tujetsch | Signur Vigeli Monn  |
| Sumvitg  | Signur mistral Schmid sco tierparents dil defunct signur bannerherr   |
| Breil    | Signur Gion Antoni Camihel  |

Il scarvon dil cumin, Giachen Murezi de Cabiallavetta da Breil, ha protocolau il decours da quei di dalla tschentada da bannerherr sco suonda:

«Suenter ch'il signur mistral, scarvon e salter cun las colurs ed era ils signur «fendris» cun la truppa da Sutsassiala ein stai seradunai a Surrein il sura fixau di ed ura (ils 29 da zercladur allas 7), sche ha il signur mistral regent<sup>30</sup> fatg in plaid da condolaziun ed il signur Landaman Schmid ha era fatg in encounter plaid; suenter han quels signurs priu in refrestg, e pli ha il signur mistral regent dau las bandieras ord da finiastra tenor vegl usit; lura ha il signur capitani Caspar de Latour, ch'era numnaus dil signur mistral regent sco cumandant da honur, priu e postau las bandieras enamiez la truppa e cumpigniau ellas cun tutta pusseivla honur et attenziun entochen Mustér, e leu mess en casa cumin, en stiva dalla dertgira. A S. Placi ei la truppa da Sursassiala vegnid'encunter ed ei s'unida cun tschella truppa.

Havend il ludeivel oberkeit finiu il cussegl, sche han ei tratg si cumin en moda, sco ei ein vegni naven da Surrein ed era deputau si per sia «firstliche» grazia, tenor usit, per la ludeivla cuort da

|          |  |
|----------|--|
| Mustér   | Gion Frantestg Huonder                   |
| Tujetsch | Signur statalter Giachen Caviezel        |
| Sumvitg  | Signur mistral Cagienard                 |
| Medel    | Signur mistral Pally                     |
| Breil    | Signur scarvon de Cabiallavetta e salter |

Suenter che quella deputaziun ha giu cumpigniau giu sia grazia, che ha priu en siu plaz cun in bi ed adequat plaid, ed era leu bia pievel present, sche ha signur mistral regent, entras in honorific plaid aviert il cumin.

Havend sia sabientscha Peter Antoni de Latour giu la supplica dil signur defunct sez e la cumissiun dils honorifics signurs parents dil defunct signur bannerherr d'engraziar,



Duitg Balletta, Breil, bannerherr 1812 – 1841

per la confidonza ch'il ludeivel cumin hagi giu da haver giu agli confidau quei uffeci da bannerherr, sch'ei el ius sin la buora e per cumissiun dil signur defunct sez ed era en num da ses signurs parents, fatg igl engraziament en ina moda aschi sabia, aschi prudenta, ch'ei mai pli udida. Cun dasperas metter avon agli pievel la gronda ventira che nossa suletta republica gaudi, ed en particular la biala libertad, che nies ludeivel cumin possedi d'aunc adina puder eleger ora entrais il pli maun ils commembers d'in ludeivel oberkeit etc.

Nua ch'el ha era cun grond «iffer» mess avon alla pluralitat con d'im-purtonza ei seigi da leger ora in bein qualificau persunal tier quella scharscha da bannerherr.

Suenter in aschi sabi e per il cumin aschi avantagius metter avon, ei il signur litinent Ludvic Balletta da Breil cumparius sin la buora e recumandau per quei uffeci da Banameister, sco era signur mistral Beer da Tujetsch e quei ton l'ins sco l'auters omis-sus per nuot oreifer las spesas fixadas ent'il sura circular.

Alla fin ha il pli curdau agli signur litinent Ludvic Baletta da Breil ed ei ha stuui vegnir dumbrau las vuschs, ch'ein stadas 576 per signur mistral Beer e 599 per signur Baletta.<sup>31</sup> E suenter quei che quels sura menziunai signurs han giu cumpigniau sia «firstliche» grazia en casa da Diu, sch'ei il ludeivel oberkeit tratgs giud cumin, en uorden sco avon en casa cumin e da leu naveen ha il signur mistral regent, scarvon, salter cun il signur capitan ed ils signurs fendris e la truppa cumpigniau las bandieras a Breil e leu ha il signur mistral regent fatg in plaid d'auguraziun e retschiert las bandieras en da finiastra, suenter il vegl usit ed aschia finiu quella solemnissima elecziun, suenter la moda da nos buns antecessurs.

Dieus concedi po ina liunga veta e buna disposiziun al niev eligiu ora bannerherr!»<sup>32</sup>

• •

Ils 24 da schaner 1841 circulescha la tresta nova, che signur bannerherr Duitg Balletta da Breil seigi morts en ina vegliadetgna dad 81onn. Ils 26 ha la funcziun da bara giu liug. In ludeivel oberkeit e signur pader statalter en num dalla venerabla claustra cun

auters signurs parents ed amitgs ed in grond pievel han rendiu la davosa honur al bein-vengonz e preziau defunct. Gia da 19 onns er'el serendius en survetsch jester militar dalla Frontscha. Pli tard ha el surviu alla vischnaunca sco gerau, al cumin sco commember d'in ludeivel oberkeit buca meins che 40 onns, en quels 29 onns sco bannerherr. El medem temps ha el prestau ses survetschs al cantun sco capitani ed ha finalmein retschiert per ses merets il tetel da major. Aunc en ses vegls dis ha el fatg il survetsch militar el camp da Schwarzenbach e cun plascher seregurdavan ses commilitars da lur veteran aunc ditg suenter.<sup>33</sup>


Pader Placi a Spescha fa aunc la suandonta notizia sur bannerherr Baletta en ina scar-tira da 1814: «Nun ziehen unsere Truppen den 17. April(?) gegen Chur. Hauptmann unsers Hochgerichts soll Herr Ludwik Balet von Brigels, und Pannerherr seyn. Er ist ein mage-rer Herr, aber von beträchtlicher Länge, und war ehehin als Lieutenant in französischem Dienste gestanden. Zu Trons versammeln sich diese Truppen an der Zahl ungef. 80, und sollen dort gemustert werden.»

Schebein ei hagi retractau pervia digl act da mediaziun,<sup>34</sup> ni pervia dalla reconquista dalla Valtlina, vegn buca detg.

• •

IIs 31 da matg 1841 ei vegniu teniu in cumin extraordinari per eleger ora in niev bannerherr. Las bandieras ein vegnidias cumpignadas solemnamein da Breil a Mustér ed ein leu en curtgin cumin vegnidias plantadas si sin ina biala piramida. In numerus diember da burgheis hagi frequentau quel cun aschi buna pasch, harmonia e quietezia, ch'ins seregurdava biars onns buca ed aschia dau ina bial'emprova, che cura ch'il fanatissem surmeina buc il pievel, ch'ei regi aunc adina tier nies pievel il bien spért, che vul uorden e ruaus.<sup>35</sup> Monsignur avat Adalgott Waller ha all'entschatta mussau cun in adattau plaid la biala caussa, dalla quala mo paucas naziuns e pievels san selegrar, che nus gudien numnadamein la libertad da puder vegnir ensemble ed eleger ora libramein ord il miez ils pli vengonz umens per administraturs dalla giustia e defensurs dalla religiun. Silsuenter ha mistral regent Felix Cabernard da Dardin, fatg ver claramein l'impurtontdad digl uffeci da bannerherr, ton en risguard civil, sco era en risguard da religiun. Sco niev bannerherr ei vegniu eligiu per il cuoz da siat onns cun ina vusch Giachen Gelli Cajacob da Sumvitg.

Quels siat onns ein stai spirai cun 1848. Il di da cumin da quei onn, ils 12 da zercladur, arriva ed il protocol da cumin rapporta sur quella tschentada denter auter era il suandont: «Suenter che signur mistral regent cun in entir cumin ein stai saramentai, ei signur bannerherr Julius de Cajacob dalla Vischnaunca da Sumvitg secumparius sin la buora e (ha) teniu in plaid ent'il qual quel, aschilunsch sco la historia ha schau tier, (ha dilucidau la) significaziun e derivonza dallas bandieras cun giavischar, ch'il cumin possi leger ora in bein vengonz successur en sia plaza, sco era en quei critic temps buns e perderts deputai sil cussegl grond, che segien ton per la baselgia sco era per il stadi, engraziond alla fin ad in ludeivel cumin per la favur mussada encunter el en quels



Giachen Gelli Cajacob, Sumvitg, bannerherr 1841–1854

siat onns, ch'el seigi staus bannerherr. Sin giavisch da signur mistral Cagienard ed auters signurs ha signur bannerherr Julius de Cajacob seschau en da schar proponer ad in ludeivel cumin, sche quel vegli aunc favorir ad el per ils sis sequents onns la carica da bannerherr. Tala proposiziun ei da signur mistral Cagienard ad in ludeivel cumin vegnida fatga e da quel unanimamein vegnida approbada.» Silsuenter vegn bannerherr Cajacob saramentaus ed er'eligiis sco depautau sil Cussegl grond per 1849.<sup>36</sup>

En quella aulta piazza da bannerherr ei Cajacob restaus entochen che la nova constituziun, dissolvent il vegl uorden dil cumin dalla Cadi, ha fatg fin a plirs uffecis da quel.

Bannerberr Giachen Gelli Cajacob ei morts ils 12 da fenadur 1888 ella biala vegliadetgna dad 87 onns e 4 meins. Sur da sia sepultura scriva la Gasetta Romontscha il sequent: «Ils 14 d. q. eis ei vegniu surdau al ravugl dalla tiara la bara da signur bannerherr Julius Cajacob, il senior dalla vischnaunca da Sumvitg. Las treis bandieras dil cumin, che han cumpignau el tier la fossa, indicavan, che cun el vegni satrau il davos bannerherr dalla Cadi. Il numerus pievel, che ha cumpignau la bara admirava surstaus las treis bandieras da cumin, principalmein quella amiez, in regal da papa Julius II als valerus umens dalla Cadi. Per la giuvna generaziun ein las bandieras da cumin aschi emblidadas sco gl'uffeci d'in bannerherr e tuttina era quel in dils pli honorai ed encuretgts dil cumin.. . El niev circuit (suenter la nova constituziun da 1851) ha signur Julius Cajacob funcziunu sco mediatur per Sutsassiala ed ei repetidamein vegnius confirmaus dil pievel en quei impurtont uffeci. Senza haver fatg gronds studis ha il permiert cun siu clar e penetrant intelletg e sia enconuschientscha dil pievel e dils basegns da quel adempliu cunscienziusamein las obligaziuns dils differents ad el surdai uffecis. Ei era in vengonz representant da quella svanenta generaziun da derschaders ord il pievel, che entras las enconuschientschas praticas e lur saun giudezi supplevan la munconza savida giuridica. Igl ei mo donn, che las voluminusas leschas, la qualas creschan ozildi sco las urticlas suenter las seivs, fan pli e pli nunpusseivel a tals umens ord il pievel da seser en las dertgiras.

Cun signur bannerherr Julius Cajacob ei vegniu satrau in dils davos representants dalla veglia suverana Cadi, che haveva ligias cun il papa, cun ils retgs da Spagna e Frontscha, e la memoria dalla quala lai clamar ora: Fuimus Troes (nus essan stai da Troia)».<sup>37</sup>

• •

Suenter haver dilucidau la muntada d'in bannerherr, co quel vegneva eligius ed havend dau entginas notizias sur differents representants da quella dignitat, rest'ei aunc da far in per remarcas sur las bandieras sezzas.

All'entschatta ha il cumin senza dubi giu mo ina bandiera. Uregiond denton tscheu e leu victoriusamein han ils valerus umens dalla Cadi conquistau ina u l'autra bandiera digl inimitg ed era retschiert ina u l'autra per memoria ed engraziament da haver battiu curaschusamein per ina u l'autra pussonza. Sco ei seresulta ord las sura notizias, ha il cumin giu cul temps quater bandieras, ina per mintga cuort, las qualas il bannerherr haveva da survigilar e conservar.

La tradiziun raquenta, che la Cadi possedevi avon l'invasiun dils Franzos da 1799 aunc la bandiera duvrada ni conquistada ella battaglia dalla Tgavaleina 1499. Che papa Julius II (1503–1513) hagi giu regalau ina bandiera als umens dalla Cadi ei factum historic.<sup>38</sup> Ensemblamein cun las otras duas ligias ha era la Ligia Grischa gidau il papa a victoriar ell'Italia sur Ludivic XII, retg dalla Frontscha 1512. Papa Julius II ha giu regalau a plirs cantuns, che havevan giu gidau el sin stimulaziun da cardinal Schinner, da lezzas uras uestg da Sion, differentas custeivlas bandieras, che vegnan aunc ussa conservadas tscheu e leu en divers museums dalla Svizra. La bandiera, che papa Julius II ha giu regalau alla Cadi, han ins aunc duvrau, sco nus havein gia relatau, tier la sepultura dil davos bannerherr, signur Gelli Cajacob, ils 14 da fenadur 1888.

Tier l'elecziun dil bannerherr 1799, ils 11'd'uost, ei vegniu menziunau, che mistral G. Rest Modest Pally hagi giu relatau al Cussegl dil cumin, «ch'ils Franzos hagien priu naveu ni fatg a frusta ina dallas bandieras.»<sup>39</sup> Co quella vesevi ora, nua quei ei daventau e tier tgei mument, vegn ei buca detg. Forsa tier la sventireivla campagna e retirada da Reichenau?<sup>40</sup> Per mantener denton l'isonza, che mintga cuort hagi ina bandiera tier la tschentada d'in bannerherr, ei vegniu ordinau, ch'ina cuort, tenor roda, prendi mintgamai tier tala solemnitad in da ses «fenglis», sco gia descret. Da lu enneu havess pia il cumin dalla Cadi giu mo treis bandieras.

• •

Concernent la colur e la materia dallas bandieras, tgei maletgs, simbols ed ornaments ellas purtavan, savein nus dir nuot. Ein las colurs dallas bandieras sil monument da bannerherr Pally el corridor dalla baselgia claustral reproducidas historic exactamein, sche fussen duas bandieras stadas dalla colur dil cumin cotschna e verda, e quei ina bandiera partida giu en quater uliws quadrats, l'autra en quater ulivas sdremas, mintgamai tgietschen e verd.

Sil purtret da bannerherr Duitg Balletta, en possess da signura Isabella Deflorin-Balletta, Breil, figureschan duas bandieras, ina tut cotschna, l'autra tut verda.  
Las colurs dalla bandiera sil purtret da bannerherr Rest Modest de Pally, appartenent a famiglia Schmid a Bubretschi, paran dad esser fantasia.<sup>41</sup>

• •

Ed ussa la damonda: Nua sesanflan quellas bandieras dapresent? – Ina damonda empau delicata ed igl ei buca lev da dar ina sufficienta, cumpleina risposta sin quella damonda. Nuotatonmeins schein nus suandar cheu quei, che nus havein anflau en scartiras ed enderschii ord bunas fontaunas.

Sco gia relatau han ins duvrau quellas treis bandieras per la davosa gada ufficialmeint la sepultura dil davos bannerherr dalla Cadi, Giachen Gelli Cajacob a Sumvitg, ils 14 da fenadur 1888. Silsuenter ein quellas vegnidas deponidas e salvadas si, sco vidavon, en casa da Gion Gieri Cajacob, fegl dil defunct bannerherr.

Duront igl emprem bienni dalla mistralia da G. Giusep Condrau da Mustér 1889/91 ha dr. Casper Decurtins da Trun giu supplicau la dertgira circuitala dalla Cadi, sco ei vegn detg en in artechel dalla Gasetta Romontscha, il qual nus schein suandar pli tard, da vuler surschar ad el per in temps quellas treis bandieras per schar rugalar si quellas entras sia mumma, che capeva zun bein en lavurs da seida. Havend Casper Decurtins tier la sepultura da Giachen Gelli Cajacob giu caschun da considerar quellas bandieras pli datier ed havend el sez giu purtau ina da quellas, ha el era saviu calcular il meglier, co e tgei ins savessi reparar e restaurar vid quellas, che vegnan muort lur vegliadetgna senza dubi ad esser stadas en defect.

Mond mistral G. Giusep Condrau in di cun cavagl a Trun, ha el retschiert sin siu giavisch quellas bandieras ord casa da Giachen Gieri Cajacob a Sumvitg e menau e surdau ellas a Casper Decurtins a Trun. – Il temps varga, ins emblida, ins auda zun nuot pli dallas treis bandieras da quei da diesch onns ora.

Cheu arrivan las fiastas centenaras dalla Tgalaveina e dall'invasiun dils Franzos ella Cadi. La memoria dils gloriis cumbats da nos perdavons sepresenta; ins patratga era vid las venerablas, veglias bandieras; ins leva prender neunavon ellas e far fiasta. Mo remarcabel! Negin che leva saver, nua che quellas fussien. Quei pareva tonaton curios ed a certins ha quei dau cun buna raschun empau sill a gnarva. Tuttenina cumpara el «Freier Rhätier» nr. 185, ils 9 d'uost 1901, suandonta notizia cun la poesia:

«La Surselva sura possedeva tochen avon entgins onns treis veglias bandieras, che mavan mintgamai dil vegl mistral vi sil niev. Ussa ein quellas svanidas e negin che sa ni vul saver: nua? Sin quei seferescha la poesia romontscha, che suonda cheu sut.»

## Las veglias bandieras dalla Cadi

Treis bandieras possedeva

Aunc da vegl temps la Cadi;

Quei pli baul tut che saveva,

Uss negin vul saver pli.

Treis bandieras, conservadas

Dis ed onns e tschentaners,

Sco in scazi risguardadas

Da valur pli che daners.

Treis bandieras da parada

Temps da pasch e da cumbat,

Derulladas savens gada

Cun respect e dignitad.

Treis bandieras figuravan

In edificont simbol,

E pli clar e bein plidavan,

Che scadin liung protocol.

Treis bandieras, che formavan

In simbol bi en verdad,

Che al pievel presentavan

Dretg, giustia, libertad.

Treis bandieras d'arrivonza

Ord il temps vegl e feudal;

Dad in papa cun fidonza

L'ina dada sco regal.

Quellas treis bandieras vevan

Von entgin temps paradau,

Il davos lur dignitari

Tier la fossa cumpignau.

Uss ein ellas, sco ei para,

Tut svanidas, tresta sort!

Sch'ellas fussen fors'en bara,

Co sei iu sin pugn da mort?

Fussen teilas, scrottas, astas,

Gnanc la tocca d'anflar pli,

Lu calei sunar las tastas,

Glisnerem far cun gl'ischi.

X.Y.Z.

• •

Quei poet «X.Y.Z.» ei stau negin auter, che statalter guvernatur G. Antoni Tuor da Rabius. Sia poesia ha fatg spert la runda en nossas vischnauncas ed era survegniu sia melodia, aschia ch'ella resunava tscheu e leu en cumpignias da mats.

Gia l'auter di, ils 10 d'uost, cumpara el «Bündner Tagblatt» la medema notizia sco sura el «Freier Rhätier», denton senza la poesia. Ei vul bunamein parer, che la sura poesia eri destinada igl emprem per il Bündner Tagblatt, mo che quel hagi buca priu si ella ord certis risguards, e nus savein era strusch capir, che G. Antoni Tuor hagi alla bial'entschatta viliu publicar quella el «Freier Rhätier.»

Tschun dis sissu, ils 15 d'uost, cumpara el «Bündner Tagblatt» nr. 189 ina correspondenza cul tetel: «Die Landschaftsfahnen des oberen Oberlandes», che nus schein suandar cheu en versiun romontscha.

«La notizia en nr. 185 da lur preziau fegl concernent las veglias bandieras dalla Surselva sura, ha da basegns d'ina cuorta correctura en quei senn, ch'ei sto vegrir detg, che quelas mavien mintgamai «dal vegl bannerherr tier il niev» e buca «dal vegl mistral tier il niev». Ils mistrals havevan da far nuot cullas bandieras. Il davos bannerherr, signur Cajacob a Sumvitg, ei morts 1888, sch'jeu sbagliel buc. Sin sia sepultura ein tuttas treis bandieras vegnididas purtadas avon sia bara. Ils signurs, che han purtau quellas, vivan aunc tuts.<sup>42</sup> Pli tard ein las bandieras, dallas qualas ina fuva in regal da papa Julius II, vegnididas requiridas ord ils mauns dils vegnendsuenter da bannerherr Cajacob per miert. Il signur mistral da lezzas uras ha gariau anavos ellas persunalmein e ha retschiert ellas. Nua ch'el ha menau ed a tgi el ha surdau quellas, sto el saver.»

Casper Decurtins, al qual las treis bandieras eran stadas vegnididas surdadas e las qualas eran aunc buca returnadas, sto, sco ei para, haver resentiu la sura poesia «Las veglias bandieras dalla Cadi» ed en sia favur e per sclariment cumpara el nr. 33 dalla «Gasetta Romontscha», ils 14 d'uost 1901, suandont artechel dalla redacziun:

«Partenent la notizia purtada quels dis dallas gassetas da Cuera en poesia e prosa, che las treis bandieras veglias dalla Cadi segien idas a piarder, savein nus, sin informaziuns fatgas, dar suandont sclariment. A siu temps ha signur cusseglier naziunal dr. Decurtins giu dumandau la dertgira dalla Cadi,<sup>43</sup> da schar extrader ad el quellas bandieras ord casa digl anterius «bannerherr», nua ch'ellas vegnevan salvadas si ed eran adina zugliadas en nunveseivlamein sco schon tier il conduct funeral dil davos bannerherr signur Cajacob. Signur Decurtins vuleva, sche pusseivel, schar reparar las bandieras per mintgamai schar far parada cun quellas tiella festividat dil cumin. Denton hagi signur Decurtins, discuvrend las bandieras ord lur cuviartas, anflau las teilas da quellas en cumpleina decadenza e totalmein semigliadas e pauc auter, che la blutta festa. Da quellas treis bandieras era mo quella da papa Julius II remarcabla. Igl ei donn per quels vegls documents historics, mo il dent dil temps rui tut terrester.»

Ins havess saviu spitgar, che questa risposta, schegie buca dil tut clara e sufficienta, possi ad interim quietar empau ils spérts leventai ella Cadi e ch'ins laschi las venerablas bandieras en perpeten ruaus. Mo cheu cumpara gia ils 16 d'uost el «Bündner Tagblatt» nr. 190 ina beinmodulada poesia tudestga, che porta denton zun negin sclariment en caussa, che pren si ualti lev quels documents historics e ch'ei stagn persuna-la, cunzun alla fin. Nus schein suandar ella.

## Die Oberländer Panner

(Auf ein Poem im Freien Rhätier.)

Wo sind die Oberländer Fahnen?  
Ruft ein Poet ins Land hinaus,  
Und jagt voll Grimm die blassen Mannen  
Den lässgen Wächtern in das Haus.

Ein altes Buch aus grauen Tagen;  
Von Pannerherr zu Pannerherr  
Ging's weiter – keiner wollte fragen:  
«Wie lang noch hält das Tuch am Speer?»

Es waren trutz'ge Oberländer  
Die alten Panner alle drei;  
Sie wahrten ihre alten Ränder  
Vor der modernen Spielerei.

Drum, bester Dichter, lass das Grollen,  
Heft'an die Toten keinen Reim!  
Du kannst die «alten» nicht entrollen,  
So trag'die eig'ne Fahne heim! –  
Paulin Mondin

Nur still! Wir wussten auch zu schätzen  
Das ruhmumglänzte, alte Tuch;  
Wir sah'n die zeitzernagten Fetzen  
Mit Ehrfurcht, wie ein altes Buch;

So riss die Seide, brachen Borden,  
Es kam zu spät die Bündnermaid  
Mit neuem Garn – zu spät geworden  
War's für das Flickerwerk uns'r Zeit!

Sie sind, als trutz'ge Oberländer,  
Viel lieber ganz hinweggerafft,  
Als irgendwo auf fremdem Ständer  
Als Altertümer angegafft.

«Paulin Mondin» era negin auter che pader Maurus Carnot, si per il qual Decurtins era selamentaus, ch'el vegni attaccaus pervia dallas bandieras. Natural ha Tuor buca schau spitgar ditg sin ina risposta, suarada e murdenta, che cumpara ils 27 d'uost el «Freier Rhätier» nr. 200 en la poesia adressada

## A Paulin Mondin

Il bi num Paulin Mondin

Tiu poèm fa tarlischar;

El resun'aschi carin

Tut ch'il cor sto seluar.

Tes versichels traduir

En romontsch dovevas clar

Pertut meglier far capir,

Tgei vul dir saver schular.

Sur las caussas de cumin

Ha il dretg de s'intressar

Il burgheis ed il vischin,

Grad schi bein sco de votar.

Ei la seida tut naven,

Sto exister per tonpli

Dil historic document,

Quei che steva lundervi.

Tgi sa mai, tgei inscripziuns

E tgei datums ni maletg,

Autras aunc decoraziuns

Figuravan sco delelg?

Trucca, festa, futteral,

Per las fiastas de cumin,

Dil museum naziunal

Pos retrer, miu bien Paulin.

Il tiu fengli meina tez;

Sch'en schanuglias eis curdaus,

Petga ferm e stagn il pèz

Sur ils agens tes pucaus.

Ei il fengli ruts, scarpaus,

Sas a temps quel reparar,

Cun il tiu maletg ornaus

Per memoria relaschar.

X-Z.

• •

Cun quella poesia svanescha tutta polemica sur las bandieras ord las gasettas grischunas. Nus havein anflau nuot pli. E tonaton havessen nus spitzgau grad sin la davosa poesia ina clara, objectiva risposta, che havess dau sclariment e fatg fin ina ga per adina a tuts gests ni faults suspects. E quei era ton pli, perquei ch'ei vegn insinuau ualti clar el sisavel cuors dalla davosa poesia, ch'ins hagi vendiu las bandieras al museum naziunal a Turitg.

Igl ei vegniu detg da sias uras, che las bandieras sappien strusch esser stadas da quei temps en totala decadenza, aschiglioc havessen ins buca saviu duvrar ellas tier la sepultura dil davos bannerherr, ed il pievel havess buca saviu admirar surstaus las treis bandieras da cumin, principalmein quella amiez, in regal da papa Julius II, sco la corrispondenza dalla Gasetta Romontscha da lezzas uras plaida. Mo las astas havessen ins tonaton buca purtau entuorn?

Il medem patratg vegn era exprimius en in cuort necrolog sur bannerherr Giachen Caja-cob el «Basler Volksblatt» nua ch'ei stat secret: «...Die drei Banner des Hochgerichtes begleiteten den Sarg. Vorzüglich war die Aufmerksamkeit der zahlreichen Leidtragenden auf die altehrwürdige Fahne gerichtet, welche Papst Julius II. den tapferen Männern des Hochgerichtes Disentis als dankbares Andenken ihrer Waffentaten in der Poebene

schenkte; hatte man doch die alten Banner, welche die Väter in die ruhmreichen Schlachten begleitet, schon lange nicht mehr gesehen und der jungen Generation ist der Titel eines Pannerherrn ebenso fremd wie die ihnen anvertraute Fahne.»<sup>44</sup> – Fetg probabel ha Casper Decurtins sez giu scret quella correspondenza.

Plinavon eis ei vegniu detg, che las bandieras dalla Lumnezia seigien dalla medema vegliadetgna, silmeins quella da Julius II, e ch'ins hagi paradau cun quellas biars onns sin la tschentada dil cumin, entochen ch'ins ha deponiu quellas 1889 el museum retic a Cuera, nua ch'ellas sesanflan aunc ozildi. Savessen las bandieras dalla Cadi buc esser ellas medemas cundiziuns, schegie empau ruttas ed en franzlas?

E sch'ei era da far nuot culla projectada reparatura, pertgei buca turnentar immediat las bandieras els mauns ufficials dil cumin? – E sche tons fauls suspects cursavan vi e neu, pertgei buca confunder quels e dar ina gada ina clara declaranza sur il passau, dall'entschatta entochen la fin, cun signar siu agen num?

• •

Aunc ozildi curseschan da tuttas sorts ideas sur la sort dallas bandieras dalla Cadi. La damonda tuorna adina: Ein quellas idas veramein en totala decadenza, ni sesanflan quelas aunc enzanua en in encarden, en ni ord la Cadi? – Vulend perseguitar quella damonda objectivamein, schi lunsch sco mo pusseivel, per arrivar tier in resultat positiv, havein nus tschercau e dumandau suenter tscheu e leu, mo senza negin success.

El museum naziunal a Turitg sesanflan differentas bandieras ord la Cadi, da Cumpadials, Rabius, Schlans, Sedrun, Sumvitg, Trun e buca meins che tschun mo ord la Val Medel, denter quellas ina da mistral Giachen Pally 1853, denton, ton sco nus havein pudiu eruir, tut mo bandieras (fenglis) da cumpignias da mats ord il 19avel tschentaner, stadas cumpradas dad in cert G. Cathieni-Pagasu da Blizuna 1892 e dad Alfons Meyer da Turitg 1900. Els museums historics da Bern e Basel sesanflan neginas bandieras dalla Cadi, sco ils directurs da quels museums han giu la buontad da comunicar a nus.

Nus bandunein quella «delicata domonda» cun la speranza da haver stridau negin, essend stai sespruai da relatar objectivamein sulettamein il curriu e passau e surschein a scadin da trer sia atgna conclusiun.

• •

Denton, sche las bandieras cun astas e tut, ein era stulidas, silmeins existan aunc duas veglias chistas da lenn da biabein treis meters lunghezia, enten las qualas las bandieras vegnevan conservadas pli baul. L'ina a Bubretsch, veglia e massiva en fuorma d'in begl da frina, ch'ils bannerherrs Contrins e Pally han senza dubi aunc duvrau; l'autra a Breil, pli bufatga e da serrar cun treis mischlos. A Sumvitg vegnevan las bandieras conservadas en futterals da teila ni scharada.

• •

Nus havein era encuretg da metter ensemen la giesta dils bannerherrs da nies cumin, mo il material ord il 15 e 16 avel tschentaner ei staus stagn scarts per saver dar quella completa. Sco ei vul parer vegnevan ils bannerherrs midai ualti savens all'entschatta e lur uffeci cuzzava buca veta duronta. Dasperas astgan ins buca prender adina ils differents nums: signifer, vexillifer, vexillarius, fendri el senn da bannerherr, bannermeister. Ultra da quei ha in u l'auter cumpatriot surviu beinenqualga sut cruna sco «fendri», ni schiglioc conquistau sin ina moda u l'autra ina bandiera, purtau quella a casa ed ei vegnius titulaus silsuenter «fendri» e tonaton mai staus bannerherr dalla Cadi.

Aschia legin nus per exempl, ch'in cert Giachen Cumenill da Mustér hagi (ca. 1650) surviu en Frontscha sco «Wachtmeister, hernach Hauptmann, hat viel gelt gewunen, ist nacher haus komen, und ein kriegsfanen von weissen und blauen seiden und ein standarde mitgebracht.»<sup>45</sup>

Pli tard, nua che mintga cuort haveva sia atgna bandiera, vegneva naturalmein era mo in titulaus bannerherr, numnadamein quel, ch'era eligius sco tal dil cumin, ferton ch'ils auters senumnavan «fendris.»

Malgrad tuttas quellas difficultads schein nus tonaton suandar differents nums, che nus havein anflau sco bannerherr, denton senza saver dar en exactamein, co els suondan in sin l'auter, cura ni con ditg els ein stai en uffeci. Pér cun Giachen de Balliel savein nus dar la giesta exacta.

|             |   |
|-------------|---|
|             | Hugo Lombris, Trun  |
| 1499        | Martin Berchter, Tujetsch, mistral 1499   |
|             | Hygli, Trun   |
| 1517        | Padrut Jannet, Trun   |
|             | Giachen Wolff, Trun, mistral 1561, 1562, 1566   |
|             | Gudegn Maissen, Trun  |
|             | Nicolaus Genal, Sumvitg, mistral 1573; 1585, 1586.  |
|             | Christian de Castelberg, Mustér, mistral 1609, 1610; landrehter 1612.   |
|             | Sialm Soliva, Trun. †1667.  |
|             | Gion Duri Soliva, Tujetsch. Mistral 1632, 1633; podestat; maridaus cun Agatha im Hoff (= Decurtins).  |
|             | Nicolaus Lombriser, Trun, †1676.  |
| 1621        | Plaisch Genal, Sumvitg, mistral 1623, 1624, 1625.   |
| 1623 – 1643 | Giachen de Balliel, Mustér (oriunds da Tujetsch). Maridaus cun Julscha de Tuor, Dardin. Staus scarvon dalla ligia; mistral 1626, 1627; 1638, 1639; 1642; landrehter 1630; podestat a Teglio, nua ch'el ei morts ils 2 da fevrer 1645 e satraus leu en baselgia. Era sia dunna ei morta e satrada leu en baselgia, nua ch'in monument cun l'arma dad omisdus duei exister. |

- 1643–1649 Giachen d'Arpagaus, Sumvitg, fegl da mistral  
 Giachen d'Arpagaus. Maridaus cun Anna Berchter da Mustér;  
 habitava il casti Castliun sur Sumvitg.
- 1649–1686 Barclamiu de Balliel, Mustér, fegl da landrehter Giachen de Balliel.  
 Maridaus cun Catrina de Caprez da Trun. Mistral 1654, 1655; ha finiu ora  
 la podestateria da siu bab a Teglio. †14 da schaner 1686.
- 1686–1694 Giachen de Caprez, Trun, nevs da Barclamiu de Balliel. Eligius  
 Gliendisdis Tschuncheismas. «Jedem man bz. 4.»
- 1694–1733 Duitg de Caprez, Trun, fegl dil sura, daventaus bannerherr da 16 onns.  
 «Jedem man bz. 3.» Maridaus cun Catrina Lombriser. † 4 avrel 1733.
- 1733–1768 Giosch de Contrin, Surrein-Sumvitg, fegl da statalter Mathias. Eligius  
 Gliendisdis Tschuncheismas, ils 25 da matg. «Jedem man halben Gulden.»  
 Maridaus cun Anna Maria Rigiet da Cumpadials. †1. d'avrel 1768.
- 1768–1799 Antieni Maria de Contrin, Surrein-Sumvitg, fegl dil sura. Principal confun-  
 datur dalla pleiv da Surrein-Sumvitg, eregida leu ils 19 da mars 1786;  
 maridaus cun Maria Barla de Sax da Mustér-Segnas. †15 da schaner 1799.
- 1799–1812 Gion Rest Modest de Pally, Surrein-Sumvitg, schiender dil sura cun  
 maridar Anna Maria de Contrin. Mistral 1788, 1789; pliras periodas  
 deputau sil Cussegl grond. † a Mustér ils 29 da matg 1812 e satraus leu  
 en baselgia da Nossadunna.<sup>46</sup>
- 1812–1841 Duitg Baletta, Breil, litinent en survetsch franzos; staus cumandant dils  
 «catschadurs» tier l'invasiun dils Franzos 1799; deportaus silsuenter cun  
 auters ad Aarburg-Belfort-Salins. Major dil cantun. El ha scret in inte-  
 rescant «Diari» u «Cudisch da sia veta» en romontsch, dil qual professer  
 G. C. Muoth ha publicau in excerpt ellas «Annalas» da 1892 e 93. Staus  
 maridaus cun Francisca Gremion da Friburg. † 24 da schaner 1841.
- 1841–1854 Giachen Gelli Cajacob, Sumvitg. Maridaus ils 18 da november 1829 cun  
 Anna Maria Cajacob. †12 da fenadur 1888.

• •

Tenor in conclus dil magistrat da cumin dils 18 da mars 1841, approbaus dallas visch-  
 nauncas, er'ei, aschinavon che mintga vischnaunca astgava leger ora ussa mo dus geraus  
 da cumin, ed essend che las vischnauncas levan buca schar curdar la scharscha da ban-  
 nerherr, sco ei fuva stau proponiu e scret ora silllas vischnauncas ils 28 da schaner 1837,  
 vegniu ordinau, ch'il nieveligiu bannerherr dueigi esser dacheudenvi mintgamai igl  
 emprem gerau da sia vischnaunca en fatgs da cumin; encuntercomi en fatgs da  
 vischnaunca stetti ei liber aschibein alla respectiva vischnaunca da confidar, sco era al  
 bannerherr da prender si uffecis. – Il bannerherr dueigi sigl avegnir vegnir eligius min-  
 tga sis onns e quei tier in ordinari cumin. – Il bannerherr, che vegni eligius sil proxim  
 cumin, hagi da restar en uffeci tochen Tschuncheismas 1848.<sup>47</sup>

Passond la nova constiuuziun en vigur, ein la carica da bannerherr, sco era quellas da sechelmeister, scarvon ed assistent curdadas naven per adina. Era il solemn sarament dils salters dallas sis vischnauncas avon casa cumin, l'emprema gievgia suenter esser stau cumin, en preschientscha da sia grazia monsignur avat e digl entir magistrat da cumin cun la usitada marendala communal, svaneschan cun quei temps.<sup>48</sup>

*Il vegl svanescha,  
Il niev, intrescha;  
Cul niev, che vegn en prescha,  
Il bien dils vegls unescha!*

• •

Per conclusiun da nossa laver schein nus aunc suandar il sarament, ch'il bannerherr haveva da prestar suenter sia elecziun avon il pievel, in solemn act, che regurdava el seriusamein vid la greva obligaziun da pertgirar e conservar las bandieras.

## Fuorma da dar il sarament ad il signur Banamaister

Per igl emprem. Da pia che ei ha plaschiu ad in ludeivel cumin da Vus tscharner ora per in Banamaister d'nies ludeivel cumin, sche vegnis Vus per l'emprema gada a far in sarament tier Dieus e la Sontgissima Trinitad, che Vus leies esser in fideivel a vegliont Banamaister e ton la Bandiera sco fendli e standarta adina tener enten bien segir guvern nua che ni laders ni mulauns possien far donn.

2. Sch'ei duess dar en enqual, che barschament ni fortinas d'aua, sche leies Vus quei tut avon tuttas outras caussas pertgirar, dustar, a schurmiar, perfin avon Vossa atgna dunna, affons ni fargliuns.

3. Vus vegnis era a far in sarament da mai vuler alzar ni dar ora ni fendli ni bandiera ni standarta senza cussegl d'in ludeivel obrigkeit u dil cumin.

4. Sche nus vessen da setrer ora encunter enqual che nies inimitg per sedefender per la patria, u per la cardientscha, sche vegnis Vus a far in sarament da fideivlamein purtar e pertgirar la bandiera adina cun tut flis, e sche Vus duesses vegnir blessai vid Vies bratsch dretg, sche dueies Vus prender sin maun seniester, a sche Vus duesses vegnir blessai vid omisdus bratschs, sche dueies Vus sedustar cun ils peis ed alla fin sturtigliar vid Vossa persuna e cun tutta forza sedustar ed ella buca bandunar, aschi ditg, aschi liung sco Vus veis flad.

5. Sche ei duess cun tutta buna speranza, ed assistenza divina buca passar sco vida-von a Vus ei mess avon, sche dueies Vus pli gleiti, che pusseivel ei, e la caschun dat, puspei la purtar anavos fideivlamein, e la tener enten bien segir guvern, ed adina sin il mender cuost, che pusseivel ei.

6. A tut quei che ei cheu a Vus teniu avon vegnis Vus fideivlamein ad observar e bein considerar e buca schar ni per schenghetgs ni per «gaabs» ni per aur ni argien, ni per negina caussa che pudess Vus disviar giu dil Vies engirau sarament.

7. Finalmein vegnis Vus prender la bandiera giu dil Vies maun dretg sin il seniester, e tener si 3 dets dil Vies maun dretg sut tschiel aviert, a scheis a mi suenter quests plaids: Tut quei che Vus a mi veis teniu a mi avon cun ils plaids, vi jeu vegnir suenter cun ils fatgs cun la grazia da Diu a buna fei; aschi pilver mi gidi Dieus e la Sontgissima Trinitad. Amen.

• •

#### **Remaras:**

<sup>1</sup> Aunc in auter monument d'in laic sesanfla ella baselgia claustralra oragiuDEM dil maun dils umens. Fagend mistral e cumissari Gion Gieri Travers d'Ortenstein in pelegrinadi a Mustér eis el morts e satraus leu ils 16 da fenadur 1742.

<sup>2</sup> Pli tard era igl ureden da marschar ell'uira il suandont: Il mistral regent cumandava la truppa. Ordavon mava il picher, lu suandava il tambur, silsuunter il mistral cun ils cussegliers; enamiez sepustava il bannerherr. Ils da Medel e Breil van ordavon, lu suondan ils da Trun e Sumvitg, ils da Tujetsch ed il davos ils da Mustér. Mintga cuort haveva da furnir il medem diember umens.

<sup>3</sup> Denter igl oberkeit sesa il bannerherr suenter ils landrehters e mistrals. Decrets e statuts dil cumin dalla Cadi, revedi 1821.

<sup>4</sup> Ins distingueva era denter magistrat pign e magistrat grond. Il magistrat pign, 17 commembers, giudicava en tuttas caussas civilas; il magistrat grond, 40 commembers (tier ils 17 aunc ils cussegliers da mintga cuort) giudicava en caussas criminalas. v. Calender romontsch dalla claustra 1771.

<sup>5</sup> Ch'ins radunescha aunc adina ils vischins da Mustér sut «gliendas» per far giu las fatschentas communalas, deriva senza dubi aunc da quei usit,

<sup>6</sup> Br. 215.

<sup>7</sup> Descriptio Communitatis Desertinensis da pader Maurus Venzin.

<sup>8</sup> Schmid's Copialbuch 287.

<sup>9</sup> Igl assistant vegneva buca saramentaus sin cumin, mobein ella stiva da dertgira avon il ludeivel oberkeit. Mira protocol da cumin dils 29 da matg 1822. Denton ei quei buca vegniu observau adina.

<sup>10</sup> Synopsis, ad annum 1666. – Gia 1595 havevan avat Giachen Bundi ensemens cun il magistrat e cumin giu dismess l'isonza da comprar ni vender ils uffecis publics. Quels che prendevan si uffecis, stuevan engirav avon da buca haver fatg quei, ni sez ni entras auters. (Synopsis).

<sup>11</sup> Schmid's Copialbuch 265. – «1676, den 5. und 6. Juny ist er (Podestat Joan Berchter) mit dem neu erwölten Landt Aman Caspar de Turre geen Medels und Tavetsch gangen die bäzen der Landt Amanschaft zu helfen ausstheilen.» Br. 86.

<sup>12</sup> Stau ordinau ils 26 da november 1803.

<sup>13</sup> Gia dil temps dalla «Mediaziun» fuv'e vegniu scumandau entras lescha da pagar per uffecis publics.

<sup>14</sup> Schmid's Copialbuch 253.

<sup>15</sup> Che nos bannerherrs seigien stai bannerherr dalla Ligia Grischa, sco Alfons Tuor pretendea en siu drama: «Ils Franzos a Sumvitg» pag. 66, san ins strusch dir, e quei gia per raschun, ch'els vegnevan eligi mo dil cumin.

<sup>16</sup> «1499 Martin Berchter Aman zu Disentis. Martin Pannenmeister p. 2 fol. 868». Br. 213. – «1499 War Martinus Berchter Landt Aman dess Gotteshauss und der Gemeindt, war hauptman der die companei unserss Gemeindt gen Münster zu dem Etschischen krieg gefürt und darvon ein grosses lob, und ruohm getragen». Br. 247.

<sup>17</sup> Br. 116.

<sup>18</sup> «1633, als der General Hornig des königs in schweden Constanze belagert hatte, haben die Pündner auf den steckh hinabziehen müssen, als haupt Mann die soldaten der gemeindt Disentis hinabgeführt Landt Aman Jacob Berchter. (?) Pannerherr ware zur selbigen zeit H. Landrichter Jacob Balliel». Br. 108

<sup>19</sup> Br. 107.

<sup>20</sup> Tenor «Decrets e statutas dil ludeivel cumin dalla Cadi», revedi 1821, haveva il bannerherr aunc in auter uffeci. En nr. 3 da quellas statutas vegn ei ordinau: De tuttas scartiras ent'il Archiv dei vegnir fatg in manedel inventari, ed alla fin da scadin bienni per dertgiras da Tschuncheismas deigi il signur bannerherri en uffeci examinar il Archiv e mirar, ch'el seigi en bien uorden.»

<sup>21</sup> 1663, ils 16 da fevrer, ha Barclamu de Balliel vendiu la Salaplauna-sut alla claustra e cun quella caschun turnau a comprar anavos sia casa veglia el vitg cun iert, curtin e nuegl, ch'ei havevan giu vendiu 1658 ad avat Adalbert II. – La casa a Salaplauna-sut steva fetg probabel da maun sura dil ba-ghetg. Aunc pli baul udevan Salaplauna-sut, Turatscha e Sarz a landrehter Duri Berchter. Br. 173.

<sup>22</sup> Br. 120. Gemeindt=Cumin.

<sup>23</sup> Br. 120.

<sup>24</sup> Protocol da cumin dalla Cadi II.

<sup>25</sup> Protocol da cumin dalla Cadi I.

<sup>26</sup> Protocol da cumin dalla Cadi I.

<sup>27</sup> Suenter il barschament dalla casa cumin 1799, ils 6 da matg, ha il magistrat dil cumin teniu per engin temps sias radunonzas el casti de Castelberg a Caschliun, ch'ei barschaus giu per la gronda part ils 2 d'avrel 1830. Ord sias ruinas ei cul temps il present hotel Disentiserhof sesalzaus.

<sup>28</sup> Protocol da cumin dalla Cadi I. – Remarcabel! Sin quei cumin ein era quels vegni tgisai e denunziai, ils quals seigien suspectus per la patria u per la partida franzosa. Numnadamein: Marschal Caprez, colonel Caprez, capitani Lombrisier, statalter Laus Lombrisier, colonel Castelberg, litinent Nay e Genart Balletta. «In ludeivel cumin ha decretau entras ina brev ils numbs da quels alla regenza interinala per sura da quels schar decider quei ch'ei anflien per gest.» – Nuota da sesmarvegliar sur las deportaziuns d'ina e dall'autra vart! Ed il poet landrehter Theodor de Castelberg, ha tutta raschun, sch'el entscheiva plein gretta sia canzun ella perschunia:

O, sch'jeu vess curenta plema,  
Per saver descriver bein,  
Fuss è pratics silla rema,  
Fa less jeu maletg cumplein;  
Co ei han cavau la fossa  
A tuts senza cu culpa nossa,  
Co nus essan stai menai  
E pertut persequitai  
Dad enzacons malenclinai.  
.....

<sup>29</sup> Protocol da cumin dalla Cadi II.

<sup>30</sup> Gion Antoni Frisch da Zignau.

<sup>31</sup> Tier quell'elecziun ha avat Anselm Huonder giu fatg diever dil vegl dretg claustral ed era giu votau en num da ses claustrals (30 vuschs). Pér suenter eis el vegnius tgisaus tier la nunziatura, avon la quala el ha obteniu cumpleina raschun. Pader Augustin Schuler «Veta ed operar dils Avats da Mustér,» pag. 292.

<sup>32</sup> Protocol da cumin dalla Cadi II.

<sup>33</sup> Mira: Nova Gasetta Romonscha, Surrein-Sumvitg 1841 nr. 23.

<sup>34</sup> L'enconuschenta, viseta dils purs sut commando da barun Heinric de Salis-Zezras al radunau Cussegl grond a Cuera ha giu liug ils 4 da schaner 1814.

<sup>35</sup> Nova Gasetta Romonscha. Surrhein-Sumvitg 1841 Nr. 23.

<sup>36</sup> Protocol da cumin Nr. 8.

<sup>37</sup> Gasetta Romontscha 1888 nr. 29

<sup>38</sup> Daventau ils 24 da fenadur 1512.

<sup>39</sup> pag. 15.

<sup>40</sup> Las bandieras dil cumin san strusch esser stadas duvradas 1799. Negliu vegn ei fatg menziun da quel-las els rapports d'uiara; dasperas ha la Cadi giu negin bannerherr ufficial dils 15 da schaner entochen ils 11 d'uest 1799.

<sup>41</sup> Ferton ch'il purtret da bannerherr Pally, ch'appartegn alla famiglia Schmid a Bubretsch, dil qual nus havein dau il maletg en nossa lavur, ei digl onn 1807, exista aunc in auter purtret da 1803, seman-

tenius fetg bein, en casa da famiglia cusseglier naziunal Steinhauser a Sagogn, nua che las colurs dalla bandiera paran dad esser cotschna e verda.

<sup>42</sup> Las treis bandieras han giu purtau: Dr. Placi Berther, Mustér †1903; statalter guvernativ Gion Antoni Tuor, Rabius †1904 e dr. Casper Decurtins, Trun †1916.

<sup>43</sup> Nus havein vuliu controllar quella decisiun el protocol da cumin, mo nus havein anflau nuot da quel-las varts. – Cun quella caschun eis ei curdau si a nus, ch'igl ei vegniu menau negin protocol da cumin plirs onns ora, ni silmeins buca scret en, ch'ei zun deplorabel.

<sup>44</sup> Basler Volksblatt 1888 nr. 86.

<sup>45</sup> Br. 205. – «Fendri Conrad Giacumet»vegn avon a Sumvitg en in document dils 6 d'avrel 1661. Mira: Archiv Mappa A. – «Fendrich Plaisch de Turre Dardin». Br. 445.

<sup>46</sup> Bannerherr de Pally ei natvis da Sumvitg, naschius leu ils 27 da matg 1769; ses geniturs senumnavan Andriu Giusep e Maria Ursula Valder, maridai ils 25 d'october 1763, pia buca da Medel, sco dr. J. Robbi pretenda en siu opus: «Ils deputai dalla Cadi el Cussegl grond da 1803–1917». Ina lavour che cuntregn differentas semigliontas errurs.

<sup>47</sup> Archiv da Sumvitg, Mappa B. Nr. 68, 70, 71. – Protocol da cumin dalla Cadi dils 8 da matg 1837 e dils 18 da fevrer 1846. –

<sup>48</sup> Sil cumin extraordinari dils 24 d'uost 1802 ei stau ordinau dil Cussegl da cumin, ch'ils salters duei-gien vegnir saramentai (per quella gada) dils geraus mintgin en sia vischnaunca. – Culs 26 da matg 1814 vegnan ils salters eligi mintgamai per dus onns ed era saramentai mo mintg'auter onn. Mira: Protocol da cumin.

<sup>49</sup> Tenor regulativ dils 30 da matg 1686: «Ei enconuschiu, ch'il Bannaherr duei retscheiver il sarament en schanuglias sin ina suppia cun tener si 3 dets el maun seniester e cul maun dretg tegn el il ban-ner.»

# Avon onns

Dis commemorativs ord la historia dalla Cadi

Mintga cuntrada, gie ins sa dir mintga vallada e vischnaunca, ha sper sias usitadas fia-  
stas ecclesiasticas, aunc ses specials dis, che regordan vid in u l'auter eveniment histo-  
ric dil liug. Plirs da quels dis commemorativs ein svani cul temps en nossas vischnaun-  
cas, auters ein semanteni en pia ed effectiva memoria, cunzun quels, als quals ins ha  
dau in caracter religius, ils quals ins ha uniu cun l'orazion dalla baselgia.

Quels dis commemorativs regordan ils pli biars vid trests eveniments, vid pestilenza,  
auas grondas, bovas e lavinas, uiaras e barschamenti. Els dattan in agen colorit al liug,  
els recloman pietad ed engrazievladad encunter ils per davons; els leventan il senn  
historic per nossas atgnas caussas ed implanteschan quei spért vi sin ina nova genera-  
ziun. Ultra da quei vegn ei fatg sin tals dis per ordinari bia dil bien per las olmas dils  
disgraziai; ei vegn rugau, che Niessegner vegli pertgirar graziusamein da talas disgra-  
zias e miserias, pertgei quei ch'ei stau, sa puspei turnar.

Mintga vischnaunca duess perquei mantener e celebrar tals dis, sch'ella ha aunc tals,  
cun tutta pietad e premura; ei spargnass era d'encurir e celebrar novas fiastas. Ins duess  
conservar en pietusa memoria loghens, monuments, ed isonzas, che regordan vid tals  
dis, era sch'ei fuss mo ina pintga crusch lenn leuora sin in crest. Igl ei in toc historia  
dalla cuntrada.

• •

Sche nus schein suandar cheu entgins, cuortas notizias sur da tals dis commemorativs  
ella Cadi, en particular sur Mustér, sche daventa quei, – nuslein dir quei alla bial'ent-  
schatta – per leventar puspei inagada il senn historic per nossas atgnas caussas, per  
stimular in u l'auter giuven scribent da nossas vischnauncas da rimnar tuttas notizias  
sur tals e semeglionts eveniments en sia vischnaunca.

Ei dat da questas varts zun bia ed interessant material els divers protocols da pleivs e  
vischnauncas, en vegls anniversaris ed urbaris, en agendas, diaris e cronicas da fami-  
glia. Dasperas ha mintga vischnaunca sia tradiziun, che glieud veglia raquenta aschi  
bugen cun pietad e viv sentiment. – Avon entgins meins havein nus supplicau in  
venerabel veteran per entgins notizias sur d'in fatg historic da sia vischnaunca ed en paucs  
dis havein nus retschiert ina liunga e detagliada risposta, ch'entscheiva cun ils suan-  
dants bials plaids: «Bugen tarmettel cheu ad Els il giavischau. Ins anfla schi darar enza-  
tgi, che ha interess vid quellas caussas historicas, ch'ei fa in grond bein, cura ch'ins sa  
puspei inaga seconversar gindlunder...»

Nus essan dalla perschusaiun, ch'ei dess strusch enzatgei pli plascheivel e meriteivel per  
in scribent, che da publicar quellas notizias, u en fuorma da historia ni cronica, savend  
che nies pievel romontsch legia strusch enzatgei pli bugen, che la historia da sia atgna  
patria. E cheu ha era la pli cuorta notizia sia valeta, siu interess. Denton essan nus  
dall'opiniun, che mo in nativ dalla vischnaunca sappi scriver e descriver quei cun la

dueivla pietad ed exactedad. La horribla catastrofa dils 25 da settember 1927 gest en nossa Cadi, ha regurdau nus puspei cun commuent sentiment vid quels trests eveniments d'avon onns, vid las miseras, ch'era nos perdavons han stiu far atras ed ha menau la plema tier suandontas notizias.

• •

**Breil** celebrescha mintgamai ils 16 d'uost, s. Roc, il di suenter la gronda fiasta da Nossadunna cun particulara pietad in solemn anniversari per tut quels, ch'ein morts en vischnaunca (circa 130 personas) dalla muria igl onn 1631. Già igl onn 1566 haveva la pestilenzia visitau quella vischnaunca e raffau naven 180 personas e 1595, entuorn la fiasta da s. Onna, sis personas ella casa dad in cert Placi Balun, ferton che las otras casas ein stadas preservadas quei onn dalla pestilenzia. Da vegl enneu vegn s. Roc, sper s. Bistgaun veneraus sco particular patrun encounter pestilenzia e malsognas contagiusas, e nus anflein tscheu e leu capluttas eregidias en sia honour per urbir ora sia protecziun. Per tala raschun conta era ina veglia canzun:

*Sogn Roc vegn quel numnaus.*

*Zun fetg pertut ludaus;*

*In grond sogn tuttavia,*

*Ch'ei schon dals perdavons*

*Prius si avon biars onns*

*En il temps da muria.*



Breil

**Trun** cun ils uclauns vischinonts, senza Zignau, fa la secunda dumengia d'october ina processiun suenter la Ferrera si per implorar da Diu la grazia, ch'el preserveschi il vitg da bovas e lavinas. In grond tschancun sur il vitg si sesanfla ina crusch. Sper quella vegn ei dau la benedicziun e satrau el tratsch ina caussa benedida, palma u cotgel. Plinavon ha la pleiv da Trun «firau liber» ils 25 da schaner, Conversiun da s. Paul, nua ch'ei vegn celebrau la sontga messa, fundada per urbir ora agid encounter lavinas.

• •

La raschun dalla davosa devoziun dat il vegl anniversari dalla pleiv da Trun, nua ch'ei stat scret il suandont:

«Per la Conversiun da s. Paul, ils 25 da schaner 1459 ein sur il vitg Trun duas lavinas da freid ruttas ora il medem temps e sestuschadas ensem en Val da Punteglias, han sdernau bia uaul e plirs baghetgs ed ein sederschidas sil vitg odem, ferton ch'ina part dils habitants sesanflavan gest en baselgia tiel survetsch divin. (Ei fuva la mesjamna suenter la dumengia «Septuagesima».) Ellas han cuvretg en in diember baghetgs cun lur habitants. Siat casas e siat baghetgs «mit grundt und gradt und stuben» ein vegni devastai e nov persunas han piars la veta. – Hans Prug, da quei temps plevon a Trun (pli tard avat Joannes VII Brugger a Mustér 1497–1512), ugaus ed igl entir pievel han concludiu da far scriver quei per perpetna memoria egl anniversari. E sinaquei che scadin tegni quei en buna memoria dueigi il plevon publicar quei giud scantschala mintg'onn la dumengia avon il di dalla Conversiun da s. Paul e supplicar instantamein da rugar per las olmas. Ed igl ei vegni priu si da far firau per bonn (bim bann) quei di».

Cun las sura devoziuns a Trun stat forsa era en connexiun la notizia, che sesanfla el vegl anniversari dalla pleiv da Tujetsch, la quala sur Sebastian de Castelberg, da lezzas uras plevon a Sedrun, pli tard avat da Mustér 1614–1634, ha nudau si sco suonda: «La vigelia da s. Gion Battesta (23 da zercladur) 1610, ei in cuolm ruts ora (erupit quidam mons) cun stermentusa vehemenza, che ha menau giudora cun terribel fraccass carpuna, auas e bovas, aschia che pliras casas e curtgins dil vitg da Trun ein vegni devastai, ch'ins gnanc encorscha pli il fastigt da lur liug».

Igl onn 1723 ha ina gronda lavina devastau per part la baselgia da Nossadunna dalla Glisch senza stizzar la «glisch perpetna».

A **Zignau** sur il vitg, dado la Zavragia, leu nua che la bova pugna ord la val, stat ina crusch, tier la quala ils habitants da Zignau fan ina processiun la dumengia da benedicziun baselgia (davosa dumengia d'uost) per urbir ora protecziun divina encunter la bova. – Dapi la bova da 1883, sche nus sbaglein buc, van ils da Zignau per contonscher protecziun encunter la bova mintga dumengia suenter cargar entochen scargar dad alp avon messa cun processiun vi s. Giusep a Darvella. – Malgrad la horrenta catastrofa dils 25 da settember 1927 han a Zignau tonaton ni glieud ni s. h. tiers piars la veta.

• •

La dumengia suenter s. Placi ha **Sumvitg**, dedicaziun baselgia e l'auter di vegn celebrau leu igl aschinumnau «Caudonn s. Onna» en memoria da quellas 450 persunas, ch'ein mortas leu en vischerna iga onn dalla muria gronda 1585.

La pleiv da Sumvitg ha giu piars quei onn circa la tiarza part da sia populaziun e la dolur e consternaziun ei stada gronda. E quella impressiun ei semantenida en memoria tiel pievel tochen sin il di dad oz. Il «Caudonn s. Onna» vegn celebraus quasi sco il di dal-las olmas e fa gronda impressiun.



Sumvitg

Suenter viaspras da perdanonza vegn ei cantau viaspras da morts e silsuenter fatg treis ga processiun entuorn baselgia. L'auter di vegn recitau in nocturn cun Laudes digl uffeci da morts, fatg messa solemlna da bara e lu puspei treisga cun processiun entuorn baselgia. Ei vegn priu si in'unfrenda ed il reverendissim plevon ha da far dudisch mes-sas per quellas olmas. Il riug, che vegn fatgs quei di, ei adina il medem ed ei perpetni-saus sillia cuviarta lenn dil ritual vegl e secloma sco suonda:

«Per accumpignar ils presents divins uffecis cun ton pli gronda devoziun e meret vegn ina devoziusa rimmada supplicada da dir devoziusamein tschun paternos ed Ave Marias enten honur dallas tschun sontgas plagas da Cristus, nies Salvador, dall'Immaculata semper purschala Maria, da s. Gion Battesta, dils glorijs apostels s. Pieder e s. Paul, s. Leci, s. Flurin, s. Mudest, s. Antoni, s. Bistgaun, s. Placi, s. Francesc, s. Barla e s. Cata-rina sco era da tuts auters sogns e sontgas, che vegnan particularmein veneradas en quest sogn tempel, sinaquei ch'il Tutpuscent Diu vegli a tutta questa ludeivla vischnaunca misericurdeivlamein conceder tuttas grazias spiritualas e temporalas per il beinstar da quella. Entras las presentas oraziuns e divins uffecislein nus seregurdar dallas olmas dil purgatieri, particularmein da quellas, las qualas ein passadas da questa veta igl onn dalla muria gronda 1585 enten la quala ein mortas 450 persunas dalla vischnaunca da Sumvitg, sinaquei che Dieus detti a quellas entras intercessiun dils beai sogns e sontgas il perpeten ruaus, en cass ch'ellas fussen aunc en loghens da munglamments.»

«Enten queste suffragis lein nus era seregurdar da quels, ils quals han fundau quest anniversari da s. Onna: numnadamein da quels de Castiaffen, de Antonüs, Fry, Wiezeli ed auters benefacturs.»

«Dieus detti a quellas ed a tuttas fideivlas olmas dil purgatieri il perpeten raus. Amen».

• •

**Surrein-Sumvitg** ei exponius al Rein, sco era alla furiosa aua, che sa vegnir ord la Val Sumvitg e fa perquei era differentas devoziuns publicas per urbir ora da Diu protezion encuter auas devastontas.

Sur Giusep Maria Camenisch, plevon a Surrein 1832–1847, scriva viers la fin da sias notizias sur dalla malaura gronda dils 23–27 d'uost 1834: «Per engraziament e per dumandar Diu, ch'el era digl vegnent nus pertgiri, ha il vischinadi concludiu dad ir si S. Clau (Reits) da calonda matg entochen ch'ils tiers ein a casa cun processiun mintga firau e dumengia, sco era ils 27 d'uost far firau cun exponer da messa il Sontgissim».

El decuors dil temps ein las sura devoziuns semidadas e la pleiv fa ussa cul medem intent:

1. Igl 1. da matg processiun a Reits e lu suenter il Rein giu, nua ch'ei vegn fatg quater staziuns e dau la benedicziun... contra inundationes aquarum».
2. La vigelgia Nossadunna d'uost processiun a Reits tier s. Clau, nua ch'ei vegn detg in cuors rusari. Cantond la litania lauretana tuorna la processiun anavos ella baselgia parochiala, nua ch'igl ei messa.



Surrein

3. Duront la stad, respectiv duront ch'ils tiers ein sin las alps, vegn ei fatg mintg'autra dumengia avon messa processiun tier s. Clau. Dad ir ensi vegn ei cantau la litania da tut ils sogns, leusi tschun paternos, lu intonau la litania lauretana ed anavos ella pleiv.

• •

Era la vischnaunca da **Medel** ha ses dis commemorativs, che regordan ils habitants vid differentas disgrazias e catastrofas, ch'ein vegnidias da temps en temps sur la vallada.

Igl onn dalla muria gronda 1584 sin 1585, nua ch'igl ei miert mo el cummin dalla Cadi 1800–2000 persunas ha era Medel giu da purtar sias unfrendas. En memoria da quei onn, per salit da quellas olmas e per urbir ora misericordia da surengiu, vegn ei fatg onn per onn ils 15 d'uost suenter viaspras ina processiun da Platta a S. Roc.

Ils 25 da schaner «Conversiun da s. Paul», ha Medel «miez fira» ed ei vegn rugau, che Niessegner vegli pertgirar da lavinas, havend ils habitants stuiu far atras pliras disgrazias da lavina.

Anno 1777 ei il vitg Curaglia barschaus giu. Ins ha silsuenter priu si da far «miez fira» il di da s. Lucia, ils 13 da december. Ultra da quei vegn ei fatg a Curaglia mintga sonda suenter messa ina processiun entuorn baselgia, nua ch'ei vegn recitau la litania da tut ils sogns cun l'oraziun da s. Lucia, per rugar che Niessegner pertgiri il vitg da novs barschaments.

• •

A **Tujetsch** ha la muria gronda da 1584 raffau naven 800 persunas, pia quasi l'entira populaziun. Denter quellas unfrendas sesanflava era il preziau plevon sur Gion Liem. – 1637 ei la muria dallas biergnas ratt'ora, nua che 70 persunas ein mortas en cuort temps. Ei vegn raquintau, ch'ei eri da quei temps mo in sulet spiritual ell'entira Val Tujetsch e ch'il prefect dils caputschins a Lonsch, pader Jreneus, hagi sin instanza dad avat Augustin Stöcklin da Mustér, tarmess pader Amadeus de Mortara a Tujetsch per gidar ora



Curaglia



Sedrun

per plirs meins ella pastoraziun duront quei trest temps.

Fetg probabel ha Tujetsch priu si da quei temps da far mintg'onn per la vigelgia da s. Gion Battesta, ils 23 da zercladur, ina processiun a Segnas tier s. Bistgaun e s. Roc, patruncs encunter la muria. Dapi 1905 vegn quella processiun fatga en vischnaunca da Sedrun a Zarcuns, el sanctuari da Nossadunna sil medem di.

Concernend igl onn 1637, la «Muria dallas biergnas», raquenta pader Placi a Spescha, ch'in cert mistral Duri de Florin seigi era vegnius

infectaus da quella pestilenzia. Ina gronda biergna seigi semussada dad in maun sco tier auters, ch'eran morts da questa pesta. El ha tertgau tier sesez: Finiu sei tonaton, mo jeu vi tonaton aunc mirar avon tgei tissi quellas biergnas cuntegnan. In mument ch'ils da casa eran absents, ha el priu in cunti e fatg in ferm tagl ella biergna, ord la quala ei flessegiau saung encugliau, aua ed ina specia da garnetschs sco da panetscha. – Igl ei vegniu meglier cun el! Silsuenter han plirs auters applicau il medem recept ed ein era mitschai.

Arisguard la persunalitat vegn pader Placi a Spescha bein ad haver sbagliau, essend che Duri de Florin ei staus mistral 1722/23 ed ei morts ils 14 da matg 1754.

Suenter las grondas lavinas a Rueras da 1749 ils 6 da fevrer, nua che 64 persunas ein vegnidias per la veta sper las sis persunas ella lavina a Zarcuns, e da 1817 ils 6 da mars, ella quala 27 persunas ein restadas mortas, han ils vischins da Rueras giu priu si da far firau per s. Turtè, ils 6 da fevrer per diesch onns. Tier il survetsch divin vegneva ei fatg in riug, legiu il rodel dils disgraziae e tut che mava en ner.

Selva ha «miez firau» il di dalla Conversiun da s. Paul en memoria dils disgraziae entras la lavina da 1808, ils 13 da december e per urbir ora protecziun da Diu encunter il «nau-schaspert» dalla Val Ruinatsch. Pli baul vegneva sin quei di il plevon da Sedrun a perdegar a Selva e suentermiezdi vegneva ei visitau la scola.

• •

La vischnaunca da **Mustér** ei cunzun reha d'eveniments historics e celebrescha era aunc plirs dis commemorativs, ferton ch'auters ein svani cul temps.

Il di da s. Roc, ils 16 d'uost, fa la vischnaunca da Mustér ina processiun a Segnas, nua ch'ils vischins da leu han firau. Ils affons da Segnas tegnan quei di tut persuls suenter



S. Gions, Mustér

gentar ina speciala processiun cun parada ad Acletta-Cuoz. Sin lur retuorn vegn ei tuc-  
cau d'ensem a Segnas ed igl entir pievel conta viaspas solemnas, ferton ch'ils buobs  
stattan parada en baselgia.

Quella processiun dalla vischaunca aschibein, sco era quella dils affons, han senza dubi  
ina seriusa muntada e stattan fetg probabel en relaziun cun la pestilenzia da 1637. La  
cronica rauenta numnadamein, che la pestilenzia seigi all'entschatta digl onn 1637  
rutt'ora a Tujetsch e seigi serasada plau e plau tochen a Segnas, nua che 30 persunas  
seigien mortas en cuort temps. Ina pictura sin igl altar grond a Segnas regorda aunc  
ozildi vid quei trest temps.

Per urbir ora misericordia da Diu e per obtener la grazia, che la pestilenzia serasi buc ora  
pli lunsch, ei vegniu fatg oraziuns publicas ed igl avat da Mustér, da quei temps Augustin  
Stöcklin, ensemblamein cun il convent han giu fatg il vut, che vegn aunc adina obser-  
vaus fideivlamein dalla claustra, da recitar numnadamein mintga sera suenter comple  
la litania da Nossadunna cun metter vitier suandont responsori ed oraziun:

V: En scadina tribulaziun ed en nossa miseria.

R: Neu en agid, o beatissima purschala mumma Maria!

Oraziun. Nus rughein tei, o Segner, entras l'intercessiun dalla beada purschala Maria:  
defenda questa tia famiglia en humilitonza cheu avon tei da scadina adversitat e per-  
tgira graziusamein ed en buontad da pestilenzia e persecuziuns dils inimitgs. Entras  
Niessegner Jesus Cristus. Amen.

E sco ei para sto il Segner haver mirau cun plascher sin las ovas da penetenzia dil pievel ed exaudiu sias ferventas oraziuns, pertgei cun legreivel ed engrazieivel sentiment metta la cronica vitier: «Und die Plage hörte auf!» – la miseria ha giu fin.

• •

La «Conversiun da s. Paul», ils 25 da schaner, vegn ei fatg ella baselgia parochiala da s. Gions gl’entir uffeci da morts, teniu in riug, priu si in’unfrenda e rugau Niessegner, ch’el pertgiri da lavinas e protegi il s. h. muvel. Lu vegn ei cantau messa da morts, dau l’absoluziun sper la tumba e visitau il carner. Arisguard il prighel da lavina vegn ei menziunau el riug, che Niessegner vegli pertgirar Clavaniev, Peisel e Caprau.

Ils vischins da Clavaniev prendan si mintg’onn in’unfrenda casa per casa e surdattan quella il di dalla «Conversiun da s. Paul» al signur plevon per schar far bien persuenter. – Clavaniev mantegn ultra da quei sur igl uclaun si, damaneivel dalla pastira, cun special quitaui, ina crusch, numnada «la Crusch s. Paul», per urbir ora da Niessegner, ch’el pertgiri igl uclaun da bovas e lavinas, che san vegnir dalla val giu e periclitari ils habitants.

Fuss denton quella crusch empau pli gronda e buca zuppada davos in crap, anzi stess ella sin in crest, forsa da tschei maun dall’aua, che tut vesess, sche seregurdass scadin, che va cheu sindengiu dil prighel, che smanatscha cheu e fagess in pietus memento. Era fuss ei buc aschi lev pli per pigns pasturs d’intercurir, schebein las reliquias ni caussas benedidas, che sesanflan ella crusch, seigien «autenticas» ni buc.

Pertgei fa Mustér quella devoziun, dalla quala il pievel pren stedia art e part, pertgei gest sil di dalla «Conversiun da s. Paul»?

Nus havein encuretg e dumandau tscheu e leu per sclariment, denton mai anflau ni survegniu ina sufficienta risposta. Cun quei, ch’ei vegn recitau sin quei di igl uffeci da morts e teniu in «Requiem», essan nus adina stai dall’opiniun, ch’ei retracti cheu dad ina disgrazia, nua che persunas ein vegnidias per la veta e che quella disgrazia seigi succedida entuorn quei di.

Nus essan perquei dalla perschuasiun, che la sura devoziun stetti en connexiun cun il factum historic, la cronica rauenta sco suonda: «Entuorn Daniev digl onn 1459 ha ei dau ina gronda nevada ed ei ha fatg stermentus’aura d’unviern entochen il di da s. Vincenz, ils 22 da schaner, nua che l’aura ei setratga si. Cheu ei il di avon la «Conversiun da s. Paul» (ils 24 da schaner) rut ora ella Val da s. Placi ina stermentusa lavina, che ha devastau totalmein la baselgia da s. Placi, baghiada 804, sco era igl uclaun Chischliun (Hof Gastlon) leu speras, nua che 16 persunas han piars la veta.»

Il casti dalla famiglia de Castelberg steva aunc buca da quei temps a Chischliun, essend quel vegnius baghegiaus per 1571, devastaus per part 1830 tras barschament, ord las ruinas dil qual il hotel «Disentiserhof» ei sesalzaus 1877.

La devoziun sil di dalla «Conversiun da s. Paul» a Mustér sa forsa era star en relaziun cun la disgrazia, che la cronica rauenta puspei sco suonda:

«Era a Mustér ei vegniu quella sera (ils 6 da fevrer 1749, ch'ei stada aschi sgarscheivla per Rueras) allas nov, strusch in quart ura lunsch naven dalla claustra, ina stementusa lavina dalla val giu e, schegie retenida e spartida dad in terment carpun, ha ella tonaton cuvretg en dad ina vart dus baghetgs cun dus cavals, 36 armauls ed in grond diember da tiers manedels, da l'autra vart ella planira denton 4 baghetgs cun 12 armauls e biars tiers manedels ed ha ultra da quei devastau ina casa, nua che 5 persunas han piars la veta, ferton ch'in um, che schischeva sin baun-pegnia ei mitschaus dalla mort mo cheutras, che la neiv, ch'era curdada sur la pegna scaldada ualти ferm, ei lumiada e luada ora entras la calira dalla pegna.»

Concernent il terment carpun, che sesanfla pia gia avon quella disgrazia dadens la baselgia da s. Placi sper la via vedra, exista la détga, che las strias hagien ruclau quel dalla Val s. Placi giu per devastar la baselgia da s. Placi, mo essend ellas dil maun dadora in pèr dapli, hagien quellas giu il surmaun e dau enten il derscher ina stagn ferma menada anen, aschi ch'il carpun seigi ruclaus giu gest dadens la baselgia ed aschia buca pudiu tschaffar quella!


Dis ed onns ei quei carpun, ch'era suren plats e neidis sco il plantschiu d'ina stiva, staus cheu sper la via vedra, purschend suten schurmetg als vischins da Disla e Faltscharidas, sch'els vegnevan surpri sin via dad in urezi ni stemprau. Veggend il stradun baghegiaus anno 1857 han ins marclau en tocs il cumpogn e duvrau la crappa tagliada per construir la punt leu speras ed aschia ei quella gigantica figura svanida per adina.

• •

Igl onn 1808, ils 28 da mars ha la suprastanza dil cumin dalla Cadi concludiu il suandont: «Per ina memoria, schibein sco era per levgiament dallas olmas da quels, ils quals per la patria a Mustér anno 1799 han dau la veta (ha) in ludeivel Oberkeit (concludiu) da projectar entras ils signurs mess sil «Pundstag» agli ludeivel Corpus Catolicum da stabilir in document d'ina memoria, e quei cun fixar, ed ordinar in ni plirs anniversaris cheu a Mustér ord la cassa dil Corpus Catolicum ed ereger in monument perpeten. Duess il Corpus Catolicum buca vuler conceder a quei argument, ed a quei «Antrag», sche dueien ins encuir da vegrir tier la medema mira cun seconferir cun ils deputai da Sursaissa, Rueun, Lumnezia etc.

«Quei anniversari duess vegrir fatgs cun pumpa ed honur en la baselgia da Nossadunna a Mustér sin ils 12 da fenadur.» (mira protocol da cumin II.)

Delegrai dil cumin e dil «Tgierp catolic» ein seconferi e vegrni perina cun la venerabla claustra sin suandonta moda. La claustra s'oblighescha da celebrar in anniversari ils 12 da fenadur en baselgia da Nossadunna, da recitar tier quella funczun in nocturn cun Laudes digl uffeci da morts, da leger giu il rodel dils curdai, da far dir tschun paternos, da cantar la messa da requiem e da dar alla fin l'absoluziun avon la tumba. Persuenter ha la claustra retschiert 400 renschs, ils quals ella ha applicau silsuenter per schar construir in'orgla en baselgia da Nossadunna.



Rodel dils curdai 1799

Ina harta cun ils numis dils curdai dils 6 cumins: Cadi 118, Lumnezia 45, Foppa 7, Sur-saissa tudestga 5, Rueun 16 e Plaun 4, en tut 195 persunas, vegneva salvada si pli daditg sper igl altar dalla mumma dalla misericordia.

Avat Anselm Huonder (1804–1826), che ha giu eregiu ella baselgia da Nossadunna 1805 la confraternitad dalla mumma dalla misericordia, ha era engrondiu e restaurau quei sanctuari 1814. Il «Tgierp catolic», che ha giu fundau quei solemn caudonn en suffragi dils curdai ell'uiara dils Franzos 1799, haveva giu pli tard il plan da schar ornar il plafon della baselgia da Nossadunna cun maletgs ord l'uiara franzosa, ch'ei denton mai daventau.

Pli baul assisteva in grond pievel a quei anniversari – «praesente multo populo» – di il cronist, ferton che dapi entgins onns strusch ch'enzagti dil pievel pren part pli da quella pietusa e dueivla funcziun.

• •

In auter di commemorativ, ch'ei ussa denton totalmein svanius ed emblidaus, celebrava Mustér pli baul mintgamai ils 6 da matg en memoria dil sgarscheivel di, nua che Mustér ei daventaus ensemblamein cun la claustra l'unfrenda dil barschament entras ils Franzos. La cronica rauenta il decuors dalla pietusa devoziun da quei di sco suonda: «La damaun allas 7 serimna il pievel ella baselgia parochiala a S. Gions, nua ch'ei vegn fatg ina messa bassa. Silsuenter serenda il pievel en processiun cun las statuas da s. Gion evangelist e da s. Gion Battesta en baselgia da Nossadunna, nua ch'ei vegn legiu ina s. messa, duront la quala ils reverendissims padres reciteschan in nocturn cun Laudes digl uffeci da morts. Finiu quei, s'uneschan ils claustrals cun il pievel ed ins serenda en

baselgia claustral, nua ch'ei vegn puspei fatg ina messa bassa. Ei quella finida, sche vegn ei intonau la litania da tut ils sogns e cun las reliquias dils sogns patrunz s. Placi e s. Sigisbert, sco era cun il tgierp da s. Basilei, en uniu cun las duas sontgadads dalla parochiala, serenda il pievel en processiun ella baselgia da s. Placi. Leu vegn ei fatg in riug dil reverendissim plevon, nua ch'ei vegn explicau igl intent da quella devoziun. Silsuenter vegn ei celebrau ina sontga messa, duront la quala il pievel recitescha il sogn rusari. Entschavend la canzun dils s. patrunz: «Avete Patres patriae», sin la quala la litania lauretana suonda, tuornan ins puspei en baselgia claustral, nua ch'ei vegn cantau messa solemna. Finida quella, retuorna il pievel en processiun a S. Gions.»

«Suenter gentar vegn ei tuccau d'ensemella baselgia parochiala. Havend cantau viaspraz leu, vegn ei fatg silsuenter processiun quasi en mintga liug, nua ch'ils Franzos han dau fiug ed arsentau, numnadamein ella baselgia dall'Immaculata ad Acletta, tier s. Giachen a Cuoz ed a S. Gada. Finiu las oraziuns en quels loghens, tuornan ins puspei ella baselgia parochiala.»

La cronica, scretta per latin, metta aunc vitier per conclusiun: «Vegli Niessegner pertigirar nos vegnentsuenter da tals castitgs dil fiug e dall'uiara, sinaquei ch'els possien culla grazia da Diu semussar cun ina pietusa veta vengonz dalla misericordia da Diu.» Ton sco nus havein pudiu eruir, han ins entschiet a celebrar quei di commemorativ igl onn 1808. En ina «Agenda» dalla baselgia da s. Gions cul tetel: «Calendario» di quel, «che si deve praticare in chiesa, ed annunciare al populo ogni Domenica», ch'ils reverendissims paders caputschins, che pastoravan da lezzas uras la pleiv da Mustér han giu mess ensem 1806 suenter il barschament, ei vegniu secret pli tard denter las lingias sils 6 da matg: «firau prius si onn 1807». Scadin cass ei quei «firau» vegnius prius si entras conclus dalla vischnaunca, mo essend ch'ils protocols da lezza ein vegni purtai en regularmein pér cun 1820, sche anflan ins perquei leu nuot da quellas varts.

Denton vul ei parer, che quei «firau» seigi buca vegnius observaus biars onns a Mustér. Glieud veglia sa buca seregurdar da tal, ni dad haver udiu enzatgei sur da quel da lur perdavons. Forsa ch'ins ha giu priu si quei «firau» mo per enzacons onns, sco quei daventava era en outras vischnauncas suenter ina gronda disgrazia generala, ni ch'ins ei secuntentaus silsuenter cun igl anniversari dils 12 da fenadur, sogn «Placi pign», en baselgia da Nossadunna, ch'ei fundaus quasi il medem temps dil «Tgierp catolic». Dil reminent era quei «firau» unius cun stagn biaras e stentusas unfrendas en in di, che han forsa fatg vegnir era pli spert staunchels.

• • •

Dil rest possedein nus ina zun muentonta canzun da landrehter Theodor de Castelberg (†1818) cun ina atgna introducziun ed oraziun, fatga aparti per quei di da devoziun a Mustér e ch'ei forsa era vegnida cantada, la quala nus schein suandar cheu per conclusiun tenor in manuscret digl autur sez, midond sulettamein entginas pintgas caussas ell'ortografia.



Mustér cun S. Gions e claustra

### Canzun

pils 6 da matg, sil qual di la sontga mumma baselgia celebrescha igl uffeci da s. Gion avon la porta latina numnaus, ch'ei s. Gion evangelist staus mess en ina caldera dad ieli buglient sura fiug ed ei vegnius orda quel pli frestgs e vigurus, che quei ch'el ei ius en, sil qual di la vischnaunca da Mustér ha priu si da far strentgamein fira e fiasta, part per en sontga maniera mintga onn renovar la memoria dil horribel barschament succedius cheu Mustér igl onn 1799 ils 6 da matg, part per caudonn per las olmas dils nos cars vischins barschai viss en quellas furiusas flommas, sco era d'auters nos vischins, ch'ein vegni per la veta cheu quei di e devidavon els cumbats cheu ni per la tiara giu; epi era per far penetenzia dils puccaus, e per semegliurar da quels, cunzun dils pli frequents, per engraziar a Diu dil bien retschiert, per far oraziun generala e cheutras urbir schierm ed ustonza da semegliontas ed outras disgrazias, rugar per buna e fritgeivla tempranza d'aura mintg'onn.

1.

Gl'onn gissiat tschien navontanov,  
dil meins da matg ils sis,  
sei curdau tier in zun grond strof  
als da Mustér ils plis.  
remetter leinsa tut a Diu  
la caschun tgi seigi stau.  
pitir vein nus sulets stuiu,  
Dieus nus ha visitau.

2.

La claustra, tempels, cun il vitg  
sco la parochiala,  
ha consumau en buca ditg  
la flomma infernala.  
cul Sogn Gions, Raveras, Gonda,  
Funs, Clavaniev, d'Acletta  
ars en clavaus part gronda  
en meins, che in'uretta.

3.

Cun tiers manedels, muvels gronds,  
zun nuot stgav'ins dustar  
per far il mal pli criu dils donns  
dil tut per pirentar.  
allura aunc! o tgei sgarschur,  
han glieud biara mazzacrau  
sco tons vietrichs pleins furur,  
persunas viv barschau.

5.

Dacormein per s'enricular  
e far propiest statteivel,  
da megliurar nies demanar  
e far tut nies pusseivel  
per quei sin oz vein sez priu si  
sco penitents firau stregn far,  
e cur ch'ei croda gest sil di,  
aunc pli gronda fiasta far.

7.

E vus pli car da Jesus Crist,  
sogn Gion per nus rughei,  
apiestel ed evangelist,  
d'effectuar gidei.  
sco ord ieli fetg buglient sur fiug  
frestgs e sauns veis pudiu ir,  
dustei da donns, d'uiar'e fiug,  
tempranza buna urbi.

9.

Sche nus nos lasters patertgein  
comess da di en di  
viers quei, che nus bein meritein,  
fuss nuot il nies pitir  
per nos malfatgs, che ein schi grevs,  
culs quals nus vein stridau,  
en cruschs e strofs bia memia levs,  
che nus vein supportau.

4.

Cumpatg cheutras ha Dieus vuliu  
a nus il cor tuccar,  
pli strofs en temps da rugar giu,  
depurtaments midar.  
mo tonaton, vischins zun cars,  
stuein gie confessar nus sez,  
ch'igl ei vegniu culs lasters biars  
nuot meglier e culs vezs.

6.

Lein oz savens seregurdar  
da nos pupratschs confrars,  
ch'el fiug ed ell'uiara far  
lur vet'han piars bein biars,  
che Dieus els clomi tiels beaus,  
sch'els fussen aunc en peina,  
e detti ad els il lur ruaus  
en gloria cumpleina.

8.

D'Urban ils otg la oraziun  
cheu lein nus applicar  
e lein sco quel cun submissiun  
a nies Diu si clamar!  
avon tes egls nus oz purtar  
las nossas cuolpas tuttas lein,  
cun quellas era presentar  
las plagas, che nus vein.

10.

La peina per ils nos pucaus  
sentin nus zuar zun bein,  
untgir da quels sin negins graus  
stinademein buc lein.  
ei vegn zuar nossa fleivladad  
tras tes castitgs battida,  
mo dils pucaus la nauschadad  
vegn nuota sminuida.

11.

Nos cors blessai ein turmentai,  
mo mein en ault cul tgau;  
nus suspirein tut dulentai,  
culs fatgs vein nuot midau;  
sin nies far meglier, sche ti spetgas,  
vein nus nuota correcziun,  
e sch'ti vul duvrar vendetgas,  
lu star or pudein nuotzun.

13.

Sche strofs ti fas sentir empau  
clamein nus per perdun,  
e sco che ti has perdunau,  
tier novs dein nus caschun.  
cheu Segner has la confessiun,  
che nus sincer culponts sedein  
e senza tia remischun  
a piarder ir stuein.

12.

Cu ti castigias, confessein,  
Tut schliet ch'ei fatgs zacu,  
suent'igl avis nus emblidein,  
che nus bargiu vein lu.  
da strufigiar sch'ti muossas maun,  
da far bien purschein sil zuc,  
retegnas ti la spada aunc,  
il bien paghein nus buc.

14.

Senza merets nos, o Bab Diu,  
concedi a nus quei,  
che nus ord nuot has tez scaffiu,  
che nus rugheien tei  
entras Jesum vies fegl sogn,  
muort siu saung, ch'ei spons per nus,  
e regia ussa cul Spért sogn  
en Trinitad cun vus.

Amen.

V: Rughei per nus s. Gion apiestel ed evangelist.

R: Che nus vegnien vengonzs dallas empermischuns da Jesus Crist.

### **Oraziun**

Dieus, il qual vesa, che nos mals, nus dapertutanavon perturbeschan, nus rughein, che ti concedes, che la gloriusa intercessiun dil beau sogn Gion tiu apiestel ed evangelist nus schurmegi. Entras nies Segner Jesum Christ. Amen.



Mustér

## Reminiscenzas d'in vegl curant da Mustér

Suenter in liung temps essan nus puspei vegni ina gada tras Mustér. Stend amiez il vitg essan nus tut surstai co ins ha engrondiu, restaurau ed embelliu pliras casas, cunzun ils hotels, ch'igl ei in bi mirar. Ils hoteliers da Mustér ston far bunas fatschentas, pertgei renovar e fittar si quell'uisa, cuosta daners. Denton, tgi che ha buca proper e pulit, tgi che ha buca ranschau en empau modern, astga strusch spetgar sin frequenza dad jasters. Ozildi ei tut che fa vacanzas, ed era quel ni quella, che ha stuiu luvrar igl entir onn ora sin biro ed ha spargnau ensemble in pèr tschien francs per saver pigliar si l'aria frestga duas, treis jamnas, sa far remarcablas, beinduras stravagantas pretensiuns. Ils hoteliers ston naturalmein saltar leusuenter, renovar e restaurar e per sesez era specular e mirar da vegnir tier lur quen.

Pli daditg er'ei tut pli sempel, bia pli bienmarcav e – nus lein era ual dir, bia pli emperneivel e familiar per ordinaris curants. Curants «extraordinaris» ha ei adina dau e quels ein ina vera mulesta per ils auters, denton capavels e fins ustiers han igl inschign da spedir tals ton pli spert dad esch ora.

Leu amiez il vitg Mustér havess jeu ussa en quei mument giavischau da saver salidar ils vegls, anteriurs possessurs da quellas casas, da quels hotels. Tgei eglis, tgei smarvegl havessen quels fatg sur lur atgnas casas!

Leuvi la nov'ustria da G. Schwarz, bein postada denter ils straduns dall'Alpsu e dil Lucmagn, leu nua che scarvon Berther e la tgeua Rosa Bundi habitavan en ina veglia, bufatga casa-lenn. – Lu «Hotel de la Poste», che capitani Tumaisch Condrau (†1871) ha giu engrondiu per ina alzada e nua che sia dunna Onna Maria, naschida Venzin da Rueras, ha silsuenter dirigi e manischau tons onns cun tutta energia e capacitad. Bein pli ditg ch'in miez tschentaner ei il biro postal staus en questa casa, baul dadora, baul dadens e silsuenter aunc pli «anen». En quella casa ei il biro da telegraf per Mustér vegnius aviarts ils 14 d'ouost 1861.

Bein il pli fetg vegness professer Gion Battesta Carigiet a sesmarvegliar sur da sia ante-riura casa, ch'el ha sez giu baghegiau 1874, excellent e cun gronds cuosts sil plaz dalla pintga casa da siu bab giuncher Conradin Carigiet, e la quala ei ussa semidada en il «Hotel Central». Professer Carigiet fuva in um studiau, aristocrat ed idealist e perquei buca gest scaldaus per augmentar ustrias e hotels, schegie ch'el encureva beinbugen la sera empau cumpignia ell'ustria. Plirs onns fuv'el staus sco professer ella Russia tier ina nobla famiglia e returnond a casa, ha el surpriu l'instrucziun el lungatg franzos ella scola claustral. Quei ei adina daventau tut gratis. Professer Carigiet ha prestau buns survetschs sco official da vischnaunca, sco derschader dalla dertgira circuitala e sco depu-tau sil Cussegl grond. Dasperas fuv'el enconuschents per in dils meglies tenorists dalla Surselva.

El liug nua che la moderna stampa Condrau sesanfla dapresent, steva pli baul in sempel iert cun in clavau da lenna ella medema altezia sco il terren da tschei maun dalla via. Ina gerba luvrava leu dasperas. La veglia stampa, eregida 1857, era messa sut tetg en casa fravi, ord la quala ins ha cul temps fatg il «Dependance» dalla Cruna.



Hotel Central amiez il vitg



Hotel Cruna e Dependance

Ed ussa il «Hotel Cruna», fittaus si uonn tut appartii alla moderna, ei staus da vegl enneu ina bein accreditada ustria, onns ora en mauns da famiglia Condrau. Quasi tutts jasters ed er'ils indigens frequentavan la «Cruna», ni sco ins ha numnau ella decennis la «Vèva». Gia la via pusa in tec engiu, aschia ch'ei va ton pli tgunsch d'entrar. «Vèva» ni il cumplein num Genoveva Cavegn da Sedrun, fuva la dunna da Giachen Antoni Condrau, ch'ei morts 1855. Ella ha menau e dirigu l'ustria dalla «Cruna» entochen sia mort 1878 cun excellent bien maun, aschia che siu agen num ei s'artaus vi sillla casa sezza, ch'ei stada enconuschenta e renomada lunsch entuorn varga in miez tschentaner sut il num «Vèva». Quei ch'ins anflava tiella «Vèva», era oravontut in special matern quita per mintgin da ses hospis, aschia ch'ins sesenteva leu adina sco da casa. Genoveva sestentava e luvrava igl entir di ora pella casa entuorn, cuschinava e fageva sezza il paun, haveva per in e scadin in bien plaid, mava savens duront la jamna en ina messa marveglia e firaus e dumengias cumpareva ella adina cun schlappa en baselgia.

Quei che deva era empau veta tiella «Vèva» fuva il biro postal, che sesanflava el local, nua che signur Gadola ha dapresent la cuschina. Quei ei stau da nies saver igl emprem biro postal a Mustér. Avon quei temps era docter Augustin Condrau staus cumissiunaus dad haver quita per fatgs dalla posta e quei mava tier ualts sempel. Vegneva la glieud la dumengia da messa en da S. Gions steva docter Augustin Condrau sin il lautget da sia casa e clamava giu l'adressa dallas paucas brevs e scartiras, ch'eran arrivadas la jamna ora. Tut pacificamein – negin che havess reclamau!

E quei ch'ins haveva il pli bugen: Ella «Cruna» anflavan ins adina, cunzun la sera, ina emperneivla eligida cumpignia, umens da savida, da gronda experienza, che havevan viu ed enconuschevan il mund. Cheu era adina landrehter docter Augustin Condrau, il fin

diplomat, cun sia pipa da tiara-cotga. Culs mauns en sac mav'el per la stiva entuorn e discurreva ruasseivlamein savens cun murdenta satira dalla politica e diplomazia, ch'ei era in plascher tedlar. – Vonzeivia vegneva professer Placi Condrau cun viv temperament, gest il cuntrari da siu frar landrehter, raquintava dils eveniments dalla Cadi, dalla scola, el fuva gie da quei temps inspectur da scola ed haveva beinduras difficultads da survegnir scolasts per las differentas vischnauncas, aschia ch'el stueva prender tscheu e leu in dils meglies scolars ord las scolas superiuras dalla scola primara e tarmetter sco-scolast en ina vischnaunca. Professer Placi Condrau s'interessava tier ils hospes sur tuttas caussas ed ideas, ch'el saveva lu eventualmein duvrar per sia «Gasetta». Denton punct las nov dev'el la buna notg e mava.

Ella «Cruna» cumparevan la sera bein savens professer Carigiet, major Vincenz, capitani Vincenz ed era ualti savens gerau «Latin», zun versaus en fatgs da vischnaunca e che deva snueivel bugen in scart troccas. A sia dunna scheva el beinduras bandunond la casa: «La cumissiun pauperila vegn ensemen questa sera!» Ina gada ha la dunna tonaton maniau, che la cumissiun pauperila stoppi vegnir stagn savens ensemen. Gerau «Latin» ha sco seresentiu e dau per risposta: «Mustér ei ina gronda vischnaunca, nus havein bia paupers ed ei dat trasora novs cass.»

Basta, suenter haver raschunau da quei e tschei, cunzun fatgs da vischnaunca, semettevan ins en e deva in scart troccas, il vegl giug romontsch. Quei daventava e mava tut ruasseivlamein, sulettamein professer Carigiet saveva sescalda, sche siu camerat deva buca gest tenor giavisch ed il «bagat» mava vi en l'auter quatier. Treis ga entuorn e quels che havevan piars pagavan il «fiff», che steva da maun dretg e per il qual la patruna-casa, la premurada Clementina, haveva tut quitau. Il ruasseivel landrehter mava aunc adina per la stiva entuorn, turnava a cargar sia pipa, plidava e raschunava vinavon cun quel e tschel. Denton buca mo politica e troccas havevan ins el tgau. All'entschatta dils onns 1870 vegneva reguladamein la stad docter Ed. Böhmer, professer dils lungatgs romans sill'universitat da Strassburg, a Mustér per far studis el lungatg romontsch e per rimnar litteratura. El prendeva adina albiert ella «Cruna». La sera seteneva el si bugen amiez ils hospes, raquintava e dumandava quei e tschei sur expressiuns, plaids e pronunzia dil lungatg. Professer Placi Condrau era cheu da casa, nus tedlavan tier cun grond interess, confirmavan e devan il tgau. La davosa sera avon che prender cumiau, envidava docter Böhmer en «ses amitgs» tier in glas vin, teneva in plaid romontsch, schava «viver» il lungatg romontsch e – «viva! – sin seveser»! Professer Böhmer ha publicau differentas, interessantas lavurs sur il lungatg romontsch en il fegl periodic «Romanische Studien», ch'el redigeva sez. Sia reha biblioteca romontscha, bein la pli gronda che exista, ha el vendiu pli tard a Berlin per 30 000.– marcs.

• •

Nus turnein puspei avon casa ed admirein danovamein dretg e seniester las casas bein renovadas e restauradas. Mond in pèr pass anen vegn tuttenina il patratg: «L'autra gada

vegn senza dubi la casa dils «Augustis» renovada». Quella casa para a nus, sche nus astgein dir, sco sch'ella fuss in tec schenada ussa sper sias vischinas, ual sco ina giuvna en moda veglia sper giuvnas fittadas si tut alla moderna. E tonaton ei la casa dils «Augustis» la pli veglia e la pli interessanta casa digl entir Mustér. Denton buca sco ella ei ussa. Ins ha el decuors dil temps scarpau giu e rut ora e turnau a far si vid quella casa gest sco igl ei dau el tgau, senza plan e mesira, sco igl interess momentan ha gare-giau e vuliu. Quei ei da deplorar. Sch'ins vegn forsa en cuort temps a renovar e restaurar quella casa, sche sperein nus e nus selubin d'exprimer il giavisch, ch'ins fetschi quei tenor plan d'in capavel architect, ch'enconuscha la historia dalla casa e sappi reconstruir enzatgei plascheivel, aschia ch'ella seigi silsuentar in veritabel ornament per il vitg Mustér, gie per igl entir cumin dalla Cadi. Ella mereta quei.

La casa dils «Augustis» ei stada la veglia casa dil cumin dalla Cadi, l'emprema e ditg la suletta casa a Mustér, baghegiada dalla claustra. Ella surveva per local da radunonzas, per sesiuns da dertgira, per dar albiert als differents deputai e derschaders, sco era per saver metter giu da maun ils delinquents. Tenor ina nova cunvenziun, fatga 1642 denter la claustra ed il cumin dalla Cadi, ein tuts documents, che sesanflavan vidavon en claustra ensemen, vegni zavrai e separai. Ils documents dil cumin, sco era tuts utensils appartenents al cumin ein silsuenter vegni conservai en casa cumin.

Denton raquenta ina veglia cronica, ch'igl archiv dil cumin sesanflavi tier il barschament da 1799 en il local dalla spenda, che vegn bein ad esser staus sper il carner? La cronica scriva numnadamein, ch'ei seigi barschau denter auter... «Igl archiv dil cumin en il cumah dalla spenda, nua che sanflavan tuttas scartiras veglias e documents dil cumin da vegl enneu, sco era las scartiras dalla vischnaunca da Mustér, sco documents, brevs ed urbaris...»

Giu bass en casa dils «Augustis» sesanflan aunc oz locals cun arviul e ferma eschadira, che survevan pli baul per perschuns. En l'emprema alzada ei ina gronda sala, che formava il local da dertgira e ch'il vitg Mustér ha duvrau entgins onns sco stiva da scola per las classas superiuras. Las autres localitads dalla casa eran destinadas per dar albiert als differents officials ed era ad jasters, aschi lunsch sco il plac lubeva. Cul temps vegn la claustra ad haver surschau la casa al cumin e quel schava la casa per tscheins mintgammal al salter da cumin, che stueva haver quitau per ils «internai» ed era porscher in refrestg a tgi che leva. Da cheu deriv'ei, che plirs salters da cumin ord autres vischnauncas dalla Cadi ein secolocai e restai a Mustér sco ei vegn raquintau per exempl da Gion Berchter, oriunds da Tujetsch (†1671), ch'el seigi staus varga 40 onns salter da cumin e sco tal «gar vil iahren der Gemeindt Wirt gewesen». Da cheu deriv'ei era, che la casa cumin, ton la veglia sco la nova (anteriur «Bellevue») ei adina stada el medem temps ustria entochen 1924 e ch'ils salters da cumin han menau quella entochen che mistral Felix Cabernard ha cumprau la casa cumin (Bellevue) da salter Gion Battesta Durgiai, nua ch'il cumin ha giu reservau tuts dretgs sin locals dalla casa necessaris per fatgs dil cumin.

La casa Cumin ei pia stada tschentaners ora l'emprema e suletta ustria a Mustér. Ed ei era ina buna ustria, nua ch'ei vegneva surviu cun rauba reala, cunzun cun oreifer bien vin vulclin, ch'ins schava, sco ei para, plascher beinduras ualti pulit.

Barclamiu Pieder Antoni Derungs da Breil ei staus schuldau en Frontscha entochen igl onn dalla revoluziun dils 10 d'uost 1792, nua che tutz Svizzers ein vegni catschai ord Frontscha. Suenter ha Derungs mess si in stab (10–12) cavals da sauma e fatg il bernier mond en Valtlina per vin. La fatschenta ha fluriu. Ed ussa raquenta el en sia «Cronica de famiglia» il suandont: «Ina sera arriva Barclamiu Derungs cun siu stab cavals a Mustér en casa cumin, nua ch'el haveva siu quatier; tutz cavals eran cargai cun bien vin. En casa cumin eran dus signurs da Mustér presents. (Derungs numna ils nums, mo quels han da dir nuot cheu). Ils dus signurs envidan en Barclamiu Derungs da far tscheiver quella sera. Ei vegn concludiu denter els treis da beiber quella notg els treis persuls ina brel vin sut la condizion, che quel che beibi il pli pauc, stoppi pagar tut. E sco igl ei concludiu, aschia eis ei era daventau. La brel vegn messa sin pegna; mintgin haveva sia mesira cun la quala el retergeva il vin. La damaun cun catschar dis fuva la brel vita. Barclamiu Derungs ha buiu quitordisch mesiras e per consequenza il pli pauc ed ha stiuu pagar la brel vin. Las brels da quei temps fuvan mo da 42–44 mesiras, pertgei pli grondas er'ei buca lubiu da far.» – Toni! il vin ei staus buns! – S'entelli, che quels treis cum-pogns han dulitgau denter en vid ina brava puolpa ni in bien schambun per cudizzar la seit e tablegiar las spundas dil stumi.

La casa Cumin haveva pli da vegl certi dretgs per lenna da baghegiar e da barschar ella schetga cumin. Sin la piazza avon casa da cumin vegnevan ils salters dallas quater cuorts dalla Cadi saramentai solempnamein l'emprema gievgia suenter esser stau cumin en preschientscha da sia grazia reverendissima e dil magistrat da cumin, nua ch'ei suandava silsuenter l'usitada marenda communabla, ch'ils salters havevan da pagar.

Dil maun dadens el cantun giudem dalla casa cumin fuva nudau en el mir il «bratsch cumin», nua che tut saveva s'orientar sur dall'ufficiala, gesta mesira. Forsa ch'ins anflass aunc quella «mesira» sut la crusta da maulta. – Ina pintga memoria dalla casa cumin veglia ei semantenida tochen il di dad oz. Per rimnar e dar enzenna, che la tschentada dil cumin entscheivi prest, mava il schinumnau «stab da cumin» treis ga entuorn casa cumin. Quei daventa aunc ozildi, naturalmein entuorn ina gruppa da pliras casas, essend la veglia casa cumin buca isolada pli.

Tgi less bein descriver e raquintar tut quei ch'ei iu e curriu duront tons tschentaners en quella casa, nua che la politica dalla Cadi vegneva fatga, sentenziau tenor dretg e giustia, nua ch'ils pli sabis umens dil cumin, en uniu cun sia grazia reverendissima, seradunavan e secussegliavan en buns e schliats dis sur il beinstar ni la miseria dil pievel e nua ch'ei vegneva beinduras era traua sur veta e mort. En verdad, ina zun interessanta, gie ins astga dir, venerabla casa, da muntada historica e mereta perquei, ch'ins restaurareschi e renoveschi ella cun pietad, tenor plan e cun quitau.

Tier il barschament dils Franzos, ils 6 da matg 1799, ei era questa casa barschada tochen sin ils mirs. Sche nus sbagliein buc, ha il cumin giu vendiu la veglia casa cumin enzatgei onns avon l'invasiun dils Franzos a privats e giu cumprau per casa cumin la casa (Bellevue) sut la claustra, ni che quella scumiada sa esser daventada cuort suenter il barschament. Tenor ina brev da marcau dils 10 d'oust 1799 ha il cumin denton vendiu quella casa (Bellevue), respectiv il sulom a salter Gion Battesta Durgiai per 1200 renschs resalvond tier la nova casa tuts anteriurs dretgs dil cumin. Tutta lenna per baghegiar ha Durgiai saviu pinar ella schetga da cumin.

Suenter il barschament da Mustér ei la veglia casa cumin (Augustis), respectiv siu sulom, daventada in «dualissem», quei vul dir en possess da dus proprietaris, che cuoza aunc adina vinavon. Ina mesadad dalla casa udeva da siu temps a statalter Placi Nazi Berther, che possedeva era la «Cresta». – Da Placi Nazi Berther ha capitani Ludivic Carigiet cumprau quella mesa casa. Capitani Carigiet, fegl da mistral Gion Luregn Carigiet (†1824), era staus 25 onns en survetsch napolitan, ha giu fatg la campagna da Sicilia ed era lu turnaus cun ina biala pensiun anavos en sia patria a Mustér. Leu eis el vegnius numnaus cumandant dil «Landwehr». Denton schava sia consorta, ina dama da Neapel, encrescher e capitani Carigiet ei seresolvius da returnar a Neapel, nua ch'el ei daventaus paucs onns suenter in'unfrenda dalla colera. El ei morts cun ses 66 onns ils 21 da november 1865.

Avon che seretrer naven da Mustér ha capitani Carigiet vendiu sia mesadad dalla casa Cumin a frars Agosti da Trun. In da quels frars, Battesta ei secolocaus a Mustér, ha drizzau en leu stizun ed ustria. Quella mesadad casa ei ussa en possess da Susanna Agosti-Monn, che meina era vinavon stizun ed ustria.

L'autra mesadad dalla casa cumin apparteneva a Giachen Monn da Mustér, ch'ei staus mistral 1828/29. Mistral Giachen Monn ei sereratrags pli tard a Rabius, nua ch'el ei morts 1848 ils 3 d'october e satraus ils 5 a Mustér. Quella mesadad casa para dad esser vegnida en possess dalla famiglia Monn, Mustér-Gonda. Gerau Gion Battesta Monn, carteivlamein frar da mistral Monn, ha vendiu quella mesa casa a statalter Pieder Paul Cagienard da Rabius, che ha giu maridau Lucia Giuseppa, feglia da mistral Monn e quei per la summa da 2800 renschs. Cagienard ei sereratrags a Mustér.

Dils treis affons da statalter Cagienard ei la feglia Rosa vegnida la pli veglia, che ha artau questa mesadad casa. Igl ei vegniu ranschau en giu bass in local per far ustria, che postenent Conrad Bühler ha giu affittau per plirs onns e dau il num «Alpenrose». Silsuenter ha Zazzi menau quell'ustria sut il medem num. 1912 ha Rosa Cagienard vendiu sia mesadad casa a Bernard Columberg-Bundi da Cavardiras, che ha retratg quella part casa il mars 1913 e dau all'ustria il num «Veltlinerkeller». – Cun 1918 ei questa mesa casa vegnida en possess da Josef Giger-Condrau, che ha midau il local d'ustria en ina bischutaria.



Il Bellevue

Era la secunda casa da Cumin (Bellevue) ha fatg atras, ton sco nus savein, differentas midadas. Avon ch'ils Franzos arrivien a Mustér 1799 udeva quella casa ad ina famiglia Huonder, che haveva leu ina stizun ed hagi giu tiel barschament in donn da 10 000 renschs mo per rauba da stizun. Sil - suenter ei salter Gion Battesta Durgiai, sco gia detg, vegnius en possess da quei sulom, ha baghegiau la casa danovamein e fatg ustria e giu quita per ils ufficials e locals dil cumin ed ei il davos salter, che figurescha sco ustier dil cumin.

Felix Cabernard da Dardin, ch'era sereratrags a Mustér entuorn anno 1830, ha cumprau la casa Cumin da

salter Gion Battesta Durgiai, e menau sez l'ustria, carteivlamein cun la taverna «Zum Adler». Il cumin ha naturalmein giu resalvau tut ses dretgs sco vidavon. Cabernard era in um da gronda sabientscha e capacitad ed ha giu, ton sco nus savein, differents uffecis en vischnaunca da Mustér. A sia iniziativa ed activitat ha Mustér d'engraziar per siu «spital», ch'ins ha baghegiau 1842 sco casa pauperila e sco casa da scola, da nies saver l'emprema a Mustér. Leu ha era siu frar Gion Clau Cabernard dau scola, ferton ch'ins deva scola vidavon en casa pervenda ed en casas privatas. Felix Cabernard ei igl autur dalla cumedia «Il spért libertin». 1840/41 ei Cabernard staus mistral dalla Cadi. Silsuenter lev'el serertrer a Cuera sco procuratur, nua ch'el, entras sia savida «po far ses fatgs pli bein che star cheu e far ustria». Denton eis ei stau ordinau autruisa dalla divina provvidentscha. Tut nunspitgadamein ei mistral Cabernard morts ils 3 d'avrel 1843 ella veglia-detgna da mo 36 onns. Ei cursava da lezzas uras ualti aviartamein la fama e certs indezis ein era semussai, ch'ins hagi tussegau el. Siu sulet affon ei morts da pign; sia dunna ei serendida ell'America.

Gia 1840 haveva Cabernard giu vendiu la casa Cumin a litinent Mattias Berther, che ha priu possess da quella per Daniev 1841. Cabernard habitava leu vinavon ell'alzada sura. Il niev stradun, baghegiaus 1857 entochen amiez il vitg Mustér, ha purtau nova veta e bia traffic ella Surselva ed era a Mustér. 1870/71 han ins engrondiu la casa Cumin per in'alzada, construui il tettgam autruisa cun sia clutgera sissu. Ins ha dau alla casa ina fatschada era da maun sura, sco era alla veglia casa-lenn leu speras da Gion Antoni Genelin e da «pot» Giachen Fidel Riedi. La piazza dadora la casa Cumin era vegnida ulivada gia avon (1862) dils tschun vischins leu speras, nua ch'ins ha saviu tener 1871 la



### Il vitg Mustér cun claustra

fiasta districtuala da cant. La casa Cumin ha survegniu il num «Hotel Berther» e la taver-  
na «Zum Adler» han ins mess sur combras. Frars Berther, fegls da litinent Mattias Ber-  
ther, han sviluppu gronda activitatad ella Surselva sco hoteliers, marcadonts, cun far il  
pur e cunzun cun menar biars onns la posta federala da Glion entochen ad Ursera.  
Suenter la mort da docter medicinal Placi Berther 1903 ha siu nevs Fidel Berther surpriu  
la casa Cumin, restaurau e ranschau en ella danovamein sco «Hotel Bellevue» e turnau  
a pender ora la taverna «Zum Adler». Cun igl onn 1913 ei la casa Cumin vegnida en auters  
mauns ed igl onn 1924 han ins calau da far ustria. La casa ei vegnida ranschada en per  
habitaziuns privatas, nua ch'il cumin ha aunc adina reservau certa paucs locals per siu  
diever.

• •

Nus lein denton far fin cun nossas «Reminiscenzas». Igl ei mo cuortas, muncheivlas  
notizias, ch'ils stimai vischins da Mustér veglien gentilmein perstgisar, curreger e cum-  
pletar. Forsa che nus turnein puspei inagada. Ad interim nos megliers salids als prezai  
amitgs, cunzun als vegls trochists.



Staziun dalla viafier

# Pader Baseli Berther OSB 1858–1931

## Sia veta e sias ovras

biografia da dr. Guglielm Gadola, cumpariu en Tschespet 23/1943

### 1. Siu origin

Il temps da sia veta mavan ils patratgs da pader Baseli Berther savens anavos els emprems onns da sia affonza. Quei hai jeu mez observau, visitond el pliras ga 1931, igl onn da sia mort. E cura ch'el raquintava a mi da siu car Dieni, la idilica ucliva paterna, dev'el aunc enqual sbargat videnasi els tschentaners vargai. Lu plidava el cun commoziun e pietad da ses perdavons, che vevan viviu gia avon 500 – 600 onns. E jeu tedlavel cun bucca e nas e meditavel en miu cor: Ei dat famiglias, ch'ein in scazi custeivel atras tschentaners e tschentaners; famiglias ch'ein ina beneficenza permanenta per ellas e lur figlialanza e per tut il pievel, da generaziun tier generaziun; famiglias che han cultivau ad in cultivar religiun e pietad, senn patriotic e vera noblezia aristocratica purila! Ad ina tala famiglia apparteneva era nies pader Baseli, in um sc'in cuolm da tgierp ed olma, trasstras ed entochen sia davosa fladada.

Ina «Berther» da Tujetsch vegn numnada gia 1300 en in'impurtonta scartira (copia), che sesanfla egl archiv dalla pleiv tuatschina e zuar en ina scartira digl avat Nicolaus I da Mustér, nua ch'el surlai en moda da regal alla claustra da Wettingen, cantun Aargau, ils dretgs sur ina certa brava dunna («honestam mulierem Berchtham») sco era ses affons. La schlatteina Berther (Berchter) existeva pia gia da gliez temps en la Val Tujetsch.<sup>1</sup> Silsuenter serepeta quella schlatteina ad in serepeter en ulteriuras purgameinas, documents, urbaris e cronicas da Tujetsch, Mustér e dalla Cadi. Il num Berther vegneva screts tschels onns: Berchter, Brechter e pér el 18avel e tochen oz: Berther.

Filologs e specialists dall'historia medievala pretendan e per part muossan ei era si, che la Val Tujetsch seigi el decuors dil 13avel tschentaner vegnida immigrada da culegns vallesans. Quei demuossien oravontut ils numbs d'ina partida famiglias tuatschinas sco ils Berthers, Monns (pli baul scrivevan ei: Mohn), Schmeds, Beers, Mugglis, Hetz e Bruggers. Ditg vegn ei buc ad haver cuzzau, che quels «Valeisers», che han runcau, epi habitau ils aults dalla val, ein stai romontschai trasstras entochen la crusta. Schebi ch'els occupavan all'entschatta mo las spundas, las plauncas e launcas, lunsch orasi sugl irlal dalla val, quasi mo ils gliemets dalla cuntrada! – ein quels immigrants dallas circa 66 uclivas tuatschinas semischedai enteifer 2 – 3 tschentaners cun la populaziun indigena, ed ord quella successiva cruschada dil saung vallesan e romontsch ha ei lu dau ina frestga, biala e zun robusta razza alpina. En quella nova generaziun, regiuvinada dad omisduas varts, ein las qualitads romontschas vegnidas dominè: il lungatg romontsch, la cultura retica, talien e talent tuatschin da rudien, aschia ch'il spért german dils Vallesans ei gia dalla bial'entschatta envi vegnius umbrivaus ed el decuors da paucas generaziuns sclavinaus. Da tut quei che ils immigrants han purtau ella tiara «aetuada» ein mo las bunas qualitads penetradas ellas aveinas dils vegls indigens, qualitads che quels gia possedevan per part e ch'ein aschia vegnidas potenziadas: religiusadad, lu-

vrusadad, spargnusadad ed ina perseveronza endinada, sco ins sa ir ad encuir! – Aunc oz han las famiglias tuatschinas quasi tuttas quella noda-casa e denter las empremas ils Berthers!

Sco l'istoria da nies cumin dalla Cadi e dalla Ligia Grischa muossa, ein ils Berthers da Tujetsch dapi 1500, ensemblamein culs de Flurin e de Medell, ils pugniers ed aristocrats dalla «secunda Cuort» da nossa veglia Cadi. Naven da 1501 entochen 1933 han ils Berthers da Tujetsch administrau buca meins che 22 ga la mistralia da nossa suverana Cadi. Denter tuttas nossas famiglias da mistrals ed ufficials ein sulettamein ils Latours da Breil aunc stai undrai pli savens cul manti tgietschen (34 ga!).

Dapli ein plirs da quella tipica èra mistralera vegni alzai alla dignitad da scarvons e landrehters dalla Ligia. Aschia per exempl: Duri Berther 1522, 1525 e 1528 landrehter; e lu puspei Pieder Berther 1549 e 1561. Auters ein stai en Valtlina sco podestats e sindicatur.<sup>2</sup> Mo era alla baselgia han commembers da quella famiglia e da lur numerusa fegliallonza surviu cun prusadad e pietad sco prers e paders.

Sco ufficials suprems e subalterns da cumin e ligia ed era sco sacerdots ella vegna dil Segner han els prestau bia buna e cunscienziosa lavur, mo adina senza caneras e bahaultschas, aschia che buc in soli ei pli enconuschents ni pil tgau pli gronds che tutt ils auters mistrals ed augsegners da nossa Cadi. Deno il famos mistral Giachen Berther da 1656 e vinavon ed il scarvon perpeten Giachen Berther (1719 e vinavon circa 20 onns), secasaus en casa-cumin a Mustér, ein negins da quels numerus dignitaris dai ord l'èra d'umens mudests e luvrus e da buns administraturs.

Sco pader Baseli sez raquintava a mi, detti ei pliras declaraziuns per la derivonza dil num Berther. Ils ins pretendien, quel derivi da «brachen» (aufbrechen), che pudes-

si muntar ton sco: arader, quel che ara; auters veglien derivar quel dil prenum: Berchtold, e gliez seigi probabel la megliera derivada, essend il pli savens scret: Berchter. Mo forsa anflan ils filologs ina tiarza etimologia, ch'ei lu finalmein la vera.

L'arma (igl uoppen) dils Berthers representa in uors sinsè, brancond in pegn solitari. Igl uors ei il simbol dalla forza e robustedad – ed ei perquei aunc oz significativs per l'entira descendenza bertheriana! Igl uors ei gia svanius dapi tschien onns en Tujetsch, mo quels dall'arma uorsica vivan e semultipliceschan aunc oz, sco da sias uras ils tschuts da Jacob ella bibla. Ils Berthers ein numnadamein, da



Uoppen dils Berther's

45 famiglias che vivan oz en Tujetsch, la secunda numerusa schlattelina dalla val. Sin 718 habitants da Tujetsch, ch'ein vegni dumbrai e controllai 1929/30 per motiv d'ina scrutaziun antropologica,<sup>3</sup> fuvan 84 Berthers, ni 11,7 % dall'entira populaziun. (Pli biars ch'els dumbran mo ils Monns = 91!). Monns e Berthers fan ora ensemes 24,37 % dall'entira populaziun tuatschina.

Da quels Berthers, ch'ein oz secapescha buca tuts tierparents, mobein aunc adina parents: ina dètga partida schizun entadem il rom sper il best, circa la mesadad ora miez ed il rest odemdem la frastga, habiteschan da 81 habitont da Camischolas, 40 Berthers en quei vischinadi, pia exact 50 % e 31 a Rueras (sin 202), che fa medemamein 15,4 %. – A tgi vegnan cheu buc endamen ils plaids dil Veder Testament, nua ch'igl ei la tschontscha dalla benedicziun dalla schlattelina humana, che dueigi daventar numerusa sco il sablun dalla mar? – Navonta per tschien da tut ils Berthers tuatschins ein purs tocca la crusta e fuorman cheutras ina part essenziala dalla populaziun purila tuatschina.

Ils Berthers da Mustér ein ina frastga tuatschina, transplantada a Mustér viers la fin dalla emprema mesadad dil 17avel tschentaner; ils Berthers da Sumvitg e Rabius ein la pli giuvna enfiarla, carschida ord l'enfiarla daventada plonta a Mustér e translocada 1750 e tons naven da Capadrut e Faltscharidas a Mustér ella vischnaunca da Sumvitg. Era cheu savess ins applicar il citat dalla bibla, nua ch'ei sedi ch'ils Gedius erien vegni aschi numerus, ch'els seigien dai ella tiara da Sidon e maridau las mattauns da leu – perquei ch'ellas erien bialas!

Basta, nuslein ussa turnar a Camischolas e Rueras, respectiv a Dieni, tiella casa paterna da nies pader Baseli.

## 2. Ses geniturs e sia affonza

Pader Baseli veva in dun tut special e plascherun dalla genealogia, quei vul dir dalla historia dallas famiglias, cunzun dallas tuatschinas. Capeivel, ch'el ha era eregiu il tschep da sia famiglia. Quel va denton buca pli lunsch anavos che sin tats e tattas da mintga vart. El di denton en siu bi studi «Sas era nua Giuv ei?»: «Nossa uratta, Maria Catrina Venzin, era da Giuv e perquei havein uns aunc adina empau simpatia per quei tec tratsch leu si sin quei crest.»

Siu tat davart il bab ei stau Vigeli Giusep Berther, morts ils 18 da fevrer 1830, e sia tatta paternella Maria Turtè de Pally, morta il di suenter, ils 19 dil medem meins e medem onn. Siu tat maternel ei stau igl enconuschent «Sten nair» da Rueras, Tumaisch Giusep Schmed, naschius ils 10 d'october 1784 e morts ils 15 da matg 1866. (Da quel vegn jeu aunc a plidar, essend pliras da sias qualitads e vertids idas vi sco buna ierta sin siu biadi da pli tard: Giachen Martin, nies pader Baseli!) Sia tatta davart la mumma ei stada Onna Maria Ursula Monn, naschida 1782 ils 19 d'uost, morta 1853 ils 29 da matg.

Siu tat davart il bab eri in bien pur: pur trasatras e buca mo in da scotga; sia tatta Maria Turtè, naschida de Pally, ina dallas rehas da Tujetsch. Quels dus, tat e tatta Berther, han giu sis affons: Maria Cresenzia (1805 – 1832); Vigeli Giusep (1807 – 1876); Giachen Martin (1809 – 1872); Giachen Antoni (1812 – 1870); Duri Battesta (1816 – 1882) e Maria Cristgina (1819 – 1890): tuts naschi a Camischolas, ella casa paterna dalla famiglia Berther da pader Baseli, nua che viva ed habitescha aunc oz Giachen Martin Berther, siu cursin, il pli frestg mat vegl dall'entira Val Tujetsch – en ses 85 onns!

Il tat Schmed, davart sia numma, ha giu siat affons: Giachen Placi, morts da 15 onns, ch'el era student on claustra; Giusep Luregn, naschius 1808 e morts 1836 da Nadal ella lavina da Giuv; Gion Antoni, naschius 1810 e morts sco caporal a Neapel; era quel veva in dun, ni meglier detg ina pissiun, che pader Baseli ha artau (pli bia giusut!); Cristoffel, naschius 1812 e morts da 25 onns; Vigeli, 1815 – 1891; Maria Barla Catrina, 1817 – 1883; era vegnida ella lavina da Rueras da 1817 e cavond ora ella, veva in dau culla sigir – per ventira grad spel plumatsch giu, nua ch'ella durmeva pacificamein treis meters sut la neiv! Numera siat, la giuvna da tuts, ei stada la mumma da pader Baseli: Onna Maria Ursula Schmed, (1821 – 1898) maridada 1852 cun Duri Battesta Berther (1816 – 1882), bab da pader Baseli.

Ils geniturs da pader Baseli eran glieud luvrusa e spargnusa, vivevan en grazia cun Diu ed han tratg si cun quitau e carezia treis mats e duas mattauns «ed educau els cun plaid, fatg ed exemplier tier quei ch'els tuts ein daventai: tier buns cristifideivels da tgierp ed olma.» Pader Baseli «il pign», sco el vegneva numnaus da ses fargliuns, ei staus il quart da tschun fargliuns. Il vegl ei stau sur Tumaisch Giusep (1853 – 1931), il pli original «plevon da purs», che la generaziun dad oz ha enconuschiu.<sup>4</sup> Epi vegn Onna Maria Ursula, (1854, maridada 1877 cun Gion Mihel Monn da Sedrun, morts 1922); il tierz, Vigeli Giusep, numnaus «Sep da Dieni» (naschius 1856, maridaus 1886 cun Barla Catrina Deflorin da Camischolas, morts 1925); il quart ei stau Giachen Martin, il pader Baseli da pli tard, naschius 1858 ils 10 da november e morts la vigelgia da Nadal 1931. Suenter el ei aunc vegniu ina sora: Maria Turtè, naschida 1860, maridada 1887 cun Sigisbert Berther da Rueras, morta 1925.

Dalla numerusa feglialonza da ses cars fargliuns, da ses nevs e niazas, sutnevs e sutnizas, lein nus buca plidar cheu, mo ton astgein nus dir, che tuts fetschien honur a lur augsegners e mantegnien e cultiveschien vinavon las vertids da lur perdavons.

Anno 1858, igl onn dalla pli miserabla fiera da Ligiaun ch'ei ha dau enzacuras,<sup>5</sup> fuvan era 24 marcadonts da stiarls ord la Val Tujetsch i vi «la tiara taliana» cun lur mercanzia. Cun ils stiarls digl Uri era ei serimnau ensemble silla plaza fiera ed ellas «zonas da stiarls» da Ligiaun circa 20 000 tgaus; varga 3000 mo ord Surselva. Ei er'iu malissim gliez onn, essend che l'Italia veva giu calamitad fretg ed insumma tut falliu! Denter ils 24 marcadonts da stiarls da Tujetsch sesanflava era il bab da pader Baseli. Vulend nun-grazia turnar a casa cun lur marcanzia, eran els vargai giu Ligiaun e la finfinala turnai a casa senza stiarls e senza – marenghins! Ei er'iu si tut en spesas – ed ils Malerbas da Pianca Bella vevan ei era buca stuiu temer fetg.

Dend dad esch en a Dieni, nua ch'ils giuvens maridai eran secasai dapi 6 – 7 onns, hagi ina ferma e robusta vusch d'in cantadur da mo in'ura vegls retschiert il bab. Quella can-zun plein forza hagi destadau il bab ord ses quitaus depriments ed en in amen seigi sia fatscha sesclarida. In mat aschi saun e frestg era per el la pli segira caparra per in ventireivel avegnir. Svani eran fastedis e quitaus dallas davosas treis jamnas – e mirar anavos en fatscha d'ina tala ventira e selamentar – fuss stau fatg da matta veglia, mo buca dad um.

L'auter di, per sogn Martin, ei il pign da Dieni vegnius battegiaus a Sedrun cul num Giachen Martin: Giachen en honur e veneraziun da sogn Giachen a Rueras, e Martin per saver festivar gia igl emprem di da sia veta il sogn dil di, che veva bein smanatschau al bab da vegnir cul sgurdin, mo ch'era lu tuttina vegnius culla ventira en casa.

Duri Battesta da Dieni, il bab plein lavur e premura, era in um da gronda iniziativa. El era pur, mo dasperas fageva el era il marcadont da biestga ed igl impressari. Cun siu frar Giachen Martin (morts 1872), era Duri Battesta sereratrgs da giuven giul Schuob e cun caschun fatg leu zatgei scolas sco surprendiders da construcziuns da straduns. Sco tals havevan els luvrau en Baviera e giu la Svizra bassa e suenter paucs onns turnai a casa cun in bi daner. Anno 1860 ei la via nova sur il Cuolm d'Ursera vegnida baghegiada. Entochen 1864 ei quella stada finida fin ad Ursera (Andermatt) e vegnida collaudada. Capeivel, ch'ils dus versai impressaris ein senezegiai da quella caschun. Leusura anflel jeu la suandonta notizia, scretta da pader Baseli sez en in carnet: «Nies bab, Duri Battesta Berther, ha baghiau la via naven dils cunfins da Mustér entochen S. Brida. Associai cun el eran siu frar, aug Giachen Martin, in cert signur Castagnola da Ligiaun e landrehter Augustin Condrau da Mustér. – In toc sil Cuolm d'Ursera ha il bab era baghiau; il caraun sisum dal maun d'Ursera senumna aunc ussa «Berther's Kehr». Ferton ch'els han giu sil territori uranès buns, capavels inschigniers e fatg bunas fatschentas, ha igl inschignier Depuoz sin territori grischun mussau pintga savida ed era dasperas in pedant dalla emprema classa. El ei staus la cuolpa che quella interpresa ha rendiu pauc als impressaris».

Dapi quels onns leu ei siu bab sededicaus entir ed entratg al puresser e cun far empau il marcadont denteren, ha el tratg si ina stupenta famiglia, ferton ch'ils «daners gudignai sin via» han fatg pigns ed in di facilitau ils studis da ses dus megliers mats.

Nuota tgisa, il «pign» da Dieni cun ses fargliuns han passentau en quell'ucliva paradisica sisum la Val Tujetsch sper la tuor da Pieder de Putnengia dis d'affonza e giuventetgna da mai murir! Ins enqueri in liug pli bi ella Cadi, che Dieni sper Sumsassi! – Agradgiu sut Sumsassi sper Plaunmiez la ruina dil casti dils niebels de Putnengia. Occidental-settentrional da Dieni: Giuv, la patria dil beau Gionet de Giuv, in'ucliva depopulada, che pader Baseli ha descret cun tonta amur e savur, Giuv cun sia caplutta da s. Bistgaun, alva e senza macla sc'ina neiv nova! Ed occidental dil tuttafatg serasan sco in'oasa paradisica ils mises primavauns-atunils da Mulinatsch, Milez e Caspaura; tramuntan schaian sur teissa spunda viers la Val Milà las tegias da Malamusa, Alp e Péz Culmatsch, Péz Giuv e Crispalt. E leu visavi la casetta da Dieni, sin l'autra vart dil Rein,



Casa paterna a Dieni

sur ina bellezia pastira, il gigantic Uaul Surrein stgir-verds sco las buolas da S. Brida. Tgei rasada uaul per liung e per lad ed en altezia, e sur el s'extenda l'Alp Tgom cugl Uaul Davos Nacla e Val Nalps. Tgei deletg pigl egl e pil cor!

Cheu en quei venerabel «para – dis» ha il pign Giachen Martin passentau ina ventirei-vla affonza enamiez ses cars geniturs e fargliuns. Gia avon ch'ira a Rueras a scola, ella vegliadetgna da 6 – 7 onns, gidava el ses frars Tumaisch e Sep a pertgirar ils vadials sil-las plauncas e palas da Mila e bien a savens fagevan ils treis mats dil Duri Battesta cun aunc auters ensemens, tgeinin che seigi igl emprem giudem cun «ir empalas sil davos». Buca darar capitav'ei lu, ch'ils «feghers» vegnevan la sera a casa cun caultschas senza tapun. La mumma fagevi bein sfracs, mo buobs ein buobs, e cura ch'ei vuleva buca ver fin cun quei sport, ha la mumma in di cun ina «peisch-curom» dau sustegn al tapun. Quei vevan ils schanis nuota nuidis, mo la sera cura ch'ei vegnevan a casa culs vadials, tergevien ei ora ils tschops e schevien giu quels sill-a peisch-curom – per ch'ils vadials stoppien buca seturpegiar da lur vadlès... Cheu en quei liug solitari vevan ei schiglioc era che semegliava cuort, pertgei che primavera ed atun vegnev'ei neu beinenqual da lentalgels, sul Rizli. Quels tschintschavan persesez tudestg ed il bab schevi a ses mattets: «Buezs, emprandai tudestg, per savai vènder vos purschals!»

Cumpatg ch'ils buobs vevan priu a pèz quei cussegl, rauenta pader Baseli sez, seregurdond da quels bials onns: «Nus buobs vevan mintgamai in agen tschaffen cura ch'in ni l'auter tudestg vegneva sul Rizli dalla Val Milà oragiu, cun lur caultschas stgir-verdas, cun in tschiep aschi cuort sco'l libroc e la liunga capetscha da seida cun in hazer tinghelin. Cheu devan nus bein adatg, cur che quels tschintschavan culs umens dils mises, e bein gleiti savevan nus era dir: «Wo gehnt ihr hi? Uf sant Jacob aba, süli go reiha!» – E tgei bialas seras d'unviern a Dieni en cumpignia cul bien pot da Selva Martin Felici Schmed da Rueras, quei brav e sempel um, dil qual pader Baseli seregurdava aunc en ses vegls dis cun tutta speciala carezia!

«Ei era in pauper schani, denton in um dad aur, cunents e pazients sco Job. El haveva il bia duas vaccas ed ina stiarla, enzacons tiers manedels, ch'el perveseva aunc tier far pot tut unviern ora en sia solitaria acla «Val» sper Dieni. El fuva nies meglier vischin, fageva reguladamein pliras ga per di sia staziun tier nus, laschond anavos siu uorden da posta e sia mondura, ferton ch'el serendeva en si'acla. Sia feglia Filomena pertava temps d'unviern, quels dis ch'el mava a Selva, il solver tochen Dieni, dis ruhs era il gentar. Duront sia tschavera era el leu cun nus e ruschanava bugen cul hab.

Cun quei che Felici haveva giu fatg pli daditg e fageva aunc ussa denteren empau il marcadont da stiarls e cavals, raquintava el il pli bugen da ses viadis e da sias aventuras a Sebiastg e Ligiaun e Varesa, nua ch'ei stuevan vargar giu schliats onns. A nus buobs fageva sia raquintazion dil bandit «Malerba» adina la pli gronda impressiun. «Malerba», era il capo d'ina banda da laders, che periclitavan la via sul Lucmagn e che vevan principalmein en egl ils marcadonts, che returnavan cun lur tschentas pleinas d'aur dalla fiera da Ligiaun. Felici era fiug e flomma, cura ch'el vegneva cun siu «Malerba». – Polizist Duri Maculin da Rueras ha alla finala giu pudiu tier il Malerba ellas alps da Scona e fatg fin a quei prigulus cumpogn cun sia suita. S'entelli che Felici ludava buca pauc la curascha e forza dil Maculin!

Haveva Felici finiu siu solver, sche semtgava el da far siu tur a Selva; metteva en tuorn schui la termenta tastga-curom, ella quala ei er'en mintga zacu ina brev si da «Schuobalan», e lu pli tard, la sonda, in pèr numers dalla Gasetta Romontscha, schiglioc schuber vivamein nuot. Lu vegneva in hazer caput blau cun nuvs alvs, grevs e liungs, che Felici stueva, malgrad sia pulita grondezia, runar suenter ella neiv. Alla finala suandava la capial'aulta, dira e steria, cun duas ulti grondas ruosnas da mintga maun dil cup, che Felici hagi surtut frestg il tgau – in um da circa 60 onns! Felici era cunscienzius, denton era pratics e metteva si mintgamai sia capetscha e pér lu la capiala. En verdad, ina empau fasierlia mondura, snueivel tappa sisum la Val Tujetsch, per in pot da Selva! Nus essan savens sesmarvegliai pli tard, ch'il bien Felici ha buca tratg vi Sumsassi la capiala da leugiu, quei malengasi pategl! Da basegns e pratic fuss ei stau: in pign, lev turnister, ina cuorta pelerina da launa, ni craga sco nus schein, in pér liungas osas tochen sur schanugl, ina capetscha da pial uors cun ureglas, in pér vons ed in fest liung enferrau. Quei fuss stau e fuss aunc adina la megliera mondura temps d'unviern per in pot da Selva.

Felici ha stuiu far bia gadas gronds strapazs sin siu tur. Beinenqualga ha el giu detgavunda. Ei ha era buca muncau, ch'el ha stuiu traversar il Rein a Carmihut e sfollar tras la neiv da tschei maun per arrivar a Selva e cumplenir l'obligaziun. E tgei paga retergeva quei um? All'entschatta 35.–frs per onn, che landrehter Augustin Condrau veva cumissiun da pagar ora. Per ordinari schava Felici dar in sac segal ed in sac salin persuenter. Plitard ch'il tur mava tochen Tschamut, fuva la paga 100.–frs e mintga tons onns la fasierlia mondura.

Beinduras fageva sia feglia il tur ordinau e turnava a casa cun ina schuba schelada sco fier. Inagada eis ella arrivada tochen las Vals. Ina gronda lavina era vegnida buca daditg.

Nunpudend e nunsavend ir vinavon, ha ella entschiet a grir e pudiu sussentar entgins umens, che stevan a Selva avon baselgia – ei era ina dumengia – ils quals ein vegni encunter e priu giu las caussas dalla posta e schau turnar anavos la giuvna.

Felici turnava savens tard a Dieni e miez schelaus. Selamentar era mai sia moda. El se-scaldava empau, prendeva cun bien appetit siu gentar, raquintava puspei dalla fiera da Ligiaun, dils mulissiers, dils strangugls che ses cavals havevan enqualga e natural dil «Malerba» e dil polizist Maculin e mava puspei a pver ella Rufna.

Felici haveva tscheu e leu miseria cun lenna da barschar, e sche Filomena deva vid ils pleders da slondas, sche fuv'ei buca bialaura. Mav'ei encunter la primavera sche haveva Felici per ordinari scart da fein; el mava enasi Val Mala e fageva nitschuns e beinduras era siu davos refugi a Dieni: «Tgè té Duri desses in bla fain!»

Pot Felici haveva in oreifer bien cor. Dalla fiera da Ligiaun fuss el mai turnaus senza purtar a nus buobs enzatgei, il bia in cunti per in. Quei havevan nus il pli bugen ed era il pli da basegns, perdevan nus gie quel per ordinari entochen l'autra fiera. Sinaquei che nus sefagessien denton buca mal en nossas differentas manipulaziuns, haveva il cunti il bia in «péz rodund».

Da Daniev fuv'el igl emprem vischin, al qual nus aguravan in legreivel bien niev onn. La buna mumma visava denton il Felici da nuota dar enzatgei e far cuosts. Quei stridava el. «Quai fuss ina biala, bétga dar dus raps a quels buézs!» Felici veva bugen nus affons e nus era el. Havessen nus saviu far enzatgei per el, nus fussen i tras in fiug...<sup>6</sup>

Pli gronds ch'ei vegnevan, ils mats da Dieni, e pli serrau ch'il bab metteva els sut il stadal. Els stuevan luvrar tenor forzas e gidar en tuttas lavurs da pur, era da students, entochen ch'ei han entschiet culla teologia. Aschia vegn ei aunc oz raquintau, che Tumaisch e Giachen Martin stuevien da sias uras perfin gidar a far fein a pastg! E cheu schabe-giav'ei buca darar, che la sera, turnond a casa, ils dus mats dil Duri pertavien mintgin in hazer buordi fein a pastg naven dil Crest da Nossadunnaun entochen a Dieni – duas uras viadi! Sur Tumaisch da pli tard fagevi quella bravura senza ruassar ina solia ga; pader Baseli stuevi ruassar ina ga silmeins! – «Tgei dies! Tgei stgeinas!» ha in exclamau aunc buca ton daditg, udend a raquintond quellas strapazzadas – senza neginas consequenzas. Umens sco cuolms! E buca per nuot; il pursepen era leusuenter, essend che a Dieni era la maglia l'emprema pagaglia!

Deno temps d'unviern fuvan ils buobs da Dieni adina occupai sufficientamein e vegnevan aschia buca bia en contact cun auters. Las regurdientschas da quels bials onns d'affonza entochen ir a scola ein per part descrettas en: «Sas era nua Giuv ei?».

Donn e puccau che pader Baseli ei buca vegnius a frida da dessignar a nus siu tat Tumaisch Giusep Schmed, enconuschents ell'entira Cadi sut il tetel: assistent Schmed, ed en Tujetsch sut il num familiar «Sten nair» per distinguere el digl assistent Schmed da Gionda, ch'ins veva nudau culla tezla contraria da «Sten alv».

Pader Baseli ha aunc enconuschiu bein siu tat, ch'ei morts pér 1866, ch'il biadi veva otg onns. Sco jeu hai saviu constatar per mauns dallas notizias, ch'el ha nudau si, havevel grond interess ed ina certa luschezia da siu «tat Sten», ch'ils vischins titulavan buca

per nuot era «il retg da Tujetsch». El eri in um sec, grond, d'ina pelladira stgir-brina, in um viv ed activ, intelligent e da gronda malezia. Naschius 1784, eri el ius gia da dudisch onns a scola el Valleis e fatg a Sion 3 – 4 classas. Stuend veser leu cun agens eglis, co ils Giacubins franzos han destruui 1798 il casti episcopal da Tourbillon, seigi el turnaus a casa quei onn cun ina stermmentusa rabia el cor enviers quels pertadars dalla «libertad e fraternitad». Anno 1799, cura ch'ils Franzos ein dai sul Cuolm d'Ursera e ruts ella Cadi, seigi Tumaisch Schmed sepurschius d'era sebetter cull'arma encunter quels amitgs dil pievel. El eri lu mo sedisch onns vegls, vevi denton l'urdadira d'in mat da vegn. Havend giu fatg empau scola e scrivend sc'ina stampa,<sup>7</sup> essend resoluts e senza risguards, cura ch'ei fageva basegns, ha il cussegli d'uiara surdau ad el la scharscha da furier, ch'el hagi adempliu per cumpleina cumentientscha.

Plein fiug e curascha sco el eri lu ed era suenter adina, seigi el, malgrad las grondas miserias digl emprem decenni suenter l'uiara dils Franzos, maridaus gia da 20 onns, cun Maria Ursula Monn. Ei va buca ton ditg, ed el ei gerau, premgerau e plaun a plaun il factotum dall'entira val. Sco ei semuossa fuv'el insumma politicher tocca la crusta – perfin en sias poesias e comedias ch'el fageva en ses giuvens onns. Aschia raquenta Giachen Antoni Venzin da Rueras en sia specia da cronica, ch'il «Sten nair», vevi fatg 1836 ina zun interessanta cumedia pils da Tujetsch, che seigi vegnida dada ils 5 d'avrel a Rueras sin ina gronda lautga avon casa pervenda. – Il cuntegn da quella eri in signur, che tut levi far esser malsauns e dil qual ins cartevi ch'el vessi da tuttas uisas malsognas. El vegnevi mudergiaus da quater miedis che levien medegar il schani. Il davos seigi in bien vischin vegnius tier el ed hagi detg: quels quater cugliunien el e veglien mo tschitschar ora siu saung e sia buorsa... Il teater eri daus quell'uisa, che tut encurschevi, ch'il «Signur» personificavi il Svizzer e co quel seigi la finfinala vegnius sauns, seschond per reger da siu saun e bien natural. Ils quater miedis significavien las principales ideas politicas, arisguard ina nova constituziun. «Quels signurs quitavien, la Svizra seigi fetg malsauna e tonaton stetti ella silllas combas», scriva Giachen Antoni Venzin. Las ideas novas liberalas vevi gl'autur beffegiau e sgomiau quell'uisa, ch'el schevi better ora garnetschs dumiec giun plaun entras in survient; quel clamavi lu las «biuas» che representavien la massa senza giudezi – e quellas laguttevien enguordamein tut, rubas e strubas!

Donn che quella cumedia ei ida a piarder e che nus possedein oz mo pli la canzun da quella, che vegneva cantada tenor veglia tradiziun alla fin dalla cumedia. Quella lai bein aucn encorscher «la ductrina dil teater», – mo en general eis ella tenida alla maniera barocca dil 17avel e 18avel tschentaner. – Il «Sten nair», era gie staus scolar dils Gesuits! Ils anno 1842/43, 1846/47 e 1850/51 han ils Tuatschins, susteni dils auters umens da cumin, tarmess el a Cuera sil Cussegli grond; 1857 han ins eligiu el per treis onns ella dertgira districtuala a Trun. Proponius pliras ga mistral, ha el vuliu saver nuot da quella honur, mo nuotatonmeins cargavan las ideas da gliez temps burasclus profundamein en sia natira passiunada politica. El era insumma politicher e quei tochen osum la detta. Las ideas liberalas, che la revoluziun franzosa veva semnau en tuttas tiaras dall'Europa,

havevan fatg cagl er'en nossa tiara. Ellas eran carschidas cun ried dapi 1800 – 1840, essend nutridas e favorisadas d'ina flurenta economia, aschia ch'il temps dalla raccolta ruchegiava era en nies Grischun. Quei ch'il liberalissem da lezz'epoca desiderava, fuva la dictatura da partida en tut e dapertut; se capescha, era en fatgs culturals.

En nossa Surselva, entochen ussa serratamein catolica e perquei conservativa, ha il liberalissem medemamein empruau da far vau – ed in temps eis ei reüssiu buca mal, sil-meins arisguard las elecziuns e votaziuns. «Il Grischun Romontsch», (1836 – 39), la gasetta dils Latours liberalisonts, schebein aunc ualti moderada, ha tuttina ughegiala da far sgulatschar la bandiera blaua e quei pli e pli gagliardamein. Strusch dus onns vegls il Grischun Romontsch, che sur Giusep Maria Camenisch ed auters intelligents umens han fastisau exact e bein via e mirau dil niev apiestel. Cun ina curascha e forza temeraria senza paregl han quels cargau il bov per la corna entras igl «Amitg dalla Religiun e dalla Patria» (1838 e 1839). Las discussiuns ed uiaras, che suondan ussa denter quels dus organs, ein aunc oz in deleitg per tuts quels che han spért e razza e carezan ina situaziun clara e detscharta. Duront quels dus onns han quellas duas schanias pugnau da gust, purgau l'aria sursilvana – e fatg partida! Stuiu ceder han omisduas (1839 da Silvester!), mo la bova liberala ei stada tschuncanada per ina e per adina, e schebi ch'ei ha aunc dau enqual sbuau da temps en temps: vegni dominè ein ils pugniers liberals buc! Il mussament persuenter ein ils dus paupers sghignai, naschi ord la lètg sfurzada digl «Amitg» e dalla «Grischuna»: la «Nova Gasetta Romontscha» (1840/41) ed igl «Amitg dil Pievel» (I) (1841 fenadur-december), ch'ein domisdus morts per spir «neutralitat» e «diplomazia»<sup>8</sup>. La mort dil davos ha la soluziun dallas otg claustras digl Aargau caschunau. Sur Giusep Maria Camenisch leva prender posiziun egl «Amitg». Ses conredacturs, ils honors da Breil, levan buc – e per quei motiv han ins fatg in armistizi e schau murir quei trebelet d'in «Amitg» dalla mort voluntaria. Duront ils treis suandonts onns d'armistizi han ni ils conservatis ni ils liberals durmiu. Ils eveniments radicals encunter las claustras ed outras bravuras liberalas han effectuau, che las retschas conservativas en nossa Surselva e Surmir han fatg rascha. «Il Confederau Grischun» (schaner 1845 – fenadur 1845) ha renovau l'attacca e sunau la medema tiba, sco las otras gassetas «antigesuiticas» dalla Bassa. Mo la finala, avon che murir dalla «vana stenta», ha quei confederau grischun schizun stuiu laguoter in pèr ga péllas conservativas, che han caschunau ad el la segira mort!<sup>9</sup> Era tier nus temevan ins – buca senza raschun – la medema prepotenza liberala enviers instituziuns catolicas e perquei leva la pressa conservativa danovamein da mort en veta.<sup>10</sup>

Enten gliez temps da viva ed intensiva veta politica, pren era il tat da pader Basel i viva art e part da quella. Bien amitg da sur Giusep Maria Camenisch ed incarnau inimitg dil liberalissem, entscheiva era il pur da Rueras a far politica activa! Anno 1842/43 selai el eleger el Cussegl grond e va a Cuera plitost sco observatur. Schebi «mo pur» vesa el clar e bein, nua ch'il carr segeina ed el fa attents ses amitgs ella Cadi, ch'ei hagi num sedutar cun peis e mauns. Ils Latours denton e lur trabants – quellas umbrivas dallas umbriavas – cartevan ed agevan tenor il principi da opportunitad; la gatta morta era lur – arma!

Naven da 1843 entochen 1846/47 vegn il Sten nair buca pli tarmess a Cuera, mo gest anno 1847, il pli delicat ed interessant, po el puspei en sco deputau. 1847, la primavera, tuorna el da Cuera cun la ferma perschuaision, ch'ei detti gleiti uiara civila en Svizra e ch'ei savessi tgunschamein era dar in adual «moviment» el Grischun, malgrad ch'ils politichers grischuns dil pum sinceravan: Nus stein neutrals! Il Sten nair, in «Tumasch nuncartent» scheva e turnava a dir si per ses Tuatschins: «Dils da Cuera ston ins crer bia e fidar nuot! Veggend l'aura sut pli e pli recenta, spargnava il Sten nair ni turs ni turnialas, ni ella Cadi, ni vi d'Ursera.

Anno 1847 suenter mesa stad seradunavien ils da Rueras seras e notgs «orasè tiel scar-von Lucas Cavegn», nua ch'il Sten nair dilucidavi la situazion politica ed ugliavi da prender mesiras en cass che quels «d'anoragiu» massien cun forza armada encunter ils siat cantuns «Sonderbundis».

Assistent Schmed, pli mals perfin che las uolps digl Uaul Surrein, ha la finfinala cun agid dad enzacons fidai agiu sin agen quen e responsabladad. El ha priu contact cun litinent Fidel Cavelti da Sagogn, che corrispundeva sco agent denter Siegwart-Müller ed ils Grischuns catolicks. Era mistral Gieriet da Rueras cartevan ins, che seigi gudignaus pil culp – en casamai! Era gie Cavelti staus sez tier el la notg dils 10/11 da november a Rueras, accumpignaus dil salter da Lucerna. Strusch stada ordad esch quella viseta nocturna, ch'ei schabegia zatgei zun heicli ed interessant! Ils 12 da november suenter da quei ch'il Sten nair veva mess fil ella guila, cumparan, tarmess da Cavelti, plirs umens cun cavals da bast, grevamein cargai cun dudisch canistruns tochen a Rueras tier mistral Gieriet, nua ch'els levan descargar «la péra e meila». Mistral Gieriet, ferdond l'aura, «deschadescha» quei mument, accepta buca la muniziun e tarmetta anavos ils umens. Il Sten nair va suenter e gida a descargar e zuppar la puorla «en plunas lenna denter Sumsassi e S. Brida». Ils proxims dis sissu arriva il polizist Baltassar Kocher da Cuera e staziuneschia cun aunc enzacons – a Rueras! Enzatgei cumpatg ch'ei vevan ferdau, pertgei ch'ils emprems dis suenter esser arrivai, han els intercuriu ils ladretschs ed ils cals sut ils irals! Schebi che Sten nair veseva co ei steva, schevi el tuttina si per ses congiurai: «Schi von, main nus era; cuesti tge che vegli!»

Mo ei era mal far! Ils dus battagliuns grischuns, ch'ein vegni mobilisai plitost per tener pasch el Grischun, che per ira culs Federai encunter ils siat cantuns catolicks, eran staziunai entochen ils 19 da november a Glion e contuorn, aschia ch'ei era mal semover pils dalla Cadi e da Rueras.

Ils 17 da november ha colonel Luvini, cumandant dalla 6avla divisiun, alla quala ils dus battagliuns grischuns udevan, survegniu ina schlepra radicala dils Sonderbundis sil S. Gottard. En quella divisiun sesanflava era colonel Lanicca, sco cumandant dil genie. Ils 19 da november ein omisdus battagliuns grischuns marschai a Blizuna; ils 22 eran ei leu, aschia che nos confrars grischuns han buca pli stuiu batter encunter ils catolicks – ed aschia ein era ils da Rueras stai grad eri, pertgei ch'en quei interval era l'uiara gia decidida e finida.

Buca stai necessitai da siglir el fiug, schebein pinai leutier, han ils da Rueras fatg la gatta morta ed ein aschia mitschai dallas consequenzas, ch'ei havess aunc pudiu dar lunderora.

Mender eis ei in cul litinent Cavelti da Sagogn, ch'era staus duront l'uiara «Platzkommandant» dad Ursera! Da quel rapporta igl «Amitg dil Pievel» 1850, nr. 3: «Igl aventurei sonderbundic ed explatzcommandant d'Ursera Cavelti da Sagogn, ch'ei 1848 en contumaz vegnius condemnauis da nies suprem tribunal d'appellaz tier diesch onns prischnun en casaforz, sesanfla uss a Paris et ha survegniu ina plazza tiel cont Montalembert».<sup>11</sup>

Tut ils dalla Cadi patertgavan buca sco il Sten nair e ses amitgs en ed ord Tujetsch. Aschia legal jeu per exemplu ord la cronica da famiglia da Pieder Antoni Derungs, Breil (copia ella Biblioteca romontscha dalla claustra) – «1847 ei stau igl onn dil Sonderbund. Trests e deplorabels ei quei onn staus; dapli che dus onns ha ei entschiet a quidar sco il fiug sut la tschendra. Il chef dil Sonderbund ei staus Siegwart-Müller a Lucerna cun siu secretari Mayer – veramein eis ei stau ina manipulaziun da pres – nua che siat cantuns catolics han battiu encunter ils Confederai – Svizzers encunter Svizzers han battiu! Mo ils Confederai han giu il surmaun e sin quei ei la nova constituziun vegnida organisada 1848». Nus vesein: Breil e Tujetsch vevan ualти differentas ideas davart il Sonderbund!

Ferton che ton sco tut las vischnauncas sursilvanas fuvan conservativas entochen la crusta, dev'ei era outras, che fuvan buca meins catolicas, mo che votavan tuttina liberal. Liberal votavan ins perquei che nossa glieud suandava las personalitads da spért e slontsch – e quellas eran da lezzas uras ils Latours liberals! En Surselva ed oravontut ella Cadi vegnev'ei fatg avon 100 onns politica da famiglia – e pér en secunda lingia politica da partida. Denton savein nus mussar si, che ual suenter la fusun dallas duas scolas cantunalas eis ei vegniu auter, quei vul dir suenter 1850 ein las dinastias sursilvanas idas ualти rapid da rendiu e victorisau ha plau a plau il principi conservativ, che ha entochen dr. Casper Decurtins giu paucs exponentes da format! Avon ch'el ei cumparius sillla tribuna politica eran nos umens da maguol e muntada Latours, quei vul dir pli u meins liberals e tut ils auters ensemes, schebi buca liberals da casa anora, havevan pintga peisa ella politica directiva. Jeu puntueschel aunc ina ga: Ins era bein conservatifs da natira, mo vuschar vuschav'ins savens liberal!

Sche Tujetsch, Medel e Mustér votavan da lezzas uras preponderontamein conservativ e formavan cheutras in veritabel «rocher da bronce» dall'idea e ductrina conservativa, mava quei gnanc ton dalla claustra anora (ins patratgi mo dils paucs conventuals da gliez temps e ch'il pli capavel da quels era liberals!), mobein dad umens dil pievel anora, sco il Sten nair era in. E buc il davos derivava quella endinada tendenza dall'influenza dils umens dalla plema, sco per exemplu professor Placi Condrau e Gion Antoni Huonder, che scrivevan lur gasettas «Il Romontsch» (I) ed igl «Amitg dil Pievel» (II) cun spért e curascha e senza negin risguard dils «Signurs da Breil», ch'igl ei aunc oz in deleitg e

plascher da leger lur artechels da capo! Ins prendi tgei damonda da principi che ins vul e persequiteschi il slontsch e la forza perschadenta da lur plema! Per exemplu la dificultusa e zun spinusa questiu partenent la fusiun dallas duas scolas cantunalas en ina paritetica. Nos menaders politics, ils Latours, eran trasatras persuenter<sup>12</sup> ed han era realisau la caussa, ferton ch'ils «pigns», ch'eran en verdad la vusch dil pievel catolic sursilvan, han stuiu defender lur pugn da vesta mo els, aschibein ella gasetta, sco en lur sincers e curaschus votums el Cussegl grond.<sup>13</sup>

Gest en il Cussegl grond eis ei stau – e quei la davosa ga – ch'il «Sten nair», ni sco'l vegneva era numnaus plianoragiù «il patriarche de Rueras», ha priu la caschun da dir cuort e sinceramein sia opiniun, l'opiniun dalla gronda maioritad dil pievel catolic, en in curaschus e perschadent votum, che ha fatg impressiun el Cussegl grond, mo che ha giu negin fretg! Jeu sai che pader Baseli era loschs da quell'ovra da siu tat Sten e perquei suondi cheu il rapport leusura, sco igl «Amitg dil Pievel» porta quel en siu nr. 27 da 1850: «Uniuon dallas scolas avon il Cussegl grond» Schmed: El hagi entelgiu pauc dil plaid da signur capitani Latour, mo hagi el udiu, che quel seigi pella uniun, mo encunter quella stoppi el solenamein protestar. Tgei che hagi provocau quella idea (dalla fusiun) sappi el buca, forsa nossa paupradad? Mo quell'enconuschevan ins gia daditg ed ins dueva spargnar avon, denton vegli el buca plidar dil vargau. Ins duei dumandar il pievel reformau e catolic, sche vegn ins ad udir che quel vegli saver da neginas uniuns. El hagi gudiu bia amicezia dils protestants, hagi quels adina stimau e carezau sco frars e cristifideivels, mo l'educaziun dalla giuventetgna vegli el tener separau sco tochen ussa. Pella prosperitat dalla scola catolica drov'ins buca d'unir ella; signur capitani Latour hagi gie era studiau en quella ed ins hagi grad udiu che quel seigi in stupent oratur».<sup>14</sup>

Capeivel ch'in «patriarc» da tala tempra mava mal a prau cun la politica ufficiala da nos pugniers e ch'el ha silsuenter stuiu renunziar alla honour da deputau. Quei ha el dil reminent supportau levamein, schebi ch'el era da l'autra vart buc adina quel che schava plascher tut senza mussar ils dents e prender posiziun da lutga! Aschia raquentan ils vegls Tuatschins aunc oz dallas rabiadas rabantschas sin vischernaunca, cura ch'ei mava buca suenter giavisch dil «retg da Tujetsch». Cura ch'il Sten nair ed il Sten alv fruntavan en lutga, sesprunavi il da Rueras cul dies encunter il mir dalla casa da scola sin Cadruvi a Sedrun e schevi liber tut ils registers da sia passiunada eloquenza... mo sedems, sco en autras vischernauncas dalla Cadi, hagi tuttina mai dau en Tujetsch!

Inaga ha ina tala controversa sin vischernaunca perfin giu nauschas consequenzas economicas per la vischernaunca. Hans Giachen Beer era da lezzas uras premgerau (entuorn 1850), cura ch'ins ha mess tiarms egl Uaul Cavorgia denter Medel e Tujetsch. Per puntili ha il president da vischernaunca buca clamau il Sten nair, il pli versau en tals fatgs – e lez fussi probabel era buca vegnius! Basta, igl ei vegniu tier process e la vischernaunca da Tujetsch ha piars in bellezia toc uaul ed aunc in toc buna pastira entadem la val. – Suenter schevan ils Tuatschins, ed aunc oz di quei Giachen Martin Berther da Cami-

scholas, che la vischnaunca havessi aunc gudignau bia, era sch'ei havessien schenghe-giu al Sten nair pil bien survetsch «in tgavai da luxus cun sé siala e staffas d'argien!» Preziaz lectur, perduna sche jeu sun s'entardaus empau ditg tiel tat da pader Basel; mo enqualga han ils biadis qualitads e semeglientschas da spért e caracter aschi parentadas culs tats, ch'ei dat nuota donn dar in sguard anavos.


### 3. Ils onns da scola

Ils affons da Dieri stuevan ir a scola a Rueras. Buc in grond tschancun, mo persuenter in prigulus per temps d'unviern, cura ch'ei suflava e cuflava neuagiu da Caschlè e Londadusa. Eran ei sin via da cufla, sche schabegiav'ei savens, che siu frar Tumaisch, pèr 4–5 onns pli vegls, stueva pegliar il pign per la totona e smaccar el cun el per tiara, per buca stuer stenscher dils bufs che devan oragiu. Mo il sfollar via tras nevadas e cufladas entschaleva pèz e gambetscha als dus robusts scolars da Dieri, aschia che negins da Rueras dumignavan els da far da sedumignar.

Entochen 1856 vegnev'ei dau scola a Rueras en stivas privatas. Quei onn han ils da Rueras baghegian ina stupenta casa da scola pèr da lezzas uras, aschia ch'il Giachen Martin da Dieri ha giu la ventira da saver ira siat onns en «scola nova». Ses emprems scolasts ein stai Anton Schmed da Mompé-Medel 1866/67, ch'eri in bien magister en tuts graus; mo gia cuort temps suenter ha el giu sco «surmeister» Gion Antoni Soliva da Sedrun (1868/69), in mediocheret, che buca mo smenavi il fest. Suenter quels treis emprems onns ha el giu il cletg da saver ir a scola quater onns tier l'excellenta scolasta Maria Barla Pally da Rueras (1869/82 a Rueras). Quella fuva scolasta ed educatura tras - atras, da tempra e pissiun. Ina matta plein ideal, ina veritabla mumma da scolars e scolaras, ina femna ferma d'in'autoritat e disciplina distinguida. Jeu sai seregurdar bein, co pader Basel raquintava da quella aunc en ses siatonta onns cun tutt'affecziun ed entusiassem. Da cheu deriva ei era, ch'el sescaldava buca pauc, cura ch'ei fuva la tschontscha: Scolast u scolasta? En quei grau pretendeva el beinduras cun vehemenza, che per ils emprems onns da scola seigi ina scolasta il sulet ver. Ina buna scolasta hagi mo la scola el tgau, seigi il bia passiunada da sia clamada ed unfreschi cor ed olma a «ses affons». Ils scolasts encountercomi, e quei els bia cass, hagien per bia buca quei anim da sededicar mo al sogn ideal dalla scola. Els seigien il pli savens aunc enzatgei auter dasperas – e buca darar «dil tut» enzatgei auter. En quei grau schava el nuota metter giud via – e paupra quel che tuccav'en ina scolasta sco scolasta. Quei derivava oravontut da si'affonila carezia per l'oreifra scolasta da ses pli bials onns. – Cudischs vevien ei paucs, mo denter quels in fetg bien e bein applicaus a nossas relaziuns, numnadamein: Il cudisch instructiv da professer Placi Condrai, ch'el numnava aunc sco um vegl: il cudisch dalla patria!

Scola e recreaziun sebrattavien ch'ei eri in deletg, e paucs che hagien realisau aschi intensiv ils plaids dalla veglia canzun: «Mintga sera suenter scola lein nus ir a scursalar». E co quei sgulava neuadoragiu dis da samada, da Dieri entochen a Rueras!

Havend tschaffen per la scola, ha il Giachen Martin dil Duri Battesta da Dieni suandau igl exempl da siu frar vegled ei medemamein sededicaus al studi. Grazia alla bufatga beinstonza ed alla voluntad idealista da ses cars geniturs, ha era «il pign» astgau studegiar! Enta Dieni vevan ei ussa dus students – e quei custava. Mo ses buns geniturs udevan ad ina nobla èra purila-aristocratica, sco nus possedein aunc oz, Dieus seigi ludaus, beinenquala. En talas famiglias s'artan per ordinari duas bunas qualitads: il quet e la luschezia (ch'ein cheu ina vertid!) d'haver in studegiau en famiglia, sche pusseivel in augsegner. In aug da s'uratta, Venzin da Giuv, ei morts spiritual a Tersnaus; in aug da siu tat, sur Rest Antoni Schmed, ei medemamein morts sin pervenda, 1829, a Rueun. Dun e tradiziun targevan pia da quella vart en famiglia, schebi ch'il pader Baselí da pli tard ha duront ils onns da gimnasi mai propri pater-tgau da vegnir pader ni prer.



Claustro da Mustér

La preparanda ha il robust student tuatschin fatg 1873/74 on claustra a Mustér. Culla scola er'ei buca bia da lezzas uras a Mustér. Consequenzas dil barschament dalla claustra da 1846 e dalla famusa lescha excepziunala encunter ils catolics, che scumandava da recepir novizs ellas claustras. Buca smarvegl, ch'il baghetg e las localitads dalla casa da s. Placi fagevan plitost tschera da bargia e ch'ils paucs paders eran vegls e runavan peis. Era igl agid e succuors d'ordeifer ha buca pudiu metter en pei la scola, era buc il declarar quella per scola «episcopal» (suenter 1851). La preparanda era buca mal, mo il gimnasi piteva. Perquei capin nus, che la gronda part da nos students romontschs fagevan mo la preparanda a Mustér, per allura, suenter haver empriu empau tudestg, serender en auters gimnasis.

Conscolars da pader Baselí, che fussen stai cun el a Mustér ed a Sviz, ein oz negins pli en veta, mo nus savein sin fundament dad auters documents, ch'el era in pulit talent, buc extraordinari, e ch'el udeva all'emprema mesadad ensiviar da sia classa. Enten patertgar e luvrar er'el plitost plauns, mo persuenter zun exacts e punctuals, pli tard schizun pedants. Da scriver e plidar fuv'el in vess, mo era ei inaga secret, muncav'ei nuot pli, ni en cuntegn ni en fuorma. Ils plaids ch'el fageva scrivev'el treis ga, curregeva, strihava e memorisava, aschia ch 'igl auditur haveva ina buna impressiun da si'eloquenza

franca e segira. Da quellas varts er'el zun scrupulus, gia da student e pli tard aunc pir. El ha dessignau sesez inaga enviers mei, fagend jeu curvien ch'el hagi secret relativamein pauc, schebi ch'el sappi bia: «Mira, jeu sun adina staus luvrus ed activs, mo dumignavel nuota la maulta naven dalla pala!»

Il gimnasi ha el fatg cun success a Sviz, nua che la scola era buna da gliez temps. Finidas las sis classas, serenda el a Friburg al Collegi St. Michel, che veva aschi capavels professers per las davosas classas, ch'ins plidava senza exagerar d'ina facultad filosofica. Er a mi ha pader Baselii raquintau dils spiritus professers, che docevien leu la filosofia pernenis! – La matura era buc aunc obligatoria, mo a Cuera savev'ins tuttina far in'aschinum-nada «Staatsmatura» voluntaria. Candidats dalla teologia er'ei per ordinari fetg paucs che fagevan quella; perencunter fagevan ils candidats dallas differentas outras profesiuns academicas quei examen voluntari da maturidad. Giachen Martin Berther, da lezzas uras buc aunc sedecidius definitivamein per sia clamada, ha era vuliu far quella matura – e tut ei iu bein!

La stad 1879 ha el pia fatg la matura a Cuera, suenter haver fatg recrut cuort avon. Plein fiug e premura pil survetsch militar, ha el lu fatg la scola d'aspirant quella stad ed atun e vegnius numnaus litinent ella vegliadetgna da 21onn.

Quella pissiun vev'el era buc engulau sco ei para. Raquintava el gie sez enqualga d'in siu aug davart la mumma, Giachen Antoni, ch'era ius (1826) ella vegliadetgna da mo sedisch onns en survetsch jester a Neapel. Per tema ch'el fetschi buc ontras la mesira, veva quel mess il giug da troccas, miez e miez els calzers... e quei ha pudiu far! In Cavegn da Mustér havevi «fatg schuldada», ed els erien i quei onn otg da Tujetsch e quater da Mustér. Arrivai a Glion, per serender viers l'Italia, seigien quels dudisch apostels secunvegni da sfurzar il «Werber» da numnar els immediat caporals, ni ch'els tuornien tuts a casa. La finfinala ha quei schanli buca saviu far auter che dar las cordas e la schulda da caporal! Perquei seludavi igl aug enqualga, turnond per cuort temps a casa en congedi, ch'el seigi vegnius caporal avon che far recrut! Quei aug ei lu morts pli tard sco fideivel sergent dil retg da Neapel.

Gest da gliez temps veva il giuven officier grevs combats tgei far, per tgei sedecider: per la carriera militara ni per la teologia? Baul smenava el il sabel e baul sefuritgav'el ella summa dil grond Thomas d'Aquin. La finfinala ha el fatg in cumpromis per dus onns ed ei entraus empau anguschaus el seminari da s. Leci a Cuera, da 1880 gl'atun entochen la stad 1881, dus cuors. Aunc adina buc el clar dil tut ha el bandunau Cuera igl atun 1881 ed ei setratgs all'universidad dad Eichstätt, nua ch'el ei s'enscrets ella facultad filosofica-teologica. Siu sur frar Tumaisch veva medemamein fatg leu 2–3 semesters avon e quei buca mo teologia, mobein era aunc historia naturala e medischina. Era quei mument po per part haver entruidau el da serender all'universidad dad Eichstätt.

Cheu stojeu aunc menziunar, che pader Baselii da pli tard eri entraus 1880 ella Societat da students svizzers e ch'el hagi mantenu a quella la fideivladad entochen la mort. Giachen Martin Berther era in flot student, bials e beincarschius e veva buca pauc tschaffen per la veta studentica plein romantica da lezs onns. Animaus pils ideals dalla So-

cietad da students svizzers: vertid, scienzia ed amicezia, eis el era entraus ella «*Helvetia Eistettensis*», nua ch'el figurescha gia 1881 igl atun, entochen la stad 1882, sco resolut senior da quella, suenter esser staus eligius la stad 1881 el CC.<sup>15</sup> Siu stupent rapport da lavur da quei semester, cumparius ellas «*Monat-Rosen*» da 1882 (pag. 466/67) dat in verdeivel maletg dalla gronda e zun activa lavur scientifica, praticada duront quei semester sut sia bitgetta! – Ad Eichstätt ha el giu la caschun – ed era fatg diever da quella da frequentar ils renomai collegs d'enzacontas glischs sil candelier dalla scienzia, sco per exemplel professer dr. Hergenröther, professer dr. Pruner, professer Schneid, Suttner e Thalhofer.

Da quels raquintav'el savens cun grond respect, cunzun da Hergenröther, ch'el teneva per in dils pli capavels sciensiats tudestgs da gliez temps.

Cumbein ch'el era in elegant student da lezzas uras, seturpegiava el tuttavia buc da visitar duront las vacanzas ils numerus Tuatschins a Minca ed els auters marcaus dalla Baviera, nua che quels convertevan elllas grondas cascharias da lezs marcaus il latg en caschiel e pischada. Bia bunas relaziuns enfiladas da gliez temps culs Tuatschins egl jester han cuzzau entochen la mort.

Schebi premuraus per la filosofia e teologia, er'el aunc adina buca propi sedecidius tgei far. Dad in maun tergeva la veta militara e da l'autra vart la scienzia e veta claustral. Anno 1882, igl atun, ch'el veva mo 24 onns, entupein nus el sco premlitinent dil battagliun 90 ella Val Tujetsch tiels manevers dalla brigada. (El sez ha descret quels cuortamein en sia scartira: Sas era nua Giuv ei?) Cun quell'occasiun ha el giu caschun da gastar opulentamein sia entira colonna enta Dieni en casia.

Ussa vev'e num sedecider tgei far; ei era uras. Sco siu cusrin Giachen Martin Berther a Camischolas, ch'ei aunc oz bein en gamba, malgrad ses 85 onns di, hagi il pader Baseli da pli tard studegiau ditg quei onn, sch'el duessi buc ir a Ruma sco schuldau ed officier tiel papa. In bi di d'atun da quei onn seigi el vegnius tier el e detg: «Ussa sai jeu tgei far! Jeu mon en claustra a Mustér!» Detg e fatg! El lai ir cun sia biala barba brina, bratta l'uniforma culla sutana, il sabel cul rentamogn da s. Placi e semetta el noviziat. El tuorna a Cuera, finescha ses studis da teologia e tuorna en claustra spir premura da daventar in pader exemplar, il maun dretg da pader priur Benedetg Prevost, ch'era ual sil precint da restaurar la venerabla mo paupra casa da s. Placi e s. Sigisbert cun agid da Diu e d'enzacons giuvens fraters e paders.

Cura ch'igl avat Benedetg d'enzacons onns pli tard (1888) ha giu dumandau la mumma da pader Baseli (feglia dil Sten nair) per il cunsentiment da schar entrar siu fegl en claustra, hagi quella rispundi spiritusamein: «Quai stul sez savai; mu maneg'ju tge segi meglier dad esser ord claustra e mira anain, tg'esser ain e mira ano!»

Basta, il stupent officier da quels onns leu ei daventaus in religius e bien pader. Ils 16 da december 1884 ha il frater Baseli Berther fatg siu sogn profess ella baselgia da s. Martin, siu sogn patrun. Ils 25 da schaner 1885 ei il giuven pader vegnius benedius subdiacon a Cuera, ils 14 da matg dil medem onn diacon a Mustér ed ils 17 da matg spiritual. Sia sontga messa nuviala ha el celebrau per Gliendisdis-Tschuncheismas, ils 25

da matg 1885, sut gronda frequenza digl entir pievel dalla Cadi, essend quel plein speronza, che cun il giuven pader da Tujetsch obtegni la claustra in dils megliers sustegns per la restauraziun.

Quei di da gentar hagi, denter auters, era siu meglier amitg da scola e militar, signur generaladjutant Brügger da pli tard, fatg in stupent plaid, exprimend igl emprem siu smarvegl, ch'il flot officier tuatschin seigi uss en claustra e buc en caserna; mo ella secunda part da sia perorazion hagi el paregliau las vertids d'in bien schuldau cun quel-las da s. Placi e sincerau il bien amitg dils pli bials onns, ch'el hagi eligiu la megliera part!

#### **4. Il prefect e professer**

Cura che pader Baseli ei daventaus conventional dalla claustra da Mustér, ardevan aunc adina mo paucas cazzolas sillla plaunca sflurida. Ils paders pli vegls mavan a runond peis tier Niessegner, mo lur fatschas faldadas tarlischavan aunc en bara da gronda speronza, havend els finalmein anflau giuvens successurs plein fiug e carezia per ils ideals da s. Placi e s. Sigisbert: Priur pader Benedetg Prevost, pader Bonaventura, pader Bernard, pader Sigisbert, frater Maurus, frater Ursicin e pader Baseli. Ina pintga, mo persuenter ton pli premurada recruta, sin la quala il vegl e pauper convent astgava fundar sias pli bialas speronzas. Scadin da quels giuvnals – bunamein tuts gudignai per la veta monastica entras nies pli grond e meriteivel politicher sursilvan, il giuven idealist dr. Casper Decurtins, sescaldavan e barhavan en sontga premura per la restauraziun da nossa claustra da Mustér. Denter quels era pader Baseli buc il davos; era el gie da lezzas uras in bien amitg e fervent veneratur dil «liun da Trun». Enzacons semesters avon ch'el mondi en claustra eran els stai en stretg contact in cun l'auter, sco emprems ella Societat da students svizzers: pader Baseli sco commember dil CC e Decurtins sco redactur dallas «Monat-Rosen».

Igl ei buca smarvegl, che pader Baseli ha gia collaborau sco noviz e frater alla scola claustral, era quella gie adina siu ideal. Pader Baseli ei adina staus in idealist, mo buc in denter tschiel e tiara, anzi, in idealist cun domisdus peis giun plaun, in idealist che luvrava tenor plan e segira finamira. Negin curvien, che pader priur, daventaus 1888 avat Benedetg da Mustér, ha immediat surdau la scola a siu fideivel maun dretg gia il medem onn. Sco prefect alla testa da quella, ha pader Baseli luvrau e seduvrau per ella cun sogn entusiassem e perseveronza duront 17 onns, entochen 1905. Da lezzas uras er ei buc aschi bi ed emperneivel sco oz dad esser prefect e rector da quella tut en ina persuna! Ei veva num entscheiver tut da niev, pertgei ch'il fil dalla veglia scola claustral era ruts e negin veva aunc propri capiu d'empunir e filar vinavon. Ei era mal far: esser directur dad ina scola privata senza scolars e professers! Igl emprem onn che pader Baseli ha surpriu la direcziun dalla scola, dumbrava quella circa vegn scolars; 1905, cura ch'el ha puspei remess ella els mauns da siu avat, fuv'ella carschida sin siatonta! Sper la redei-vla lavour da prefect, stuev'el aunc remember cun sias forzas e siu temps aschi scart alla

propaganda da scolars, dasperas dar instrucziun en latin e franzos e tudestg e romontsch als Romontschs! «In grev buordi» ha el fatg inaga si per mei, raquintond da ses onns da prefect, «mo jeu erel endisaus da casa ano da purtar buordis ed igl ei iu!»

Pader Baseli carezava tut ses scolars ed ils biars carezavan e stimavan era el. Aunc il davos onn da sia veta ha el detg inaga a mi: «Paucs han emblidau mei; jeu per mei aber, seigien ei vivs ni morts, jeu vegnel mai ad emblidar els». Donn che buca tuts han capiu el, schebi ch'el manegiava schi bein. Sco prefect e professer fuva pader Baseli stregns e punctuals! Beinenqual seduleva, ch'el seigi memia recent, memia officier en tut e dapertut! Igl ei ver: el verteva negina resistenza e paupra quel che serebalzava! Lez vegneva buca vegls sin claustra! Dotaus da natira e da casa anora cun las qualitads d'in schuldaud en tut e trasatras ed havend silsuenter aunc empriu ed admirau igl uorden miltar en Germania, eis ei nuota smarvegl, che certas vertids d'officier preponderavan en sia pedagogica pratica. Duront ils onns da prefect survargan en el ed en sia educaziun las qualitads il bab rigurus. Pli tard, el temps dil migeivel sulegl atunil da sia veta, ha ei dau ina viulta bunamein radicala, aschia che las vertids d'ina buna mumma plein capientscha per ses affons ein vegnidias dominè en siu bien cor.

Il scribent da questa biografia ha enconuschiu el mo en questa davosa epoca ed astga sincerar ses lecturs da mai haver giu in amitg aschi matern, da schi sincera beinvuglientscha e bien cor sco pader Baseli! Il medem vegnan aunc biars da ses scolars ad haver experimentau. Sias noblas vertids d'in veritabel amitg, derivavan franc e segir da siu sacerdozi suenter il cor da Diu, «e schebein beinduras da sia vischinonza buca dil tut capius ed essend forsa sez era buc adina penetraus cun siu spert ellas intenziuns da quella, perquei ch'ei fuva buca dau agli da sfurzar sesez e sia cavazza tuatschina en mintga patratg ed ideal (da siu contuorn), sche fuv'el tonaton in caracter schuber sco gl'aur, che vegn honoraus e respectaus da ses veneraturs ed amitgs».

Las mellis brevs, ch'el ha scret duront varga curonta onns a ses scolars da pli baul, ad amitgs ed enconuschents, ein la megliera perdetga per la noblezia da siu cor e per las bunas qualitads da sia pedagogica e per igl effect da si'influenza. El s'interessava da tuts, da students e studegiai, gie perfin da quels – cunzun ils Romontschs che vevan buca studegiau en claustra.

Mo in pèr exempels. Sin meisa avon mei sesanflan zacontas brevs, ch'el ha scret avon tschunconta onns e varga ad in student romontsch, ch'era da lezzas uras alumn dalla scola claustral da Engelberg e che lavura aunc oz denter nus. El scriva a quel denter auter (Brev dils 17 da zercladur 1892, scretta per part en tudestg per part en romontsch): «Vorerst meinen innigsten Dank für Deine herzlichen Glückwünsche auf meinen Namenstag und dann auch für Deine Liebe und Anhänglichkeit an unsere Heimat, an unser Kloster. Ich weiss nicht, wie das kommt. Du bist nie unser Zögling gewesen und hast uns nichts zu verdanken und dennoch diese Liebe und Begeisterung für das liebe Vaterland. Quei ei enzatgei, che schai el cor da mintga ver Grischun, en particular ad in dalla Surselva. Ins sa ir nua ch'ins vul, en tgei collegi ni claustra ch'ins vul, ils Romontschs setegnan ensemen, els tegnan car lur patria sco lur agen saung. – Das ist auch

ein Stück Philosophie, ein schöner Zug unserer kleinen Nation, das wir mit den Irlandern gemein haben.

Engelberg ist Dir lieb geworden... Du gehst nächsten Herbst auf die Universität Freiburg, und da hast Du die beste Gelegenheit, Deinen Geist und Dein Herz auszubilden. Auch Deinen Beruf wirst Du erkennen, denn wer kindlich demütig den Ib. Gott und seine Heiligen um diese Gnade bittet, der wird auch den wahren Weg finden, der den armen Pilger durch dieses Jammertal zu Gott führt.

Tscheu stat quasi tut sil pei vegl. Mia recruta fa en general pulit; nus mein prest encounter la fin digl onn scolastic, e tut selegra sils bials dis da vacanzas e natural il prefect – era».

Aschiprest che pader Baseli senteva d'haver ina certa influenza sin ses scolars, ni era sin students ordeifer ils mirs claustrals, schava el buca dar il fil, mobein targeva per quel aschi intensiv ed endinadamein sco pusseivel. Capeivel, ch'el «persequitava» quels era all'universitat! – In'altra brev, scretta al medem ils 3 da schaner 1894, demuossa quei eclatantamein:

«Haiel retschiert oz Tia brev cun la cordiala gratulaziun e las diversas novitads da Friburg, per il qual jeu portel adina in'atgna affecziun. Engraziel grondamein persuentter. Admettel cheu era mes pli cordials auguris e salids pil niev onn: buna sanedad, nova curascha e premura per la scienzia sper las bialas e rehas fontaunas, sco era grond success en Tiu far e demanar. Virtus, scientia, quei ei e duei restar igl ideal da mintga student, e ventireivel quel il qual drova en ses giuvens onns sias forzas per corrispunder a quels.

E lu bien viadi sil retuorn a Friburg. Senezegia cun tutta energia e perseveronza da quella buna caschun, che Ti has dapresent; quei san ins strusch cuntschar en pli tard. – Che Ti vivies aschi retratg a Friburg el marcau ei ina buna enzenna ed ins sa concluder da bia ordlunder. Ils cudaschs ed ils manuscrets ein era buns, fetg buns amitgs... Sur Tes studis sai jeu natural dir pauc. Che Ti teidlas pedagogica, archeologia ei fetg ludeivel. Sil hebraic teness jeu buc aschi bia, sche Ti has buc el senn da star pli biars onns leu, e cussegliassel plitost da tedlar per exemplu economia naziunala, estetica, apologetica etc.

Denton Ti vegnas ad haver Tias raschuns, e perquei lessel jeu nuota haver prescret enzatgei. Da sedar giu pauc ni nuot cun politica, fas Ti fetg prudent; quei porscha mo di - straczun ed ins ha alla finala snueivel pauc avantatg». <sup>16</sup>

«Ussa aunc mia damonda, che Ti ed il Baselgia e Schmed saveis ventilar e ponderar, numnadamein: Nua duei dapresent in teolog grischun far la filosofia? A Sviz, a Nossa-dunnaun, a Sarnen ni a Friburg? In onn duess esser sufficient.

A Friburg munglassen ins saver tedlar dasperas enzatgei fisica e chemia. Tgei scheis sur igl examen da maturidad el Grischun? Jeu haiel gia daditg studiau vid quella caussa e vegnel era dumandaus per cussegli, mo igl ei grev da decider. Haveies endamen cun dr. Beck e teni in pér seras ina disputazion pro e contra. Vus capis bein avunda nossas relaziuns. Jeu spetgel lu sin Vies resultat».

Brevs ein enconuscentamein las megleras fontaunas historicas. Las duas citadas ed aunc tschiens autras muossan clar e bein, che pader Baseli era buca mo officier sco recetur, mobein era pedagog e bien cusegliader da ses attaschais. Sch'el fuva da l'autra vart fetg stregns cun ses students, sche daventava quei per bein manegiar e per gidar suenter ils cumadeivels enten far lur obligaziuns. Mava pader Baseli gie da quell'anora: che l'obligaziun seigi l'olma interna, la veta dalla educaziun!

Ils roms ch'el deva sper sias grondas e stentusas lavurs da prefect fuvan: latin, franzos e romontsch e tudestg per ils Romontschs. Sias uras eran emperneivlas, schebi ch'el pretendeva exactedad puntuala en patertgar, plidar e scriver. Passiunaus era el oravontut per la grammatica, e quei ei da capir sche nus enconuschein sia natira d'officier: Tut tenor regla! Exact e precis! Da l'autra vart pretendeva el buca memia bia alla ga. Siu principi fuva: Dai mintga di in tec alla ga sco tiels affons pigns, essend ch'in student ei sco ina vasa, l'entrada dalla quala ei stretga. Ch'ins derschi lu en bia ni pauc, ei va mai en bia alla ga. In da ses scolars, che dumbra oz prest siatonta, ha remarcau si per mei: «Dil pader Baseli hai jeu empriu aschi bein la grammatica tudestga, che jeu sai aunc oz tut las reglas ordado. Savend quellas, hai jeu mai disdiu ella grammatica; quei hai jeu d'engraziar a pader Baseli. Da l'autra vart vi jeu denton dir, che sia pronunzia tudestga eri quella – da tut ils buns Romontschs».

Che pader Baseli sedeva immensa breigia da mussar bein romontsch als Romontschs, mo era il tudestg a quels, demuossan sias duas extendidas, minuziusas e zun detagliadas grammaticas: la romontscha e la romontsch-tudestga, che existan aunc oz en manuscret e ch'ein tondanavon – en plirs manuscrets fragmentaris e commentaris adina puspei glie-madas e megluradas, ch'il davos manuscret ei screts aschi schuber ed exact sc'ina gravura, che vegn ual ord stampa. Da sias uras (1887–1900) havess el rendiu in grond survetsch als students romontschs d'haver schau ir en squetsch sias duas grammaticas! Mo ei era mai bien avunda! Denton duvrau e dictau ha el adina sias grammaticas als scolars romontschs. Ellas han tempra e caracter dalla veglia grammatica latina, e dil reminent san ins era constatar, ch'el sepusa il pli fetg sin pader Baseli Carigiet e sin profes-sor Muoth; mo da l'autra vart eis el tuttina sedaus tutta breigia da perfecziunar quels dus mieds d'instruczion e da render sias duas grammaticas pli levas e muganablas che lezzas duas. Aunc ils anno vegn entuorn ha el luvrau e trafficau vid sia grammatica romontscha ed havess magari giu mustgas da schar stampar quella, mo havend lu professer Cahannes publicau la sia 1924, ha el en tutta mudestad renunziau all'ediziun dalla sia malgrad, che enquala da sias ideas e reglas ortograficas mavan buca d'accord culla grammatica nova. Ultra dallas duas grammaticas, vev'el aunc el senn da publicar ina «Stilistica romon-tscha», sco ei seresulta ord 3–4 carnets en 8°, che stattan ual sin meisa avon mei, e ch'ein zun interessants fragments da differents capetels da quei mied d'instruczion, ch'ei deplorablamein buca cumparius. – Fragments sco «Reglas praticas per l'ortografia sur-silvana», «Substantivs cumponi», «Assimilaziun» «Expressiuns adverbialas cun igl ablative» «Tudestgems» etc. han aunc oz valeta e duessen vegnir consultai a caschun da novas ediziuns da grammaticas romontschas sursilvanas.

Che pader Baseli veva sco professer era la fleivlezia da ton sco tut ses collegas, ei capeivel: el carezava, gie, bunamein venerava ils buns, ils intelligents scolars. Quei daventava denton senza sprezzar ils meins buns, che fagevan reclamein lur obligaziun. Mo tgei plascher, cura ch'el veva giuvens intelligents, plein veta ed activitat giudapeis da sicutateder! Lu sbrinzlavan ses egls plein legria e cugl animar e tulanar a prestaziuns da emprema qualitat spargnav'el buc! Lu quitav'el d'era stuer cumparter sia legria ad auters. Aschia scriva el repetidamein ils dus davos onns da sia veta a mi sur d'in scolar, dil qual el saveva che jeu s'interessassi. Per exemplu 1929, ils 18 da november: «N. fa stupent, intelligenza extraordinaria, lavura cun grond interess ed ei en tuts graus in oreifer scolar. Sche mo nus havessen zacons da quels en mintga classa; tgei deletg ch'ei fuss lu dar scola». Ed in'altra ga: «Cura che jeu hai tals scolars sco igl N. avon mei, vegn jeu beinduras tschaffaus da tema ed anguoscha, sedumandond: Daventa quei ventireivel carstgaun giuven, dotaus da Diu culs tschun talents, buc in lump e valanuot? Enstagl d'in grond um, d'ina glisch per pievel e scienzia? Semeglionts dubis e patratgs turmentan mei buca darar!»

Contas ga ha el detg si per mei plidond dil medem tema: «Ils paucs propri buns, che studegian e vegnan la finala zatgei en uorden, munglass e stuess ins saver influenzar, sco Cristus ses apostels. Han ins quels, han ins tuts; gl'entir pievel e per zacontas generaziuns!» Tgi less pretender, ch'el vegni buca las meglieras intenziuns en quei grau? Jeu vi buca terminar quest capitel senza far menziun d'ina da sias pli caras ideas partenant la scola claustral, quei vul dir pli precis: la scola reala dalla claustra ed il pievel romontsch.

Sco forsa strusch enconuschent a tut mes lecturs, ha la claustra da Mustér giu da varga tschien onns enneu l'obligaziun enviers il cumin dalla Cadi da mantener e perfecziunar ina scola reala, che prendi oravontut risguard dils basegns economics, culturals ed educativs da nies sempel pievel puril romontsch e catolic. En quei punct ha ei savens muncau; enqualga buca per atgna cuolpa. Las relaziuns en claustra eran pliras ga quelluisa, ch'ei seschava buca far dapli che quei ch'ei vegniu fatg; mo cun empau buna veglia havess ins tuttina saviu prestar – en auters temps bia dapli per ina buna scola reala, senza stuer negligir e schar engaldir il gimnasi! Buca smarvegl, che nies pievel haveva e ch'el ha aunc oz pli u meins l'impressiun, che la claustra da nos dis daventa cheutras – cun negligir la scola reala per nos giuvens purs ed umens da faschenta pli e pli in'insla, ni oasa tudestga, enamiez il pievel romontsch.

Quei patratg e l'obligaziun che seresultava ordlunder mudergiava pader Baseli. Contas ga ha el priu l'iniziativa, ch'ei stuessi daventar enzatgei en quei grau. Cun tgei premura prendeva el mintgaton in catsch per realisar l'idea d'ina adequata scola reala per nos giuvens mats purils! E cun tgei success? Cun lidinuot negin!

El leva ina scola pli aulta per nos megliers giuvens, che vulan star en vischnaunca, che vulan far il pur, che vulan menar in di las fatschentas e la politica da vischnaunca e cumin. Cun in plaid: el leva ina scola reala per l'elita spirtala da nies pievel puril romontsch. El patertgava ad ina scola da 3–4 classas, ad ina scola dalla veta, cun tem-

pra pratica, che massi a prau cun ils basegns spirtals ed economics da nossa giuvna generaziun purila.

Mo malgrad tut: Sias repetidas bein manegiadas iniziativas da quellas varts ein stadas adumbatten. Nua ein las difficultads per la realisaziun d'ina tala scola? Quei fuss in interessant tema per nos politichers, sco per nos scolasts – e buca meins per sempels umens ord il pievel, che han il giudezi el ver liug.

## 5. Il pader

Schebein che pader Baseli ha targlinau in cuort temps e panzau duront quels onns leu endinadamein tgei vegnir: instructer militar ni pader benedictin, ha el tuttina anflau la suletta vera via, l'ideala clamada da pader. Pader Baseli fuva muntg da sum tocca dem, in claustral tenor igl ideal exempl da quels officiers aristocrats, che vevan da sias uras bandunau lur occupaziun mundana ella Ruma decadenta e suandau igl exempl da Benedictus da Nursia a Montecassino. Per ina natira sco pader Baseli corrispundeva la regla da s. Benedetg aschi bein ed aschi accurat, sco per igl officier siu reglament.

Igl ei strusch capitau ina ga – cun excepciuon d'enzacontas paucas maldispostadads – che pader Baseli fuss buca cumparius el chor tier l'orazion communabla, ch'ei gie pil pader l'occupaziun principala.

Pader Baseli fuv'era in bien oratur, schebi buc igl oratur da naschientscha, al qual l'eloquenza sburfla e sbuglia ord bucca e mongia. El sedeva breigiunas per mintga priedi. Quei prendel jeu ord plirs fragments e restonzas da ses priedis. Gl'emprem scrivev'el la disposiziun dil priedi, lu il text. Suenter vegneva il text curregius e midaus, il pli savens scursanius e concentraus ed alla finfinala scrivev'el quel per la tiarza ga – epi vegnev'e memorisau. Vid ses priedis sentevan ins la lavur e meditaziun, mo oravontut l'olma perschudenta, e perquei veseva il pievel da Mustér aschi bugen pader Baseli sin scanschala.

Pader Baseli era in grond veneratur da Nossadunna dalla misericordia ed attargeva ina gronda baselgiada, profunda en silenzi, oravontut duront ses priedis dil meins da matg. Buca smarvegl, ch'in religius da tala tempra haveva era grond succuors e success en confessiunal.<sup>17</sup>

Nies pievel veva gronda confidanza en el, ed ei dat aunc oz biars che seregorian cun engraziament dils buns cussegls, che pader Baseli deva ad els en tuts embrugls e di-scumets dall'olma. El e siu venerau avat Benedetg de pia memoria eran dus tarlischonts exempls dad umens religius e tuttina reals, als quals tschiens e tschiens ord nies pievel schenghegiavan lur cumpleina confidanza. E quei buc mo en damondas las pli delicatas dall'olma, sco per exempl en questiuns da clamada: da maridar, ir en claustra, star senza. Era en conflicts da letg e dispetas da semeglionta natira anflavan biars e biars la via a Mustér tier pader Baseli ni tier monsignur avat Benedetg. En talas questiuns operava el cun tact e maniera, che imponevan allas parts ed empunevan quei ch'era satel e sin rumper.

La pli gronda peisa partenent la veta pratica religiusa metteva pader Baseli silla cultivaziun dil ver spert dalla famiglia cristiana. En quei grau eran ses principis nunballuc-conts ed aschi clars sco l'aua da nos uals. Jeu vi skizzar quels cuortamein:

«Ils affons ein mo lu ventireivels el ver senn dil plaid, sch'els han geniturs religius, ch'ein er'els naschi e carschi en ina casa trasatras cristiana. L'educaziun dils affons sto entscheiver e continuar tier ils geniturs sezs; tut gl'auter ei frasas. Ina famiglia cun affons sto haver lartg e bien en casa – e perfin plaz e canorta per il cratsch nunspetgau. En casa duei reger negin luxus, mobein emperneivla sempladad, gust e cordialitat en stiva e combras. Sin meisa dueigi, sche zaco zaco pusseivel, veser ora meglier che sin dies. La stiva dueigi esser il sanctuari dalla famiglia. La famiglia seigi e resti la suletta «uniun» ora silla tiara; ei quella ferma, ei era la vischernaunca solida. Ils geniturs carezien lur affons e quella carezia creschi cul diember! Il pur sa adina occupar ses affons, ed ha ei buca plaz pli cul temps, laschi el emprender in mistregn: mo manuals daventan il pli savens schenta debrastgada. – Mo in affon dat pli quitaus che siat; dus ei memia pauc; treis ei meglier; quater ei famiglia; tschun ei aunc adina da dumignar; cun sis e plirs drov'ei buna curascha e bein s'enschignar – epi va ei, malgrad las grondas stentas dils geniturs. Quel che ha tema dalla veta, a lez creschan las anguoschas cun mintg'affon, lez vegn culla tschontscha marscha: ei seigi nunpusseivel d'haver affons en quels schliats temps. Quels che han quella tema, quei spért da cumadeivladad e d'haver «bibì», quels che vulan mo in ni dus, meretan dad ir a smerscha e cun els l'entira rateina da medema mentalitat. Il davos victorisescha adina la veta, e la forza dalla veta schai en nossas saunas e grondas familias purilas. Il stadi, che sustegn buca la gronda famiglia, moralmein sauna, ei gia sclavinaus e va a frusta». (Excerpau ord priedis ed autras scartiras manuscrettas da pader Baseli.)

Partenent las grondas familias pretendeva pader Baseli, che nos perdavons persuls vevien il ver sistem. Per talas familias s'unfrevien en sontga carezia fraterna augs ed ondas cun star senza e gidar nevs e niazas sin undreiblas vias d'existenza. Quei eri e füssi aunc oz ina dallas pli semplas e cristianeivlas sligiaziuns dalla questiu sociala. En quei grau seigi era tier nus iu da rendiu. Maridar vegli tut e purtar unfrendas mo paucs! Quei eran ils principis dil pader, ch'era sortius d'ina exemplara famiglia cristiana purila.

Jeu sai sereguardar, che pader Baseli scheva savens: Dalla dunna e mumma dependa pli che otgonta per tschien ventira e sventira dalla famiglia. Jeu enconuschel lètgs ord il sempel pievel puril, lètgs ch'ein veramein il sogn parvis già sin quest mund – e quei ein mo quellas ch'ein penetradas trasatras dil spért da Cristus. – Perquei capeschan tuts quels che han giu endamen cun pader Baseli il riscus pass ella lètg, ils plaids ch'el ha scret ad in giuven amitg, agurond a quel tut bien per sias nozzas: «Oravontut mia cordiala gratulaziun sin Tia gronda, impurtonta e legreivla fiasta. Dieus vegli dar a Ti ed a Tia preziada spusa tier quei serius, decisiv pass ella veta sia reha, compleina benedicziun, sinaquei che Vossa lètg seigi ventireivla en tuts graus e meriteivel per veta e mort. Possi Tia preziada spusa esser ina femna da profunda religiun, cun buna pratica intelli-

genza, cun paucas pretensiuns modernas! Tschenta alla bial'entschatta Tia lètg sin profunda basa catolica e pratiche scha veta catolica per perschuasiun, sche vegn la benedicziun da Diu buc a muncar ed era buca sia grazia e fermezia en tuts contrasts, che la veta vegn a purtar, ch'ei e resta per tuts: Bona mixta malis, mala mixta bonis. – Bugen vegnel jeu a sereguardar da Tei en quei senn en mias oraziuns, cunzun il di da Tias nozzas».

Partenent la cultivaziun dalla pietad e religiusadad ent'il pievel, haveva pader Baseli sias atgnas ideas, ch'eran profundamein ragischadas ella tradiziun da nossa cultura baroca catolica. El mava da quell'anora, che nies pievel romontsch seigi bein in pievel religius e da buna morala, denton seigien ils biars, essend da natira oravontut realists, tuttavia buca pratics enten igl exercitar la pietad. Da mistichers hagien ins udiu mo dad in Gonet da Giuv – e quel confimeschi la regla. Perquei stoppien ins gidar a praticar la pietad populara culs mieds ch'ils paders caputschins hagien duvrau: entras cudischs da devoziun e confraternitads religiusas. Nossa glieud hagi bein la buna veglia da meditar e dad esser devoziusa, mo ins stoppi gidar ella cun manuals spirituals. La devoziun stoppi vegnir empalada, ni ch'ella banduni las vias e mondi ellas palius, ni quei che fussi aunc mender: ella falleschi la via e mondi per trutgs prigulus.

Per evitar quels prighels e per dar enta maun el medem temps in compass per la devoziun privata, ha el publicau enzacons cudischs da devoziun ed ina partida litanias ed oraziuns da caracter da confraternitat, che jeu vi enumerar cheu sco exempl da sias stentas en quella direcziun:

1. Pren mira, Tiu retg vegn tier Tei! Mustér 1887. Stupent cudischet per la preparaziun sin la sontga communiu.
2. Il tschundubel scapulier. Nossadunnaun 1890.
3. Cudisch da messa per pietus affons. Nossadunnaun 1903; 2. ediziun 1922.
4. Collecziun d'oraziunettas cun perdun d'emprender ordado e da recitar savens. Dedicau als cars affons da scola. Mustér 1888, G. Condrau.
5. Remarcas sur la schinumnada «Corda paternos» digl uorden dalla sontga crusch. Mustér 1888, G. Condrau.
6. Il rusari dallas siats dolurs da Nossadunna. Mustér 1888, G. Condrau.
7. Empermischuns, che nies divin Salvador ha fatg alla B. Margreta M. Alacoque en favur dils vers veneraturs da siu sontgissim cor, sco era a tuts quels che promovan quella biala devoziun. (Cun maletg colurau) M. Gladbach 1898. – 1500 exemplars.
8. Act da consecraziun al sontgissim cor da Jesus. (Cun maletg colurau) M. Gladbach 1898. – 1500 exemplars.
9. Litania dil sontgissim cor da Jesus cun igl act da consecraziun prescrets da sia sontgadad il papa. Cun in maletg, en duas variaziuns, cun sempla rama cotschna. M. Gladbach 1900. – 4250 exemplars.
10. S. Alois da Gonzaga. Litania da s. Alois ed oraziuns. (Cun maletgs) M. Gladbach 1900. – 6650 exemplars.

11. Responsori en honur da s. Antoni da Padua. (Cun treis divers maletgs) M. Gladbach 1901. – 4600 exemplars.
12. Remarcas sur la schinumnada «Corda paternos» digl uorden dalla s. crusch, Mustér 1901, Condrau, 2. edizjun
13. Oraziun tier s. Benedetg per urbir ora ina ventireivla mort. Cun maletg da pader Rudolf Blättler. (Schau far il clisché e stampar a M. Gladbach, B. Kühlen) 1902. 3000 exemplars.
14. Oraziun tier s. Giusep, la quala sia sontgadad Papa Leo XIII ha recumandau pella devoziun digl october. (Cun maletg colurau) M. Gladbach 1902. – 500 exemplars.
15. Confraternitad dil sontgissim ed immaculau cor da Maria. (Cun maletg da Nossa-dunna dallas victorias a Paris) M. Gladbach 1903. – 5100 exemplars.
16. Uniun da s. Gion en favur dil hospezi per spirituals, numnaus asil da s. Gion a Zezras sper Cuera, 1904. (Cul maletg dil hospezi) Translaziun sin giavisch da revendissim dr. Job. M. Ruoss.
17. Suspirs tier il sontgissim cor da Jesus, 1907. (Cun maletg) M. Gladbach. – 1800 exemplars.
18. Zercladur. Act da consecraziun al sontgissim cor da Jesus (ed entginas oraziuns, cun maletg colurau) M. Gladbach 1907. – 1750 exemplars.
19. Litania da sogn Giusep, cun maletg – 5100 exemplars. M. Gladbach 1910.
20. S. Vigeli, uestg e marter, patrun dalla diocesa da Trent e dalla pleiv da Tujetsch. (Cuorta legenda ed oraziun, cun dus differents maletgs) Stampau a Mustér, G. Condrau, 1910. Ils maletgs ein vegni retratgs da Trent.
21. Oraziun tier Nossadunna per urbir ora ina beada mort. («Lichtdruckbildchen» en 28 diversas representaziuns da Nossadunna) M. Gladbach 1913. – 7000 exemplars.
22. Litania dil sontgissim cor da Jesus, 1913. (Cun in maletg dil cor da Jesus en auto-tipia). – 5000 exemplars.
23. Statutas dall’uniun da mummas a Platta, 1914. (Cun maletg da Nossadunna dallas dolurs) – Procurau per sur Tumaisch Berther. B. Kühlen, M. Gladbach. – 300 exemplars.
24. Uniun expiatorica per spindrar las paupras olmas dil purgatieri. – La Chapelle-Monthigen, Orne, Frontscha. 1914 (Cun maletg dalla caplutta da Nossadunna.)
25. Apostolat dils umens. (Cun maletg dil cor da Jesus) – Procurau per sur Tumaisch Berther, M. Gladbach 1914. – 7600 exemplars.
26. Oraziun en temps d’uiara, 1914, G. Condrau, Mustér. – 1500 exemplars. – Il medem onn ina secunda edizjun cun 1500 exemplars.
27. Act da consecraziun al Sontgissim cor da Jesus. M. Gladbach 1914.
28. Oraziun tier sogn Giusep, la quala sia sontgadad Papa Leo XIII ha recumandau per la devoziun digl october. Mustér, G. Condrau 1914.
29. Adoraziun perpetna dil sontgissim sacrament digl altar per confiert dallas olmas dil purgatieri, eregida ella claustra da muniessas, numnada «Leiden Christi» sper Gon-ten, Appenzell, 1917. (Cun maletg) Friburg, Stampa Canisius. 2000 exemplars. – Pagau da Stiafen Bundi, Curaglia.

Tut speciala premura havev'el dapi ses emprems onns en claustra entochen sia mort cun la «Confraternitad dalla mumma dalla misericordia» ch'ei vegnida erigida 1805 ella baselgia da Nossadunna entrais monsignur avat Anselm Huonder (1804–1826). Per quella eis el staus sia veta in scaldau promotur e protectur, il veritabel bab spiritual dils numerus commembers, che sevulvevan tier el en tuttas damondas da pietad.

A quei spért da veritabla religiusadad benedictina, ch'el leva implantar el pievel vischin da sia claustra, ein era d'attribuir sia premura e sias scrutaziuns davart las numerosas reliquias – las sontgadads, – dalla claustra da Mustér, che vegnan pertadas cun gronda pumpa e devoziun per la fiasta da s. Placi e dalla mumma dalla misericordia en proces-siun atras il vitg da Mustér.

El era adina presents ed organisava quellas manifestaziuns dil «til dils sogns» ed enconuscheva exact e bein las famiglias, che gudevan l'honur da purtar las «sontgadads». Donn ch'el ei buca vegnius a frida da scriver l'istoria da quellas.<sup>18</sup> Quei füss stau ina stupenta contribuziun all'istoria culturala dil baroc a Mustér. Cuort avon sia mort essan nus sediscurri sur quei tema ed el steva mal da buca puder dumignar silmeins aunc quella lavur.

## **6. Pader Baseli Berther, fundatur e fautur dalla Biblioteca romontscha dalla claustra da Mustér**

«Sie sind zum Bibliographen und Bibliothekar geboren» (Plaids da professer Böhmer a pader Baseli. – Brev dils 16-9-1887)

Giachen Martin Berther da Camischolas, dretg cusrin da pader Baseli, ha detg a mi pér da cuort: «Dieus seigi ludaus, che pader Baseli ha stuiu pender 1905 la prefectura sin ina clavella, schiglioc possedess oz la Biblioteca romontscha dalla claustra da Mustér buca la mesadad da quei ch'ella posseda e gliez füss oz, che tut tegn aschi fetg sil romontsch, ina macla per la claustra, ina macorta scrotta cun ina ruosna lien».

Quel ch'enconuscha la historia dalla Biblioteca romontscha da Mustér sto dar tutta raschun a Giachen Martin Berther. Quella caussa stat numnadamein, sco el ha detg e buc auter.

Igl ei buca segloriem, sche jeu pretendel cheu ner sin alv dad esser quei ventireivel discipel da pader Baseli, ch'ei il pli bein orientaus e scolaus davart igl origin, la svilupaziun ed augmentaziun dalla Biblioteca romontscha da Mustér. Quei deriva da cheu, che pader Baseli sez ei staus miu pli autentic magister en quellas enconuschientschas tut specialas.

Ina sentupada casuala ei stada la caschun da mia naschenta pissiun per la biblioteca da pader Baseli e per cudischs e bibliotecas romontschas insumma. Quei eveniment ei a mi aunc oz aschi presents e legreivels, che jeu sesentel bunamein sfurzaus da scriver el – naven da miu cor.

Jeu erel aunc in «studetgel», sco ins numna si Mustér ils pigns students claustrals, che jeu vegnevel ina dumengia suenter viaspras dil zuler grond dalla claustra ora cun in

tschupel romans da Carl May sut bratsch. Cheu entaupel jeu per schabettg il pader Baseli, che vegneva tut a buffond dallas scalas crap si. Essend neutier avunda, retegn el mei, pegliond cun sias ladezia brauncas vid mia schuviala. «Tgei has cheu sut bratsch? Lai ver?» Enaquella brauncan gia ses mauns grevs sco las tazzas d'in uors tut mes indians e selvadis, ed el fa si per mei cun tschera beffegionta, sarcasta: «Donn pil temps che ti slavidreschas cun da quella rauba schuoba, che vala buca il pupi ch'ei vegnius tartignaus. Ei fuss pli perdert che ti legesses mintgaton in bi cudisch romontsch, che mazzar il temps cun tschatscheras e bahaultschas fantasticas schuobas. Has capiu?» Revegnius che jeu erel in techet da mia surpresa ed havend tschaffau curascha, hai jeu lu rispondiu ualti supierbi e nunponderau: «Ho, bia mender che las tschaguolas da nos calenders e da nossas gasettas, schetgas e fattas sco curom ei il Carl May lu tuttina buc, ton ei franc e segir – ed auter havein nus romontschs gie nuot».

«Mo plaun, mo plaun, ti sabiut; ti has in'idea, ti, da nossa litteratura romontsch! Ussa vegnas ti grad cun mei, e jeu vi mussar a ti enzatgei che ti has tochen ussa ni viu ni sminau».

E schend quels plaids peggia el a mi per in bratsch e tila mei suenter el viaden ella Biblioteca romontsch, ch'era da lezzas uras a canorta en in camberlet dil zuler sura sper il dormitori dils students.

Pli tard hai jeu aunc visitau bia bibliotecas, bellezia bibliotecas, bibliotecas grondas, gie schizun immensas – per exempl la Biblioteca naziunala dalla Frontscha a Paris – mo ina tala impressiun sco la Biblioteca romontsch da pader Baseli ha fatg quei di sin mei, ha mai buc ina solia fatg. Il motiv ei forsa era, che pader Baseli veva quei di ina luna tut aparti e ch'el senteva in cert basegns da cumparter ina gada ad in «studetgel», sia pli gronda luschezia e siu pli grond plascher.

Cun eglis tarlischonts ha el mussau lezza emprema gada a mi ses scazis custeivels, ses scazis zuppai, pertgirai sco la poppa da ses eglis. Tgei smarvegliadas hai jeu buca fatg quei di! Mia surpresa ei stada lezza emprema gada aschi intensiva ed encarschida, che jeu audel aunc oz a tunond ses plaids en mias ureglas e che jeu hai aunc oz avon mes eglis exactamein las crunas da cudischs e tgei cudischs sesanflavan sin quellas.

Dapi lu – quell'emprema viseta alla Biblioteca romontsch hai jeu fatg 1916 il matg – ein prest treis decennis vargai, ed ei vegn gleiti tredisch onns ch'il bien pader Baseli ei ius vi ella perpetnadad tier ses per davons.

Suenter lezz'emprema viseta a sia biblioteca, a caschun dalla quala pader Baseli veva capiu da plantar el cor d'in giuven student claustral carezia e plascher per ils affons spiritals e culturals da nossa paupra e mudesta mumma romontsch, sundel jeu turnaus biaaras e biaras gadas en quei sanctuari da reliquias romontschas. Gie, tgi less dumbrar tut las uras che nus essan stai leu ensemen, cunzun la stad, ils davos onns avon sia mort? Quellas uras nua ch'el raquintava a mi dil vargau, dil present e futur da nies romontsch e da nos umens, ein per mei nunemblideivlas. Ellas ein era la raschun da quest capitel special, che jeu dedicheschel cun engraziament e cor attaschau alla pia memoria dil car magister.

*La historia dalla Biblioteca romontscha en claustra da Mustér*

«Di a mi nua ch'i ein (ils cudischs)  
e jeu ditgel a ti tgei che ti sas.»  
(Ord ina brev da pader Basel)

Las empremas novas d'ina biblioteca romontscha en nies cantun, havein nus da pader Placi a Spescha, conventional da Mustér.

Anno 1805, sis onns suenter il barschament dalla venerabla claustra entrais las truppas giacubinas, emprova pader Placi a Spescha da reconstruir ord sia memoria il vegl archiv e la Biblioteca romontscha dalla claustra da Mustér. Scrivend quei interessant studi sut il tetel: «Litteratura grischuna vedra e nova»<sup>19</sup> va el anavos entochen 1776, sespruond da dar als veggentsuenter ina idea, co quella veglia biblioteca romontscha veseva ora avon gliez onn. El relatescha en emprema lingia sur ils manuscrets: «Jeu hai anflau ina grammatica bein ornada e bein rugalada cun in dicziunari latin, romontsch e tudestg, denter las scartiras da Mustér, mo gl'onn da naschientscha muncava, schegie quel dalla copiada era. Jeu hai anflau leu in auter dicziunari dil tschentaner 17, dil qual pader Maurus Cathrin dad Ursera fuva igl autur. El tschentava il romontsch ed il latin suenter, enqualgadas era il tudestg. Il sura numnau archiv cunteneva ina certa scartira, ch'ils paders benedictins da Mustér, denton ch'ei studegiavan a Paris, han copiau e purtau cun els anavos, la quala cunteneva in lungatg pareglions al lungatg da Sursaissa romontscha e Giadina. Jeu sai veramein buca pli tgei materia ella tractava. Quei medem archiv cunteneva l'interpretaziun dils quater cudischs dalla imitaziun da Christi, la regla da sogn Benedictg ed il martirologi roman en manuscret. – Encuntercomi la biblioteca dalla claustra da Mustér conservava las ediziuns las pli veglias dils stampats en quei lungatg ed era diember manuscrets, che eran da diversas sorts materias.»

Ed en in'autra scartira<sup>20</sup> di el puspei: «Dil secul 14 enneu entscheivan las scartiras, mes-sas giu el lungatg romontsch. Quellas cuntenevan plaids da nozzas, engraziamenti, can-zuns profanas e sacras e cumedias e tuttas quellas eran screttas alla moda moderna».<sup>21</sup> Sin quei dat el lu in'interessanta survesta dallas principales ovras engiadinesas e sur-silvanas, ch'ein cumparidas en squetsch<sup>22</sup> e che la biblioteca da Mustér possedeva tut-tas! – Denter auter era duas ediziuns digl ABC per las scolas sursilvanas, che nus havein anflau en buc ina solia biblioteca romontscha dad oz. Quellas duas interessantas notizi-as secloman: «Gl'onn 1730 ei vegniu squitschau a Mustér igl ABC cun in cudischet da numis.<sup>23</sup> E lu «Egl ABC che la claustra ha schau stampar 1730 ei d'anflar: j, k, x, y ed igl u distinguuis dil v. Il medem ei restampaus igl onn 1745 e vegn neunavon cun igl ä, ö, ü ed œ, etc.»<sup>24</sup>

Quellas paucas notizias partenent il cuntegn dils dus cudischets ein bein in segir mus-sament, che pader Placi ha viu ils dus cudischs e fatg diever da quels.

Ei seresulta pia, che la claustra da Mustér possedevi da bia manuscrets romontschs, sco-era ina completa collecziun da tut ils cudischs stampai, engiadines e sursilvans, ento-chen anno 1799.

La pli interessanta notizia denton, ch'el fa partenent la historia dalla biblioteca ed archiv, ei la suandonta: «Quei era veramein igl archiv dil lungatg romontsch, il qual digl onn 1776 naven ei vegnius malamein splimaus, digl onn 1785 envi malamein cultivaus ed alla fin, igl onn 1799, totalmein darsentaus.»<sup>25</sup>

Partenent quella remarca il suandont sclariment: Avon 1776 ei la biblioteca claustral vegnida pertgirada, augmentada e conservada duront varga tschunconta onns dil pader Martin Biart, oriunds da Selva, Tujetsch, che eri, tenor pader Placi a Spescha, in excellent archivar e bibliotecar.<sup>26</sup> Quei stupent Tarlep vevi buca mo il regl da rimnar e pertgirar cudaschs, mobein era las marvegliaas da mirar tgei che stetti en quels. E sia memoria dil legiu eri talmein fenomenala, ch'el savevi il text da bia cudaschs ordadora, plaid per plaid, sco per exempl il cudaschs da Vergil ed il quater cudaschs da suandar Cristus. El ei morts 1774 ella vegliadetgna da 79 onns, dils quals el ha viviu 62 en claustra.

Suenter sia mort han disturbis e viriveris interns furiau in temps en claustra (patertgeien al regiment d'avat Columban Sozzi) e sco pader Placi a Spescha di, seigi en consequenza da quels igl archiv all'entschatta vegnius splimaus, e lu malamein cultivaus e 1799 totalmein darsentaus.<sup>27</sup>

Quei ch'ins vevi aunc pudiu liberar lezza gada ord las flommas – aschia ha pader Baseli Carigiet raquintau al student Giachen Martin Berther e lez a mi, suenter sez esser daven-taus pader Baseli – seigi iu a frusta tiel davos barschament dalla claustra ils 28 d'october 1846.

Interessants documents da litteratura e cultura romontscha vevan pia stuiu suttacum-ber, mo la carezia per lungatg e cultura indigena era aunc viva ed ardeva sco cotgla bur-nida sut la tschendra. Cun la vegnida da pader Baseli Carigiet,<sup>28</sup> oriunds d'ina famiglia aristocratica da Mustér, ei la cultivaziun dil romontsch puspei vegnida en slontsch. El ei staus exempl e muossavia pils auters conventionals, che han luvrau cheu ils davos tschien onns pil romontsch sursilvan e sia cultivaziun.<sup>29</sup> Mo sco pader Baseli Berther ha raquintau a mi pliras gadas, veva pader Baseli Carigiet deplorablamein buca patertgau alla fundaziun e rimnada d'ina nova biblioteca romontscha. Anzi, el hagi gidau a rimnar professer Ed. Böhmer e dau a lez bia caussas, che fussen stadas in ornament per ina nova biblioteca romontscha en claustra. Aschia ha pader Baseli Carigiet per exempl per-fin regalau a Böhmer ses agens manuscrets romontschs, e perquei sesanflan ils originals da sias lavurs romontschas oz en la «kaiserlich-königliche Hofbibliothek» a Berlin. Pader Baseli Carigiet ei morts 1883 e da quei temps possedeva la claustra da Mustér negina biblioteca romontscha.

Mo gest quei onn (1883) entra pader Baseli Berther en claustra. Gia sco frater ha el entschiet a semetter vid la fundaziun d'ina nova biblioteca romontscha. Igl impuls leu-tier ha el survegniu gia da student, vesend el numnadamein fetg nuidis, co professer Böhmer – ch'el ha aunc enconuschiu – mava cun entiras cargas cudaschs ord Surselva en Tiaratudestga. Igl emprem contact cun quei um ha el sez descret en siu pli davos studi historic: «Denton buca mo politica e troccas havevan ins el tgau. All'entschatta dils onns 1870 vegneva reguladamein la stad dr. Ed. Böhmer, professer dils lungatgs

romans all'universitat da Strassburg, a Mustér per far studis el lungatg romontsch e per rimnar litteratura. El prendeva adina albiert ella «Cruna». La sera seteneva el si bugen amiez ils hosps, raquintava e dumandava quei e tschei sur expressiuns, plaids e pronunzia dil lungatg. Professer Placi Condrau era cheu da casa, nus tedlavan tier cun grond interess, confirmavan e devan il tgau. La davosa sera, avon che prender cumiau, enviava dr. Böhmer en ses amitgs tier in glas vin, teneva in plaid romontsch, scheva «viver» il lungatg romontsch e – «viva» sin seveser!»<sup>30</sup>

All'occasiun dalla mort da pader Basel Berther eis ei vegniu scret, ch'el hagi specials merets «per l'augmentaziun e conservaziun dalla biblioteca romontscha.» Quella remarca ei buca dil tuttafatg gesta ed exacta. Pader Basel Berther ha buca mo augmentau e conservau la biblioteca romontscha en claustra a Mustér; el ha schizun fundau ella.

El ha raquintau a mi pli ch'ina e pli che duas gadas, ch'el hagi fundau la biblioteca romontscha igl onn 1883. Sco giuven noviz hagi el in di fatg la curella tras tut las cel-las claustralas per rimnar las davosas reliquias dalla veglia biblioteca romontscha. La sera da quei di hagi el purtau tut quei ch'el hagi anflau en siu scapulier – ei eri ton pauc, ch'el vessi giu plaz per aunc inaga ton – si el camberlet sper la biblioteca dils students, nua che la biblioteca ha giu albiert entochen 1928. Quei pugn plein cudischs ei stau igl emprem crap da cantun dalla hodierna Biblioteca romontscha dalla claustra da Mustér.

Mo ver idealissem e sincera carezia per nossa cultura romontscha han fullau via tras tuttas difficultads e schau negin plaz per sterment a pessimissem. Per sia tipica missiun da rimnader ein oravontut ses talents d'officier stai bein survi. Ses schuldaus e sias patruglias fuvan ils students romontschs, ch'el tarmetteva ora els vitgs ed uclauns cul camond d'intercurir e palpar giu tut las crunas da cudischs ed ils surcombras da nossas casas romontschas. La reserva formavan ses amitgs, ils augsegners romontschs. Nua che quellas duas truppas pudevan buca tonscher, leu gidava franc e seguir la cumparida personala dil simpanic cumandant. Buc ina solia fortezia pudeva resister a sia migeivla attacca ed a sia supplica mudesta. Scadin cudisch, e fuv'el aunc aschi scarpaus e scultschanaus, vegneva rimnaus, registraus e mess en salv.

Gia 1886 ha el la gronda satisfacziun da posseder beinenqual raritad, ch'era buca registrada el «Verzeichnis da Böhmer», cumparius 1883. Quei constatein nus ord ina brev da Böhmer, adressada a pader Basel Berther.

Quella brev ei aschi interessanta e caracteristica per omisdus umens, ch'ella mereta da vegnir publicada.<sup>31</sup> Pader Basel ha ultra da quei giu detg a mi la davosa gada che jeu sun staus cun el ella biblioteca romontscha: «En cass che ti scrivas in di zatgei sur las bibliotecas romontschas, sche fai lu era menziun dallas brevs da Böhmer che jeu hai aunc cheu.» Ord quell'emprema brev seresulta ei, che pader Basel veva tarmess a Böhmer in supplement per in ulterior «Verzeichnis», che lez veva el senn da publicar. Da l'autra vart vesein uns, che Böhmer veva buca gronda speronza per ina nova biblioteca romontscha en claustra a Mustér e che el emprova dad acquistar ils cudischs sursilvans rimnai da pader Basel. Mo pader Basel ha buca schau pegliar ed aunc meins schau pender las

alas. El ha cuntuau e cun bien success; era a Böhmer ha el fatg amogna dublettas encunter dublettas – denton vendiu cudischs rimnai, rars, vegls, ni unics: quei ha pader Baseli mai fatg ed havess era buca fatg per tut ils daners dil mund buc. In onn sissu ha pader Baseli puspei tarmess in rodel supplement da sia biblioteca augmentada, cartend el numnadamein che Böhmer publicassi en cuort in niev «Verzeichnis rätoromanischer Literatur.» Essend era quella risposta da Böhmer buca meins interessanta ed el medem temps in stupent attestat pil giuven bibliotecar claustral, suondi era quella cheu sut.<sup>32</sup> Cuort suenter quella brev – la davosa da Böhmer a pader Baseli – ei professer Böhmer morts; deplorablamein eis el buca vegnius a frida avon da publicar las contribuziuns bibliograficas da pader Baseli Berther.

Partenent la gronda collecziun da cudischs romontschs, fatga entras professer Böhmer, steva pader Baseli mal, che beinenqual unicum era arrivaus sin quella via a Berlin – per mai pli turnar el Grischun. A caschun ch'igl autur da questa biografia ha stuiu retrer in da quels da leu per diever da studi, hai jeu cumpartiu quei a pader Baseli e lez rispunda, fagend ina murdenta remarca: «Igl ei ina vergugna per nus da stuuer schar vegnir nos cudischs da Berlin! Havein durmiu!» (Ord ina brev dils 21-5-1928).

Secapescha che pader Baseli ha buca mo brattau e marcadau cun professer Böhmer, mobein aunc cun bia auters. Il pli activs en quei senn eis el staus da 1891 entochen 1900. Quei muossan las brevs ella Biblioteca romontscha da Mustér che pertuccan quella caussa. Aschia ha el per exemplum cumprau e brattau bia cun Werner Hausknecht, libraria ed antiquariat, S. Gagl,<sup>33</sup> sco era pliras gadas cun J. Hess, libraria ed antiquariat, Ellwangen, e cun otras firmas pli pintgas.

Naven da 1891 entochen 1906 muossan brevs, registers da desiderata e registers da dublettas<sup>34</sup> che pader Baseli Berther e professer J. Candreia, bibliotecar cantunal, han brattau, cumprau e vendiu in a l'auter circa 300 differentas ovras romontschas. Quellas brevs ein el medem temps in clar mussament, ch'els luvravan maun en maun pil medem bi intent, cun ina premura ed in idealissem d'inamurai, per ina caussa veramein patriotica culturala. Quellas brevs ein era in document, ch'els havevan oravontut bien adatg da buca schar mitschar ord il cantun cudischs ni manuscrets romontschs, ch'ina ni l'autra dallas duas capobibliotecas grischunas vevan buc aunc. Propi in'undreivla e vicendeivla mentalidad e missiun, che fa honur ad omisdus!

In grond giavisch da pader Baseli ei stau sia veta da vegnir sissu tgei ovras romontschas seigien vegnidias a London el British Museum, essend che ei mava la tuna d'in temps, che quel possedi la pli gronda collecziun dad ovras romontschas. Cheu arriva in di d'atun digl onn 1930 ina dunshala Elisabeth H. Alexander da Glasgow, Scotlandia, a Mustér, per far ina viseta alla biblioteca romontscha. Pader Baseli profitescha dalla caschun e dat commissiun a quella signura d'orientar el sur la biblioteca romontscha a London. Il december 1930 survegn el lu risposta en quei senn, ch'ei sappien sez buc el British Museum propi tgei ch'ei hagien, essend ch'ei existi negin catalog special per las causas romontschas. Da l'autra vart fa ella era attents pader Baseli sin ina pintga biblioteca romontscha all'universitad da Glasgow.<sup>35</sup>

Secapescha ch'il grond diember dils cudaschis ella biblioteca a Mustér ha pader Baseli rimnau sez, oravontut en Surselva. Aschia eis ei buca da sesmarveglier, che sia biblioteca ei la pli completa partenent las ovras principales e pli veglias en idiom sursilvan. El raquintava er a mi, che beinenqual scolast vegl, «da quels da tschels onns», hagien fatg ad el gronds e nunapprezieivels survetschs entras schenghegier a sia biblioteca tut quei ch'els vevien. «Quei era scolasts, che vevan aunc mai udui d'in moviment romontsch, mo che carezavan sur tut en e tut ora ils cudaschis romontschs.» Denter quels ha Placi Bisquolm, scolast a Disla (1820–1904), ils pli gronds merets per la biblioteca romontsch en claustra, essend che quel ha regalau a siu amitg pader Baseli bunamein l'entira schurnalistica da 1836–1880! Il Bisquolm fuv'il pli bi e sogn ideal d'in scolast ed els cudaschis fuv'el inamuraus – aunc pir che ti e jeu – e ti scrivas in di sia biografia! Quei fas ti! Has capiu?»<sup>36</sup>

Ch'il Placi Bisquolm era inamuraus els cudaschis hai jeu mez saviu constatar, sin claustra sco giu Disla – mo pader Baseli era franc buca meins. Contas gadas ha el clamau mei per cumparter sia legria, cura ch'el veva puspei anflau ni survegniu in cudasch u manuscret, ch'el veva buc aunc.

«Gianteren, Guglielm; neu cun mei sin biblioteca; jeu hai puspei ina rarissima raritad, ni a Cuera ni a Berlin han ei quei cudasch!» E lu mavan nus en biblioteca e stevan uras ed uras, miravan, contemplavan ed intercurevan manedlamein la «nova» raritad. Jeu sai mai emblidar, co el strihava lu ses cudaschis, sco sch'ei fuss sontgas reliquias e co el raquintava a mi la historia da bunamein mintga cudasch. Enqualga sin biblioteca, cu nus eran el fiug dil raschieni, cu nus plidavan da nos «prominent», dalla litteratura, sur quella e tschella «antiquitat» dalla biblioteca, sche udevan nus gnanc, cu ei stgalinava da tscheina buc. Mo mirond vonzeivi sill'ura, schev'el riend: Zafarmust, ussa vein nus puspei unfriu quater uras alla pissiun; dabot tiell'oraziun!» E vi e da zuler ora mav'el tut agradsi sc'in coniv e cun pass franc e segir, sc'in officier s'avanzond all'attacca.

Mo la pli gronda legria da quellas varts ha pader Baseli sentiu 1914 da «S. Placi grond.» Dapi 1883 havev'el fatg catscha sigl Adam Nauli, «Anatomia dil sulaz» ina rarissima raritad dalla litteratura sursilvana, stampada a Lyon 1618. Cheu il di dalla gronda fiasta, duront il gentar festiv en claustra, sesaulza tuttenina ord la mesada sur Rensch cun gronda solemnitad, tenend in bi cudaschet en ses mauns. Las mesadas ein spanegiadas. E cun raschun! En in cuort e marcant plaid fa igl oratur da saver alla gronda raspada, ch'el tegni enta maun il pli prezios cudasch dalla litteratura veglia e che pader Baseli hagi gia isau ora bia pèra calzers per traplar quel zanua en in teschamber ni sin in surcombras. Cun la fiasta dad oz hagi ei fin cun quellas cuorsas e spiuadas per ina e per adina, essend che da quell'ovra, ch'el tegni in bellezia exemplar enta maun, detti ei sil pli treis exemplars sin quest mund – ed il pli bi da tuts surdetti el oz cun grond plascher a siu bien amitg pader Baseli. E schend quels plaids ha el dau a mi nies bellezia «Nauli», epi eis ei vegniu a mi aschi tup entuorn ils eglis, che jeu hai stuiu schar siglir las larmas... pos cumprender! E cu pader Baseli ha raquintau a mi la historia suenter onns, vev'el puspei larmins els eglis, che sepinavan da far il tgaubriechel sur sias grassas gaultas cotschnas oragiu.

Enzacons onns pli tard di el puspei in di a mi cun in tschaffen nundescrivibel: «Patratga, ussa hai jeu survegniu d'in pader caputschin in secund Nauli, in bellezia exemplar tut entirs. Quels dus dess jeu a negin e sch'jeu survegness 100 000.-frs persuenter!» – Aschia carezava pader Baseli ses cudasch!

El encuraschava era mei da rimnar ina biblioteca e savevel jeu ina ga u l'autra dar bunas novas partenent novas acquisiziuns, selegrav'el buca pauc cun mei: «Gratuleschel tier Tias acquisiziuns ella litteratura romontscha. Ti fas alla finala aunc concurrenza a mi! Denton sas Ti esser segirs, che jeu hai tuttavia buca nuidis. Anzi!» (Ord ina brev dils 7-11-1926.)

Anno 1928, all'occasiun da siu 70avel onn da naschientscha, hai jeu giu scret in artechel sur sia biblioteca, per far ad el in plascher.<sup>37</sup> Denter auter vev'jeu era scret: «Die grösste und an Handschriften reichste romanische Privatbibliothek besass unumstritten Dr. C. Decurtins, der verdienstvolle Herausgeber der Rätoromanischen Chrestomathie. Ein Blick in dieses monumentale Werk setzt uns in Staunen über den Reichtum der glänzenden, einzig dastehenden Hausbibliothek des Verfassers. Auch diese ging vor einigen Jahren durch Kauf an das Kloster Disentis über.

Pader Baseli ha giu grond plascher da miu artechel, mo partenent la sura remarca, ha el scret: «Quei che Ti scrivas davart la biblioteca da Decurtins p. m. ei ver, deno la davosa construcziun; gliez ei ina grossa tschaguola, che Ti stos curreger en cass che Ti scrivas aunc ina gada zatgei sur bibliotecas romontschas. Neu si tier mei cu Ti tuornas en vacanzas e jeu vi dir a Ti, co ei stat cun quella caussa.»

Mia smarvegliada ei buca stada pintga. La caussa ei cuortamein quella: En Biblioteca romontscha dalla claustra da Mustér ein negins unicums, q. v. d. stampats che la claustra veva buca gia, arrivai entras la vegnida dalla biblioteca da Decurtins. Insumma, arrivai ein fetg paucs stampats e quei mo novs. Partenent ils manuscrets, eis ei vegniu in bien ton, mo buca tuts quels ch'ein indicai ella Crestomazia ed ella «Historia della litteratura romontscha» da Decurtins sco «en miu possess». Era quels che pader Baseli veva empristau per diever dalla Crestomazia ein buca tuts turnai puspei en claustra.

Quei hai jeu cartiu da stuer dir, buca ch'ins creigi aunc in di, pader Baseli hagi schau ir a piarder da quei ch'ins stuessi atgnamein encuir en sia biblioteca. Constatond quei, vi jeu da l'autra vart buc inculpar Decurtins, u ses artavels, essend che sur sia biblioteca eis el staus signur e patrun. Mo jeu hai stuiu dir il sura, essend che ins crei generalmein, che tut quei che Decurtins possedevi en cudasch e manuserets sesanfli en claustra.

La davosa gronda satisfacziun, che pader Baseli ha giu cun sia biblioteca, ei stau 1930 all'occasiun dil Congress romanistic a Mustér, nua che circa 100 romanists ord tuttas parts dil mund han visitau la biblioteca romontscha ed undrau cun tutta duida stema sia gronda e bial'ovra patriotica e culturala. «Sas, – ha el detg l'auter di a mi – quella sincera renconuschientscha paga sufficientamein la lavur da tschunconta onns!»

Co sedi ei aschi bein en «Dreizehnlinde» da W. Weber:

Zärtlich wird der Schatz betrachtet,  
Mit bescheidnem Stolz gepriesen,  
Und als Klosterhort dem fremden  
Schrifterfahrnen Mann gewiesen.

Aschiditg che la Biblioteca romontscha da Mustér vegn ad exister, vegn il num da pader Baseli Berther a restar ligiaus cun quella – e quei ei franc e segir in monument aschi honorific sco quels ell’umbriva digl ischi a S. Onna.

Dapi sia mort (1931) pertgira pader Ursicin Simeon la Biblioteca romontscha a Mustér. Pader Ursicin ha capiu dapi lu d’augmentar ella per tschunconta ovras engiadinesas ord ils tschentaners 16, 17 e 18. En ses vegls dis demuossa el aunc adina gronda e viva premura per quella biala ierta da pader Baseli e nus giavischein ad el da tut cor ina perfetta cumpletazion dallas ovras engiadinesas, sinaquei che la Biblioteca romontscha da Mustér davanti en cuort la pli gronda e perfetga da tuttas existentes.

En tut cuntegn ella, cumpriu la litteratura sursilvana ed engiadinesa, sco era la schurnalistica e periodica, circa 250 stampats u differents artechels.<sup>38</sup>

## 7. Il cronist e sribent romontsch

«Rimnei las restonzas, sinaquei  
ch’ellas mondien buc a piarder.»  
(Gion 6,12)

Nies pader Baseli ha buca mo rimnau ils scazis e las sontgas reliquias da nossa litteratura romontscha; el ha era festginau da chischenar l’abundonta miass da nossa reha e zun interessanta tradiziun historica e culturala.

Fagend quei, han ni ambizion litterara ni caprezis scientifics sfurzau la plema en siu pesont e precaut maunun, mobein – e sulettamein – pura carezia per siu car pievel e ses per davons. Pader Baseli era ni historicher intuitiv, ni specialist en metoda, mo nuotatonmeins ei quei ch’el ha scret tut ver e statteivel e flada l’olma ed il spért da nossa tiara e da nos per davons. Sia forza ei quella da cronist ed essayist dalla cultura popula-ra romontscha, oravontut dalla tuatschina. El scriva buca per tarlischar ed era buca per guder la musica ed il ritmus da si’atgna viarva. El scriva per raquintar caussas veras, per delectar, instruir e per plantar en ils cors da ses lecturs la ver’amur-patria. Sia plema ei concisa e concreta, mo essend empalada dalla carezia per tiara e pievel, eis ella ni stetga ni da ruina, mobein viva, schebein ruasseivlamein culonta e clara, sco l’aua da nos reins, cura ch’ei bandunan lur profundas buolas. Pader Baseli ha siu agen stil e tgi che ha enconuschiu el sa dir: Il stil ei igl um! Siu stil flada l’olma populara; el ha empriu da scriver giud la bucca dil pievel; el ha empriu, buca copiau; siu stil ei si’olma.

Las empremas e pli solidas fontaunas per ses studis ei il pievel sez, mo buca senza consultar e controllar las fontaunas screttas e cronicalas, nua che quei ei stau zaco pusseivel. Sia gronda forza ei la historia locala, ch’ei senza dubi la historia dalla patria per mintga carstgaun, ch’ei buca tratgs si denter tschiel e tiara. Legian ins cun attenziun

sias cuortas scrutaziuns cultur-historicas, lu han ins l'impressiun, ch'il savieivel tat da tschels onns raquenti sia segira tradizion neudor davos pegna alla spanegiada tablada, che teidla cun bucca e nas, pertgei che quei ch'el raschuna, enconusch'el da rudien – e sa raquintar.

Quei ch'el sincerescha da sias fontaunas ei vera verdad e sa vegin constatau da scadin ch'ei s'occupaus cun semeglontas lavurs. El di: «Glieud veglia san savens raquintar sco in cudisch ch'igl ei in plascher da tedlar. Ed els raquentan bugen, cunzun cura ch'els sentan ch'ins teidla cun interess. E grad per caussas daditg vargas han els tut auter sentiment, tut autra pietad, che per caussas dil temps niev. Dasperas han els ina memoria aparti per quei da vegl. – Nus havein enconuschiu in um, che saveva numnar igl onn da naschientscha da mintga persuna da siu ualts grond vitg e tier biars aunc dar en il di. E tscheu e leu havein nus entupau frestgas matronas, che savevan dar exact sclarament dalla parentella da pliras generaziuns. Bia ga essan nus stai mal, che nus havein buca dau meglier adatg pli baul sin discurridas da persunas veglias, che raquintavan aschi bugen ed aschi bein da tuttas uisas ord il temps vegl, persunas ch'eran dasperas strusch stadas a scola e che savevan beinduras gnanc scriver, denton raquintar oreifer, ch'ei era in smarvegl.

Pader Baseli scriva denton buca mo per atgna satisfacziun; el scriva era contribuziuns all'historia dalla patria, per animar giuvens scribents da nossa tiara da cultivar l'historia locala, che plaidi schi clar e sincer era ord las meglieras fontaunas screttas: «Sche nus schein suandar cheu entginas, cuortas notizias sur dis commemorativs ella Cadi, en particular sur Mustér, sche daventa quei – nuslein dir quei alla bial'entschatta – per leventar puspei inagada il senn historic per nossas atgnas caussas, per stimular in u l'auter giuven scribent da nossas vischnauncas da rimnar tuttas notizias sur tals e semeglonts eveniments en sia vischnaunca.

Ei dat da questas varts zun bia ed interessant material els divers protocols da pleivs e vischnauncas, en vegls anniversaris ed urbaris, en agendas, diaris e cronicas da famiglia. Dasperas ha mintga vischnaunca sia tradiziun, che glieud veglia rauenta aschi bugen cun pietad e viv sentiment. Avon entginas meins havein nus supplicau in venerabel veteran per entginas notizias sur d'in fatg historic da sia vischnaunca, ed en paucs dis havein nus retschiert ina liunga detagliada risposta, che entscheiva cun ils suandonts bials plaids: «Bugen tarmettel cheu ad Els il giavischau. Ins anfla aschi darar enzatgi che ha interess vid quellas caussas historicas, ch'ei fa in grond bein, cura ch'ins sa puspei inaga seconversar gindlunder...»

Nus essan dalla perschuausin, ch'ei dess strusch enzatgei pli plascheivel e meriteivel per in scribent, che da publicar quellas notizias, u en fuorma d'historia ni cronica, savend che nies pievel romontsch legia strusch enzatgei pli bugen che la historia da si'atgna patria. E cheu ha era la pli cuorta notizia sia valeta, siu interess. Denton essan nus dall'opiniun, che mo in nativ dalla vischnaunca sappi scriver e descriver quei cun la dueivla pietad ed exactedad.»

E plinavon dilucidescha el cun compleina savida la valeta culturala e religiusa dalla historia dil vitg e vallada, sch'el s'exprima sco suonda: «Mintga cuntrada, gie ins sa dir mintga vallada e vischnaunca, ha sper sias usitadas fiastas ecclesiasticas, aunc ses specials dis, che regordan vid in u l'auter eveniment historic dil liug. Plirs da quels dis commemorativs ein svani cul temps en nossas vischnanucas, auters ein semanteni en pia ed effectiva memoria, cunzun quels als quals ins ha dau in caracter religius, ils quals ins ha uniu cun l'oraziun dalla baselgia.

Quels dis commemorativs regordan ils pli biars vid trests eveniments, vid pestilenza, auas grondas, bovas e lavinas, uiaras e barschamenti. Els dattan in agen colorit al liug, els recloman pietad ed engrazievladad enviers ils per davons; els leventan il senn historic per nossas atgnas caussas ed implanteschan quei spért vi sin ina nova generaziun. Ultra da quei vegn ei fatg sin tals dis per ordinari bia bien per las olmas dils disgraziai; ei vegn rugau, che Niessegner vegli pertgirar graziusamein da talas disgrazias e misesrias, pertgei quei ch'ei stau, sa puspei turnar.

Mintga vischnaunca duess perquei mantener e celebrar tals dis, sch'ella ha aunc tals, cun tutta pietad e premura; ei spargnass era d'encurir e celebrar novas fiastas. Ins duess conservar en pietusa memoria loghens, monuments ed isonzas, che regordan vid tals dis, era sch'ei füss mo ina pintga crusch-lenn leu ora sin in crest. Igl ei in toc historia dalla cuntrada.»

Pliras da sias lavurs, per ordinari nuota voluminusas, han pretendiu dad el stedia ed immensa lavur e perseveronza d'avial. Inagada di el sez quei, senza seludar, en «Baselgias, capluttas e spiritualesser da Tujetsch»: «Nossa lavur porscha mo fragments, notizias, cunzun quei che appertegn l'entschatta. Sper nossas lavurs da mintga di, essan nus sedai onns ora tutta breigia per rimnar nossas notizias. Igl ei stau ina tgeua, plascheivla occupaziun. Nus havein encuretg e rimnau nua ch'igl ei mo stau pusseivel. En particular ei quei daventau egl archiv episcopal ed en quel dalla pleiv.»

1. L'emprema lavur cultur-historica, che pader Baseli ha publicau, ei cumparida pér 1896, ed ei aunc oz dil tuttafatg nunenconuschenta, essend cumparida directamein ella Crestomazia Retoromontscha, tom 1, 1896, numnadamein igl idillic maletg cultur-historic da si'ucliva vischinonta, sut il tetel: «**Sas era nua Giuv ei?**» Quei oreifer studi, che ha propi il suer da nies tratsch, la savur da nies paun-casa e la colur ed odur da nossa pli biala flur: dall'amur-patria – han sil pli diesch legiu! Quei deriva da cheu, che la lavur ei cumparida mo ella Crestomazia e cheutras stada satrada. Per quei motiv edin nus ella enten quest Tschespet, essend quella el medem temps il meglier exemplar per in'historia plein olma da nossas pacificas uclivas per part gia svanidas.

2. Quei medem onn (1896) ha pader Baseli aunc publicau ellas Annalas dalla Societad Retoromontscha: «**Il spazzatgamin**», ina cumedia spassusa en treis acts, che ha el decuors dils davos tschun decennis percurriu ton sco tut las tribunas sursilvanas. Il lun-gatg da quella humoristica plein veta e plein sgnoccas ei buns, mo tuttina buca culonts avunda per ina cumedia. Jeu hai mai patertgau da dumandar pader Baseli, schebein quei



Cudischet «Sin Cadruvi»

opus seigi dil tut ses; a mi par'ei, che quella cumedietta seigi mo adattada e per part schizun translatada mo memi exact. – Ultra da quella ha pader Baseli aunc translatau pliras cumerias, che existan aunc en manuscret ella Biblioteca romontscha dalla claustra e ch'ein vegnidas dadas bien a savens!

3. «**Sin Cadruvi**», Reminiscenzas ord la Val Tujetsch, cun illustraziuns da Gion Disch, ei ina lavur cumparida en la stamperia «Union Solothurn» 1904. Quella biala broschura da 32 paginas cuntegn ina partida maletgs culturals cun dessegn, maletgs da rara bellezia e cordialitat: Tgei che vegn risdau sin Cadruvi la dumengia suenter viaspas; tgei ch'il cumpar manegia dallas fieras; dil starler grond dil Tgom; dil Gambun cun sias caultschas cuortas e cassacca blaua e da sia honorifica missiun sco pot dil s. ieli atras l'entira Surselva, da Cuera entochen Tujetsch; dallas stialas da latg, ch'ein e restan in unicum da nossa tiara. Cun in plaid: «*Sin Cadruvi*» muossa propri la fatscha da dumengias e quella da luverdis d'in sempel e ventireivel pievel puril e da ses tips ils pli originals e characteristics.

4. «**Selva avon 100 onns**» 1909. Stamperia da G. Condrau, Mustér. Notizias cultur-historicas ord la Val Tujetsch. Quei studi, screts cun sentiment e capientzcha per las cruschs e miserias d'in periclitau pievelet muntagnard, tradescha il bien cor digl autur ed il ver sentir cun il pievel. Tgei meisterila descripzion dalla cuntrada, dalla buna glieudetta da Selva e Tschamut, da lur lavurs ed isonzas, da lur temas ed anguoschas da lur prighels e sgarschurs! Co el caracterisescha ils differents caplons e scolasts, ils purs e lur dunnauns e lur far e demanar en casa ed en baselgia, sil funs ed en nuegl. E lu la descripzion dalla sgarscheivla lavina da Selva dils 12/13 da december 1808, che ha en in amen tschuncanau la veta a 25 persunas! – «*Selva avon 100 onns*» cuntegn ina partida scenas e maletgs, che udessen els cudischs da scola!

5. «**Il Cumin dalla Cadi da 1656 e mistral Giachen Berchter**» Stamperia G. Condrau, 1911. In niev document per la historia dalla Cadi cun notizias. – Anno 1911 ei nies meglier drama sursilvan: «Clau Maissen, da pader Maurus Carnot, cumparius; ina cumeria che ha senza dubi fatg grond furore. Ina dallas scenas las pli dramaticas da quel ei il mument, nua che mistral Giachen Martin Berchter taglia las bullas papalas sin public cumin avon la spessa tschentada. Quella calumnia historica steva dis ed onns ella

«Synopsis» dalla claustra, sco era en sia «Cuorta Memoria». Insumma, mistral Giachen Martin Berchter, vegneva mess neu sco temerari inimitg dalla claustra da Mustér. Tenor quellas duas «fontaunas» han lu pli tard dr. Casper Decurtins en siu «Landrehter Nikolaus Maissen», ed il davos pader Maurus Carnot en siu enconuschent drama «Clau Maissen» medemamein mess neu Giachen Martin Berchter per in um empau da bein ed in adversari dalla claustra. Anno 1909 anfla pader Baseli finalmein in vegl e zun impurtont document partenent quell'affera politica e fa stampar quel exactamein tenor il manuscret original. Entras questa publicaziun sa pader Baseli mussar si clar e bein, «che tut quei ch'era vegniu pretendiu e palesau davart mistral Giachen Berchter ed il cumin d'anno 1656 ei buca ver.» Anzi, ei semuossa «che mistral Giachen Berchter ei adina staus in bien amitg e fautur dalla claustra e che las bullas dad Urban VII ed Innocenz X seigien gnanc stadas sin cumin.» Gnanc idea, che Giachen Martin Berchter hagi tagliau en tocs quellas. Pader Baseli muossa ultra da quei, ch'il mistral calumniau seigi buca, sco la Synopsis e Cuorta Memoria pretendan, vegnius en miseria, pupira e dishonur, anzi, ch'el seigi vivius ses davos onns en bunas, u silmeins buca schliatas relaziuns finanzialas, epi morts sco officier e bien cristifideivel a Valencia en Spagna, honoraus e respectaus da tuts.

Ultra da quell'apologia e vera historia dil cumin, secattan sper las interessantas notizias davart la veglia schlatteina Berther era aunc marvegliusas menziuns sur da duas outras marcantas persunalitads sursilvanas, numnadamein sur il domdecan Mattias Sgier e landrehter Clau Maissen. All'ovra poetica da pader Maurus Carnot ha quella publicaziun fatg negin donn, e la finfinala ha quella era buca smesau ils merets da dr. Casper Decurtins per nossa historia e cultura romontscha. Pader Baseli ha denton historicamein victorisau, e cheutras ein las relaziuns denter pader Baseli e dr. Casper Decurtins buca daventadas pli amicablas che quei ch'ellas eran gia da gliez temps.

6. Anno 1916, amiez l'uiara mundiala, cumparan, a caschun ch'il carezau zenn grond da Mustér era sefess, las zun interessantas ed originalmein screttas: **«Notizias sur ils zennis da S. Gions a Mustér»**, che han contribuiu essenzialmein alla erecziun d'in bi zenn grond niev, ch'ei aunc oz la luschezia da Mustér. Quella rarissima broschuretta da mo 16 paginas, stada cumparida gliez onn ella Gasetta Romontscha en fuorma dad artechels, dat ina stupenta e propri exacta e concisa historia da nos zennis da Mustér, da lur dis da legria e tristezia, naven da 1338 entochen sil di dad oz. Cun quest studi ha pader Baseli conquistau tut ils cors dils vischins da Mustér.

Il bi success da questa broschura ha animau el da porscher treis ulteriurs maletgs culturals or la historia da nies car Mustér.

7. Igl onn 1919 cumpara la marvegliusa e zun carina historietta da **«Sontga Catrina a Mustér»** la pli mudesta e singulara capluttetta denter las quendisch baselgias e capluttas sil territori da Mustér. La historia da questa caplutta privata ei raquintada en ton biala maniera, che gl'entir Mustér ha survegniu tschaffen e carezia pil bufatg tempelet sper la punt al pei dil Muntatsch. El ha era capiu da trer neuden en quei tema l'undreibla historia d'enzacontas famiglias da Mustér (ils Huonders, ils Durgialis etc), aschia che sia valeta per l'historia dallas baselgias e dalla vischnaunca da Mustér ei tuttavia

buca da pintga impurtonza. Era quella lavur ei cumparida all'entschatta en plirs arte-chels dalla «Romontscha», e silsuenter en ina bufatga broschura da 19 paginas.

8. Igl onn 1928 porta a nus il studi: **«Avon onns»**. Dis commemorativs ord l'istoria dalla Cadi. Cumparius all'entschatta medemamein ella «Romontscha» e silsuenter en emperneivla broschuretta da 22 paginas. En quella dilucidescha nies scribent principalein la historia culturala-religiosa da nossas instituziuns e tradiziuns commemorativas, oravontut dalla vischnaunca da Mustér, mo lu er aunc ils pli memorabels dis dallas ulteriuras vischnauncas dalla Cadi, sanctificai e perpetnisai (per part) entras la forza e fervur da nossa baselgia catolica e sias instituziuns pias, ch'ein per la mentalitat e tradizion da nies pievel essenzialmein effectivas e characteristicas.

9. Buca meins originals e bials ei siu davos studi cultur-historic, ch'el dedichescha alla historia dil vitg da Mustér, quei vul dir alla speciala historia dallas pli veglias casas da Mustér: dallas duas casas-cumin, sco era aunc d'enzacontas outras casas vedras: **«Reminiscenzas d'in vegl curant da Mustér»**. (Cumpariu ella Gasetta Romontscha, Mustér 1929; sep. 15 pag.) En quella admirein nus las detagliadas e zun minuziusas enconuschientschas localas, sco era sia gronda carezia per Mustér, sia secunda patria, la patria da sia veta religiosa, dedicada entratgamein a Diu ed alla patria. Buca smarvegl, che gest sur questa lavur ils migeivels radis dil sulegl dalla sera da sia veta resplendan cun in'amicabladad tut speciala.

10. Igl ei denton capeivel, che pader Baseli ha oravontut dedicau ses studis, sias lavurs e scartiras a sia cara Val Tuietsch. Anno 17 cumpara il stupert studi: **«A Camischolas»**, Notizias historicas ord la Val Tujetsch. Quel rauenta a nus en in tun emperneivel e deletgeivel dalla scola da tschels onns, d'avat Gallus de Florin, in dils pli meriteivels prencis dall'epoca barocca dalla claustra da Mustér; dils rehuns da Zarcuns:

Mo ils pli gronds rehuns

Anfl'ins el vitg Zarcuns,

Mu paucas tgèisas, biè clavaus,

In vitg che stat amiez ils praus.

Era ils marcadonts da stiarls ein buc emblidai ed aunc meins mistrals e misterlessas.

Particulara attenziun schenghegia el denton alla preiusissima caplutta gotica da Camischolas, dedicada a s. Onna, sco era al barschament da quei solit vitg puril, ch'ei curdaus en tschendra per la fiesta da s. Placi 1822 e cun el era la gronda part dalla carina capluttetta. Quella scartira cumpeglia 32 paginas.

11. **«Ils Bannerherrs dalla Cadi»**, cun notizias ord la historia dil cumin dalla Cadi. La gronda impurtonza e valeta da questa broschura da 40 paginas, cumparida 1920 en la stamparia «Paradies», Ingenbohl, schai enten l'exacta dilucidazion dall'organisaziun e constituziun dil vegl cumin dalla Cadi. Speciala attenziun dedichescha el denton alla veglissima historia e tradizion dils aschinumnae «Bannerherrs» u bandierels, che vegnevan mintgamai tscherni sin cumins ordinaris ed extraordinaris e tschentai en questa pli undreivla dignitat per mintgamai 6 – 7 onns. Entras questa exacta lavur, che cuntegn era in capitel da tempra plitost polemica en favur dallas veglias bandieras dalla

Cadi, ha pader Baseli, malgrad sia stricta objectivadad, stridau beinenqual magnat da meins gronda impurtonza. Mo il meret buca pign da quei studi ei staus, ch'el ha entras sias scrutaziuns carmelau neunavon, ton sco ord fossa en veta, duas dallas quater bandieras veglias dil cumin dalla Cadi, che parevan gia dad esser daventadas ina preda da miurs e mulauns. Ellas ein ussa restauradas aschi bein sco gl'ei stau pusseivel ed ein vegnidas tratgas ad honur a caschun dalla fiasta centenara dalla Ligia Grischa (1924) a Trun, sco era vinavon en ulteriuras specialas festivitads.

12. Sia pli vasta e minuziosa lavur cultur-historica ha el dedicau allas: «**Baselgias, capluttas e spiritualessor da Tujetsch**». Quella broschura cun sias 70 paginas ei cum-parida 1924, medemamein ad Ingenbohl. Significonts ei il bi motto da quella ord il Cudisch dils proverbis 17,6: La gloria dils affons ein lur per davons! En quels plaids schai atgnamein igl ideal effect, che pader Baseli ha vuliu contonscher cun tut sias lavurs cultur-historicas. En quella stentusa lavur dad onns ed onns, che ha e vegn a mantener valenta stabla per la historia eccleslastica dalla Val Tujetsch, ha pader Baseli presentau a siu car pievel in'oreifra historia, che ha carschentau il respect e la carezia per ses sanctuaris tgiembel pleins d'art e pietad, per sias tredisch baselgias e capluttas, pils tschun son-tgets, sco era per siu venerau spiritualessor, quei vul dir pils spirituals indigens ed jasters, che han funczionau ella val sco plevons, caplons e primissaris ord il 15/16avel tschen-taner entochen sil di dad oz. Tut speciala valur – el senn da solida fontauna e fundament per ulteriuras scrutaziuns – porscha la secunda part dil bein illustrau cudischet, che cuntegn las pli cuortas e necessarias indicaziuns davart ils «Spirituals nativs da Tujetsch».<sup>39</sup> Priu en egl tut quei che pader Baseli ha prestau sco cultur-historicher per sia cara patria tuatschina, per sia secunda patria Mustér e per il cumin dalla Cadi, astgein nus dir: ch'el seigi staus igl exempl d'in capavel historicher local.

Ultra dallas lavurs stampadas, cheu sura cuortamein undradas, ha pader Baseli aunc rim-nau in'entira partida carnets plein notizias historicas sur las vischnauncas da Tujetsch, Medel, Mustér, Sumvitg, Trun, Breil etc., che sesanflan oz en sia biblioteca romontscha. Da cheu deriv'ei era, che quasi tuts ils auturs da lavurs historicas, che pertuccan la Cadi, sefundeschan e citeschan las custeivlas notizias historicas, rimnadas cun tutta premura e carezia dal nunstunclenteivel pader Baseli.

Visitond igl autur da questa biografia per la davosa gada siu car e stimau magister, ha pader Baseli mussau cul det da siu letg anora vi sin sia cruna da cudischs e detg: «Mira, Guglielm, cu jeu sun morts – e quei vegn ad esser en cuort – sas ti, e ti oravontuts, far diever da miu relasch litterari ed historic. Quei ei miu davos giavisch avon ch'ir en fossa. Ti has seschau menar mei sin quella via, ch'ei franc la vera. Ti eis staus miu pli carezau scolar; continuescha sillia medema via. Hagies adina igl ideal avon egl – la finfinala resta tuttina mo quei ch'ins ha fatg pigl ideal – lavura e perseverescha en tut quei che aulza nies pievel e ti vegnas ad esser in di aschi cuntents e satisfatgs sco jeu, che stundel oz sillia sava dalla perpetnadad.»

Comumentaus enta funs miu cor da tonta carezia e beinvuglientscha, hai jeu dumignau ni plaid ni miez sur mias levzas; mo dend il maun ad el per la davosa gada, ha el sen-

tiu e capiu il met lungatg da mi'olma contristada, ed in lev e migeivel surrir ei serasaus sc'in davos radi dil sulegl sur sia fatscha marcanta e tuttina aschi paterna.

## 8. Pader Baseli ed il moviment romontsch

Ei füss buc avunda da far valer, che pader Baseli hagi luvrau pil romontsch mo sco fundatur e fautur dalla biblioteca e sco activ e capavel scribent romontsch. Buca meins gronds ed impurtonts ein ses merets d'haver animau giuvens students a lavur activa el senn dil moviment romontsch.

Pader Baseli udeva tiels scaldai Sursilvans, che han dapi la fundaziun dalla Societad retoromontscha luvrau pil manteniment e per la cultivazion da nies lungatg romontsch. E schebein ch'el ei buca staus padrin dalla valenta feglia romontscha: La Romania, fundada 1894/96, ha el tuttina dalla bial'entschatta envi susteniu ed animau ils giuvnals da quella a buna lavur en favur da nossa cultura romontscha.

Avon mei stat ina brevetta, che pader Baseli ha screet 1896 da Daniev a Gion Cahannes, da gliez temps student a Friburg. Quel veva cumpatg giu orientau pader Baseli en ina brev davart il giuven «Club romontsch» da Friburg: «Carissim! Engraziel grondamein per ils cordials salids ed auguris dil Club romontsch sin Daniev. Era jeu agureschel dacormein tut bien per tgierp ed olma alla carezonta flur grischuna sper la Sarine! Gronda premura ed energia, flammont ardiment e perseveronta curascha els studis, dasperas il bien humor patriarchal grischun. – Quei ei temps che tuornan buca pli, e quei ch'ins mett'en sut direcziun da tals umens, quei resta per veta duronta... Culs pli cordials salids a tuts patriots grischuns. Pader Baseli.»

Leu ils emprems onns che dr. Casper Decurtins publicava sia grond'ovra: la Crestomazia Retoromontscha, era pader Baseli medemamein inflammaus per quella caussa e sosteneva Decurtins, il fundatur dalla Romania, nua ch'el saveva e pudeva; oravontut entras metter a disposiziun ils scazis da sia reha collecziun manuscreta ella Biblioteca romontscha dalla claustra. Deplorablamein ha ei gia baul suenter la publicaziun dils emprems toms dau differenzas e scarpanzas denter el e Decurtins e quei en emprema lingia per via da custeivels manuscrets, che pader Baseli haveva empristau a Decurtins e che lez turnentava mai. Tuts ha el insumma mai pli survegniu anavos – e quei ei stau la raschun, che pader Baseli ha buca pli luvrau culla Romania e siu fundatur. Pader Baseli era in bibliotecar exact e punctual; malreguladadads e negligentschas en quella direcziun saveva el strusch pli perdunar, numdir emblidar.

Da cheu deriva ei, che pader Baseli ha publicau tut sias scartiras, deno quellas egl emprem tom dalla Crestomazia, sin agen quen e resca – e ch'el ha insumma mai contribui ina solia lavur agl «Ischi», igl organ dalla Romania; era pli tard buc, che professer Tuor e dr. Vieli eran redacturs da quel.

Mo ins mass memia lunsch da pretender quei ch'ei veramein stau il cass – che pader Baseli seigi schizun staus encunter Ischi e Romania e ch'el hagi teniu beinenqual giuveng romontsch naven da quella! Perdetga encunter quella tschontscha sa igl autur da

questa lavur dar, ch'ei gia dalla bial'entschatta da sia activitat staus pli u meins en contact cun pader Basel. Aschia scriva el a mi ils 7 da fevrer 1926, suenter che jeu vevel dau part ad el d'haver anflau il text tudestg dalla Canzun da s. Placi e s. Sigisbert, che dateschi dil medem onn dil text romontsch. «Bravo, che Ti has anflau ora quei! Savesses buca grad far sur da quei ina cuorta lavuretta per igl «Ischi»? Quei fuss dad interess per la litteratura romontscha, jeu creiel che dr. Pierer Tuor prendess bugen quei artechel.» Essend aunc schenaus da lezzas uras da far segls ella publicitat e per consequenza ch'ins veva gia emprau da pitgar giu a mi ils corns, avon che quels vevan aunc catschau sciauda, hai jeu lu tralaschau da far quei – mo buca tschessau da luvrar vinavon per nies romontsch sut l'egida dil patern e beinvulgent amity pader Basel.

Jeu level far empau sco el e publicar in'atgna «Revista periodica» romontscha. El era buc encunter e sco emprema publicaziun havevel jeu pinau la «Historia dalla schurnalistica sursilvana», ed autras caussas. La lavur era gia en stampa, che miu «malfatg» ei schluppaus ora. – Cheu ein ins currius tier pader Basel, sinaquei ch'el retegni mei e discussegilassi «quella tuppabad». E tgei scriva el a mi: «... Allura deploreschel ton pli, hael jeu detg; student G. sefutra buca bia da quei e sa era ir sias vias. Hail lu raquintau, che ti hagies in'excellenta lavur sur la schurnalistica sursilvana, che vegni cumparer sin Pastgas. Cheu ei X tut surstaus ed el ha alla fin supplicau mei per Tia addressa... Ier, dumengia, ils 5–2, ei X puspei turnaus tier mei, vegnius alla posta e deplorau zun fetg, che Ti veglies dar ora ina «Periodica»; quei fetschi concurrenza agl Ischi e lavagli la «caussa romontscha». Jeu hael detg: Student G. sa publicar tgei ch'el vul e sut tgei tetel ch'el vul; quei stat liber ad el ed haveis da dir nuot. Vus fageis era quei che plai a Vus! Sco ei para ha X era conferiu cun Y ed ils «umens» ein en tema! – X di, quei duess student G. buca far, e jeu deigi scriver a Ti e converter Tei! Quei deigi el sez far ni grad ir a T. e tschintschar cun Tei; dil reminent stoppi jeu scriver quels dis a Ti e lu vegli jeu far remarcas, denton student G. drovi nuota mes cussegls!... Tgei far? Quei ei naturalmein Tia caussa. – Denton hael tertgau tier memez: Per cass che Ti eis buca ligiaus cun Z, sche savesses Ti dar quella lavur per igl «Ischi» cun las cundiziuns, che Ti sas tschenttar. Aschia vegnesses Ti encunter ad els en fetg nobla moda etc.» (Ord ina brev dils 6-2-1928.)

Fuss pader Basel staus animaus encunter la Romania, havess el mai influenzau mei quell'uisa! Ei dess aunc auters mussaments da sia beinvulentscha enviers Romania ed Ischi, mo ei basta cun quels.

Jeu seregordel d'haver dumandau el inagada: Pertgei el hagi buca collaborau cugl Ischi e sin quei ha el detg: Quei deriva en emprema lingia da discrepanzas e differenzas cun Decurtins e dil reminent fussen mias lavurs da valur aschi mudesta e da caracter aschi local buca stadas adattadas per igl «Ischi». Tut mias raschuns encunter quella remarca ha el buca schau valer.

Suenter 1924 ha era l'ortografia nova vilentau buca pauc pader Basel. En quels graus havein nus giu beinenqual viv disput, ed el teneva sillia «moda veglia» cun cor e dents! – Era mei, giuvens e nunexperimentaus, lev'el far tener vid la «vedra», e biars da ses

arguments eran buns ed entelgeivels. Mo era en quella damonda er'el tuttavia buc il «pugnier» dalla vedra, pil qual el vegneva tenius e perfin in tec temius.

Il mussament persuenter! Jeu seregordel dad haver giu scret ina lavuretta tenor la «vedra». Sin quei vegn la redacziun cun la supplica dad astgar curreger tenor la nova. Tgei far? Jeu scrivel a pader Baseli ed el rispunda da far concessiuns – epi en in'altra brev cuort sissu: «Jeu capeschel zun bein, con grev igl ei iu a Ti da dar suenter; Ti sas denton era cumprender, con vess igl ei iu a mi da dar a Ti quei cussegli, sulettamein il davos motiv en mia brev ha dau la decisiun. Denton igl ei aunc buca sera! Ad interim seigies prudents, tschontscha e scriva pauc sur quella caussa «interna» etc. (Ord ina brev dils 14-2-1928).

Pader Baseli ha lu aunc manifestau enzacontas gadas, scrivend sias davosas lavurs suenter la vedra. Quater onns pli tard eis el morts, mo havess el aunc viviu diesch onns, jeu sundel perschuadius ch'el havess acceptau la nova, pertgei ch'el veseva sez, che l'ortografia sco tala ei ina caussa da cunvegnientscha – e lunschora buca la pli impurtonta da nies moviment romontsch!

Plinavon ha pader Baseli era aunc giu merets dad autra natira, inflammond el ideals giuvens per lavur e prestaziun en favur dil romontsch. En quei grau sai jeu deplorablamein mo quei ch'el ha luvrau vida mei; mo jeu sundel perschuadius ch'el ha impulsau ed animau aunc bia auters. Per el era gie adina la caussa il principal e buca la persuna. Ed ins mass en err da crer, che pader Baseli contonschevi sias finamiras, ses intents e si'influenza mo cun ludems. El saveva criticar e criticava era a scadina caschun, nua ch'el veva raschun; mo adina cun tact e maniera e cun cumpleina beinvuglientscha. Enzacons exempels:

El scriva a mi, cun risguard d'in artechel screts empau da recent: «Tiu artechel ei corrects concernent ils factums, denton empau stagn recents. Nus astgein buca sittar memia «scharf» sin nos camerats, aschiglioc fuijan ei e laian nus persuls. In omnibus caritas!» (20-1-1927).

In'altra gada: «Tia «Guardia dalla Piora» vegn legida bugen ed ins lauda Tiu bien e natural humor en quella lavur. Vivat sequens – forsa in tec pli cuort e cun evitar enqual expressiun plitost vulgara ... Adina nobels ellas expressiuns, cunzun quei che vegn scret e resta. – Tia idea da porscher caussas originalas ed indigenas fuss schon la dretga, mo igl ei pretendiu forsa stagn bia. Nua ir persuenter, ni meglier detg, tgi scriva quellas? Quei drova studi e lavur e natural munglassen talas lavurs vegnir bonificadas etc.» (29-11-1926).

E lu puspei: «Cun special interess hiel legiu Tias duas lavurs: «Cuort contract da mari-daglia» e «Rergurdientschas», che han plaschiu pulit, la secunda in bien ton meglier. Senza dubi vegn il pievel a leger quellas duas lavurs cun gronda satisfacziun. Al «Contract» havess ins forsa saviu dar pli paucs artechels e precisar quels pli exact. Jeu havess schau cumparer Gion e Tina avon lur plevon catolic. Sco Ti fas, ei empau alla moda dils protestants. – Ella secunda lavur havess ins forsa aunc saviu descriver, co il reverendissim signur plevon ha visitau la tatta enqualga e provediu ella; il di dalla sepultura

havess il Gion purtau la crusch dalla tatta – in special tschaffen da biadis e nevs tier augs ed en verdad ina nunemblideivla regurdientscha. – Il dialect da Tujetsch va tscheu e leu empau pei zieg. Cheu havess il tat saviu curreger. – Denton quei ei tut mo causas pintgas, secundaras e subjectivas, che ein vegnidas endamen a mi. Vivant sequentes!»

E lu partenent la secunda annada dil Glogn (1928) en general: «Dil rest par'ei a mi, ch'il Glogn seigi aunc ditg buca sigl ault. – Certas caussas, sco per exempl «La saltunza Laura»<sup>40</sup>, vesess jeu pli bugen buc en in calender catolic. Tgei duein ins emprender ord-lunder? Che mintga mattatscha stoppi haver sias «ferias» – e da far il «botsch», sch'ils geniturs vulan buca conceder? Pilver modern! E lu quella morala negativa quella duess ins duvrar mo darar e tuttavia buca per nies sempel pievel... il lungatg ei tscheu e leu barbarics, cunzun ella «Revista», per exempl «crer vid Diu» etc. – Che las gasettas han purtau nuot san ins buca approbar; quei ei tendenzius e ridicul...» (14-11-1927)

Pader Baseli saveva denton era ludar ed encuraschar sco negin. Sur da quei vi jeu denton quescher. – Bunamein pli nauschs e recents ch'ins sez, vegnev'el denton sentend la malgesta e tendenziusa critica; mo era cheu mitigav'el en sias brevs, repetend beinen-qualga ils plaids: «Per l'amur da Diu, tegn a frein Tiu temprament aduals ad in cavagl plein saung, traso sil precint da siglir sur tuts paricarrs e seivs en... Quei cuosta bein sforz; jeu sai quei memia bein, essend era buca staus da lenn; mo ins sto sedumignar e laguoter... Fai en tals e semeglionts cass adina quei ch'il prudent Franzos di: «Bien faire et laisser dire!» –

Da l'autra vart cussegliava pader Baseli era da sepertgirar da certs amitgs. Da certins crei pauc e fida nuot, schegie ch'ils da Tujetsch dian aunc adina: «Crer bia e fidar pauc!» Ch'el selegrava da mes success e da quels dils giuvens «gagliards» e quei bunamein pli fetg che nusezs ei caussa factica, ch'ins savess documentar cheu entras numerus citats ord sias brevs, mo ei fa da puntuar quella bellezia qualitat da siu niebel caracter.

Che pader Baseli acceptava bugen la meritada undrientscha pertucccont sias prestaziuns pil romontsch ei nuot auter che natural ed endretg. A mintgin il siu – e la renconuschientscha e satisfacziun morala oravontut! Aschia seregrardein nus d'haver undrau el e sia lavur bibliografica en in artechel tudestg cumparius ellas «Monats-Rosen» da 1928, sco era entras dedicar ad el noss'emprema pli gronda lavur, la «Historia della schurnalistica romontsch» (1928). Quellas mudestas enzennas d'engraziament han satisfatg el grondamein. Mo il pli grond plascher ha el giu 1928, cura che jeu hai visitau sia gronda biblioteca, cun ils scolars romontschs dalla scola cantunala. Havend annunziau nossa viseta, scriva el tut beaus e cuntents: «Tia brev cun Tia biala idea patriotica ha fatg grond plascher a mi e respect a tals giuvens. Els ein tuts cordialmein vegni. Sulettamein astgan els buca spetgar memia bia. Tut ei gie aschi pign e bufatg e muncativ, sco Ti sas bein avunda. Denton tut stat en Vossa disposiziun ed era mia paucudad, sulettamein cun la condizion, che Ti ditgies buc in sulet plaid sur mia personalidad. Ti has da quelles varts fatg daditg schon memia bia, che jeu meretel tuttavia buc» (24-10-1928). – Nus havein lu fatg la viseta e mes scolars da lezzas uras han profitau lundergiu; quei ei

stau in bi di, che buc in dils presents vegn ad haver emblidau. Gl'auter di, suenter nossa viseta, havend engraziau per sia stupenta hospitalitat e per siu cuort referat davart sia biblioteca, scriva el a mi: «Engrziel grondamein per Tia preziada, cordiala brev. Ei havess tuttavia buca fatg basegns d'engraziar a mi persuenter; Ti sas gie, che jeu hai fatg bugen quei pign survetsch, gia arisguard igl intent dalla caussa romontscha e lu era pervia da Tei e Tes prezai scolars. Ei fa plascher, sch'ils scolars han profitau enzatgei ed han priu cun els ina emperneivla impressiun e memoria da nossa cara claustra. Il meret per tut sas Ti metter en sac.» (30-10-1928).

Aschia fuva il bien pader; perfin ses pli agens merets capeva el da parter cun da quels che vevan paucs ni insumma negins! Buca da sesmarveglier, ch'in um aschi ideal ha capiu d'inflammar bein enqual giuven per il grond ideal da nossa cultura romontscha e catolica.

## 9. Il poet

Che pader Baseli füssi era «poet» ils pli paucs che san. La raccolta, che jeu hai fatg denter siu relasch litterari, dat denton perdetga, ch'el ha era emprau da mesirar il ritmus e da schar ruclar la rema. Nus havein enconuscentamein in bi diember poetins e poetus – e pader Baseli auda ni tiels ins ni tiels auters. El era buca poet da professiun e sequintava era buca denter lezs; dil reminent ha el nuotatonmeins dau beinenqual empruada; e denter sias tipicas poesias d'occasiun sesanfla enqualina ch'ei aunc gartegiada buca mal; cunzun quellas cun cuntegn satiric e satiric-politic. Quei füss stau ina

forza naturala, ch'el havess franc aunc pudiu sviluppar, mo el schaze-giava buca bia si'aveina poetica, ed ha perquei era buca fatg canera cun sias poesias, ch'el publicava tschels onns anonim ella «Gasetta» e «Calender».

Era sias poesias da cuntegn religius ein buca senza valeta, schebein che la tempra lirica era buca sia forza. Las otras – schubramein poesias d'occasiun – ston ins prender per talas ed audan perquei buca sut ils dents dalla critica. Las biaras han insumma plitost valeta cronicala-historica.

Cheu astgein nus era buc emblidar da far menziun da sias savieivlas e prudentas criticas davart las ovras



Pader Baseli

romontschas, che cumparevan mintgamai ella Gasetta Romontscha da 1890 entochen viden els anno 1910. El scriveva quellas sut l'enzenna (X) e teneva ellas el senn da «Cronica romontscha». D'encurir anflassen ins aunc ulteriurs interessants artechels da sia plema ella Gasetta Romontscha, essend el adina staus in bien e beinvlulent amitg dil redactur da lezzas uras: Signur mistral G. G. Condrau.

Tgi che ha legiu attentamein questa biografia sa, che pader Baseli Berther ha luvrau e barhau per tuts bials e stabels ideals da nossa tiara e nies lungatg, entochen ch'il sulegl da sia veta ei ius da rendiu.

La mort da ses fargliuns, cunzun la mort da siu frar original e sacerdotal, sur Tumaisch, ha sfraccau sias forzas, essend el adina – er aunc sco pader – in attaschau e bien frar da ses fargliuns e parents. Ed igl ei stau sco sche siu davos frar havess detg ad el: «Nos geniturs e tuts tes fargliuns ein uss i a casa; neu era ti sco il pli davos; ti has ussa luvrau, pitiu e secret avunda.»

Ussa ruaussa si'ossa el pign santeri claustral e spetga sil di dalla levada; sias ovras denton e ses ideals vegnan a viver vinavon, per plascher e deletg a tuts buns Romontschs, che han aunc in cor che batta per il bi ed immortal da nossa cara tiara romontscha.<sup>41</sup>

### Remarcas

<sup>1</sup> Mira pader Baseli Berther: Sas era nua Giuv ei? Crestomazia Retoromontscha I, 721.

<sup>2</sup> Mira Glogn 1944

<sup>3</sup> Mira dr. Karl Hägler: Anthropologische Studie über die Bewohner des Tavetsch 1941.

<sup>4</sup> Mira Guglielm Gadola, † sur Tumaisch Berther, necrolog, Glogn 1932.

<sup>5</sup> Partenent la fiera da Ligiaun da 1858 eis ei vegniu raquintau a pader Baseli: «Tschuncont'onns sun-del jeu staus la fiera da Ligiaun, mo dad ina schi miserabla sco uonn saiel jeu aunc mai seregurdar. Ins ha vendiu danter auter 8 pulits vadials per 13 marenghins e miez ensemes, 20 mutgs per 6 marenghins il pèr, in Glarunes 4 vaccas per 26 marenghins ed in quart e sia davosa vacca stuiu scugliar navan per 50.– frs. Plirs marcadonts havevan gnanc smesau lur roschas a Ligiaun, biars ein vargai giu ed – il vargar giu Ligiaun ei adina ina mala; auters eran intenziunai da schar leu lur biestga tochen la fiera Numnasongta.» (Mira «A Camischolas» da pader Baseli Berther)

<sup>6</sup> Mira pader Baseli Berther: Selva avon 100 onns

<sup>7</sup> Ina sia «Canzun cantada silla Comedia da Rueras dils 5 d'avrel» sesanfla ella Biblioteca romontscha da Mustér e dat perdetga da siu bien lungatg ed aunc megliera scartira.

<sup>8</sup> Pli bia mira Guglielm Gadola, Historia della schurnalistica sursilvana, Ischi XXI pag. 49

<sup>9</sup> Pareglia per ex. «Refutaziun dil concept tucont tier ils Jesuits» Extrafeegl da nr. 10 (1845) dil «Confederau Grischun» che sesanfla mo ella Biblioteca claustral.

<sup>10</sup> «Il Ramonsch» (I) 1845 uost – 1848 december; «Amitg dil Pievel» (II) schaner 1849 – december 1856, e suenter la «Gasetta Romontscha» 1857 da Daniev, che ha teniu la dira entochen oz.

<sup>11</sup> Cont Montalembert ei il renomau scribent, historicher e schurnalist catolic digl «Univers», che ha fatg historia en Frontscha.

<sup>12</sup> Mira il «Ramonsch» (II), quel dils Latours, ch'ei vegnius fundaus oravontut per la defensiu dalla scola reunida e che ha luvrau per quei intent cun success digl uost 1850 – il december 1852.

<sup>13</sup> Mira «Amitg dil Pievel» (II): «Era in plaid sulla uniu Dallas scolas cantunalas», nr. 27, 1849: «La damonda sull'uniu Dallas scolas cantunalas avon il Cussegl Grond» nr. 29, 1849, ed auters plirs avon e suenter.

<sup>14</sup> Plidau e protestau encunter l'uniun, scadin d'in auter pugn da vesta anora, han aunc cun Schmed: Peterelli, Landr. dr. Vieli, Condrau, Depuoz e Ferrari; ferton che 8 deputai catolics, capitani Latour e

sias umbrivas: a Marca, Schenardi, Ronca, Marcatoli, Albrici, Engler e Frick han votau per la fusiun.

<sup>15</sup> 1877/78, il semester d'unviern, era siu frar Tumaisch staus senior da quella; da lezzas uras dumbrava la secziun Eistettensis varga 20 Svizzers e 1880/81 aunc da pli! (Mira: Monats-Rosen, 1877/78, pag. 56 /57).

<sup>16</sup> Il passus che suonda ei ina biala perdetga, ch'il prefect da Mustér era tuttavia mudests, essend ch'el dumandava schizun ses giuvnals per plaid e cussegli en damondas, ch'il pader saveva buca giudicar aschi obiectivamein da sia cella anora.

<sup>17</sup> Che pader Baseli cultivava cun predilecziun il priedi, cunzun ils emprems onns da pader, muossa in interessant carnet, nua ch'el ha fatg notizias sur mintga priedi romontsch, ch'ei vegnius tenius en claustra da 1885 – 1890. En quel anflein nus notificai cuortamein ils predicaturs, il cuntregn dils priedis e sias observaziuns e remarcas sur da quels, che tradeschan tuttas igl intent d'emprender da min-tgin enzatgei. Quellas custeivlas notizias representan gia oz sc'ina cronica dalla veta e pratica reli-giusa dils paders e pres dil contuorn.

<sup>18</sup> Pér da cuort ha il renconuschiu historicher, pader Iso Müller dalla claustra da Mustér, publicau ina tala lavur el Monatsblatt.

<sup>19</sup> Mira: Decurtins, Crestomazia tom IV. pag. 670 e ss. – Jeu hai midau ses plaids ella ortografia hodierna.

<sup>20</sup> Mira: Decurtins, Crestomazia tom IV. pag. 708 e ss: Mussaments co leger, scriver e raschunar en moda romontscha.

<sup>21</sup> Liug citau pag. 710.

<sup>22</sup> Liug citau pag. 710 – 712.

<sup>23</sup> Liug citau pag. 710.

<sup>24</sup> Liug citau pag. 712

<sup>25</sup> Liug citau pag. 673.

<sup>26</sup> Mira pader Basli Berther, Baselgias, Capluttas e Spirituals da Tujetsch, pag. 37.

<sup>27</sup> Cun pilras caschuns ha pader Iso Müller, historicher hodiern dalla claustra da Mustér, mussau, ch'igl archiv e la biblioteca da Mustér erien buc aschi gronds sco ins carteui. Mo partenen il romontsch savein nus tuttina constatar, che la biblioteca dalla claustra era la pli gronda e completa collezioni da stampats sursilvans ed engiadines.

<sup>28</sup> Sur pader Baseli Carigiet e siu temps hai jeu scret ina monografia, che vegn a comparer in di.

<sup>29</sup> Jeu allegheschel cheu mo enzacons representants: pader Beat Ludescher, pader Maurus Rothmund, pader Sigisbert Frisch, pader Adalbert Baselgia, pader Maurus Carnot e pader Ursicin Simeon.

<sup>30</sup> Mira: Reminiscenzas d'in vegl curant da Mustér. Separat Gasetta Romontsch 1929, pag. 6.

<sup>31</sup> Il text da quella ei il sequent: «Lichtenthal bei Baden-Baden, 11.X.1886. Geehrter Herr, Sie haben mir durch Ihren lieben Brief und das beiliegende Verzeichnis eine ganz ausserordentliche Freude bereitet, für die ich Ihnen recht herzlich danke. Es ist der späte Lohn für redliche Bemühung, wenn man sieht, dass andere in gleichem Sinne weiterarbeiten und was man geschafft hat, verbessern und ergänzen. Ihr sauberes Accessionsverzeichnis ist musterhaft. Treue im Kleinen, die das Evangelium verlangt, ist auch in weltlichen Dingen Erfordernis, und Sie sind ihm hier bestens nachgekommen. Sobald ich wieder einen Nachtrag von Raetica drucken lasse, werde ich Ihren Beitrag mit dankbarer Nennung aufnehmen. Honorar zahlt der Buchhändler für diese Publikationen keines, wir müssen aus Liebe zur Sache arbeiten. Wenn ich den nächsten Nachtrag in Druck gebe, frage ich noch einmal an, ob Sie weitere Notizen hinzuzufügen haben. Ich kaufe gern was in meinem Verzeichnis nicht steht. Um Veröffentlichungen von 1885 und flg., deren Verzeichnung mir auch fernerhin sehr erwünscht sein wird, bitte ich Sie, was den Ankauf betrifft, sich nicht bemühen zu wollen. Alles frühere, das ich nicht habe, werde ich, wenn Sie es für mich zu angemessenem Preis erwerben können, mit Freuden aus Ihren Händen doppelt willkommen heissen. Insbesondere die katholische Literatur ist nirgendwo so zahlreich vertreten wie in meiner Sammlung, deren stetes Zusammenbleiben in einer öffentlichen Bibliothek ja nun gesichert ist; ich hoffe: wer da hat, dem wird gegeben, dass er die Fülle habe. In Ihrer Klosterbibliothek ist so gut wie nichts von rätischer Literatur... und jetzt noch zu versuchen, eine rätische Sammlung dort anzulegen, die ohnehin niemals Aussicht hätte, vollständig zu werden, wäre nicht verständig. Was ich sammle, wird einst alles in der Kgl. Bibliothek in Berlin dem Publikum benutzbar sein. Ist nicht alles käuflich, was Sie mir verzeichnet haben? Auch pader B. Carigiet hat sich bemüht, meine Sammlung zu bereichern. Was macht pader Giustinian Lombardin im Münsterthal? Ich habe lange nichts mehr von ihm gehört. Ich hatte ihm einen Verleger verschafft für sein Wörterbuch, aber der Pater zog das schon eingesandte Manuscript zurück, um es zu vervollkommen.

Ich fürchte, das Bessere ist der Feind des Guten geworden, und das Publikum bekommt gar nichts. – Ich rechne auf gütige weitere Mitteilung, auch über den Kostenpunkt. Nennen Sie mir bitte, wo möglich, bestimmte Forderungen für bestimmte Stücke oder grössere Partien oder alles von Ihnen verzeichnete, und wir werden bald Fühlung miteinander hahen. – Mit warmem Dank für Ihre Güte und in dem freudigen Bewusstsein gemeinschaftlicher Bestrebungen Ihr aufrichtig ergebener Ed. Böhmer.

<sup>32</sup> Quella brev secloma: «Lichtenthal bei Baden-Baden, 16.IX.1887. Hochgeehrter Herr, meinen angelegentlichen Dank für gütige Zusendung Ihrer neuesten Ergänzungen und Berichtigungen. Sie sind zum Bibliographen und Bibliothekar geboren. Möge Ihnen neben Ihren wichtigen Obliegenheiten genug Zeit zur Sammlung rätoromanischer Schriften bleiben! Dass Ihnen die Druckbogen zugehen, wenn ich weitere Nachträge drucken lasse, wird sich rnachen lassen. Ich kann aber jetzt nichts in die Druckerei geben, bis ein Artikel über Spanisches fertig ist... Des vielen Rätischen in meinen Studien werden manche Abonnenten, die sich mehr für anderes interessieren, schon etwas müde. Ich bringe aber doch einiges im nächsten Heft... Ich hoffe, Sie finden noch wieder einiges, das Sie mir zum Tausch anbieten können. Ich habe noch manches von Ihnen angestrichen, das ich Ihnen senden kann... Ed. Böhmer.

<sup>33</sup> Mira brevs e quen dils 3, 27 e 28 d'october 1894.

<sup>34</sup> Mira: Biblioteca romontscha: Brevs, registers da desiderata e da dublettas da Candreia e pader Baseli Berther: 1) 15.XI.1891; 2) 24.I.1893; 3) 8.II.1893; 4) 3.III.1893; 5) 10.III.1893; 6) 15.III.1893; 7) 12.IV.1893; 8) 16.IV.1893; 9) 21.IV.1893; 10) 4.II.1894; 11) 6.XII.1906 e 4 – 5 ulteriurs registers da dublettas senza datum.

<sup>35</sup> Mira brev dils 9 da december 1930, Biblioteca romontscha Mustér.

<sup>36</sup> Jeu hai già sesprau da cumplenir beinenqual giavisch dil bien pader Baseli; era quel ei ussa realisau: Mira Glogn 1939; mo da realisar tuts, havess ei num veginr fetg vegls ed haver in idealissem senza cunfins.

<sup>37</sup> Mira: Ein Rundgang durch die rom. Bibliotheken. Monats-Rosen 1928 Nr. 12.

<sup>38</sup> Oz ei la Biblioteca cantonal («Retica») bunamein aschi completa sco quella dalla claustra da Mustér. Quei ei denton nuota da far curvien. Ferton che pader Baseli ha saviu entscheiver a rimnar per igl onn 1883, veva il cantun già luvräu onns ora avon e per l'autra ha professer Candreia (il pli premu-rau e meriteivel bibliotecar cantunal che nus havein giu) giu aunc pli favoreivlas caschuns che il pader senza raps. Per l'ina veva el rimmaders ord igl entir Grischun romontsch e per l'autra neidis e bials marenghins, ina calamita che pader Baseli ha mai possediu per quei intent duront ils 50 onns ch'el ha rimnau e mess en salv. – Sut il successur da professer Candreia alla biblioteca cantonalha ei dau ina mala digren enten rimnar litteratura romontscha. Possi igl anim grond da professer Candreia puspei reviver per dacheudenvi!

<sup>39</sup> En tuttas questiuns da renovaziuns e restauraziuns da lur baselgias e capluttas han ils Tuatschins adina ed oravontut priu plaid e cussegli cun pader Baseli. Perdetga da quei dattan numerus brevs ord Tujetsch, che pertuccan quei tema e che sesanflan ella Biblioteca dalla claustra da Mustér.

<sup>40</sup> Ei setracta cheu d'ina translaziun, cumparida en Glogn II, igl onn avon ch'igl autur da questa biografia surprendi il Glogn. Contribuiu vevel jeu già als dus emprems, mo buca cun translaziuns.

<sup>41</sup> Questa biografia havein nus entschiet a scriver miez uost a Cuera en tutta calira e finiu ils 25 da settember ella neiv e ferdaglia da Beiva, al pei da Gelgia e Set.

# Poesias

## Poesias religiusas

### Nadal

(Sut il pigniel)

*A Bethlehem ei oz naschiu,  
En stalla freida, schi munglus,  
In pign affon, il Fegl da Diu,  
A buns affons schi beinvegnius.*

*Ah, con pupratschs el vesa o!  
Sto fom e seit gia uss pitir,  
Zugliaus en stratscha nauscha mo,  
Dil freid el bein pudess bargir.*

*Per tgi sto'l endirar schizun?  
Pertgei aschi pupratschs schon uss?  
Quei tut per ils puccaus dil mund  
E per carezi'encunter nus.*

*Ad el nus oz lein engraziar  
Per tut il bien a nus purtau;  
Pietus affons nus lein restar  
E far tut quei ch'el ha mussau.  
O Jesus, car Bambin,  
Po gida oz scadin!*

### Jeu endirel er cun tei !

(Per Nadal)

*Tgei quintar e tgei studiar,  
Tgei miserias, tgei dolurs,  
Tgei pitir e tgei cridar  
Dat ei bein uonn pils purs!*

*Gia ils onns che ein vargai  
Han schi pauc a nus purschiu,  
Plein speranza essan stai,  
Mo uonn aunc pli falliu.*

*Stermentusas aultas neivs  
Han curclau en cuolms e vals,  
Han sfraccau en tetgs e seivs  
Caschunau er plirs gronds mals.*

*Endirar han bein stuiu  
Paupers tiers rentai en nuegl;  
Primaver'ha mai vuliu  
Cumparer avon nies egl.*

*Il solegl ha strusch dau cauld;  
Plievgias, bischas fetg daried,  
Er purginas freidas baul  
Schon avon ch'haver priu fretg.*

*Truffels, quasi tut il graun  
Sut la neiv stuiu cavar;  
Cuts, putrius havein il paun,  
Truffels marschs stuein magliar.*

*Schliatas fieras, nuot gudogn,  
Pauc dad alp, pign pagament –  
Ein las tunas onn per onn –  
Gie, al pur ei fa sterment!*

*Ah, bien Segner, tgei trests onns!  
Deivets biars tier aunc pitir,  
Sez ils paupers, pigns affons  
Ston cun nus er quei suffrir.*

*Gia daditg havein plirau,  
Plans, progress ed aunc inschign,  
Bia studiau e tgei gidau?  
vein miserias senza fin!*

*Ah, miu car, tgei vul cun quei?  
Tgei pomai vul daventar? –  
In Signur dei bein ord tei  
Tut enin'il Segner far?*

*Uarda leu il car Bambin!  
Ha schi freid, sto scher sil strom,  
Emblidaus da finadin  
Lez endira seit e fom!*

*Tgi ei quei, o di a mi,  
Mira, tiu Salvador s'ei.  
Schi carin el di a ti:  
Jeu endirel er cun tei!*

(GR nr. 51, 1888)

**Nies auguri**  
(Per Daniev)

*Bien di, bien onn, dai nus biemaun  
Resun'puspei danovamein.  
Ord mellis cors vegn da tutz mauns  
Auguris oz en tgiembel plein.*

*Con bia vegn bein er giavischau,  
Che glisch mai vesa cheu;  
Con bia cun bucca implorau,  
Ch'jeu mass ni vi ni neu.*

*Con biaras brevs vegn ei tarmess,  
Pachets e chistas fullanau,  
E con schi sogn aunc empermess,  
Sil qual ei vegn schi vess spitgau.*

*A reh e pauper, grond e pign,  
Mo in giavisch jeu less purtar,  
Cuntents cun quel sei po scadin:  
Segner! Tia veglia lai nus far!*

(GR nr. 1, 1892)

## Venderdis sogn

(Sut la crusch)

*Cheu mira tiu Salvader  
Co'l penda plein en saung!  
Spir plagas siu cadaver,  
Furaus tras pei e maun.*

*Con gronds ei il puccau,  
Che tontas peinas, crusch,  
Al Segner ha purtau?  
Carstgaun semegl'el strusch!*

*Tgei l'olma ha custau,  
Cun larmas suspirond,  
Cun cor oz endriclau,  
Po mira, o puccont!*

*La mort ha'l endirau,  
Per tei e mei spindrar  
Da peina e puccau,  
Nus tiel salit gidar.*

*O tgei carezia bein  
D'in Diu encunter nus!  
O tgei ventira vein,  
Ch'el ei per nus vegnius!*

*Ah, Segner dai a mi,  
Ch'jeu mieri al puccau,  
Ed audi lu a Ti,  
Da Tei schi car cumprau.*

*Navos vi jeu turnar  
Restar vi er cun Tei;  
E «Pastgas» celebrar:  
O Jesus gida mei!*

(GR nr. 14, 1887)

## Pastgas

*Pastgas, fiasta da legria,  
La victoria sur tut mal!  
Salidaus po sei adina  
Quei grazius sogn temps pascal.*

*Tschien e mellis vuschs oz laudan,  
Giubileschan cauldamein  
Bein per tut il mund fideivel  
Sur dil Segner triumf cumplein.*

*Ah, co er'il mund en tema,  
Plein tristezia, turbelaus,  
Cur che quel che dat la veta  
Ah, en foss'en stratschs zugliaus.*

*Tier la fossa cumbrigiadas  
Vegnan prest las treis dunnauns,  
Per mirar aunc ina gada  
Lur Signur, bitschar ses mauns.*

*Balsamar cun specerias  
Siu sogn tgierp ei lur giavisch,  
Mo il crap, tgi pren navenda? –  
Uarda leu tgei clara glisch!*

*Sin il crap cheu ses'in aunghel  
Da vart dretga; siu vestgiu  
Alvs sco neiv en plein clarezia,  
Sia fatscha sco burniu.*

*«Buc temei, dunnauns pietusas,  
Quel che vus tschercheis uss cheu,  
Ei levaus ord fossa stgira,  
Ils mantials sulets ein leu.*

*Mei, nunziei uss la levada,  
Schei: La foss'ha returnau  
Sia preda; sur la freida  
Mort ha'l tschut victorisau.»*

*Ed udend quei las fideivlas,  
Tut naven ei la dolur,  
Gaudan bein legria gronda,  
Laud a Diu per la favur.*

*Melli onns e puspei melli  
Ein stuli dapi quei di,  
Mo canzun aunc oz medema  
Da nos cors en Diu uni.*

*Tschentaner rapport'a l'auter  
Il salid schi carezaus  
Da schlatteina a schlatteina:  
Co il Segner ei levaus.*

*Era nus honur lein render,  
Selegrar, canzuns cantar:  
Co il Segner ei ord fossa  
Oz levaus per nus salvar.*

*(GR nr. 13, 1893)*

### **Il di dallas olmas**

*Profund e sogn ruaus  
Leu regia sut las cruschs;  
Ins aud'plirond las vuschs  
Pil scazi leu zuppaus.*

*Ei rump'il cor a mi  
Vesend en ner schi biars,  
Che pliran per lur cars,  
Da nus schi spert sparti.*

*Con trest'ei bein la mort!  
Dolurs gia a scadin  
E larmas senza fin  
Prepara quella sort.*

*Cu larmas ent'ils egls,  
Cheu tuornan tons affons  
Quei di gia onns ed onns,  
Per l'olma da nos vegls.*

*Ah, cars! nu'essas bein?  
El sogn parvis leu si?  
Cons pliran oz aschi?  
O Diu, con grev nus vein!*

*Po lai uss tiu bargir!  
Almosnas, communiuns,  
Ferventas oraziuns  
Per ellas sas unfrir.*

*Ah, lai uss tiu plirar!  
Uarda leu la crusch,  
Che di cun clara vusch:  
Sin seveser miu car!*

*(GR nr. 43, 1887)*

## Poesias satiricas

### Patratgs dil Toni da scuas mond tschei di tras Mustér

(Cun caschun ch'igl ei vegniu teniu in cuors  
da mussar da cuschinar a Mustér)

Ah! paupers buns maluns,  
Bizochels, tagliarins,  
Schi cars a nos babuns.

Naven ston ussa ils capuns,  
Flutgets e fermentins,  
Entochen ussa stai schi buns.

Adia, veschlas, gnocs,  
Patlaunas, hosis, spitgs,  
Ch'han fatg schi ferms nos pops.

Svanir sto al progress  
Cuschina sempla, pintga,  
Custass ei tgei ch'e less.

Pertgei tedlei: da cuschinar  
A nus vegn uss mussau,  
E co barsar e co turschar!

Co cuschinar dat uss da far,  
Ferton che mumma scheva:  
«Vess mo zatgei da preparar!»

Panadas, bien barsau,  
Fortems sco a Paris  
Sil meglier preparau.

Piziultas, biscutins,  
Schi neidis e schi bials,  
Tastgets cun fidulins.

Sas ver uss suenter gust  
Tgei gianter che ti vul.  
Tgei viver! Safermust!

Progress oz pir che mai,  
Tgei schessen bein nos vegls?  
Ei fussen tut surstai.

E lu, tgi vess spetgau, pilver!  
Er'vin tier nus vegn fatg,  
Numnaus da nobel: «Vin-Mustér!»

Butteglias vi, butteglias neu,  
Schigei il tgietschen, lu igl alv!  
Ah car! ei porta buca neu.

Suera bein stagn fetg  
Dad iuas aschas sper ils mirs,  
Gnanc bien avon ch'ir a letg.

Fuss aunc da dir sul sevestgir  
Da certa glieud tier nus,  
Mo oz sin quei vi buc vegnir.

Progress da di en di,  
E deivets pir che mai,  
Ah car! – tgei vul dapli?

(Zercladur 1887)

### **La malsogna dil Toni**

*Biars onns gia erel cheu  
Tut trests e contristaus,  
Jeu mavel tscheu el leu,  
Negliu cumplein ruaus.*

*La Mengia, con savens  
Ha ella bein plunschiu:  
Tgei has pomai dadens?  
Mo dir hai mai vuliu.*

*Las cauras dapertut  
Vegnevan da scadin  
Signur squitschadas sut –  
Perdun strusch deva in.*

*Naven ston ellas franc,  
Tuts grevan, tgi en scret  
E tgi cun plaids, e gnanc  
Restar pli duess el spért.*

*Quei era aura sut!  
Nos gronds e pigns signurs  
Ston ver il nas en tut,  
Per donn dils paupers purs.*

*Perfin a Bern, tedlei!  
Nos babs han rut il tgau,  
Co bein dismetter quei –  
Savein pilver pign grau.*

*Las cauras maglian giu  
uauls e fan grond donn;  
Naven per l'amur da Diu!  
Gnanc lenn in auter onn.*

*Nos vegls nuot han capiu,  
Stai tgaus da strom, uardei!  
Han tontas cauras giu –  
Con tschecs nus essan – hei!*

*Fetg biars capevan pauc,  
Strusch nossas cauras viu,  
Aunc meins il buc digl aug  
Martin culs corns engiu.*

*Bein trest pil pauper pur,  
Tgei senza cauras far?  
Mirond el temps futur  
Tgei po a mauns pigliar?*

*Co far caffe, cumars?  
Co dar puschegn agl um?  
Mo ner uss cun vinars –  
Tgei tresta sort dil mund!*

*E lu quei bien magnuc  
Tier truffels ensalai;  
Mai pli, o pauper gnuc,  
Deis uss schigiar da quei.*

*E cun il zart caschiel  
Svanir ston ils caluns  
E buna carn d'ansiel:  
Fatal per nos maguns.*

*Aschi er'eit urdiu  
Da tgaus ualtri gross;  
Denton igl ei falliu,  
Vein giu agid dils nos.*

*Las cauras dein restar  
Tener stuein uss bials bucs  
E meglier cun els far,  
Ils vegls ein stai stagn lucs.*

*Aschi ei sin cumin  
Dad in stau proponiu,  
Tedlau ha quei mintgin  
E taffer susteniu.*

*E lu tgei grond'honur,  
Per mei pli dultsch che mèl,  
Ei stau uonn pil pur  
Leu o a Neuschatel!*

*Exposiziuns sei stau,  
Ils premis suenter gust  
Han cauras remportau.  
Tgei laud uss! Safermust!*

*Dil schliet nuot aud'ins pli,  
Las cauras han lur dretg.  
Cul Toni sei uss bien,  
Ussa auters han pli stretg!*

(CR 1888)

### **Salid e giavisch dil Toni pigl onn 1893**

*Biaars onns vai uss entuorn viagiau  
Da temps d'unviern bein vitg per vitg,  
Tier reh e pauper vai spluntau,  
Priu si han mei sco bien amitg.*

*En miu bufatg e grisch vestgiu  
Hai raquintau da tuttas sorts;  
Al pievel nies hai bein vuliu,  
Sin mendas fatg attents per sforz.*

*Jeu tuornel oz, miu car, puspei;  
fetg bialas caussas, tut apart,  
Rimnau hai jeu sulet per tei;  
Jeu spetg denton sin tiu risguard.*

*Con bia ei semidau quels onns  
En nossas vals e vitgs perfin!  
Perderts daventan pigns e gronds,  
En buorsa raps uss ha scadin.*

*Ord tuts mugrins vegn uss progress.  
Tut niev, tut bien port'ozildi  
Snueivel traffic, gronds commers;  
Speronza strusch gareg'dapli.*

*Tut sai er pli u meins capir,  
Il temps stulescha e nus cun el.  
Mo ina caussa stoi oz dir:  
Quei ir naven mi fa smarvegl!*

*Glieud giuvna a casa strusch han plaz,  
En tiaras jastras uss ei van,  
Sc'ei fuss en auters logs sulaz  
Il viver, stagl debat e span.*

*Marcaus e bass'enqueran si,  
Pagaglias grondas, pauc da far,  
La detta zarta, bein vestgi,  
Daners avunda – fan quitar.*

*Tier nus lavuran buc bugen,  
Schegie ch'igl ei camond da Diu;  
Naven ei van, mo fai persenn,  
Sc'ei fuss affons dil fegl perdiu.*

*Curios denton quei par'a mi,  
Enstagl navon navos nus mein,  
Daners daven pertai il pli,  
Enstagl navos sin carga plein.*

*E fas il quen, patratgas tez,  
Ord gl'jester aunc lu auter vegn,  
Che porta donn tier nus stagl nez;  
Ludar tut jester strusch cunvegn.*

*Sco vegl e bien amitg dil pur  
Hai ditg studiau tgei giavischar;  
Uss teidl'ils plaids che fan honur:  
Luvrar, spargnar, a casa star!*

(CR 1893)

### Ils 15 da matg 1887

*Hasper:*

*Toni! Ussa naven vinars,  
Naven cul fessli, naven butschin,  
La ruina d'aschi biars –  
Naven cul pudel, naven glasin!*

*Toni:*

*O jeu sun leds, ch'ei vegni car,  
Quei alcohol, che cuosta francs,  
Ed ei dasperas in da rar,  
Che vala gnanc dus raps.  
Sche ins savess co'l vegn barschaus,  
Ord tgei triaccas fabricaus,  
Pilver – in stess naven,  
Spargnas al venter barschament.*

*Hasper:*

*Havein nus raps danvonz,  
Sche buein nus in glasin  
Dunsauna sco ils perdavons,  
E lu surtut, in glas ord Valtalin! –  
Toni! nus votein «gie» dumengia.  
Neve, cuntent'ei er la Mengia?*

(GR nr. 19, 1887)

## Poesias d'occasiun

### Gratulaziun per Daniev 1887

*Legreivel bien niev onn  
A pauper, pign e grond:  
Ventira sin tuts mauns  
A vitgs ed ad uclauns!*

*Tgei porta bein a nus  
Tgei porscha bein a vus,  
Igl onn che nus spetgein,  
Encunter qual nus mein?*

*Legria e tut bien?  
Ventira il dubel tschien?  
Tgi sa, tgei ch'ei vegn?  
Igl ei per nus in legn!*

*Ah, forsa tresta sort,  
Uiara, paupradad,  
Miserias, cruschs, la mort!  
Tgi sa, tgei gl'onn nus dat!*

*Ah, lai il dumandar  
Regord'en tut tiu far:  
Nus vein leu si, tscheu giu  
In car e schi bien Diu!*

(GR nr. 5, 1886)

### Per la fiasta da s. Anselm

(Declamau da student Giusep Venzin sco  
gratulaziun al pader prefect)

*Ventira e benedicziun  
Sin fiasta gronda bein!  
Legria e consolaziun  
Oz dar ad Els nuslein.*

*Nuslein rugar che sogn Anselm  
Mantegni Els en buna sanadad  
E meini Els cun nus el ver Salem,  
Per leu guder perpetna beedadad.*

*Da nus cordial engraziament  
Per tut il bien e grond quitau,  
Da Diu il dubel pagament!  
En num dils mes, sco deputau.*

(21-4-1887)

**Per il giubileum sacerdotal da 50 onns  
da sia sontgadad Papa Leo XIII  
ils 31 da decembre 1887**

*Pertut resuna uss*

*Legria, laud, honur,*

*Segir sin fiasta muoss'*

*Quei ves'il sempel pur.*

*Da tuttas varts dil mund*

*Salids e deputai,*

*A Ruma uss cunzun;*

*Tgei fiasta sei pomai?*

*Gie, fiasta sei pilver;*

*Ei sto nos cors alzar,*

*E far a nus plascher,*

*Affons d'in bab schi car.*

*Nies Leo, nies bien bab,*

*Oz va sin igl altar,*

*En aulta dignitad,*

*Per giubileum far.*

*Tschunconta onns fa el*

*La sontga mess'a Diu,*

*Unfresch'il saung de quel,*

*Dil qual el ei l'unschiu.*

*Raschun segir havein,*

*Dad el oz gratular,*

*Nies cor danovamein*

*Per el er'inflammars.*

*Nies Leo, schi glorijs,*

*Sil grep da Pieder stat,*

*Schi franc, schi valerus,*

*Malgrad diversitat.*

*Da potentats gia onns  
Sbittaus e maltractaus;  
Dals buns e vers affons  
Ton pli uss carezaus.*

*Quei muossan aschi clar  
Auguris senza fin,  
Regals da mintga vart,  
Da China gie perfin.*

*E tgeilein nus bein dar,  
Naziun pupratscha zun,  
Luvrar, semudergiar,  
Nuot auter vein sil mund?*

*Savein negin schenghetg  
Uss porscher a nies bab,  
Per celebrar endretg  
Cun el solemnidad?*

*Ah, bein nus vein zatgei:  
Carezia, oraziun!  
Sco buns affons oz quei  
Purschein cun devoziun.*

*Pil bien nus engraziein  
Al bab schi celebraus,  
Tut bien nus agurein  
Al venerabel cau.*

*Fin seigi als cumbats,  
Victori'al Vatican  
E pasch als potentats,  
Ch'al bab legria fan.*

*Al papa tut agid  
Dal tschiel oz abundant!  
Po vivi Leo ditg,  
Success Dieus detti grond!*

(GR nr. 52 1887)

**Per il giubileum episcopal da 50 onns  
da sia sontgadad Leo XIII  
ils 19 da fevrer 1983**

*Salid, ti steila en stgiraglia,  
Salid, migeivel protectur!  
Exempel niebel en battaglia  
En plaid e secret nies defensur.*

*Glorius ha nus saviu defender  
Sc'in liun en forz'e tafradaad;  
Honur e laudlein render  
Al cau en plein carinada.*

*Tschunconta onns ual oz orneschan  
Cun mitr'e stab nies Bab sublim.  
Cons cors pertut oz giubileschan  
Da tes fideivels senza fin.*

*Ti glisch da tschiel a nus surdada  
El temps dad uss furius, stemprau,  
Baselgia aunc en triumf'alzada  
Survivies po, Bab carezau.*

Al nieveligiu avat  
della venerabla claustra da Mustér  
sia grazia reverendissima  
**Benedetg II Prevost**

*Bials salids cun benedicziun,  
Exprimi cun plein legria,  
Nus purschein sco gratulaziun.  
En Lur nova dignitat  
Detti Dieus prosperitad,  
E conservi «Nossa Casa»  
Tras ils mauns da nos patrunz  
Grad sco'l temps da nos babuns.*

*Ah, schi ditg stuui spetgar  
Von che fiasta celebrar!  
Ah, selegra uss Cadi,  
Ti has oz in di schi bi!*

(GR nr. 16, 1888)

Al reverendissim ed illustrissim  
monsignur uestg **Gion Fidel Battaglia**  
per la fiasta da sia consecraziun  
ils 31 de mars 1889

*Bials auguris al niev cau!  
Agl entir uestgiu oz consecraus,  
Tschentaus sco prem schuldau!  
Tras battaglias tier victoria,  
Animai, armai tras Tei,  
Gida po Tes cars affons!  
Libertad e pasch cul stat,  
Ils affons uniun cul Bab,  
Anavon tras biars bials onns!  
  
Urregiar lein sut la crusch,  
E per Tei alzar la vusch.  
Surengiu la benedicziun  
Trer nus lein cull'oraziun,  
Giubilond cul car unschlu!*

(GR nr. 13, 1889)

**Canzun cantada sin la Cumedia da Rueras**  
**ils 5 d'avrel 1836**  
(Da assistent Schmed, tat da pader Baseli  
Berther)

*Seigies beinvegni cheu oz tier nus,  
Tuts pigns e gronds, signurs e purs,  
Nus essan cheu aviartamein,  
Secumpari perinamein:  
Vivi vus, vivi nus, vivi Diu cun nus,  
Vivi la giuventetgna!*

*Per demussar divertiment  
Che duei esser legherment,  
Vegn persentau ina cumedia  
Ch'ei plitost ina tragedia:  
Vivi vus, vivi nus, vivi era Diu cun nus,  
Vivi nos babuns!*

*Selegrì pia nossa patria,  
Che giuventetgna aschi patratga  
Da divertir e praticar,  
Co ins duei viver e semussar:  
Vivi vus, vivi nus, vivi era Diu cun nus,  
Vivi nossa patria!*

*Ei avon Diu ed al mund  
Mai stau cuntrari e schizun,  
Rugheien pia tuts adina,  
Ch'el vegli cun nus la grazia sia  
Vus gidar, nus gidar,  
e da tut mal schurmegiar,  
Vivi nossa val!*

*Dein pia a nos geniturs  
Obedientscha, respect e honur  
Ils geniturs e superiurs,  
cultiveschien lur inferiurs:  
Vivi vus, vivi nus, vivi nos superiurs,  
Vivi nos geniturs!*

*Tener quels en regla e vigilar  
Ed era bien exempl dar,  
Ils spirituals e nos pasturs  
Sprezeien mai, dein tutt'honur:  
Vivi vus, vivi nus, vivi Diu cun nus,  
Vivi nos spirituals!*

*Era buca meins nos confessurs,  
Che tilan nus ord ils errurs,  
La lur cordiala admoniziun  
Suendeien cun attenziun:  
Vivi vus, vivi nus, vivi era Diu cun nus,  
Quel conservi ils confessurs!*

*Con ventireivels pia lura  
Essan nus sil mund mintg'ura,  
Ed enten tschiel guess vegnir,  
Cun ils beai leu Diu survir:  
Vivi vus, vivi nus, vivi era Diu cun nus,  
Culs beai leu Diu survir!*

*Maria vegli impetrar  
Che nus pudeien leu legrar;  
Sogn Giachen nies gloriuss patrun  
Schurmegi nus cheu sin quest mund:  
Gidi vus, gidi nus, seigies adina cun nus,  
Salideien nos sogns patruns!*